


〔重刊訂正本〕

中國醫學大成

錢若利題



〔重刊訂正本〕

# 中國醫學大成

上海科學技術出版社

中國醫學大成（全套共五十冊）

上海科學技術出版社出版

（上海瑞金二路四五〇號）

新華書店上海發行所發行

上海市印刷十廠印刷

開本七八七×一〇九二

三十二開

精裝

總字數二二,七九〇,〇〇〇

總印張八六二

一九九〇年六月第一版 一九九〇年六月第一次印刷





## 重刊訂正《中國醫學大成》序

《中國醫學大成》一書，我鄉先輩四明曹炳章先生所輯集，爲發揚中醫學，保存古醫籍，以饗同道並惠後學作也。曹氏纂集是書時，正值西學東漸，國內淺見倖進之徒，競尙浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤

其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內

容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有之巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則、方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之

年，未嘗釋卷；葉香岩以不讀破萬卷，不敢輕言醫。茲二人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於  
上海中醫學院

〔清〕 尤在涇 集註

金匱要略心典

中國醫學大成

## 金匱要略心典提要

清、尤怡撰。怡字在涇。吳縣人。雍正十年。徐靈胎序刊。徐序云。金匱要略。正仲景治雜病之方書也。其方亦不必盡出仲景。乃歷聖相傳之經方也。仲景則匯集成書。而以己意出入焉耳。何以明之。如卷首括蘘桂枝湯。乃桂枝加括蘘也。然不曰桂枝加括蘘湯。而曰括蘘桂枝湯。則知古方本有此名也。卷六桂枝加龍骨牡蠣湯。即桂枝加龍骨牡蠣也。乃不別名何湯。而曰桂枝加龍骨牡蠣湯。則知桂枝湯爲古方。而龍骨牡蠣爲仲景所加者也。諸如此類。不可勝舉。因知古聖治病方法。其可考者。惟此二書。真所謂經方之祖。可與靈素並稱。苟有心於斯道。其可舍此不講乎云云。在涇自序云。余讀仲景書者數矣。心有所得。輒筆諸簡端。以爲他日考驗學問之地。非敢舉以註是書也。日月既深。十已得其七八。而未克遂竟其緒。丙午秋日。抱病齋居。勉謝人事。因取金匱舊本。重加尋繹。其未經筆記者補之。其記而未盡善者復改之。覃精研思。務求當於古人之心而後已。而其間深文奧義。有通之而無可通者。則闕之。其係傳寫之誤者。則擬正之。其或類後人續入者。則刪

汰之。斷其臟腑經絡以下。終於婦人雜病。凡二十有二篇。釐爲上中下三卷。仍宋林億之舊也。集旣成。顏曰心典。謂以吾心求古人之心。而得其典要云爾。在涇別有醫學讀書記。刊在本集第十三醫論中。傷寒貫珠集。刊在第六外感病類。茲并記之。



## 徐序

今之稱醫宗者。則曰四大家。首仲景。次河間。次東垣。次丹谿。且曰仲景專於傷寒。自有明以來。莫有易其言者也。然竊嘗考神農著本草以後。神聖輩出。立君臣佐使之制。分大小奇偶之宜。於是不稱藥而稱方。如內經中所載半夏、秫米等數方。是已。迨商而有伊尹湯液之說。大抵湯劑之法。至商而盛。非自伊尹始也。若扁倉諸公。皆長於禁方。而其書又不克傳。惟仲景則獨祖經方而集其大成。遠接軒皇。近兼衆氏。當時著書垂教。必非一種。其存者有金匱要略及傷寒論兩書。當宋以前。本合爲一。自林億等校刊。遂分爲兩焉。夫傷寒乃諸病之一病耳。仲景獨著一書者。因傷寒變證多端。誤治者衆。故尤加意。其自敘可見矣。且傷寒論中一百十三方。皆自雜病方中檢入。而傷寒之方。又無不可以治雜病。仲景書具在。燎如也。若三家之書。雖各有發明。其去仲景相懸。不可以道里計。四家並稱。已屬不倫。況云仲景專於傷寒乎。嗚呼。是尙得爲讀仲景之書者乎。金匱要略正仲景治雜病之方書也。其方亦不必盡出仲景。乃歷聖相傳之經方也。仲景則匯集成書而以

己意出入焉耳。何以明之。如首卷括樓桂枝湯。乃桂枝加括樓也。然不曰桂枝加括樓湯。而曰括樓桂枝湯。則知古方本有此名也。六卷桂枝加龍骨牡蠣湯。即桂枝加龍骨牡蠣也。乃不別名何湯。而曰桂枝加龍骨牡蠣湯。則知桂枝湯爲古方。而龍骨牡蠣。則仲景所加者也。如此類者。不可勝舉。因知古聖治病方法。其可考者。惟此兩書。真所謂經方之祖。可與靈素並垂者。苟有心於斯道。可舍此不講乎。說者又曰。古方不可以治今病。執仲景之方。以治今之病。鮮效而多害。此則尤足歎者。仲景之方。猶百鈞之弩也。如其中的一舉貫革。如不中的。弓勁矢疾。去的彌遠。乃射者不恨己之不能審的。而恨弓強之不可以命中。不亦異乎。其有審病。雖是藥稍加減。又不驗者。則古今之本草殊也。詳本草。惟神農本經爲得藥之正性。古方用藥。悉本於是。晉唐以後諸人。各以私意加入。至張潔古輩出。而影響依附。互相辨駁。反失本草之正傳。後人遵用不易。所以每投輒拒。古方不可以治今病。遂爲信然。嗟乎。天地猶此天地。人物猶此人物。若人氣薄。則物性亦薄。豈有人今而藥獨古也。故欲用仲景之方者。必先學古窮經。辨症知藥。而後可以從事。尤君在涇。博雅之士也。自少卽喜學此藝。凡有施治。悉本仲景。輒得奇中。居恆歎古學

之益衰。知斯理之將墜。因取金匱要略。發揮正義。朝勤夕思。窮微極本。凡十易寒暑而後成。其間條理通達。指歸明顯。辭不必煩。而意已盡。語不必深。而旨已傳。雖此書之奧妙不可窮際。而由此以進。雖入仲景之室無難也。尤君與余有同好。屬爲敘。余讀尤君之書。而重有感也。故舉平日所嘗論說者。識於端。尤君所以註此書之意。亦謂是乎。

雍正十年壬子陽月松陵徐大椿敘

# 自序

金匱要略者。漢張仲景所著。爲醫方之祖。而治雜病之宗也。其方約而多驗。其文簡而難通。唐宋以來。註釋闕如。明興之後。始有起而論之者。迄於今。乃不下數十家。莫不精求深討。用以發蒙而解惑。然而性高明者。泛鶩遠引。以曲逞其說。而其失則爲浮。守矩矱者。尋行數墨。而畏盡其辭。而其失則爲隘。是隘與浮者。雖所趣不同。而其失則一也。余讀仲景書者數矣。心有所得。輒筆諸簡端。以爲他日考驗學問之地。非敢舉以註是書也。日月既深。十已得其七八。而未克遂竟其緒。丙午秋日。抱病齋居。勉謝人事。因取金匱舊本。重加尋繹。其未經筆記者。補之。其記而未盡善者。復改之。覃精研思。務求當於古人之心而後已。而其間深文奧義。有通之而無可通者。則闕之。其係傳寫之誤者。則擬正之。其或類後人續入者。則刪汰之。斷自臟腑經絡之下。終於婦人雜病。凡二十有二篇。釐爲上中下三卷。仍宋林億之舊也。集既成。顏曰心典。謂以吾心求古人之心。而得其典要云爾。雖然。劉氏援龍。宋人刻楮。力盡心靡。要歸罔用。余之是注。安知其不仍失之浮。卽失之隘也。

耶。世有哲人。箴予闕失而賜之教焉。則予之幸也。雍正己酉春日。飲鶴山人尤怡題於北郭之樹下小軒。

# 金匱要略心典目錄

## 卷上

臟腑經絡先後病脈證第	一
一……	一
痙濕喝病脈證治第二……	一三
百合狐惑陰陽毒病證治	
第三……	二七
瘧病脈證并治第四……	三六
中風歷節病脈證并治第	
五……	四一
血痺虛勞病脈證并治第	
六……	五一

## 卷中

肺痿肺癰欬嗽上氣病脈	
證治第七……	六一
奔豚氣病脈證治第八……	一
胸痺心痛短氣病脈證治	
第九……	四
腹滿寒疝宿食病脈證并	
治第十……	一〇
五臟風寒積聚病脈證治	
第十一……	二二
痰飲欬嗽病脈證治第十	

二·····	三〇
消渴小便不利淋病脈證	
治第十三·····	四七
水氣病脈證并治第十四·····	五四

卷下

黃疸病脈證并治第十五·····	一
驚悸吐衄下血胸滿瘀血	
病證并治第十六·····	二
嘔吐噦下利病脈證治第	
十七·····	一八
瘡癰腸癰浸淫病脈證并	
治第十八·····	三八
跌蹶手指臂腫轉筋狐疝	

虻蟲病脈證治第十九·····	四二
婦人妊娠病脈證治第二	
十·····	四六
婦人產後病脈證治第二	
十一·····	五三
婦人雜病脈證并治第二	
十二·····	六〇



# 金匱要略心典

漢 南陽 張 機 仲景原著  
清 吳門 尤 怡 在涇集註  
鄞縣 曹赤電 炳章 圈校

## 卷上

### 臟腑經絡先後病脈證第一

問曰。上工治未病。何也。師曰。夫治未病者。見肝之病。知肝傳脾。當先實脾。四季脾王。不受邪。即勿補之。中工不曉相傳。見肝之病。不解實脾。惟治肝也。夫肝之病。補用酸。助用焦苦。益用甘味之藥調之。酸入肝。焦苦入心。甘入脾。脾能傷腎。腎氣微弱。則水不行。水不行。則心火氣盛。則傷肺。肺被傷。則金氣不行。金氣不行。則肝氣盛。則肝自愈。此治肝補脾之要妙也。肝虛則用此法。實則不在用之。經曰。虛虛實實。補不足。損有餘。是其義也。餘臟準此。

按素問云。邪氣之客於身也。以勝相加。肝應木而勝脾土。以是知肝病當傳脾也。實脾者。助令氣王。使不受邪。所謂治未病也。設不知而徒治其肝。則肝病未已。脾病復起。豈上工之事哉。肝之病補用酸者。肝不足則益之以其本味也。與內經以辛補之之說不同。然肝以陰臟而含生氣。以辛補者。所以助其用。補用酸者。所以益其體。言雖異而理各當也。助用苦焦者。千金所謂心王則氣感於肝也。益用甘味之藥調之者。越人所謂損其肝者緩其中也。酸入肝以下十五句。疑非仲景原文。類後人謬添註脚。編書者誤收之也。蓋仲景治肝補脾之要在脾實而不受肝邪。非補脾以傷腎。縱火以刑金之謂。果爾則是所全者少。而所傷者反多也。且脾得補而肺將自旺。腎受傷必虛及其子。何制金強木之有哉。細按語意。見肝之病以下九句。是答上工治未病之辭。補用酸三句。乃別出肝虛正治之法。觀下文云。肝虛則用此法。實則不在用之。可以見矣。蓋臟病惟虛者受之。而實者不受。臟邪惟實則能傳。而虛則不傳。故治肝實者。先實脾土以杜滋蔓之禍。治肝虛者。直補本官。以防外侮之端。此仲景虛實並舉之要旨也。後人不察肝病緩中之理。謬執甘先入脾之語。遂略酸與焦苦。而獨於甘味

曲窮其說。以爲是卽治肝補脾之要妙。昔賢云。誠辭知其所蔽。此之謂耶。夫人稟五常。因風氣而生長。風氣雖能生萬物。亦能害萬物。如水能浮舟。亦能覆舟。若五藏元真通暢。人卽安和。客氣邪風。中人多死。千般疾難。不越三條。一者經絡受邪入藏府。爲內所因也。二者四肢九竅。血脈相傳。壅塞不通。爲外皮膚所中也。三者房室金刃蟲獸所傷。以此詳之。病由都盡。若人能盡慎。不令邪風干忤經絡。適中經絡。未流傳府藏。卽醫治之。四肢纔覺重滯。卽導引吐納。鍼灸膏摩。勿令九竅閉塞。更能無犯王法。禽獸災傷。房室勿令竭乏。服食節其冷熱。苦酸辛甘。不遺形體有衰。病則無由入其腠理。腠者。是三焦通會元真之處。理者。是皮膚藏府之文理也。

人稟陰陽五行之常。而其生其長。則實由風與氣。蓋非八風。則無以動盪而協和。非六氣。則無以變易而長養。然有正氣。卽有客氣。有和風。卽有邪風。其生物害物。並出一機。如浮舟覆舟。總爲一水。故得其和。則爲正氣。失其和。卽爲客氣。得其正。則爲和風。失其正。卽爲邪風。其生物有力。則其害物亦有力。所以中人多死。然風有輕重。病有淺深。約而言之。不越三條。一者邪從經絡入藏府而深。

爲內所因。二者邪在四肢九竅皮膚。沿流血脈而淺。爲外所因。三者病從王法房室金刃蟲獸而生。爲不內外因。所謂病之由也。人於此慎養。不令邪風異氣干忤經絡。則無病。適入經絡。未入藏府。可汗吐或和解而愈。所謂醫治之也。此應前內因一段。若風氣外侵四肢。將及九竅。卽吐納導引以行其氣。鍼灸膏摩以逐其邪。則重滯通快。而閉塞無由。此應前外因一段。更能不犯王法禽獸。則形體不傷。又雖有房室。而不令竭乏。則精神不敝。此應前房室一段。腠理云者。謂凡病糾纏於身。不止經絡血脈。勢必充溢腠理。故必慎之。使無由入。腠者。三焦與骨節相貫之處。此神氣所往來。故曰元真通會。理者。合皮膚藏府。內外皆有其理。細而不紊。故曰文理。仲景此論。以風氣中人爲主。故以經絡入藏府者。爲深爲內。自皮膚流血脈者。爲淺爲外。若房室金刃蟲獸所傷。則非客氣邪風中人之比。與經絡藏府無干涉者。爲不內外因也。氏節徐

按陳無擇三因方。以六淫邪氣所觸爲外因。五藏情志所感爲內因。飲食房室跌撲金刃所傷。爲不內外因。蓋仲景之論。以客氣邪風爲主。故不從內傷外感爲內外。而以經絡藏府爲內外。如徐氏所云是也。無擇合天人表裏立論。故以

病從外來者爲外因。從內生者爲內因。其不從邪氣情志所生者。爲不內外因。亦最明晰。雖與仲景並傳可也。

問曰。病人有氣色見於面部。願聞其說。師曰。鼻頭色青。腹中痛。苦冷者死。鼻頭色微黑者。有水氣。色黃者。胸上有寒。色白者。亡血也。設微赤。非時者死。其目正圓者。瘕不治。又色青爲痛。色黑爲勞。色赤爲風。色黃者便難。色鮮明者有留飲。

此氣色之辨。所謂望而知之者也。鼻頭。脾之部。青。肝之色。腹中痛者。土受木賊也。冷則陽亡而寒水助邪。故死。腎者主水。黑。水之色。脾負而腎氣勝之。故有水氣。色黃者面黃也。其病在脾。脾病則生飲。故胸上有寒。寒。寒飲也。色白亦面白也。亡血者不華於色。故白。血亡則陽不可更越。設微赤而非火令之時。其爲虛陽上泛無疑。故死。目正圓者。陰之絕也。瘕爲風強病。陰絕陽強。故不治。痛則血凝泣而不流。故色青。勞則傷腎。故色黑。經云。腎虛者面如漆柴也。風爲陽邪。故色赤。脾病則不運。故便難。色鮮明者有留飲。經云。水病人目下有臥蠶。面目鮮澤也。

師曰。病人語聲寂寂然喜驚呼者。骨節間病。語聲喑喑然不徹者。心膈間病。語聲

啾啾然細而長者。頭中病。

語聲寂寂然喜驚呼者。病在腎肝。爲筋髓寒而痛時作也。啞啞然不徹者。病在心肺。則氣道塞而音不彰也。啾啾然細而長者。痛在頭中。則聲不敢揚。而胸膈氣道自如。故雖細而仍長也。此音聲之辨。聞而知之者也。然殊未備。學者一隅三反可矣。

師曰。息搖肩者。心中堅。息引胸中上氣者。欬。息張口短氣者。肺痿吐沫。

心中堅者。氣實而出入阻。故息則搖肩。欬者。氣逆而肺失降。則息引胸中上氣。肺痿吐沫者。氣傷而布息難。則張口短氣。此因病而害於氣者也。

師曰。吸而微數。其病在中焦實也。當下之則愈。虛者不治。在上焦者。其吸促。在下焦者。其吸遠。此皆難治。呼吸動搖振振者。不治。

息兼呼吸而言。吸則專言入氣也。中焦實。則氣之入者。不得下行。故吸微數。數猶促也。下之則實去。氣通而愈。若不係實而係虛。則爲無根失守之氣。頃將自散。故曰不治。或云中焦實而元氣虛者。既不任受攻下。而又不能自和。故不治。亦通。其實在上焦者。氣不得入而輒還。則吸促。促猶短也。實在下焦者。氣欲歸

而不驟及則吸遠。遠猶長也。上下二病。並關藏氣。非若中焦之實。可從下而去者。故曰難治。呼吸動搖振振者。氣盛而形衰。不能居矣。故亦不治。

師曰。寸口脈動者。因其王時而動。假令肝王色青。四時各隨其色。肝色青而反色白。非其時色脈。皆當病。

王時。時至而氣王。脈乘之而動。而色亦應之。如肝王於春。脈弦而色青。此其常也。推之四時。無不皆然。若色當青而反白。爲非其時而有其色。不特肝病。肺亦當病矣。犯其王氣故也。故曰色脈皆當病。

問曰。有未至而至。有至而不至。有至而太過。何謂也。師曰。冬至之後。甲子夜半少陽起。少陽之時。陽始生。天得溫和。以未得甲子。天因溫和。此爲未至而至也。以得甲子而天未溫和。爲至而不至也。以得甲子而天大寒不解。此爲至而不去也。以得甲子而天溫如盛夏五六月時。此爲至而太過也。

上之至謂時至。下之至謂氣至。蓋時有常數而不移。氣無定刻而或遷也。冬至之後甲子。謂冬至後六十日也。蓋古造歷者。以十一月甲子朔夜半冬至爲歷元。依此推之。則冬至後六十日。當復得甲子。而氣盈朔虛。每歲遞遷。於是至日



不必皆值甲子。當以冬至後六十日花甲一周。正當雨水之候爲正。雨水者。冰雪解散而爲雨水。天氣溫和之始也。云少陽起者。陽方起而出地。陽始生者。陽始盛而生物。非冬至一陽初生之謂也。竊嘗論之矣。夏至一陰生。而後有小暑。大暑。冬至一陽生。而後有小寒。大寒。非陰生而反熱。陽生而反寒也。天地之道。否不極則不泰。陰陽之氣。剝不極則不復。夏至六陰盡於地上。而後一陰生於地下。是陰生之時。正陽極之時也。冬至六陽盡於地上。而後一陽生於地下。是陽生之時。正陰極之時也。陽極而大熱。陰極而大寒。自然之道也。則所謂陽始生。天得溫和者。其不得與冬至陽生同論也。審矣。至未得甲子而天已溫。或已得甲子而天反未溫。及已得甲子而天大寒不解。或如盛夏五六月時。則氣之有盈有縮。爲候之或後或先。而人在氣交之中者。往往因之而病。惟至人爲能與時消息而無忤耳。

師曰。病人脈浮者在前。其病在表。浮者在後。其病在裏。腰痛背強不能行。必短氣而極也。

前謂關前。後謂關後。關前爲陽。關後爲陰。關前脈浮者。以陽居陽。故病在表。關

後脈浮者。以陽居陰。故病在裏。然雖在裏而係陽脈。則爲表之裏。而非裏之裏。故其病不在腸胃。而在腰背膝脛。而及其至。則必短氣而極。所以然者。形傷不去。窮必及氣。表病不除。久必歸裏也。

問曰。經云厥陽獨行。何謂也。師曰。此爲有陽無陰。故稱厥陽。

厥陽獨行者。孤陽之氣。厥而上行。陽失陰則越。猶夫無妻則蕩也。千金方云。陰脈且解。血散不通。正陽遂厥。陰不往從。此卽厥陽獨行之旨歟。

問曰。寸脈沉大而滑。沉則爲實。滑則爲氣。實氣相搏。血氣入藏卽死。入府卽愈。此爲卒厥。何謂也。師曰。脣口青身冷。爲入藏卽死。如身和汗自出。爲入府卽愈。

實謂血實。氣謂氣實。實氣相搏者。血與氣并而俱實也。五藏者。藏而不寫。血氣入之。卒不得還。神去機息。則脣青身冷而死。六府者。傳而不藏。血氣入之。乍滿乍寫。氣還血行。則身和汗出而愈。經云。血之與氣。并走於上。則爲大厥。厥則暴死。氣復反則生。不返則死是也。

問曰。脈脫入臟卽死。入腑卽愈。何謂也。師曰。非爲一病。百病皆然。譬如浸淫瘡。從口起。流向四肢者可治。從四肢流來入口者不可治。病在外者可治。入裏者卽死。

脈脫者。邪氣乍加。正氣被遏。經隧不通。脈絕似脫。非真脫也。蓋卽暴厥之屬。經曰。跌陽脈不出。脾不上下。身冷膚鞭。又曰。少陰脈不至。腎氣微。少精血。爲尸厥。卽脈脫之謂也。厥病入臟者深而難出。氣竭不復則死。入腑者淺而易通。氣行脈出卽愈。浸淫瘡。瘡之浸淫不已。外臺所謂轉廣有汁。流遶周身者也。從口流向四肢者。病自內而之外。故可治。從四肢流來入口者。病自外而之裏。故不可治。李瑋西云。病在外二句。概指諸病而言。卽上文百病皆然之意。入裏者死。如痺氣入腹。脚氣衝心之類。

問曰。陽病十八。何謂也。師曰。頭痛、項、腰、脊、臂、脚、掣痛。陰病十八。何謂也。師曰。欬、上氣、喘、噦、咽、腸鳴、脹滿、心痛、拘急。五藏病各有十八。合爲九十病。人又有六微。微有十八病。合爲一百八病。五勞七傷六極。婦人三十六病。不在其中。清邪居上。濁邪居下。大邪中表。小邪中裏。穀飪之邪。從口入者。宿食也。五邪中人。各有法度。風中於前。寒中於暮。濕傷於下。霧傷於上。風令脈浮。寒令脈急。霧傷皮腠。濕流關節。食傷脾胃。極寒傷經。極熱傷絡。頭、項、腰、脊、臂、脚。六者病兼上下。而通謂之陽者。以其在軀殼之外也。欬、上氣、喘、

噦、咽、腸鳴、脹滿、心痛、拘急九者病兼藏府。而通謂之陰者。以其在軀殼之裏也。在外者有營病衛病。榮衛交病之殊。是一病而有三也。三而六之。合則爲十八。故曰陽病十八也。在裏者有或虛或實之異。是一病而有二也。九而二之。合則爲十八。故曰陰病十八也。五藏病各有十八。六微病又各有十八。則皆六淫邪氣所生者也。蓋邪氣之中人者。有風、寒、暑、濕、燥、火之六種。而藏府之受邪者。又各有氣分、血分、氣血並受之三端。六而三之。則爲十八病。以十八之數推之。則五藏合得九十病。六微合得一百八病。至於五勞七傷六極。則起居飲食情志之所生也。婦人三十六病。則經月產乳帶下之疾也。均非六氣外淫所致。故曰不在其中。清邪風露之邪。故居於上。濁邪水土之邪。故居於下。大邪漫風。雖大而力散。故中於表。小邪戶牖隙風。雖小而氣銳。故中於裏。穀飢飲食之屬。入於口而傷於胃者也。是故邪氣有清濁大小之殊。人身亦有上下表裏之別。莫不各隨其類以相從。所謂各有法度也。故風爲陽而中於前。寒爲陰而中於後。濕氣濁而傷於下。霧氣清而傷於上。經脈陰而傷於寒。絡脈陽而傷於熱。合而言之。無非陽邪親上。陰邪親下。熱氣歸陽。寒氣歸陰之理。

問曰。病有急當救裏救表者。何謂也。師曰。病醫下之。續得下利清穀不止。身體疼痛者。急當救裏。後身疼痛。清便自調者。急當救表也。

治實證者。以逐邪爲急。治虛證者。以養正爲急。蓋正氣不固。則無以禦邪而却疾。故雖身體疼痛。而急當救裏。表邪不去。勢必入裏而增患。故既清便自調。則仍當救表也。

夫病痼疾。加以卒病。當先治其卒病。後乃治其痼疾也。

卒病易除。故當先治。痼疾難拔。故宜緩圖。且勿使新邪得助舊疾也。讀二條。可以知治病緩急先後之序。

師曰。五藏病。各有所得者愈。五藏病。各有所惡。各隨其所不喜者爲病。病者素不應食。而反暴思之。必發熱也。

所得所惡所不喜。該居處服食而言。如藏氣法時論云。肝色青。宜食甘。心色赤。宜食酸。肺色白。宜食苦。腎色黑。宜食辛。脾色黃。宜食鹹。又心病禁溫食熱衣。脾病禁溫食飽食。濕地濡衣。肺病禁寒飲食寒衣。腎病禁焮煖熱食溫炙衣。宣明五氣篇所云。心惡熱。肺惡寒。肝惡風。脾惡濕。腎惡燥。靈樞五味篇所云。肝病禁

辛。心病禁鹹。脾病禁酸。肺病禁苦。腎病禁甘之屬皆是也。五藏病者所得而愈者。謂得其所宜之氣之味之處。足以安藏氣而却病氣也。各隨其所不喜爲病者。謂得其所禁所惡之氣之味之處。足以忤藏氣而助病邪也。病者素不應食。而反暴思之者。謂平素所不喜之物。而反暴思之。由病邪之氣。變其臟氣使然。食之則適以助病氣而增發熱也。

夫諸病在藏。欲攻之。當隨其所得而攻之。如渴者與猪苓湯。餘皆仿此。

無形之邪。入結於藏。必有所據。水血痰食。皆邪藪也。如渴者。水與熱得而熱結在水。故與猪苓湯利其水。而熱亦除。若有食者。食與熱得而熱結在食。則宜承氣湯下其食。而熱亦去。若無所得。則無形之邪。豈攻法所能去哉。

猪苓湯方

見後消渴證中

## 瘧濕喝病脈證治第二

太陽病。發熱無汗。反惡寒者。名曰剛瘧。太陽病。發熱汗出而不惡寒。名曰柔瘧。成氏曰。千金云。太陽中風。重感寒濕。則變瘧。太陽病。發熱無汗。爲表實。則不當

惡寒。今反惡寒者。則太陽中風。重感於寒。爲瘧病也。以其表實有寒。故曰剛瘧。太陽病。發熱汗出。爲表虛。則當惡寒。今不惡寒者。風邪變熱。外傷筋脈。爲瘧病也。以其表虛無寒。故曰柔瘧。然瘧者強也。其病在筋。故必兼有頸項強急。頭熱足寒。目赤頭搖。口噤背反等證。仲景不言者。以瘧字該之也。活人書亦云。瘧證發熱惡寒。與傷寒相似。但其脈沉遲弦細。而項背反張爲異耳。

太陽病。發熱。脈沉而細者。名曰瘧。爲難治。

太陽脈本浮。今反沉者。風得濕而伏。故爲瘧。瘧脈本緊弦。今反細者。陰氣適不足。故難治。

太陽病。發汗太多。因致瘧。夫風病下之則瘧。復發汗。必拘急。瘡家雖身疼痛。不可發汗。汗出則瘧。

此原瘧病之由。有此三者之異。其爲脫液傷津。則一也。蓋病有太陽風寒不解。重感寒濕而成瘧者。亦有亡血竭氣。損傷陰陽。而病變成瘧者。經云。氣主煦之。血主濡之。又云。陽氣者。精則養神。柔則養筋。陰陽既衰。筋脈失其濡養。而強直不柔矣。此瘧病標本虛實之異。不可不辨也。



病者身熱足寒。頸項強急。惡寒。時頭熱面赤目赤。獨頭動搖。卒口噤。背反張者。瘧病也。若發其汗者。寒濕相得。其表益虛。即惡寒甚。發其汗已。其脈如蛇。瘧病不離乎表。故身熱惡寒。瘧爲風強病。而筋脈受之。故口噤。頭項強。背反張。脈強直。經云。諸暴強直。皆屬於風也。頭熱足寒。面目赤。頭動搖者。風爲陽邪。其氣上行而又主動也。寒濕相得者。汗液之溼。與外寒之氣。相得不解。而表氣以汗而益虛。寒氣得濕而轉增。則惡寒甚也。其脈如蛇者。脈伏而曲。如蛇行也。瘧脈本直。汗之則風去而濕存。故脈不直而曲也。暴腹脹大者。爲欲解。脈如故。反伏弦者。瘧。

此卽上文風去濕存之變證。魏氏云。風去不與濕相麗。則濕邪無所依著。必順其下墜之性。而入腹作脹矣。風寒外解。而濕下行。所以爲欲解也。如是診之。其脈必浮而不沉。緩而不弦矣。乃其脈如故。而反加伏弦。知其邪內連太陰。裏病轉增。而表病不除。乃瘧病諸證中之一變也。

夫瘧脈按之緊如弦。直上下行。緊如弦。卽堅直之象。李氏曰。上下行者。自寸至尺。皆見緊直之脈也。脈經亦云。

痙病脈堅伏。直上下行。

痙病有灸瘡難治。

有灸瘡者。膿血久潰。穴俞不閉。婁全善云。卽破傷風之意。蓋陰傷而不勝風熱。陽傷而不任攻伐也。故曰難治。

太陽病其證備。身體強。几几然。脈反沉遲。此爲痙。栝樓桂枝湯主之。

太陽證備者。趙氏謂太陽之脈自足上行。循背至頭項。此其所過之部。而爲之狀者。皆是其證是也。几几。背強連頸之貌。沉本痙之脈。遲非內寒。乃津液少而營衛之行不利也。傷寒項背強。几几。汗出惡風者。脈必浮數。爲邪風盛於表。此證身體強。几几然。脈反沉遲者。爲風淫於外。而津傷於內。故用桂枝則同。而一加葛根以助其散。一加栝樓根兼滋其內。則不同也。

栝樓桂枝湯方

栝樓根二兩

桂枝三兩

芍藥三兩

甘草二兩

生薑三兩

大枣十二枚

右六味。以水九升。煮取三升。分溫三服。微汗。汗不出。食頃。啜熱粥發。

太陽病。無汗而小便反少。氣上衝胸。口噤不得語。欲作剛瘧。葛根湯主之。  
無汗而小便反少者。風寒濕甚。與氣相持。不得外達。亦并不下行也。不外達。不  
下行。勢必逆而上衝。爲胸滿。爲口噤不得語。劇至面赤頭搖。項背強直。所不待  
言。故曰欲作剛瘧。葛根湯。卽桂枝湯加麻黃。葛根。乃剛瘧無汗者之正法也。  
按瘧病多在太陽陽明之交。身體強。口噤不得語。皆其驗也。故加麻黃以發太  
陽之邪。加葛根兼疎陽明之經。而陽明外主肌肉。內主津液。用葛根者。所以通  
隧谷而逐風濕。加括樓者。所以生津液而濡經脈也。

葛根湯方

葛	根	四兩	麻	黃	三兩	桂	枝	甘草
				去節				炙
芍	藥	各二兩	生	薑	三兩	大	棗	十二枚

右七味。以水一斗。先煮麻黃。葛根減二升。去沫。內諸藥。煮取三升。去滓。溫服一  
升。覆取微似汗。不須啜粥。餘如桂枝湯法。將息及禁忌。  
瘧爲病。胸滿口噤。臥不着席。脚攣急。必齮齒。可與大承氣湯。

此瘧病之屬陽明瘧熱者。陽明之筋起於足。結於跗。其直者上結於髀。陽明之

脈入齒中。挾口環脣。其支者。循喉嚨。入缺盆下膈。故爲是諸證。然無燥實見證。自宜滌熱而勿蕩實。乃不用調胃而用大承氣者。豈病深熱極。非此不能治歟。然曰可與。則猶有斟酌之意。用者慎之。

大承氣湯方

大黃酒洗

厚朴去皮

枳實炙

芒硝三合

右四味。以水一斗。先煮枳朴。取五升。去滓。內大黃。煮二升。去滓。內芒硝。更上微火。一兩沸。分溫再服。得下。餘勿服。

太陽病。關節疼痛而煩。脈沉而細者。此名中濕。亦名濕痺。濕痺之候。小便不利。大便反快。但當利其小便。

濕爲六淫之一。故其感人。亦如風寒之先在太陽。但風寒傷於肌腠。而濕則流入關節。風脈浮。寒脈緊。而濕脈則沉而細。濕性濡而滯。氣重着。故亦名痺。痺者。閉也。然中風者。必先有內風。而後召外風。中濕者。亦必先有內濕。而後感外濕。故其人平日土德不及。而濕動於中。由是氣化不速。而濕侵於外。外內合邪。爲關節疼煩。爲小便不利。大便反快。治之者。必先逐內濕。而後可以除外濕。故曰

當利其小便。東垣亦云。治濕不利小便。非其治也。然此爲脈沉而小便不利者設耳。若風寒在表。與濕相搏。脈浮惡風。身重疼痛者。則必以麻黃、白朮、薏苡、杏仁、桂枝、附子等發其汗爲宜矣。詳見後條。

濕家之爲病。一身盡疼。發熱。身色如熏黃也。

濕外盛者。其陽必內鬱。濕外盛則身疼。陽內鬱則發熱。熱與濕合。交蒸互鬱。則身色如熏黃。熏黃者。如煙之熏。色黃而晦。濕氣沉滯故也。若熱黃則黃而明。所謂身黃如橘子色也。

濕家其人但頭汗出。背強。欲得被覆向火。若下之早則噦。或胸滿。小便不利。舌上如胎者。以丹田有熱。胸上有寒。渴欲得飲而不能飲。則口燥煩也。

寒濕居表。陽氣不得外通而但上越。爲頭汗出。爲背強。欲得被覆向火。是宜驅寒濕以通其陽。乃反下之。則陽更被抑。而噦乃作矣。或上焦之陽不布。而胸中滿。或下焦之陽不化。而小便不利。隨其所傷之處而爲病也。舌上如胎者。本非胃熱。而舌上津液燥聚。如胎之狀。實非胎也。蓋下後陽氣反陷於下。而寒濕仍聚於上。於是丹田有熱。而渴欲得飲。胸上有寒。而復不能飲。則口舌燥煩。而津

液乃聚耳。

濕家下之。額上汗出微喘。小便利者死。若下利不止者亦死。

濕病在表者宜汗。在裏者宜利小便。苟非濕熱蘊積成實。未可遽用下法。額汗出微喘。陽已離而上行。小便利。下利不止。陰復決而下走。陰陽離決。故死。一作小便不利者死。謂陽上游而陰不下濟也。亦通。

風濕相搏。一身盡疼痛。法當汗出而解。值天陰雨不止。醫云。此可發其汗。汗之病不愈者何也。蓋發其汗。汗大出者。但風氣去。濕氣在。是故不愈也。若治風濕者。但微微似欲汗出者。風濕俱去也。

風濕雖並爲六淫之一。然風無形而濕有形。風氣迅而濕氣滯。值此雨淫濕勝之時。自有風易却而濕難除之勢。而又發之速而驅之過。宜其風去而濕不與俱去也。故欲濕之去者。但使陽氣內蒸而不驟泄。肌肉關節之間充滿流行。而濕邪自無地可容矣。此發其汗。但微微似欲汗出之旨歟。

濕家病身疼發熱。面黃而喘。頭痛鼻塞而煩。其脈大。自能飲食。腹中和無病。病在頭中寒濕。故鼻塞。內藥鼻中則愈。

寒濕在上。則清陽被鬱。身疼頭痛。鼻塞者。濕上甚也。發熱面黃煩喘者。陽上鬱也。而脈大。則非沉細之比。腹和無病。則非小便不利。大便反快之比。是其病不在腹中而在頭。療之者宜但治其頭。而毋犯其腹。內藥鼻中。如瓜蒂散之屬。使黃水出。則寒濕去而愈。不必服藥以傷其和也。

濕家身煩疼。可與麻黃加朮湯。發其汗為宜。慎不可以火攻之。

身煩疼者。濕兼寒而在表也。用麻黃湯以散寒。用白朮以除濕。喻氏曰。麻黃得朮。則雖發汗不至多汗。而朮得麻黃。并可以行表裏之濕。不可以火攻者。恐濕與熱合。而反增發熱也。

麻黃加朮湯方

麻黃三兩去節

桂枝二兩

甘草一兩炙

白朮四兩

杏仁七十個去皮尖

右五味。以水九升。先煮麻黃。減二升。去上沫。內諸藥。煮取二升半。去滓。溫服八合。覆取微汗。

病者一身盡疼。發熱。日晡所劇者。此名風濕。此病傷於寒。汗出當風。或久傷取冷。

所致也。可與麻黃杏仁薏苡甘草湯。

此亦散寒除濕之法。日晡所劇。不必泥定肺與陽明。但以濕無來去。而風有休作。故曰此名風濕。然雖言風而寒亦在其中。觀下文云。汗出當風。又曰久傷取冷。意可知矣。蓋痙病非風不成。濕痺無寒不作。故以麻黃散寒。薏苡除濕。杏仁利氣。助通泄之用。甘草補中。予勝濕之權也。

麻黃杏仁薏苡甘草湯方

麻黃半兩

杏仁<sub>十個去尖</sub>

薏苡半兩

甘草<sub>炙一兩</sub>

右剉麻豆大。每服四錢匕。水一盞半。煎八分。去滓溫服。有微汗避風。風濕脈浮身重。汗出惡風者。防己黃耆湯主之。

風濕在表。法當從汗而解。乃汗不待發而自出。表尙未解而已虛。汗解之法。不可守矣。故不用麻黃出之皮毛之表。而用防己驅之肌膚之裏。服後如蟲行皮中。及從腰下如冰。皆濕下行之徵也。然非耆朮甘草。焉能使衛陽復振。而驅濕下行哉。

防己黃耆湯方



防己一兩

甘草半兩

白朮七錢

黃耆一分

右剉麻豆大。每抄五錢匕。生薑四片。大棗一枚。水盪半。煎八分。去滓溫服。喘者加麻黃半兩。胃中不和者加芍藥三分。氣上衝者加桂枝三分。下有陳寒者加細辛三分。服後當如蟲行皮中。從腰下如冰。後坐被上。又以一被繞腰下。溫令微汗差。

傷寒八九日。風濕相搏。身體疼煩。不能自轉側。不嘔不渴。脈浮虛而澹者。桂枝附子湯主之。若大便堅。小便自利者。去桂枝加白朮湯主之。

身體疼煩。不能自轉側者。邪在表也。不嘔不渴。裏無熱也。脈浮虛而澹。知其風濕外持。而衛陽不正。故以桂枝湯去芍藥之酸收。加附子之辛溫。以振陽氣而敵陰邪。若大便堅。小便自利。知其表之陽雖弱。而在裏之氣猶治。則皮中之濕。自可驅之於裏。使從水道而出。不必更發其表。以危久弱之陽矣。故於前方去桂枝之辛散。加白朮之苦燥。合附子之大力健行者。於以竝走皮中而逐水氣。亦因勢利導之法也。

### 桂枝附子湯方

桂枝四兩

附

子三枚炮去生

薑三兩切

甘草二兩炙

大棗十二枚

右五味。以水六升。煮取二升。去滓。分溫三服。

白朮附子湯方

白朮一兩

附

子一枚炮

甘草二兩炙

生薑一兩半

大棗六枚

右五味。以水三升。煮取一升。去滓。分溫三服。一服覺身痺。半日許再服。三服都盡。其人如冒狀。勿怪。即是朮附竝走皮中。逐水氣。未得除故耳。風濕相搏。骨節疼煩。掣痛不得屈伸。近之則痛劇。汗出短氣。小便不利。惡風不欲去衣。或身微腫者。甘草附子湯主之。

此亦濕勝陽微之證。其治亦不出助陽散濕之法。云得微汗則解者。非正發汗也。陽復而陰自解耳。夫風濕在表。本當從汗而解。麻黃加朮湯。麻黃杏仁薏苡甘草湯。其正法也。而汗出表虛者。不宜重發其汗。則有防己黃耆實表行濕之法。而白朮附子。則又補陽以爲行者也。表虛無熱者。不可遽發其陽。則有桂枝

附子。溫經散溼之法。而甘草附子。則兼補中以為散者也。即此數方。而仲景審病之微。用法之變。蓋可見矣。

### 甘草附子湯方

甘草二兩

附子二枚炮

白朮二兩

桂枝四兩

右四味。以水六升。煮取三升。去滓。溫服一升。日三服。初服得微汗則解。能食。汗出復煩者。服五合。恐一升多者。宜服六七合為妙。太陽中暍。發熱惡寒。身重而疼痛。其脈弦細。芤遲。小便已。洒洒然毛聳。手足逆冷。小有勞。身即熱。口開。前板齒燥。若發其汗。則惡寒甚。加溫鍼則發熱甚。數下之。則淋甚。

中暍即中暑。暑亦六淫之一。故先傷太陽而為寒熱也。然暑陽邪也。乃其證反身重疼痛。其脈反弦細而遲者。雖名中暍。而實兼溼邪也。小便已。洒洒毛聳者。太陽主表。內合膀胱。便已而氣餒也。手足逆冷者。陽內聚而不外達。故小有勞。即氣出而身熱也。口開前板齒燥者。熱盛於內。而氣淫於外也。蓋暑雖陽邪。而氣恆與溼相合。陽求陰之義也。暑因濕入。而暑反居濕之中。陰包陽之象也。治

之者一如分解風濕之法。辛以散濕。寒以涼暑可矣。若發汗則徒傷其表。溫鍼則更益其熱。下之則熱且內陷。變證隨出。皆非正治暑濕之法也。

太陽中熱者。喝是也。汗出惡寒。身熱而渴。白虎加人參湯主之。

中熱亦即中暑。喝即暑之氣也。惡寒者。熱氣入則皮膚緩。腠理開。開則洒然寒。與傷寒惡寒者不同。發熱汗出而渴。表裏熱熾。胃陰待涸。求救於水。故與白虎加人參以清熱生陰。為中暑而無濕者之法也。

白虎加人參湯方

知母六兩

石膏

一斤碎

甘草

二兩

粳

米六合

人參三兩

右五味。以水一斗。煮米熟湯成。去滓。溫服一升。日三服。

太陽中暍。身熱疼重而脈微弱。此以夏月傷冷水。水行皮中。所致也。一物瓜蒂湯主之。

暑之中人也。陰虛而多火者。暑即寓於火之中。為汗出而煩渴。陽虛而多濕者。暑即伏於濕之內。為身熱而疼重。故暑病恆以濕為病。而治濕即所以治暑。瓜

蒂苦寒。能吐能下。去身面四肢水氣。水去而暑無所依。將不治而自解矣。此治中暑兼濕者之法也。

### 瓜蒂湯方

瓜蒂二十

右剉。以水一升。煮取五合。去滓頓服。

### 百合狐惑陰陽毒病證治第三

論曰。百合病者。百脈一宗。悉致其病也。意欲食。復不能食。常默然。欲臥不能臥。欲行不能行。飲食或有美時。或有不欲聞食臭時。如寒無寒。如熱無熱。口苦小便赤。諸藥不能治。得藥則劇吐利。如有神靈者。身形如和。其脈微數。每溺時頭痛者。六十日乃愈。若溺時頭不痛。淅淅然者。四十日愈。若溺快然。但頭眩者。二十日愈。其證或未病而預見。或病四五日而出。或二十日。或一月後見者。各隨證治之。百脈一宗者。分之則爲百脈。合之則爲一宗。悉致其病。則無之非病矣。然詳其證。意欲食矣。而復不能食。常默然靜矣。而又躁不得臥。飲食或有時美矣。而復

有不欲聞食臭時。如有寒。如有熱矣。而又不見爲寒。不見爲熱。諸藥不能治。得藥則劇吐利矣。而又身形如和。全是恍惚去來。不可爲憑之象。惟口苦、小便赤、脈微數。則其常也。所以者何。熱邪散漫。未統於經。其氣遊走無定。故其病亦去來無定。而病之所以爲熱者。則徵於脈。見於口與便。有不可掩然者矣。夫膀胱者。太陽之府。其脈上至顛頂。而外行皮膚。溺時頭痛者。太陽乍虛。而熱氣乘之也。淅然快然。則遽減矣。夫乍虛之氣。溺已卽復。而熱淫之氣。得陰乃解。故其甚者。必六十日之久。諸陰盡集。而後邪退而愈。其次四十日。又其次二十日。熱差減者。愈差速也。此病多於傷寒熱病前後見之。其未病而預見者。熱氣先動也。其病後四五日。或二十日。或一月見者。遺熱不去也。各隨其證以治。具如下文。

百合病發汗後者。百合知母湯主之。

人之有百脈。猶地之有衆水也。衆水朝宗於海。百脈朝宗於肺。故百脈不可治。而可治其肺。百合味甘平微苦。色白入肺。治邪氣。補虛清熱。故諸方悉以之爲主。而隨證加藥治之。用知母者。以發汗傷津液故也。

百合知母湯方

百合七枚

知母三兩

右先以水洗百合。漬一宿。當白沫出。去其水。別以泉水二升。煎取一升。去滓。別以泉水二升。煎知母。取一升。後合煎。取一升五合。分溫再服。

百合病下之後者。百合滑石代赭湯主之。

百合病不可下而下之。必傷其裏。乃復以滑石、代赭者。蓋欲因下藥之勢。而抑之使下。導之使出。亦在下者引而竭之之意也。

百合滑石代赭湯方

百合七枚

滑石三兩碎

代赭石如彈丸大一枚碎綿裹

右先煎百合如前法。別以泉水二升。煎滑石代赭。取一升。去滓。後合和重煎。取一升五合。分溫再服。

百合病吐之後者。百合鷄子湯主之。

本草鷄子安五藏。治熱疾。吐後藏氣傷而病不去。用之不特安內。亦且攘外也。

百合鷄子湯方

百合七枚

鷄子黃一枚

右先煎百合如前法了。內鷄子黃攪勻。煎五分溫服。百合病。不經吐下發汗。病形如初者。百合地黄湯主之。

此則百合病正治之法也。蓋肺主行身之陽。腎主行身之陰。百合色白入肺。而清氣中之熱。地黃色黑入腎。而除血中之熱。氣血既治。百脈俱清。雖有邪氣。亦必自下。服後大便如漆。則熱除之驗也。外臺云。大便當出黑沫。

百合地黄湯方

百合七枚

生地黄汁一升

右先煎百合如前法了。內地黃汁。煎取一升五合。溫分再服。中病勿更服。大便當如漆。

百合病。一月不解。變成渴者。百合洗方主之。

病久不解而變成渴。邪熱留聚在肺也。單用百合漬水外洗者。以皮毛爲肺之合。其氣相通故也。洗已食煮餅。按外臺云。洗身訖。食白湯餅。今罽飴也。本草粳米。小麥。竝除熱止渴。勿以鹹豉者。恐鹹味耗水而增渴也。

百合洗方



百合一升。以水一斗。漬之一宿。以洗身。洗已食煮餅。勿以鹹豉也。

百合病。渴不差者。括樓牡蠣散主之。

病變成渴。與百合洗方而不差者。熱盛而津傷也。括樓根苦寒。生津止渴。牡蠣鹹寒。引熱下行。不使上燥也。

### 括樓牡蠣散方

括樓根

牡

蠣分熱等

右爲細末。飲服方寸匕。日三服。

百合病。變發熱者。百合滑石散主之。

病變發熱者。邪聚於裏而見於外也。滑石甘寒。能除六府之熱。得微利。則裏熱除而表熱自退。

### 百合滑石散方

百合炙一兩

滑石三兩

右二味爲散。飲服方寸匕。日三服。當微利者止服。熱則除。

百合病。見於陰者。以陽法救之。見於陽者。以陰法救之。見陽攻陰。復發其汗。此爲

逆。見陰攻陽。乃復下之。此亦爲逆。

病見於陰。甚必及陽。病見於陽。窮必歸陰。以法救之者。養其陽以救陰之偏。則陰以平而陽不傷。補其陰以救陽之過。則陽以和而陰不敝。內經用陰和陽。用陽和陰之道也。若見陽之病而攻其陰。則并傷其陰矣。乃復發汗。是重傷其陽也。故爲逆。見陰之病而攻其陽。則并傷其陽矣。乃復下之。是重竭其陰也。故亦爲逆。以百合爲邪少虛多之證。故不可直攻其病。亦不可誤攻其無病如此。狐惑之爲病。狀如傷寒。默默欲眠。目不得閉。臥起不安。蝕於喉爲惑。蝕於陰爲狐。不欲飲食。惡聞食臭。其面目乍赤乍黑乍白。蝕於上部則聲啞。甘草瀉心湯主之。蝕於下部則咽乾。苦參湯洗之。蝕於肛者。雄黃熏之。

狐惑。蟲病。卽巢氏所謂蠹病也。默默欲眠。目不得閉。臥起不安。其躁擾之象。有似傷寒少陰熱證。而實爲蠹之亂其心也。不欲飲食。惡聞食臭。有似傷寒陽明實證。而實爲蟲之擾其胃也。其面目乍赤乍黑乍白者。蟲之上下聚散無時。故其色變更不一。甚者脈亦大小無定也。蓋雖蟲病。而能使人惑亂而狐疑。故名曰狐惑。徐氏曰。蝕於喉爲惑。謂熱淫於上。如惑亂之氣。惑而生蠹。蝕於陰爲狐。

謂熱淫於下。柔害而幽隱。如狐性之陰也。亦通。蝕於上部。即蝕於喉之謂。故聲  
啞。蝕於下部。即蝕於陰之謂。陰內屬於肝。而咽門爲肝膽之候。鉗干病自下而  
衝上。則咽乾也。至生蟲之由。則趙氏所謂濕熱停久。蒸腐氣血而成瘡濁。於是  
風化所腐而成蟲者當矣。甘草瀉心。不特使中氣運而濕熱自化。抑亦苦辛雜  
用。足勝殺蟲之任。其苦參雄黃。則皆清燥殺蟲之品。洗之熏之。就其近而治之  
耳。

### 甘草瀉心湯方

甘草炙四兩

黃芩

乾薑

人參各三兩

半夏半升

黃連一兩

大棗十二枚

右七味。以水一斗。煮取六升。去滓。再煎。取三升。溫服一升。日三服。

### 苦參湯方

苦參一升。以水一斗。煎取七升。去滓。熏洗日三。

### 雄黃熏法

雄黃一味爲末。筒瓦二枚合之。燒向肛熏之。

病者脈數無熱。微煩。默默但欲臥。汗出。初得之三四日。目赤如鳩目。七八日。目四皆黑。若能食者。膿已成也。赤豆當歸散主之。

脈數微煩。默默但欲臥。熱盛於裏也。無熱汗出。病不在表也。三四日。目赤如鳩眼者。肝臟血中之熱。隨經上注於目也。經熱如此。臟熱可知。其爲畜熱不去。將成癰腫無疑。至七八日。目四皆黑。赤色極而變黑。則癰尤甚矣。夫肝與胃。互爲勝負者也。肝方有熱。勢必以其熱侵及於胃。而肝既成癰。胃卽以其熱併之於肝。故曰若能食者。知膿已成也。且膿成則毒化。毒化則不特胃和而肝亦和矣。赤豆當歸。乃排膿血除濕熱之良劑也。

再按此一條。注家有目爲狐惑病者。有目爲陰陽毒者。要之。亦是濕熱蘊毒之病。其不腐而爲蟲者。則積而爲癰。不發於身面者。則發於腸臟。亦病機自然之勢也。仲景意謂與狐惑陰陽毒同源而異流者。故特論列於此歟。

赤豆當歸散方

赤小豆

三升浸令芽出曝乾

當歸十兩

右二味。杵爲散。漿水服方寸匕。日三服。

陽毒之爲病。面赤斑斑如錦紋。咽喉痛。吐膿血。五日可治。七日不可治。升麻鱉甲湯主之。

陰毒之爲病。面目青。身痛如被杖。咽喉痛。五日可治。七日不可治。升麻鱉甲湯去雄黃、蜀椒主之。

毒者。邪氣蘊畜不解之謂。陽毒非必極熱。陰毒非必極寒。邪在陽者爲陽毒。邪在陰者爲陰毒也。而此所謂陰陽者。亦非藏府氣血之謂。但以面赤斑斑如錦紋。咽喉痛。唾膿血。其邪著而在表者謂之陽。面目青。身痛如被杖。咽喉痛。不唾膿血。其邪隱而在裏者謂之陰耳。故皆得用辛溫升散之品。以發其蘊畜不解之邪。而亦竝用甘潤鹹寒之味。以安其邪氣經擾之陰。五日邪氣尙淺。發之猶易。故可治。七日邪氣已深。發之則難。故不可治。其蜀椒、雄黃二物。陽毒用之者。以陽從陽。欲其速散也。陰毒去之者。恐陰邪不可劫。而陰氣反受損也。

### 升麻鱉甲湯方

升麻	當歸	甘草	蜀椒
升麻	當歸	甘草	蜀椒
鱉甲	雄黃	各二兩	炒去汗
鱉甲	雄黃	各二兩	炒去汗

右六味。以水四升。煮取一升。頓服之。老小再服。取汗。肘後千金方陽毒用升麻湯。無驚甲有桂。陰毒用甘草湯。無雄黃。

### 瘧病脈證并治第四

師曰。瘧脈自弦。弦數者多熱。弦遲者多寒。弦小緊者下之差。弦遲者可溫之。弦緊者可發汗。鍼灸也。浮大者可吐之。弦數者風發也。以飲食消息止之。

瘧者少陽之邪。弦者少陽之脈。有是邪。則有是脈也。然瘧之舍。固在半表半裏之間。而瘧之氣。則有偏多偏少之異。故其病有熱多者。有寒多者。有裏多而可下者。有表多而可汗可吐者。有風從熱出。而不可以藥散者。當各隨其脈而施治也。徐氏曰。脈大者爲陽。小者爲陰。緊雖寒脈。小緊則內入而爲陰矣。陰不可從表散。故曰下之愈。遲既爲寒。溫之無疑。弦緊不沉。爲寒脈而非陰脈。非陰故可發汗。鍼灸也。瘧脈概弦。而忽浮大。知邪在高分。高者引而越之。故可吐。喻氏曰。仲景既云弦數者多熱矣。而復申一義云弦數者風發。見多熱不已。必至於極熱。熱極則生風。風生則肝木侮土。而傳其熱於胃。坐耗津液。此非可徒求之

藥。須以飲食消息。止其熾熱。即梨汁、蔗漿。生津止渴之屬。正內經風淫於內。治以甘寒之旨也。

病瘧以月一日發。當十五日愈。設不差。當月盡解。如其不差。當云何。師曰。此結為癥瘕。名曰瘧母。急治之。宜鱉甲煎丸。

天氣十五日一更。人之氣亦十五日一更。氣更則邪當解也。否則三十日天人。之氣再更。而邪自不能留矣。設更不愈。其邪必假血依痰。結為癥瘕。僻處脇下。將成負固不服之勢。故宜急治。鱉甲煎丸。行氣逐血之藥頗多。而不嫌其峻。一日三服。不嫌其急。所謂乘其未集而擊之也。

### 鱉甲煎丸方

鱉甲	十二分	烏扇	三分	黃芩	三分	柴胡	六分
鼠婦	三分	乾薑	一分	大黃	一分	桂枝	一分
石葦	去毛	厚朴	一分	紫葳	一分	阿膠	各三分
半夏	各三分	芍藥	一分	牡蛎	一分	蟬蛻	各五分
澤漆	一分	人參	一分	瞿麥	二分	蜂窠	四分

赤硝分二

蜨

蟬熬六分

桃

仁二分去尖研

右二十三味。爲末。取煨竈下灰一斗。清酒一斛五升。浸灰。候酒盡一半。着鱉甲於中。煮令泛爛如膠漆。絞取汁。內諸藥煎。爲丸。如梧子大。空心服七丸。日三服。千金方用鱉甲十二片。又有海藻三分。大戟一分。無鼠婦。赤硝二味。師曰。陰氣孤絕。陽氣獨發。則熱而少氣煩冤。手足熱而欲嘔。名曰瘧瘧。若但熱不寒者。邪氣內藏於心。外舍分肉之間。令人消燍肌肉。

此與內經論瘧瘧文大同。夫陰氣虛者。陽氣必發。發則足以傷氣而耗神。故少氣煩冤也。四肢者。諸陽之本。陽盛則手足熱也。欲嘔者。熱干胃也。邪氣內藏於心者。瘧爲陽邪。心爲陽藏。以陽從陽。故邪外舍分肉。而其氣則內通心藏也。消燍肌肉者。肌肉爲陰。陽極則陰消也。

溫瘧者。其脈如平。身無寒但熱。骨節煩疼。時嘔。白虎加桂枝湯主之。

此與內經論溫瘧文不同。內經言其因。此詳其脈與證也。瘧瘧。溫瘧。俱無寒但熱。俱嘔。而其因不同。瘧瘧者。肺素有熱。而加外感。爲表寒裏熱之證。緣陰氣內虛。不能與陽相爭。故不作寒也。溫瘧者。邪氣內藏腎中。至春夏而始發。爲伏氣。



外出之證。寒畜久而變熱。故亦不作寒也。脈如平者。病非乍感。故脈如其平時也。骨節煩疼時嘔者。熱從腎出。外舍於其合。而上并於陽明也。白虎甘寒除熱。桂枝則因其勢而達之耳。

### 白虎加桂枝湯方

知母六兩

石膏一斤

甘草二兩

粳米二合

桂枝三兩

右五味。以水一斗。煮米熟湯成。去滓。溫服一升。日三。

瘧多寒者。名曰牡瘧。蜀漆散主之。

瘧多寒者。非真寒也。陽氣為痰飲所遏。不得外出肌表。而但內伏心間。心牡藏也。故名牡瘧。蜀漆能吐瘧痰。痰去則陽伸而寒愈。取雲母、龍骨者。以蜀漆上越之。猛恐并動心中之神與氣也。

### 蜀漆散方

蜀漆洗去腥

雲母燒二夜

龍骨等分

右三味。杵為散。未發前以漿水服半錢匕。

附外臺祕要三方

牡蠣湯

牡蠣

麻

黃

各四兩

甘

草

二兩

蜀

漆

三兩

右四味。以水八升。先煮蜀漆、麻黃。去上沫。得六升。內諸藥。煮取二升。溫服一升。若吐則勿更服。

按此係宋孫奇等所附。蓋亦蜀漆散之意。而外攻之力較猛矣。趙氏云。牡蠣、堅、消結。麻黃、非獨散寒。且可發越陽氣。使通於外。結散陽通。其病自愈。柴胡去半夏加栝樓根湯。治瘧病發渴者。亦治勞瘧。

柴胡八兩

人參

黃芩

甘草各三兩

栝樓根四兩

生薑

二兩

大棗

十二枚

右七味。以水一斗二升。煮取六升。去滓再煎。取三升。溫服一升。日二服。胡桂薑湯。治瘧寒多微有熱。或但寒不熱。服一劑如神。

柴胡半斤

桂枝

三兩

乾薑

二兩

栝樓根四兩

黃芩三兩

甘草

二兩

牡蠣

二兩

右七味。以水一斗。煮取六升。去滓。再煎。取三升。溫服一升。日三。初服微煩。復服汗出便愈。

趙氏曰。此與牡瘡相類而實非。牡瘡邪客心下。此風寒溼痺於肌表。肌表既痺。陽氣不得通於外。遂鬱伏於榮血之中。陽氣化熱。血滯成瘀。着於其處。遇衛氣行。陽二十五度及之。則病作。其邪之入營者。既無外出之勢。而營之素痺者。亦不出而與陽爭。故少熱或無熱也。是用柴胡爲君。發其鬱伏之陽。黃芩爲佐。清其半裏之熱。桂枝、乾薑所以通肌表之痺。栝樓根、牡蠣除留熱。消瘀血。甘草和諸藥。調陰陽也。得汗則痺邪散。血熱行而病愈矣。

### 中風歷節病脈證并治第五

夫風之爲病。當半身不遂。或但臂不遂者。此爲痺。脈微而數。中風使然。風徹於上下。故半身不遂。痺閉於一處。故但臂不遂。以此見風重而痺輕。風動而痺着也。風從虛入。故脈微。風發而成熱。故脈數。曰中風使然者。謂痺病亦是風病。但以在陽者則爲風。而在陰者則爲痺耳。

寸口脈浮而緊。緊則爲寒。浮則爲虛。寒虛相搏。邪在皮膚。浮者血虛。絡脈空虛。賊邪不瀉。或左或右。邪氣反緩。正氣即急。正氣引邪。喎僻不遂。邪在於絡。肌膚不仁。邪在於經。即重不勝。邪入於府。即不識人。邪入於藏。舌即難言。口吐涎。

寒虛相搏者。正不足而邪乘之。爲風寒初感之診也。浮爲血虛者。氣行脈外而血行脈中。脈浮者沉不足。爲血虛也。血虛則無以充灌皮膚。而絡脈空虛。并無以捍禦外氣。而賊邪不瀉。由是或左或右。隨其空處而留着矣。邪氣反緩。正氣即急者。受邪之處。筋脈不用而緩。無邪之處。正氣獨治而急。緩者爲急者所引。則口目爲僻。而肢體不遂。是以左喎者邪反在右。右喎者邪反在左。然或左或右。則有邪正緩急之殊。而爲表爲裏。亦有經絡藏府之別。經云。經脈爲裏。支而橫者爲絡。絡之小者爲孫。是則絡淺而經深。絡小而經大。故絡邪病於肌膚。而經邪病連筋骨。甚而入府。又甚而入藏。則邪遞深矣。蓋神藏於臟。而通於府。府病則神窒於內。故不識人。諸陰皆連舌本。藏氣厥不至舌下。則機息於上。故舌難言。而涎自出也。

侯氏黑散 治大風四肢煩重。心中惡寒不足者。

菊花各十

白朮

防風各十

桔梗八分

黃芩五分

細辛

乾薑

人參

茯苓

當歸

川芎

牡蠣

礬石

桂枝各三分

右十四味。杵爲散。酒服方寸匕。日一服。初服二十日。溫酒調服。禁一切魚肉大  
蒜。常宜冷食。六十日止。即藥積腹中不下也。熱食即下矣。冷食自能助藥力。  
此方亦孫奇等所附。而去風除熱。補虛下痰之法。具備。以爲中風之病。莫不由  
是數者所致。云爾。學者得其意。毋泥其迹可也。  
寸口脈遲而緩。遲則爲寒。緩則爲虛。營緩則爲亡血。衛緩則爲中風。邪氣中經。則  
身癢而癰疹。心氣不足。邪氣入中。則胸滿而短氣。  
遲者行之不及。緩者至而無力。不及爲寒。而無力爲虛也。沉而緩者爲營不足。  
浮而緩者爲衛中風。衛在表而營在裏也。經不足而風入之。血爲風動。則身癢  
而癰疹。心不足而風中之。陽用不布。則胸滿而短氣。經行肌中。而心處胸間也。

風引湯 除熱癰癩

大黃

乾薑

龍骨各四兩

桂枝三兩

甘草

牡蠣各二兩

寒水石

滑石

赤石脂

白石脂

紫石英

石膏各六兩

右十二味。杵麤篩。以韋囊盛之。取三指撮。并花水三升。煮三沸。溫服一升。治大人風引。少小驚癇。瘈瘲日數發。醫所不療。除熱方。巢氏云。脚氣宜風引湯。此下熱清熱之劑。孫奇以爲中風多從熱起。故特附於此。歟。中有薑、桂、石、脂、龍、蠔者。蓋以澁馭泄。以熱監寒也。然亦猛劑。用者審之。

防己地黃湯

治病如狂狀。妄行獨語不休。無寒熱。其脈浮。

防己

甘草各一分

桂枝

防風各三分

右四味。以酒一杯。漬之。絞取汁。生地黄二斤。㕮咀。蒸之如斗米飯久。以銅器盛藥汁。更絞地黄汁。和分再服。

狂走譫語。身熱脈大者。屬陽明也。此無寒熱。其脈浮者。乃血虛生熱。邪并於陽。而然。桂枝、防風、防己、甘草。酒浸取汁。用是輕清。歸之於陽。以散其邪。用生地黄之甘寒。熟蒸使歸於陰。以養血除熱。蓋藥生則散表。熱則補裏。此煎煮法。亦表

裏法也。趙氏

# 頭風摩散

大附子一枚

鹽等分

右二味。爲散。沐了。以方寸匕。摩疾上。令藥力行。

寸口脈沉而弱。沉卽主骨。弱卽主筋。沉卽爲腎。弱卽爲肝。汗出入水中。如水傷心。歷節痛。黃汗出。故曰歷節。

此爲肝腎先虛。而心陽復鬱。爲歷節黃汗之本也。心氣化液爲汗。汗出入水中。水寒之氣。從汗孔入侵。心藏外水內火。鬱爲濕熱。汗液則黃。浸淫筋骨。歷節乃痛。歷節者。遇節皆痛也。蓋非肝腎先虛。則雖得水氣。未必便入筋骨。非水濕內侵。則肝腎雖虛。未必便成歷節。仲景欲舉其標。而先究其本。以爲歷節多從虛得之也。

按後水氣篇中云。黃汗之病。以汗出入水中浴。水從汗孔入得之。合觀二條。知歷節黃汗。爲同源異流之病。其瘀鬱上焦者。則爲黃汗。其併傷筋骨者。則爲歷節也。

跌陽脈浮而滑。滑則穀氣實。浮則汗自出。少陰脈浮而弱。弱則血不足。浮則爲風。風血相搏。卽疼痛如掣。盛人脈濇小短氣。自汗出。歷節疼。不可屈伸。此皆飲酒汗出當風所致。

跌陽脈浮者風也。脈滑者穀氣盛也。汗生於穀。而風性善泄。故汗自出。風血相搏者。少陰血虛而風復擾之。爲疼痛如掣也。跌陽少陰二條合看。知陽明穀氣盛者。風入必與汗偕出。少陰血不足者。風入遂着而成病也。盛人脈濇小短氣者。形盛於外。而氣歉於內也。自汗出。濕復勝也。緣酒客溼本內積。而汗出當風。則濕復外鬱。內外相召。流入關節。故歷節痛。不可屈伸也。合三條觀之。汗出入水者。熱爲濕鬱也。風血相搏者。血爲風動也。飲酒汗出當風者。風溼相合也。歷節病因有是三者不同。其爲從虛所得則一也。

諸肢節疼痛。身體尪羸。脚腫如脫。頭眩短氣。溫溫欲吐。桂枝芍藥知母湯主之。諸肢節疼痛。卽歷節也。身體尪羸。脚腫如脫。形氣不足。而溼熱下甚也。頭眩短氣。溫溫欲吐。濕熱且從下而上衝矣。與脚氣衝心之候頗同。桂枝麻黃防風散。濕於表。芍藥知母甘草。除熱於中。白朮附子。驅濕於下。而用生薑最多。以止嘔。



降逆。爲溼熱外傷肢節。而復上衝心胃之治法也。

# 桂枝芍藥知母湯方

桂枝四兩

芍藥三兩

甘草

麻黃

附子各二兩炮

白朮

知母

防風各四兩

生薑五兩

右九味。以水七升。煮取二升。溫服七合。日三服。

味酸則傷筋。筋傷則緩。名曰泄。鹹則傷骨。骨傷則痿。名曰枯。枯泄相搏。名曰斷泄。營氣不通。衛不獨行。營衛俱微。三焦無所御。四屬斷絕。身體羸瘦。獨足腫大。黃汗出。脛冷。假令發熱。便爲歷節也。

此亦內傷肝腎。而由於滋味不節者也。枯泄相搏。卽筋骨竝傷之謂。曰斷泄者。言其生氣不續。而精神時越也。營不通。因而衛不行者。病在陰而及於陽也。不通不行。非壅而實。蓋卽營衛涸流之意。四屬四肢也。營衛者。水穀之氣。三焦受氣於水穀。而四肢稟氣於三焦。故營衛微。則三焦無氣。而四屬失養也。由是精微不化於上。而身體羸瘦。陰濁獨注於下。而足腫脛冷。黃汗出。此病類似歷節。

黃汗。而實非水溼爲病。所謂肝腎雖虛。未必便成歷節者是也。而虛病不能發熱。歷節則未有不熱者。故曰假令發熱。便爲歷節。後水氣篇中又云。黃汗之病。兩脛自冷。假令發熱。此屬歷節。蓋卽黃汗歷節而又致其辨也。詳見本文。病歷節不可屈伸疼痛。烏頭湯主之。

此治寒溼歷節之正法也。寒溼之邪。非麻黃、烏頭不能去。而病在筋節。又非如皮毛之邪。可一汗而散者。故以黃耆之補。白芍之收。甘草之緩。牽制二物。俾得深入而去留邪。如衛瓘監鍾鄧入蜀。使其成功而不及於亂。乃制方之要妙也。烏頭湯 亦治脚氣疼痛不可屈伸。

麻黃

芍藥

黃耆

甘草各三兩炙

烏

頭五枚以蜜二升煎取一升卽出烏頭

右四味。以水三升。煮取一升。去滓。內蜜煎中。更煎之。服七合。不知。盡服之。礬石湯 治脚氣衝心。

礬石二兩

右一味。以漿水一斗五升。煎三五沸。浸脚良。

脚氣之病。濕傷於下。而氣衝於上。礬石味酸。澁性燥。能却水收濕解毒。毒解濕收。上衝自止。

附方

古今錄驗續命湯。治中風痲。身體不能自收持。口不能言。冒昧不知痛處。或拘急不得轉側。

麻黃

桂枝

甘草

乾薑

石膏

當歸

人參

杏仁

川芎

五錢

各三兩

四十粒

右九味。以水一斗。煮取四升。溫服一升。當小汗。薄覆脊。憑几坐。汗出則愈。不汗更服。無所禁。勿當風。并治但伏不得臥。欬逆上氣。面目浮腫。痲者廢也。精神不持。筋骨不用。非特邪氣之擾。亦真氣之衰也。麻黃、桂枝。所以散邪。人參、當歸。所以養正。石膏合杏仁。助散邪之力。甘草合乾薑。為復氣之需。乃攻補兼行之法也。

千金三黃湯。治中風。手足拘急。百節疼痛。煩熱心亂。惡寒。經日不欲飲食。

麻黃五分

獨活四分

細辛

黃耆各二分

黃芩三分

右五味。以水六升。煮取二升。分溫三服。一服小汗出。二服大汗出。心熱加大

黃二分。腹滿加枳實一枚。氣逆加人參三分。悸加牡蠣三分。渴加栝

樓根三分。先有寒加附子一枚。

近效朮附湯 治風虛頭重眩苦極不知食味。煖肌補中益精氣

白朮一兩

附子炮一枚半

甘草炙一兩

右三味剉。每五錢匕。薑五片。棗一枚。水盞半。煎七分。去滓溫服。

崔氏八味丸 治脚氣上入少腹不仁。

熟地黄八兩

山茱萸

山藥各四兩

澤瀉

茯苓

牡丹皮各三兩

桂

附子各一兩炮

右八味。末之。煉蜜和丸。梧子大。酒下十五丸。日再服。腎之脈起於足而入於腹

腎氣不治。濕寒之氣隨經上入。聚於少腹。為之不仁。是非驅濕散寒之劑所可

治者。須以腎氣丸補腎中之氣。以為生陽化濕之用也。

千金越婢加朮湯 治肉極熱。則身體津脫。腠理開。汗大泄。厲風氣。下焦脚弱。

麻黃六兩

石膏半斤

生薑二兩

甘草二兩

白朮四兩

大枣十五枚

右六味。以水六升。先煮麻黃。去上沫。內諸藥。煮取三升。分溫三服。惡風加附子一枚炮。

### 血痺虛勞病脈證并治第六

問曰。血痺之病。從何得之。師曰。夫尊榮人。骨弱肌膚盛。重因疲勞汗出。臥不時動搖。加被微風。遂得之。但以脈自微。潛在一寸口。關上小緊。宜鍼引陽氣。令脈和緊去則愈。

陽氣者。衛外而為固也。乃因疲勞汗出。而陽氣一傷。臥不時動搖。而陽氣再傷。於是風氣雖微。得以直入血中。而為痺。經云。邪入於陰則痺也。脈微為陽微。潛為血滯。緊則邪之徵也。血中之邪。始以陽氣傷而得入。終必得陽氣通而後出。而痺之為病。血既以風入而痺於外。陽亦以血痺而止於中。故必鍼以引陽使

出。陽出而邪去。邪去而脈緊乃和。血痺乃通。以是知血分受痺。不當獨治其血矣。

血痺陰陽俱微。寸口關上微。尺中小緊。外證身體不仁。如風痺狀。黃耆桂枝五物湯主之。

陰陽俱微。該人迎、趺陽、太谿爲言。寸口關上微。尺中小緊。卽陽不足而陰爲痺之象。不仁者。肌體頑痺。痛癢不覺。如風痺狀。而實非風也。黃耆、桂枝、五物。和榮之滯。助衛之行。亦鍼引陽氣之意。以脈陰陽俱微。故不可鍼而可藥。經所謂陰陽形氣俱不足者。勿刺以鍼而調以甘藥也。

黃耆桂枝五物湯方

黃耆 三兩

芍藥 三兩

桂枝 三兩

生薑 六兩

大枣 十二枚

右五味。以水六升。煮取二升。溫服七合。日三服。

夫男子平人。脈大爲勞。脈極虛亦爲勞。

陽氣者。煩勞則張。故脈大。勞則氣耗。故脈極虛。李氏曰。脈大非氣盛也。重按必

空濡。大者。勞脈之外暴者也。極虛者。勞脈之內衰者也。

男子面色薄。主渴及亡血。卒喘悸。脈浮者。裏虛也。

渴者。熱傷陰氣。亡血者。不華於色。故面色薄者。知其渴及亡血也。李氏曰。勞者。氣血俱耗。氣虛則喘。血虛則悸。卒者。猝然見此病也。脈浮為裏虛。以勞則真陰失守。孤陽無根。氣散於外。而精奪於內也。

男子脈虛沉弦。無寒熱。短氣裏急。小便不利。面色白。時目瞑兼衄。少腹滿。此為勞使之然。勞之為病。其脈浮大。手足煩。春夏劇。秋冬差。陰寒精自出。痠削不能行。男子脈浮弱而濇。為無子。精氣清冷。

脈虛沉弦者。勞而傷陽也。故為短氣裏急。為小便不利。少腹滿。為面色白。而其極則并傷其陰。而目瞑兼衄。目瞑。目不明也。脈浮者。勞而傷陰也。故為手足煩。為痠削不能行。為春夏劇。而秋冬瘳。而其極則并傷其陽。而陰寒精自出。此陰陽互根。自然之道也。若脈浮弱而濇。則精氣交虧。而清冷不溫。此得之天稟薄弱。故當無子。

夫失精家。少腹弦急。陰頭寒。目眩。髮落。脈極虛芤遲。為清穀亡血失精。脈得諸芤。

動微緊。男子失精。女子夢交。桂枝龍骨牡蠣湯主之。

脈極虛芤遲者。精失而虛及其氣也。故少腹弦急。陰頭寒而目眩。脈得諸芤動微緊者。陰陽竝乖而傷及其神與精也。故男子失精。女子夢交。沈氏所謂勞傷心氣。火浮不斂。則為心腎不交。陽泛於上。精孤於下。火不攝水。不交自洩。故病失精。或精虛心相內浮。擾精而出。則成夢交者是也。徐氏曰。桂枝湯外證得之。能解肌去邪氣。內證得之。能補虛調陰陽。加龍骨牡蠣者。以失精夢交為神精間病。非此不足以收斂其浮越也。

桂枝龍骨牡蠣湯方

桂枝

芍藥

生薑

各三兩

甘草二兩

大棗十二枚

龍骨

牡蠣

各三兩

右七味。以水七升。煮取三升。分溫三服。

天雄散方

天雄三兩

白朮八兩

桂枝六兩

龍骨三兩

右四味。杵為散。酒服半錢匕。日三服。不知。稍增之。



按此疑亦後人所附。爲補陽攝陰之用也。

男子平人脈虛弱細微者。喜盜汗也。人年五六十。其病脈大者。痺俠背行。若腸鳴。馬刀。俠癭者。皆爲勞得之。脈沉小遲。名脫氣。其人疾行則喘喝。手足逆寒。腹滿。甚則澹泄。食不消化也。脈弦而大。弦則爲減。大則爲芤。減則爲寒。芤則爲虛。虛寒相搏。此名爲革。婦人則半產漏下。男子則亡血失精。

平人不病之人也。脈虛弱細微。則陰陽俱不足矣。陽不足者不能固。陰不足者不能守。是其人必善盜汗。人年五六十。精氣衰矣。而病脈反大者。是其人當有風氣也。痺俠背行。痺之俠脊者。由陽氣不足。而邪氣從之也。若腸鳴。馬刀。俠癭者。陽氣以勞而外張。火熱以勞而上逆。陽外張。則寒動於中。而爲腹鳴。火上逆。則與痰相搏。而爲馬刀。俠癭。李氏曰。癭生乳腋下。曰馬刀。又夾生頸之兩旁者。爲俠癭。俠者挾也。馬刀。蠡蛤之屬。瘡形似之。故名馬刀。癭一作纓。發於結纓之處。二瘡一在頸。一在腋下。當相聯絡。故俗名癭串。脈沉小遲。皆陰象也。三者並見。陰盛而陽迺亡矣。故名脫氣。其人疾行則喘喝者。氣脫而不固也。由是外無氣而手足逆冷。胃無氣而腹滿。脾無氣而澹泄。食不化。皆陽微氣脫之證。

也。脈弦者陽不足。故爲減爲寒。脈大者陰不足。故爲芤爲虛。陰陽並虛。外強中乾。此名爲革。又變革也。婦人半產。漏下。男子亡血。失精。是皆失其產乳生育之常矣。故名曰革。

虛勞裏急。悸衄。腹中痛。夢失精。四肢痠疼。手足煩熱。咽乾口燥。小建中湯主之。此和陰陽調營衛之法也。夫人生之道。曰陰曰陽。陰陽和平。百疾不生。若陽病不能與陰和。則陰以其寒獨行。爲裏急。爲腹中痛。而實非陰之盛也。陰病不能與陽和。則陽以其熱獨行。爲手足煩熱。爲咽乾口燥。而實非陽之熾也。昧者以寒攻熱。以熱攻寒。寒熱內賊。其病益甚。惟以甘酸辛藥。和合成劑。調之使和。則陽就於陰。而寒以溫。陰就於陽。而熱以和。醫之所以貴識其大要也。豈徒云寒可治熱。熱可治寒而已哉。或問和陰陽調營衛是矣。而必以建中者何也。曰中者脾胃也。營衛生成於水穀。而水穀轉輸於脾胃。故中氣立。則營衛流行。而不失其和。又中者四運之軸。而陰陽之機也。故中氣立。則陰陽相循。如環無端。而不極於偏。是方甘與辛合而生陽。酸得甘助而生陰。陰陽相生。中氣自立。是故求陰陽之和者。必於中氣。求中氣之立者。必以建中也。

小建中湯方

桂枝三兩

甘草二兩

芍藥六兩

大棗十二枚

生薑三兩

飴糖一升

右六味。以水七升。煮取三升。去滓。內膠飴。更上微火消解。溫服一升。日三服。虛勞裏急。諸不足。黃耆建中湯主之。

裏急者。裏虛脈急。腹中當引痛也。諸不足者。陰陽諸脈。並俱不足。而眩悸喘喝。失精亡血等證。相因而至也。急者緩之。必以甘。不足者補之。必以溫。而充虛塞空。則黃耆尤有專長也。

黃耆建中湯方。卽小建中湯內加黃耆一兩半。餘依上法。氣短胸滿者。加生薑。腹滿者。去棗。加茯苓一兩半。及療肺虛損不足。補氣。加半夏三兩。虛勞腰痛。少腹拘急。小便不利者。八味腎氣丸主之。

下焦之分。少陰主之。少陰雖爲陰藏。而中有元陽。所以溫經。臟行陰陽。司開闔者也。虛勞之人。損傷少陰腎氣。是以腰痛。小腹拘急。小便不利。程氏所謂腎間動氣已損者是矣。八味腎氣丸補陰之虛。可以生氣。助陽之弱。可以化水。乃

補下治下之良劑也。

八味腎氣丸方見婦人雜病

虛勞諸不足風氣百疾薯蕷丸主之。

虛勞證多有挾風氣者。正不可獨補其虛。亦不可着意去風氣。仲景以參、地、芎、歸、苓、朮補其氣血。膠、麥、薑、棗、甘、芍益其營衛。而以桔、梗、杏、仁、桂、枝、防、風、柴、胡、白、欬、黃、卷、神、麴去風行氣。其用薯蕷最多者。以其不寒不熱。不燥不滑。兼擅補虛去風之長。故以為君。謂必得正氣理而後風氣可去耳。

薯蕷丸方

薯蕷	三十	人參	七分	白朮	六分	茯苓	五分
甘草	八分	當歸	十分	乾地黄	十分	芍藥	六分
芎藭	六分	麥冬	六分	阿膠	七分	乾薑	三分
大棗	百枚	桔梗	五分	杏仁	六分	桂枝	十分
防風	六分	神麴	十分	豆黃卷	十分	柴胡	五分
白欬	二分						

右二十一味末之。煉蜜和丸。如彈子大。空腹酒服一九。一百丸爲劑。虛勞虛煩不得眠。酸棗仁湯主之。

人寤則魂寓於目。寐則魂藏於肝。虛勞之人。肝氣不榮。則魂不得藏。魂不藏。故不得眠。酸棗仁補肝斂氣。宜以爲君。而魂既不歸。容必有濁痰燥火乘間而襲其舍者。煩之所由作也。故以知母、甘草清熱滋燥。茯苓、川芎行氣除痰。皆所以求肝之治。而宅其魂也。

### 酸棗仁湯方

酸棗仁二升

甘草一兩

知母

茯苓各二

芎藭一兩

右五味。以水八升。煮酸棗仁得六升。內諸藥。煮取三升。分溫三服。

五勞虛極羸瘦。腹滿不能飲食。食傷。憂傷。飲傷。房室傷。飢傷。勞傷。經絡榮衛氣傷。內有乾血。肌膚甲錯。兩目黯黑。緩中補虛。大黃蠱蟲丸主之。

虛勞症有挾外邪者。如上所謂風氣百疾是也。有挾瘀鬱者。則此所謂五勞諸傷。內有乾血者是也。夫風氣不去。則足以賊正氣而生長不榮。乾血不去。則足

以留新血而滲灌不周。故去之不可不早也。此方潤以濡其乾。蟲以動其瘀。通以去其閉。而仍以地黃、芍藥、甘草和養其虛。攻血而不專主於血。一如薯蕷丸之去風而不着意於風也。喻氏曰：此世俗所稱乾血勞之良治也。血瘀於內。手足脈相失者宜之。兼入瓊玉膏補潤之劑尤妙。

大黃蠱蟲丸方

大黃十分 黃蒸十分

黃芩二兩

甘草三兩

桃仁一升

杏仁一升

芍藥四兩

乾地黃十兩

乾漆令煙盡

蠱蟲一升去足熬

水蛭百枚熬

蟬蛻百枚熬

蠱蟲半升熬

右十二味末之。煉蜜和丸。小豆大。酒服五丸。日三服。

附方

千金翼炙甘草湯 治虛勞不足。汗出而悶。脈結悸。行動如常。不出百日。○危急者十一日死。

甘草四兩

桂枝

生薑各三兩

麥冬半升

麻仁半升

人參

阿膠各三兩

大棗三十枚

生地黃一斤

右九味。以酒七升。水八升。先煮八味。取三升。去滓。內膠消盡。溫服一升。日三服。脈結是榮氣不行。悸則血虧而心無所養。榮滯血虧而更出汗。豈不立槁乎。故雖行動如常。斷云不出百日死。知其陰亡而陽絕也。人參、桂枝、甘草、生薑行身之陽。膠、麥、麻地行身之陰。蓋欲使陽得復行。陰中而脈自復也。後人只喜用膠、地等而畏薑、桂。豈知陰凝燥氣。非陽不能化耶。徐氏

肘後獺肝散 治冷勞。又主鬼疰。一門相染。獺肝一具。炙乾末之。水服方寸匕。日三服。

### 肺痿肺癰欬嗽上氣病脈證治第七

問曰。熱在上焦者。因欬爲肺痿。肺痿之病。從何得之。師曰。或從汗出。或從嘔吐。或從消渴。小便利數。或從便難。又被快藥下利。重亡津液。故得之。曰。寸口脈數。其人欬。口中反有濁唾涎沫者何。師曰。爲肺痿之病。若口中辟辟燥。欬即胸中隱隱痛。脈反滑數。此爲肺癰。欬唾膿血。脈數虛者爲肺痿。數實者爲肺癰。

此設爲問答。以辨肺痿肺癰之異。熱在上焦二句。見五臟風寒積聚篇。蓋師有是語。而因之以爲問也。汗出嘔吐。消渴。二便下多。皆足以亡津液而生燥熱。肺虛且熱。則爲痿矣。口中反有濁唾涎沫者。肺中津液。爲熱所迫而上行也。或云肺既痿而不用。則飲食游溢之精氣。不能分布諸經。而但上溢於口。亦通口中辟辟燥者。魏氏以爲肺癰之痰涎膿血。俱蘊蓄結聚於肺臟之內。故口中反乾燥。而但辟辟作空響燥欬而已。然按下肺癰條亦云。其人欬咽燥不渴。多唾濁沫。則肺痿肺癰二證多同。惟胸中痛。脈滑數。唾膿血。則肺癰所獨也。比而論之。痿者萎也。如草木之萎而不榮。爲津燥而肺焦也。癰者壅也。如土之壅而不通。爲熱聚而肺癰也。故其脈有虛實不同。而其數則一也。

問曰。病欬逆。脈之。何以知此爲肺癰。當有膿血。吐之則死。其脈何類。師曰。寸口脈微而數。微則爲風。數則爲熱。微則汗出。數則惡寒。風中於衛。呼氣不入。熱過於營。吸而不出。風傷皮毛。熱傷血脈。風舍於肺。其人則欬。口乾喘滿。咽燥不渴。多唾濁沫。時時振寒。熱之所過。血爲之凝滯。畜結癰膿。吐如米粥。始萌可救。膿成則死。

此原肺癰之由。爲風熱畜結不解也。凡言風脈多浮。或緩。此云微者。風入營而



增熱。故脈不浮而反微。且與數俱見也。微則汗出者。氣傷於熱也。數則惡寒者。陰反在外也。呼氣不入者。氣得風而浮。利出而艱入也。吸而不出者。血得熱而壅。氣亦爲之不伸也。肺熱而壅。故口乾而喘滿。熱在血中。故咽燥而不渴。且肺被熱迫。而反從熱化。爲多唾濁沫。熱盛於裏。而外反無氣。爲時時振寒。由是熱畜不解。血凝不通。而癰膿成矣。吐如米粥。未必便是死證。至浸淫不已。肺葉腐敗。則不可治矣。故曰始萌可救。膿成則死。

上氣面浮腫。肩息。其脈浮大不治。又加利尤甚。上氣喘而躁者。此爲肺脹。欲作風水。發汗則愈。

上氣面浮腫。肩息。氣但升而不降矣。脈復浮大。則陽有上越之機。脈偏盛者偏絕也。又加下利。是陰復從下脫矣。陰陽離決。故當不治。肩息。息搖肩也。上氣喘而躁者。水性潤下。風性上行。水爲風激。氣湊於肺。所謂激而行之。可使在山者也。故曰。欲作風水。發汗令風去。則水復其潤下之性矣。故愈。肺痿。吐涎沫而不效者。其人不渴。必遺尿。小便數。所以然者。以上虛不能制下故也。此爲肺中冷。必眩。多涎唾。甘草乾薑湯以溫之。若服湯已渴者。屬消渴。

此舉肺痿之屬虛冷者。以見病變之不同。蓋肺為嬌臟。熱則氣燥。故不用而痿。冷則氣沮。故亦不用而痿也。遺尿小便數者。肺金不用而氣化無權。斯膀胱無制而津液不藏也。頭眩多涎唾者。經云上虛則眩。又云上焦有寒。其口多涎也。甘草乾薑甘辛合用。為溫肺復氣之劑。服後病不去而加渴者。則屬消渴。蓋小便數而渴者為消。不渴者非下虛。即肺冷也。

甘草乾薑湯方

甘草炙四兩

乾薑炮二兩

右咬咀。以水三升。煮取一升五合。去滓。分溫再服。

欬而上氣。喉中水雞聲。射干麻黃湯主之。

欬而上氣。肺有邪。則氣不降而反逆也。肺中寒飲。上入喉間。為呼吸之氣所激。則作聲如水雞。射干紫苑。款冬降逆氣。麻黃細辛。生薑發邪氣。半夏消飲氣。而以大棗安中。五味斂肺。恐劫散之藥。并傷及其正氣也。

射干麻黃湯方

射干三兩

麻黃

生薑各四兩

細辛

紫苑

款冬花各三兩

大棗七枚

半夏半升

五味半升

右九味。以水一斗二升。先煮麻黃兩沸。去上沫。內諸藥。煮取三升。分溫三服。欬逆上氣。時時吐濁。但坐不得眠。皂莢丸主之。洶濁痰也。時時吐濁者。肺中之痰。隨上氣而時出也。然痰雖出而滿不減。則其本有固而不拔之勢。不迅而掃之不去也。皂莢味辛入肺。除痰之力最猛。飲以棗膏。安其正也。

### 皂莢丸方

皂

莢八兩刮去皮酥炙

右一味。末之。蜜丸梧子大。以棗膏和湯服三丸。日三夜一服。

欬而脈浮者。厚朴麻黃湯主之。欬而脈沉者。澤漆湯主之。

此不詳見證。而但以脈之浮沉爲辨。而異其治。按厚朴麻黃湯。與小青龍加石膏湯大同。則散邪蠲飲之力居多。而厚朴辛溫。亦能助表。小麥甘平。則同五味。欬安正氣者也。澤漆湯以澤漆爲主。而以白前、黃芩、半夏佐之。則下趨之力較

猛。雖生薑、桂枝之辛。亦祇爲下氣降逆之用而已。不能發表也。仲景之意。蓋以欬皆肺邪。而脈浮者氣多居表。故驅之使從外出爲易。脈沉者氣多居裏。故驅之使從下出爲易。亦因勢利導之法也。

厚朴麻黃湯方

厚朴五兩

麻黃四兩

石膏如雞子大

杏仁半升

半夏六升

乾薑

細辛各二兩

小麥一升

五味半升

右九味。以水一斗二升。先煮小麥熟去滓。內諸藥。煮取三升。溫服一升。日三服。澤漆湯方

半夏半升

澤漆三升以東流水五斗煮取一斗五升

紫參

生薑

白前各五兩甘草

黃芩

人參

桂枝各三兩

右九味。㕮咀。內澤漆湯中。煮取五升。溫服五合。至夜盡。火逆上氣。咽喉不利。止逆下氣。麥門冬湯主之。

火熱挾飲致逆。爲上氣。爲咽喉不利。與表寒挾飲上逆者懸殊矣。故以麥冬之寒治火逆。半夏之辛治飲氣。人參、甘草之甘以補益中氣。蓋從外來者其氣多實。故以攻發爲急。從內生者其氣多虛。則以補養爲主也。

### 麥門冬湯方

麥門冬七升

半夏一升

人參

甘草各二兩

粳米三合

大棗十二枚

右六味以水一斗二升。煮取六升。溫服一升。日三夜一服。

肺癰喘不得臥。葶藶大棗瀉肺湯主之。

肺癰喘不得臥。肺氣被迫。亦已甚矣。故須峻藥頓服。以逐其邪。葶藶苦寒。入肺洩氣閉。加大棗甘溫以和藥力。亦猶皂莢丸之飲以棗膏也。

### 葶藶大棗瀉肺湯方

葶藶

丸熬令黃色搗如鷄子大

大棗十二枚

右先以水三升。煮葶藶取二升。去棗內葶藶。煮取一升。頓服。

欬而胸滿振寒。脈數咽乾不渴。時出濁唾腥臭。久久吐膿如米粥者。爲肺癰。桔梗

湯主之。

此條見證。具如前第二條所云。乃肺癰之的證也。此病爲風熱所壅。故以苦梗開之。熱聚則成毒。故以甘草解之。而甘倍於苦。其力似乎太緩。意者癰膿已成。正傷毒潰之時。有非峻劑所可排擊者。故藥不嫌輕耳。後附外臺桔梗白散。治證與此正同。方中桔梗貝母同用。而無甘草之甘緩。且有巴豆之毒熱。似亦以毒攻毒之意。然非病盛氣實。非峻藥不能爲功者。不可僥倖一試也。是在審其形之肥瘠。與病之緩急。而善其用焉。

桔梗湯方

桔梗一兩

甘草二兩

右以水三升。煮取一升。分溫再服。則吐膿血也。

欬而上氣。此爲肺脹。其人喘。目如脫狀。脈浮大者。越婢加半夏湯主之。

外邪內飲。填塞肺中。爲脹爲喘。爲欬而上氣。越婢湯散邪之力多。而蠲飲之力少。故以半夏輔其未逮。不用小青龍者。以脈浮且大。病屬陽熱。故利辛寒。不利辛熱也。目如脫狀者。目睛脹突。如欲脫落之狀。壅氣使然也。

越婢加半夏湯方

麻黃六兩

石膏半斤

生薑三兩

大棗十五枚

甘草二兩

半夏半升

右六味。以水六升。先煮麻黃去上沫。內諸藥。煮取三升。分溫三服。

肺脹欬而上氣。煩躁而喘。脈浮者。心下有水。小青龍加石膏湯主之。

此亦外邪內飲相搏之證。而兼煩躁。則挾有熱邪。麻桂藥中必用石膏。如大青龍之例也。又此條見證。與上條頗同。而心下寒飲。則非溫藥不能開而去之。故不用越婢加半夏。而用小青龍加石膏。溫寒並進。水熱俱損。於法尤為密矣。

小青龍加石膏湯方

麻黃

芍藥

桂枝

細辛

乾薑

甘草各三兩

五味

半夏半升

石膏二兩

右九味。以水一斗。先煮麻黃去上沫。內諸藥。煮取三升。強人服一升。羸者減之。日三服。小兒服四合。

附方

外臺炙甘草湯 治肺痿涎唾多。心中溫溫液液者。方見虛勞

千金甘草湯

甘草一味。以水三升。煮減半。分溫三服。

千金生薑甘草湯 治肺痿欬唾涎沫不止。咽燥而渴。

生薑五兩

人參三兩

甘草四兩

大棗十五枚

右四味。以水七升。煮取三升。分溫三服。

千金桂枝去芍藥加皂莢湯 治肺痿吐涎沫。

桂枝

生薑各三兩

甘草二兩

大棗十枚

皂莢

一枚炙焦去皮

右五味。以水七升。微火煮取三升。分溫三服。

按已上諸方。俱用辛甘溫藥。以肺既枯痿。非濕劑可滋者。必生氣行氣以致其津。蓋津生於氣。氣至則津亦至也。又方下俱云吐涎沫多不止。則非無津液也。乃有津液而不能收攝分布也。故非辛甘溫藥不可。加皂莢者。兼有濁痰也。



外臺桔梗白散。治欬而胸滿振寒脈數。咽乾不渴。時出濁唾腥臭。久久吐膿如米粥者。爲肺癰。

桔梗

貝母各三

巴豆一分去皮熬研如脂

右三味爲散。強人飲服半錢匕。羸者減之。病在膈上者吐膿。在膈下者瀉下。若下多不止。飲冷水一盃則定。

千金葦莖湯。治欬有痰微熱滿。胸中甲錯。是爲肺癰。

葦莖二升

薏苡仁半升

桃仁五十粒

瓜瓣半升

右四味。以水一斗。先煮葦莖得五升。去滓內諸藥。煮取二升。服一升。再服。當吐如膿。

按此方具下熱散結通瘀之力。而重不傷峻。緩不傷懈。可以補桔梗湯。桔梗白散二方之偏。亦良法也。

葶藶大棗瀉肺湯。治肺癰胸滿脹。一身面目浮腫。鼻塞清涕出。不聞香臭酸辛

欬逆上氣喘鳴迫塞。

方見上三日一劑可至三四劑先服小青龍湯一劑乃進

按此方原治肺癰喘不得臥。此兼面目浮。鼻塞清涕。則肺有表邪。宜散。故先服

小青龍一劑乃進。

又按肺癰諸方其於治效各有專長。如葶藶大棗用治癰之始萌而未成者。所謂乘其未集而擊之也。其葦莖湯則因其亂而逐之者耳。桔梗湯勦撫兼行而意在於撫。洵爲王者之師。桔梗白散則搗堅之銳師也。比而觀之。審而行之。庶幾各當而無誤矣。

# 金匱要略心典

漢 南陽 張 機 仲景原著  
清 吳門 尤 怡 在涇集註  
鄞縣 曹赤電 炳章 圈校

## 卷中

### 奔豚氣病脈證治第八

師曰。病有奔豚。有吐膿。有驚怖。有火邪。此四部病。皆從驚發得之。

奔豚具如下文。吐膿有欬與嘔之別。其從驚得之旨未詳。驚怖即驚恐。蓋病從驚得。而驚氣即為病氣也。火邪見後驚悸部。及傷寒太陽篇云。太陽病。以火熏之。不得汗。其人必躁。到經不解。必圜血。名為火邪。然未嘗云從驚發也。驚悸篇云。火邪者。桂枝去芍藥加蜀漆牡蠣龍骨救逆湯主之。此亦是因火邪而發驚。非因驚而發火邪也。即後奔豚證治三條。亦不必定從驚恐而得。蓋是證有雜

病傷寒之異。從驚恐得者。雜病也。從發汗及燒鍼被寒者。傷寒也。其吐膿火邪二病。仲景必別有謂。姑闕之以俟知者。

或云。東方肝木。其病發驚駭。四部病皆以肝為主。奔豚驚怖。皆肝自病。奔豚因驚而發病。驚怖卽驚以爲病也。吐膿者。肝移熱於胃。胃受熱而生癰膿也。火邪者。木中有火。因驚而發。發則不特自燔。且及他藏也。亦通。

師曰。奔豚病從少腹上衝咽喉。發作欲死。復還止。皆從驚恐得之。

前云驚發。此兼言恐者。腎傷於恐。而奔豚爲腎病也。狫水畜也。腎水藏也。腎氣內動。上衝胸喉。如豕之奔。故名奔豚。亦有從肝病得者。以腎肝同處下焦。而其氣並善上逆也。

奔豚氣上衝胸腹痛。往來寒熱。奔豚湯主之。

此奔豚氣之發於肝邪者。往來寒熱。肝藏有邪。而氣通於少陽也。肝欲散。以薑、夏、生葛散之。肝苦急。以甘草緩之。芎、歸、芍藥理其血。黃芩、李根下其氣。桂、苓爲奔豚主藥。而不用者。病不由腎發也。

奔豚湯方

甘草

芎藭

當歸

黃芩

芍藥各二兩

半夏

生薑各四兩

生葛五兩

甘李根白皮一升

右九味。以水二斗。煮取五升。溫服一升。日三夜一服。

發汗後。燒鍼令其汗。鍼處被寒。核起而赤者。必發奔豚。氣從少腹上至心。灸其核上各一壯。與桂枝加桂湯主之。

此腎氣乘外寒而動。發為奔豚者。發汗後。燒鍼復汗。陽氣重傷。於是外寒從鍼孔而入。通於腎。腎氣乘外寒而上衝於心。故須灸其核上。以杜再入之邪。而以桂枝湯外解寒邪。加桂內泄腎氣也。

桂枝加桂湯方

桂枝五兩

芍藥

生薑各三兩

甘草二兩

大棗十二枚

右五味。以水七升。微火煮取三升。去滓。服一升。

發汗後。臍下悸者。欲作奔豚。茯苓桂枝甘草大棗湯主之。

此發汗後心氣不足。而後腎氣乘之。發為奔豚者。臍下先悸。此其兆也。桂枝能伐腎邪。茯苓能泄水氣。然欲治其水。必益其土。故又以甘草大棗補其脾氣。甘瀾水者。揚之令輕。使不益腎邪也。

茯苓桂枝甘草大棗湯方

茯苓半斤

甘草二兩

大棗十五枚

桂枝四兩

右四味。以甘瀾水一斗。先煮茯苓減二升。內諸藥。煮取三升。去滓。溫服一升。日三服。甘瀾水法取水二斗置大盆內以杓揚之。上有珠子五六千顆相逐取用之也。

胸痺心痛短氣病脈證治第九

師曰。夫脈當取太過不及。陽微陰弦。即胸痺而痛。所以然者。責其極虛也。今陽虛知在上焦。所以胸痺心痛者。以其陰弦故也。

陽微。陽不足也。陰弦。陰太過也。陽主開。陰主閉。陽虛而陰干之。即胸痺而痛。痺者。閉也。夫上焦為陽之位。而微脈為虛之甚。故曰責其極虛。以虛陽而受陰邪之擊。故為心痛。

平人無寒熱。短氣不足以息者。實也。

平人素無疾之人也。無寒熱。無新邪也。而乃短氣不足以息。當是裏氣暴實。或痰或食或飲。礙其升降之氣而然。蓋短氣有從素虛宿疾而來者。有從新邪暴遏而得者。二端並否。其爲裏實無疑。此審因察病之法也。

胸痺之病。喘息欬唾。胸背痛。短氣。寸口脈沉而遲。關上小緊數。括樓薤白白酒湯主之。

胸中陽也。而反痺。則陽不用矣。陽不用。則氣之上下不相順接。前後不能貫通。而喘息欬唾。胸背痛。短氣等證見矣。更審其脈。寸口亦陽也。而沉遲。則等於微矣。關上小緊。亦陰弦之意。而反數者。陽氣失位。陰反得而主之。易所謂陰凝於陽。書所謂牝雞司晨也。是當以通胸中之陽爲主。薤白白酒。辛以開痺。溫以行陽。括樓實者。以陽痺之處。必有痰濁阻其間耳。

括樓薤白白酒湯方

括樓實一枚

薤白半升

白酒七升

右三味同煮。取二升。分溫再服。

胸痺不得臥。心痛徹背者。栝樓薤白半夏湯主之。

胸痺不得臥。是肺氣上而不下也。心痛徹背。是心氣塞而不和也。其痺爲尤甚矣。所以然者。有痰飲以爲之援也。故於胸痺藥中。加半夏以逐痰飲。

栝樓薤白半夏湯方

栝樓實一枚

薤白三兩

半夏半升

白酒一斗

右四味同煮。取四升。溫服一升。日三服。

胸痺。心中痞氣。氣結在胸。胸滿。脇下逆搶心。枳實薤白桂枝湯主之。人參湯亦主之。

心中痞氣。氣痺而成痞也。脇下逆搶心。氣逆不降。將爲中之害也。是宜急通其痞結之氣。否則速復其不振之陽。蓋去邪之實。卽以安正。養陽之虛。卽以逐陰。是在審其病之久暫。與氣之虛實而決之。

栝樓薤白桂枝湯方

枳實四枚

薤白半升

桂枝一兩

厚朴四兩

栝樓實一枚



右五味。以水五升。先煮枳實、厚朴。取二升。去滓。內諸藥。煮數沸。分溫三服。  
人參湯方

人參

甘草

乾薑

白朮各三兩

右四味。以水八升。煮取三升。溫服一升。日三服。

胸痺。胸中氣塞短氣。茯苓杏仁甘草湯主之。橘枳生薑湯亦主之。

此亦氣閉氣逆之證。視前條爲稍緩矣。二方皆下氣散結之劑。而有甘淡苦辛之異。亦在酌其強弱而用之。

茯苓杏仁甘草湯方

茯苓三兩

杏仁五十個

甘草一兩

右三味。以水一斗。煮取五升。溫服一升。日三服。不差更服。

橘枳生薑湯方

橘皮一斤

枳實三兩

生薑半斤

右三味。以水五升。煮取二升。分溫再服。

胸痺緩急者。薤白附子散主之。

陽氣者。精則養神。柔則養筋。陽痺不用。則筋失養。而或緩或急。所謂大筋輭短。小筋弛長者。是也。故以薏苡仁舒筋脈。附子通陽痺。

薏苡附子散方

薏苡仁耐十五兩

大附子炮十枚

右二味。杵為散。服方寸匕。日三服。

心中痞。諸逆心懸痛。桂枝生薑枳實湯主之。

諸逆。該痰飲。客氣而言。心懸痛。謂如懸物動搖而痛。逆氣使然也。桂枝、枳實生薑。辛以散逆。苦以泄痞。溫以祛寒也。

桂枝生薑枳實湯方

桂枝

生

薑各三兩

枳

實五兩

右三味。以水六升。煮取三升。分溫三服。

心痛徹背。背痛徹心。烏頭赤石脂丸主之。

心背徹痛。陰寒之氣。遍滿陽位。故前後牽引作痛。沈氏云。邪感心包。氣應外俞。則心痛徹背。邪襲背俞。氣從內走。則背痛徹心。俞臟相通。內外之氣相引。則心

痛徹背。背痛徹心。即經所謂寒氣客於背俞之脈。其俞注於心。故相引而痛是也。烏附椒薑同力協濟。以振陽氣而逐陰邪。取赤石脂者。所以安心氣也。

烏頭赤石脂丸方

烏頭炮一分

蜀椒

乾薑各一兩

附子半兩

赤石脂一兩

右五味末之。蜜丸如桐子大。先食服一丸。日三服。不知稍加服。

附方

九痛丸 治九種心疼。

附子炮三兩

生狼牙

巴豆去皮熬研如膏

乾薑

吳茱萸

人參各一兩

右六味末之。煉蜜丸如梧子大。酒下。強人初服三丸。日三服。弱者二丸。兼治卒中惡。腹脹口不能言。又治連年積冷。流注心胸痛。并冷衝上氣。落馬墜車血疾等皆主之。忌口如常法。

按九痛者。一蟲二注三風四悸五食六飲七冷八熱九去來痛是也。而並以一

藥治之者。豈痛雖有九。其因於積冷結氣所致者多耶。

腹滿寒疝宿食病脈證治第十

跌陽脈微弦。法當腹滿。不滿者必便難。兩胠疼痛。此虛寒從下上也。當以溫藥服之。

跌陽、胃脈也。微弦、陰象也。以陰加陽。脾胃受之。則爲腹滿。設不滿。則陰邪必旁攻。臑脇而下。閉穀道。爲便難。爲兩胠疼痛。然其寒不從外入而從下上。則病自內生。所謂腎虛則寒動於中也。故不當散而當溫。

病者腹滿。按之不痛爲虛。痛者爲實。可下之。舌黃未下者。下之黃自去。

腹滿按之不痛者。無形之氣散而不收。其滿爲虛。按之而痛者。有形之邪結而不行。其滿爲實。實者可下。虛者不可下也。舌黃者熱之徵。下之實去。則黃亦去。腹滿時減復如故。此爲寒。當與溫藥。

腹滿不減者實也。時減復如故者。腹中寒氣得陽而暫開。得陰而復合也。此亦寒從內生。故曰當與溫藥。

病者痿黃。燥而不渴。胸中寒實而利不止者死。

痿黃脾虛而色敗也。氣不至故燥。中無陽故不渴。氣竭陽衰。中土已敗。而復寒結於上。藏脫於下。何恃而可以通之止之乎。故死。

寸口脈弦者。卽脅下拘急而痛。其人嗇嗇惡寒也。

寸口脈弦。亦陰邪加陽之象。故脇下拘急而痛。而寒從外得。與趺陽脈弦之兩胛疼痛有別。故彼兼便難。而此有惡寒也。

夫中寒家喜欠。其人清涕出發熱色和者善嚏。

陽欲上而陰引之則欠。陰欲入而陽拒之則嚏。中寒者陽氣被抑。故喜欠。清涕出發熱色和。則邪不能留。故善嚏。

中寒其人下利。以裏虛也。欲嚏不能。此人肚中寒。

中寒而下利者。裏氣素虛。無爲捍蔽。邪得直侵中藏也。欲嚏不能者。正爲邪逼。旣不能却。又不甘受。於是陽欲動而復止。邪欲去而仍留也。

夫瘦人繞臍痛。必有風冷。穀氣不行。而反下之。其氣必衝。不衝者。心下則痞。瘦人臟虛氣弱。風冷易入。入則穀氣留滯不行。繞臍疼痛。有似裏實。而實爲虛。

冷。是宜溫藥以助脾之行者也。乃反下之。穀出而風冷不與俱出。正乃益虛。邪乃無制。勢必犯上無等。否亦竊據中原也。

病腹滿。發熱十日。脈浮而數。飲食如故。厚朴七物湯主之。

腹滿裏有實也。發熱脈浮數。表有邪也。而飲食如故。則當乘其胃氣未病而攻之。枳朴大黃所以攻裏。桂枝生薑所以攻表。甘草大棗則以其內外並攻。故以之安臟氣。抑以和藥氣也。

厚朴七物湯方

厚朴半斤

甘草

大黃各三兩

大棗十枚

枳實五枚

桂枝二兩

生薑五兩

右七味。以水一斗。煮取四升。溫服八合。日三服。嘔者加半夏五合。下利去大黃。寒多者加生薑至半斤。

腹中寒氣。雷鳴切痛。胸脇逆滿。嘔吐。附子粳米湯主之。

下焦濁陰之氣。不特肆於陰部。而且逆於陽位。中土虛而隄防撤矣。故以附子輔陽驅陰。半夏降逆止嘔。而尤賴粳米甘草。培令土厚。而使斂陰氣也。

附子粳米湯方

附子炮一枚

半夏

粳米各半

甘草一兩

大棗十枚

右五味。以水八升。煮米熟湯成去滓。溫服一升。日三服。

痛而閉者。厚朴三物湯主之。

痛而閉。六府之氣不行矣。厚朴三物湯。與小承氣同。但承氣意在蕩實。故君大黃。三物意在行氣。故君厚朴。

厚朴三物湯方

厚朴八兩

大黃四兩

枳實五枚

右三味。以水一斗二升。先煮二味。取五升。內大黃。煮取三升。溫服一升。以利爲度。

按之心下滿痛者。此爲實也。當下之。宜大柴胡湯。

按之而滿痛者。爲有形之實邪。實則可下。而心下滿痛。則結處尙高。與腹中滿痛不同。故不宜大承氣而宜大柴胡。承氣獨主裏實。柴胡兼通陽痺也。

大柴胡湯方

柴胡半斤

黃芩

芍藥各三兩

半夏半升

枳實四枚

大黃二兩

大棗十二枚

生薑五兩

右八味。以水一斗二升。煮取六升。去滓再煎。溫服一升。日三服。

腹滿不減。減不足言。當下之。宜大承氣湯。

減不足言。謂雖減而不足云減。所以形其滿之至也。故宜大下。已上三方。雖緩急不同。而攻泄則一。所謂中滿者瀉之於內也。

大承氣湯方病見瘕

心腹中大寒痛。嘔不能飲食。腹中滿。上衝皮起。出見有頭足。上下痛而不可觸近者。大建中湯主之。

心腹寒痛。嘔不能食者。陰寒氣盛。而中土無權也。上衝皮起。出見有頭足。上下痛而不可觸近者。陰凝成象。腹中蟲物乘之而動也。是宜大建中藏之陽。以勝上逆之陰。故以蜀椒、乾薑、溫胃下蟲、人參、飴糖、安中益氣也。

大建中湯方



蜀椒二合炒

乾薑四兩

人參一兩

右三味。以水四升。煮取二升。去滓。內膠飴一升。微火煎取二升。分溫再服。如一炊頃。可飲粥二升。後更服。當一日食糜粥。溫覆之。

脇下偏痛發熱。其脈緊弦。此寒也。以溫藥下之。宜大黃附子湯。

脇下偏痛而脈緊弦。陰寒成聚。偏着一處。雖有發熱。亦是陽氣被鬱所致。是以非溫不能已其寒。非下不能去其結。故曰宜以溫藥下之。程氏曰。大黃苦寒。走而不守。得附子。細辛之大熱。則寒性散而走泄之性存是也。

### 大黃附子湯方

大黃三兩

附子三枚

細辛二兩

右三味。以水五升。煮取二升。分溫三服。若強人。煮取二升半。分溫三服。服後如人行四五里。進一服。

寒氣厥逆。赤丸主之。

寒氣厥逆。下焦陰寒之氣。厥而上逆也。茯苓。半夏降其逆。烏頭。細辛散其寒。真朱體重色正。內之以破陰去逆也。

赤丸方

烏頭炮二兩

茯苓四兩

細辛一兩

半夏四兩

右四味末之。內真朱爲色。煉蜜爲丸。如麻子大。先食飲。酒下三丸。日再。夜一服。不知稍增之。以知爲度。

腹滿脈弦而緊。弦則衛氣不行。卽惡寒。緊則不欲食。邪正相搏。卽爲寒疝。寒疝繞臍痛。若發則白津出。手足厥冷。其脈沉緊者。大烏頭煎主之。

弦緊脈皆陰也。而弦之陰從內生。緊之陰從外得。弦則衛氣不行而惡寒者。陰出而痺。其外之陽也。緊則不欲食者。陰入而痺。其胃之陽也。衛陽與胃陽並衰。而外寒與內寒交盛。由是陰反無畏而上衝。陽反不治而下伏。所謂邪正相搏。卽爲寒疝者也。繞臍痛。發則白津出。手足厥冷。其脈沉緊。皆寒疝之的證。白津。汗之淡而不鹹者。爲虛汗也。一作自汗亦通。大烏頭煎大辛大熱。爲復陽散陰之峻劑。故云不可一日更服。

大烏頭煎

烏

頭大者五枚熬去皮不必咀

右以水三升。煮取一升。去滓。內蜜二升。煎令水氣盡。取二升。強人服七合。弱人五合。不差。明日更服。不可一日更服。

寒疝腹中痛。及脇痛裏急者。當歸生薑羊肉湯主之。

此治寒多而血虛者之法。血虛則脈不榮。寒多則脈絀急。故腹脇痛而裏急也。當歸生薑溫血散寒。羊肉補虛益血也。

當歸生薑羊肉湯方

當歸三兩

生薑五兩

羊肉一斤

右三味。以水八升。煮取三升。溫服七合。日三服。若寒多加生薑。成一斤。痛多而嘔者。加橘皮二兩。白朮一兩。加生薑者。亦加水五升。煮取三升。二合服之。

寒疝腹中痛。逆冷。手足不仁。若身疼痛。灸刺諸藥不能治。抵當烏頭桂枝湯主之。腹中痛。逆冷。陽絕於裏也。手足不仁。或身疼痛。陽痺於外也。此爲寒邪兼傷表裏。故當表裏並治。烏頭溫裏。桂枝解外也。徐氏曰。灸刺諸藥不能治者。是或攻其內。或攻其外。邪氣牽制不服也。如醉狀。則榮衛得溫而氣勝。故曰知得吐則陰邪不爲陽所容而上出。故爲中病。

烏頭桂枝湯方

烏頭

右一味。以水二升。煎減半。去滓。以桂枝湯二合解之。令得一升後。初服五合。不知。卽服三合。又不知。復加至五合。其知者如醉狀。得吐者爲中病。其脈數而緊。乃弦狀。知弓弦。按之不移。脈數弦者。當下其寒。脈緊大而遲者。必心下堅。脈大而緊者。陽中有陰。可下之。

脈數爲陽。緊弦爲陰。陰陽參見。是寒熱交至也。然就寒疝言。則數反從弦。故其數爲陰。疑於陽之數。非陽氣生熱之數矣。如就風瘧言。則弦反從數。故其弦爲風。從熱發之弦。而非陰氣生寒之弦者。與此適相發明也。故曰脈數弦者。當下其寒。緊而遲。大而緊亦然。大雖陽脈。不得爲熱。正以形其陰之實也。故曰陽中有陰。可下之。

附方

外臺烏頭湯 治寒疝。腹中絞痛。賊風入攻五臟。拘急不得轉側。發作有時。令人陰縮。手足厥逆。卽大烏頭煎

外臺柴胡桂枝湯 治心腹卒中惡痛者。

柴胡四兩

黃芩

人參

芍藥

桂枝

生薑各半

甘草一兩

半夏一合

大棗六枚

右九味。以水六升。煮取三升。溫服一升。日三服。

外臺走馬湯 治中惡心痛腹脹大便不通。

巴豆

二枚去心熬

杏仁

二枚

右二味。以綿纏搥令碎。熱湯二合。捻取白汁飲之。當下。老小量之。通治飛尸鬼擊病。

問曰。人病有宿食。何以別之。師曰。寸口脈浮而大。按之反濇。尺中亦微而濇。故知有宿食。大承氣湯主之。脈數而滑者實也。此有宿食。下之愈。宜大承氣湯。下利不欲食者。此有宿食。當下之。宜大承氣湯。

寸口脈浮大者。穀氣多也。穀多不能益脾而反傷脾。按之脈反濇者。脾傷而滯。血氣爲之不利也。尺中亦微而濇者。中氣阻滯。而水穀之精氣不能逮下也。是

因宿食爲病。則宜大承氣下其宿食。脈數而滑與浮大同。蓋皆有餘之象。爲穀氣之實也。實則可下。故亦宜大承氣。穀多則傷脾。而水穀不分。穀停則傷胃。而惡聞食臭。故下利不欲食者。知其有宿食當下也。夫脾胃者。所以化水穀而行津氣。不可或止者也。穀止則化絕。氣止則機息。化絕機息。人事不其頓乎。故必大承氣速去其停穀。穀去則氣行。氣行則化續而生以全矣。若徒事消尅。將宿食未去而生氣已消。豈徒無益而已哉。

大承氣湯方

見瘕病

宿食在上脘。當吐之。宜瓜蒂散。

食在下脘者當下。食在上脘者。則不當下而當吐。經云。其高者因而越之也。

瓜蒂散方

瓜蒂一分

赤小豆三分

右二味。杵爲散。以香豉七合。煮取汁。和散一錢匕。溫服之。不吐者少加之。以快吐爲度而止。

脈緊如轉索無常者。宿食也。脈緊。頭痛風寒。腹中有宿食不化也。

脈緊如轉索無常者。緊中兼有滑象。不似風寒外感之緊。爲緊而帶弦也。故寒氣所束者。緊而不移。食氣所發者。乍緊乍滑。如以指轉索之狀。故曰無常。脈緊頭痛風寒者。非既有宿食。而又感風寒也。謂宿食不化。鬱滯之氣。上爲頭痛。有如風寒之狀。而實爲食積類傷寒也。仲景恐人誤以爲外感而發其汗。故舉以示人曰。腹中有宿食不化。意亦遠矣。

### 五臟風寒積聚病脈證并治第十一

肺中風者。口燥而喘。身運而重。冒而腫脹。肺中寒。吐濁涕。肺死臟。浮之虛。按之弱如蔥葉。下無根者死。

肺中風者。津結而氣壅。津結則不上潮而口燥。氣壅則不下行而喘也。身運而重者。肺居上焦。治節一身。肺受風邪。大氣則傷。故身欲動而彌覺其重也。冒者。清肅失降。濁氣反上。爲蒙冒也。腫脹者。輸化無權。水聚而氣停也。肺中寒。吐濁涕者。五液在肺爲涕。寒氣閉肺竅而畜臟熱。則濁涕從口出也。肺死臟者。肺將死而真臟之脈見也。浮之虛。按之弱如蔥葉者。沈氏所謂有浮上之氣。而無

下翕之陰是也。內經云。真肺脈至。大而虛。如以毛羽中人膚。亦浮虛中空。而下復無根之象爾。

肝中風者。頭目暈。兩脇痛。行常偃。令人嗜甘。肝中寒者。兩臂不舉。舌本燥。善太息。胸中痛。不得轉側。食則吐而汗出也。肝死臟。浮之弱。按之如索不來。或曲如蛇行者死。

肝爲木臟。而風復擾之。以風從風動而上行。爲頭目暈也。肝脈布脇肋。風勝則脈急。爲兩脇痛而行常偃也。嗜甘者。肝苦急。甘能緩之。抑木勝而土負乃求助於其味也。肝中寒。兩臂不舉者。肝受寒而筋拘急也。徐氏曰。四肢雖屬脾。然兩臂如枝。木之體也。中寒則木氣困。故不舉。亦通。肝脈循喉嚨之後。中寒者逼熱於上。故舌本燥。肝喜踈泄。中寒則氣被鬱。故喜太息。太息。長息也。肝脈上行者。挾胃貫膈。故胸痛不能轉側。食則吐而汗出也。浮之弱。不榮於上也。按之如索不來。有伏而不起。勁而不柔之象。曲如蛇行。謂雖左右奔引。而不能夭矯上行。亦伏而勁之意。按內經云。真肝脈至。中外急。如循刀刃。責責然。如按琴瑟弦。與此稍異。而其勁直則一也。



肝着。其人常欲蹈其胸上。先未苦時。但欲飲熱。旋覆花湯主之。肝臟氣血鬱滯着而不行。故名肝着。然肝雖着而氣反注於肺。所謂橫之病也。故其人常欲蹈其胸上。胸者肺之位。蹈之欲使氣內鼓而出肝邪。以肺猶橐籥。抑之則氣反出也。先未苦時。但欲飲熱者。欲着之氣得熱則行。迨既着則亦無益矣。旋覆花鹹溫。下氣散結。新絳和其血。葱葉通其陽。結散陽通。氣血以和而肝着愈。肝愈而肺亦和矣。

### 旋覆花湯方

旋覆花三兩

葱十四莖

新絳少許

右三味。以水三升。煮取一升。頓服。

心中風者。翕翕發熱。不能起。心中飢。食即嘔吐。心中寒者。其人苦病。心如噉蒜狀。劇者心痛徹背。背痛徹心。譬如蟲注。其脈浮者。自吐乃愈。心傷者。其人勞倦。即頭面赤而下重。心中痛而自煩。發熱當臍跳。其脈弦。此爲心臟傷所致也。心死。臍浮之實如麻豆。按之益躁疾者死。

翕翕發熱者。心爲陽臟。風入而益其熱也。不能起者。君主病而百骸皆廢也。心

中飢。食則嘔者。火亂於中。而熱格於上也。心中如噉蒜者。寒束於外。火鬱於內。似痛非痛。似熱非熱。懊憹無奈。甚者心背徹痛也。如蟲注者。言其自心而背。自背而心。如蟲之往來交注也。若其脈浮。則寒有外出之機。設得吐則邪去而愈。然此亦氣機自動而然。非可以藥強吐之也。故曰其脈浮者。自吐乃愈。心傷者。其人勞倦。即頭面赤而下重。蓋血虛者。其陽易浮。上盛者。下必無氣也。心中痛而自煩發熱者。心虛失養。而熱動於中也。當臍跳者。心虛於上。而腎動於下也。心之平脈。累累如貫珠。如循環玕。又胃多微曲曰心平。今脈弦。是變溫潤圓利之常。而爲長直勁強之形矣。故曰此爲心臟傷所致也。經云。真心脈至。堅而搏。如循薏苡子。累累然。與此浮之實如麻豆。按之益躁疾者。均爲上下堅緊。而往來無情也。故死。

邪哭使魂魄不安者。血氣少也。血氣少者。屬於心。心氣虛者。其人則畏。合目欲眠。夢遠行而精神離散。魂魄妄行。陰氣衰者爲顛。陽氣衰者爲狂。

邪哭者。悲傷哭泣。如邪所憑。此其標有稠痰濁火之殊。而其本則皆心虛而血氣少也。於是寤寐恐怖。精神不守。魂魄不居。爲顛爲狂。勢有必至者矣。經云。邪

入於陽則狂。邪入於陰則顛。此云陰氣衰者爲顛。陽氣衰者爲狂。蓋必正氣虛而後邪氣入。經言其爲病之故。此言其致病之原也。

脾中風。翕翕發熱。形如醉人。腹中煩重。皮目潤潤而短氣。脾死。臍浮之大堅。按之如覆盂。潔潔狀如搖者死。

風氣中脾。外淫肌肉。爲翕翕發熱。內亂心意。爲形如醉人也。脾脈入腹而其合肉。腹中煩重。邪勝而正不用也。皮目潤潤而短氣。風淫於外而氣阻於中也。李氏曰。風屬陽邪。而氣疎泄。形如醉人。言其面赤而四肢軟也。皮目上下眼胞也。又曰。脈弱以滑。是有胃氣。浮之大堅。則胃氣絕。真臟見矣。按之如覆盂。言其外實而中空無有也。徐氏曰。潔潔狀如搖。是不能成至而欲傾圯之象。故其動非活動。轉非圓轉。非臟氣將絕而何。故死。

跌陽脈浮而濇。浮則胃氣強。濇則小便數。浮濇相搏。大便則堅。其脾爲約。麻仁丸主之。

浮者陽氣多。濇者陰氣少。而跌陽見之。是爲胃強而脾弱。約。約束也。猶弱者受強之約束而氣餒也。又約。小也。胃不輸精於脾。脾乃乾澁而小也。大黃枳實厚

朴。所以下令胃弱。麻仁、杏仁、芍藥。所以滋令脾厚。用蜜丸者。恐速下而并傷及脾也。

麻仁丸方

麻仁二升

芍藥半斤

大黃去皮

枳實各一

厚朴去皮

杏仁一升去皮尖熬別作脂

右六味。末之。煉蜜和丸。梧子大。飲服十丸。日三服。漸加。以知爲度。

腎着之病。其人身體重。腰中冷。如坐水中。形如水狀。反不渴。小便自利。飲食如故。病屬下焦。身勞汗出。衣裏冷濕。久久得之。腰以下冷痛。腹重如帶五千錢。甘薑、苓朮湯主之。

腎受冷濕。着而不去。則爲腎着。身重腰中冷。如坐水中。腰下冷痛。腹重如帶五千錢。皆冷濕着腎。而陽氣不化之徵也。不渴。上無熱也。小便自利。寒在下也。飲食如故。胃無病也。故曰病屬下焦。身勞汗出。衣裏冷濕。久久得之。蓋所謂清濕襲虛。病起於下者也。然其病不在腎之中藏。而在腎之外府。故其治法。不在溫腎以散寒。而在燠土以勝水。甘薑、苓朮。辛溫甘淡。本非腎藥。名腎着者。原其病

也。

甘薑苓朮湯方一名腎着湯

甘草

白

朮各二兩

乾薑

茯苓各四兩

右四味。以水五升。煮取三升。分溫三服。腰中即溫。

腎死。臍浮之堅。按之亂如轉丸。益下入尺中者死。

腎脈本石。浮之堅。則不石而外鼓。按之亂如轉丸。是變石之體而為躁動。真陽

將搏躍而出矣。益下入尺。言按之至尺澤。而脈猶大動也。尺下脈宜伏。今反動。

真氣不固而將外越。反其封蟄之常。故死。

問曰。三焦竭部。上焦竭。善噫。何謂也。師曰。上焦受中焦氣未和。不能消穀。故能噫

耳。下焦竭。即遺溺失便。其氣不和。不能自禁止。不須治。久則愈。

上焦在胃上口。其治在膻中。而受氣於中焦。今胃未和。不能消穀。則上焦所受

者。非精微之氣。而為陳滯之氣矣。故為噫。噫。噉食氣也。下焦在膀胱上口。其治

在臍下。故其氣乏竭。即遺溺失便。然上焦氣未和。不能約束禁制。亦令遺溺失

便。所謂上虛不能制下者也。云不須治者。謂不須治其下焦。俟上焦氣和。久當

自愈。夫上焦受氣於中焦。而下焦復受氣於上焦。推而言之。腎中之元陽不正。則脾胃之轉運不速。是中焦又復受氣於下焦也。蓋雖各有分部。而實相助爲理如此。此造化自然之妙也。

師曰。熱在上焦者。因欬爲肺痿。熱在中焦者。則爲堅。熱在下焦者。則尿血。亦令淋。閼不通。大腸有寒者。多鶩溏。有熱者。便腸垢。小腸有寒者。其人下重便血。有熱者。必痔。

熱在上焦者。肺受之。肺喜清肅而惡煩熱。肺熱則欬。欬久則肺傷而痿也。熱在中焦者。脾胃受之。脾胃者。所以化水穀而行陰陽者也。胃熱則實而鞭。脾熱則燥而閼。皆爲堅也。下焦有熱者。大小腸膀胱受之。小腸爲心之府。熱則尿血。膀胱爲腎之府。熱則癰閼不通也。鶩溏如鶩之後。水糞雜下。大腸有寒。故泌別不職。其有熱者。則腸中之垢。被迫而下也。下重。謂腹中重而下墜。小腸有寒者。能腐而不能化。故下重。陽不化則陰下溜。故便血。其有熱者。則下注廣腸而爲痔。痔。熱疾也。

問曰。病有積。有聚。有穀氣。何謂也。師曰。積者。臟病也。終不移。聚者。府病也。發作有

時。展轉痛移。爲可治。穀氣者。脇下痛。按之則愈。復發爲穀氣。

積者跡也。病氣之屬陰者也。臟屬陰。兩陰相得。故不移。不移者。有專痛之處。而無遷改也。聚則如市中之物。偶聚而已。病氣之屬陽者也。府屬陽。兩陽相比。則非如陰之凝。故寒氣感則發。否則已。所謂有時也。旣無定着。則痛無常處。故展轉痛移。其根不深。故比積爲可治。穀氣者。食氣也。食積太陰。敦阜之氣。抑遏肝氣。故病在脇下。按之則氣行而愈。復發者。飲食不節。則其氣仍聚也。徐氏諸積大法。脈來細而附骨者。乃積也。寸口積在胸中。微出寸口。積在喉中。關上積在臍旁。上關上。積在心下。微下關。積在少腹。尺中積在氣衝。脈出左。積在左。脈出右。積在右。脈兩出。積在中央。各以其部處之。諸積該氣血痰食而言。脈來細而附骨。謂細而沉之至。諸積皆陰故也。又積而不移之處。其氣血榮衛不復上行而外達。則其脈爲之沉細而不起。故歷舉其脈出之所。以決其受積之處。而復益之曰。脈兩出。積在中央。以中央有積。其氣不能分布左右。故脈之見於兩手者。俱沉細而不起也。各以其部處之。謂各隨其積所在之處而分治之耳。

痰飲欬嗽病脈證治第十二

問曰。夫飲有四。何謂也。師曰。有痰飲。有懸飲。有溢飲。有支飲。

問曰。四飲何以爲異。師曰。其人素盛今瘦。水走腸間。漚漚有聲。謂之痰飲。飲後水流在脇下。欬唾引痛。謂之懸飲。飲水流行。歸於四肢。當汗出而不汗出。身體疼重。謂之溢飲。欬逆倚息不得臥。其形如腫。謂之支飲。

穀入而胃不能散其精。則化而爲痰。水入而脾不能輸其氣。則凝而爲飲。其平素飲食所化之精津。凝結而不布。則爲痰飲。痰飲者。痰積於中。而飲附於外也。素盛今瘦。知其精津盡爲痰飲。故不復外充形體。而反下走腸間也。飲水流溢者。水多氣逆。徐氏所謂水爲氣吸不下者是也。其流於脇下者。則爲懸飲。其歸於四肢者。則爲溢飲。懸者懸於一處。溢者溢於四旁。其偏結而上附心肺者。則爲支飲。支飲者。如水之有派。木之有枝。附近於臟而不正中。也。欬逆倚息不得臥者。上迫肺也。

水在心。心下堅築。短氣。惡水不欲飲。

水在肺。吐涎沫。欲飲水。

水在脾。少氣身



重。水在肝。脇下支滿。噦而痛。水在腎。心下悸。

水即飲也。堅築悸動有力。築築然也。短氣者。心屬火而畏水。水氣上逼。則火氣不伸也。吐涎沫者。氣水相激。而水從氣泛也。欲飲水者。水獨聚肺。而諸經失漑也。脾爲水困。故少氣。水淫肌肉。故身重。土本制水。而水盛反能制土也。肝脈布脇肋。水在肝。故脇下支滿。支滿猶偏滿也。噦出於肺。而肝脈上注肺。故噦則相引而痛也。心下悸者。腎水盛而上凌心火也。

夫心下有留飲。其人背寒冷如掌大。留飲者。脇下痛引缺盆。欬嗽則輒已。胸中有留飲。其人短氣而渴。四肢歷節痛。脈沉者有留飲。

留飲即痰飲之留而不去者也。背寒冷如掌大者。飲留之處。陽氣所不入也。魏氏曰。背爲太陽。在易爲艮止之象。一身皆動。背獨常靜。靜處陰邪常客之。所以風寒自外入。多中於背。而陰寒自內生。亦多踞於背也。脇下痛引缺盆者。飲留於肝。而氣連於肺也。欬嗽則輒已者。飲被氣擊而欲移。故輒已。一作欬嗽則轉甚。亦通。蓋即水流脇下。欬唾引痛之謂。氣爲飲滯。故短。飲結者。津液不周。故渴。四肢歷節痛。爲風寒濕在關節。若脈不浮而沉。而又短氣而渴。則知是留

飲爲病。而非外入之邪矣。

膈上病痰滿喘欬唾。發則寒熱背痛腰疼。目泣自出。其人振振身瞤劇。必有伏飲。伏飲亦卽痰飲之伏而不覺者。發則始見也。身熱背痛腰疼。有似外感。而兼見喘滿欬唾。則是活人所謂痰之爲病。能令人憎寒發熱。狀類傷寒者也。目泣自出。振振身瞤動者。飲發而上逼液道。外攻經隧也。

夫病人飲水多。必暴喘滿。凡食少飲多。水停心下。甚者則悸。微者短氣。脈雙弦者。寒也。皆大下後喜虛。脈偏弦者飲也。

飲水過多。水溢入肺者。則爲喘滿。水停心下者。甚則水氣凌心而悸。微則氣被飲抑而短也。雙弦者。兩手皆弦。寒氣周體也。偏弦者。一手獨弦。飲氣偏注也。肺飲不弦。但苦喘短氣。支飲亦喘而不能臥。加短氣。其脈平也。

肺飲飲之在肺中者。五藏獨有肺飲。以其虛而能受也。肺主氣而司呼吸。苦喘短氣。肺病已著。脈雖不弦。可以知其有飲矣。支飲上附於肺。卽同肺飲。故亦喘而短氣。其脈亦平而不必弦也。按後第十四條云。欬家其脈弦。爲有水。夫欬爲肺病。而水卽是飲。而其脈弦。此云肺飲不弦。支飲脈平。未詳何謂。

病痰飲者。當以溫藥和之。心下有痰飲。胸脇支滿目眩。苓桂朮甘湯主之。痰飲陰邪也。爲有形。以形礙虛則滿。以陰冒陽則眩。苓桂朮甘。溫中去濕。治痰飲之良劑。是卽所謂溫藥也。蓋痰飲爲結邪。溫則易散。內屬脾胃。溫則能運耳。

苓桂朮甘湯方

茯苓

桂枝

白朮各三兩

甘草二兩

右四味。以水六升。煮取三升。分溫三服。小便則利。

夫短氣有微飲。當從小便去之。苓桂朮甘湯主之。腎氣丸亦主之。

氣爲飲抑則短。欲引其氣。必蠲其飲。飲水類也。治水必自小便去之。苓桂朮甘。益土氣以行水。腎氣丸。養陽氣以化陰。雖所主不同。而利小便則一也。

苓桂朮甘湯方見上

腎氣丸方見婦人雜病

病者脈伏。其人欲自利。利反快。雖利。心下續堅滿。此爲留飲欲去故也。甘遂半夏湯主之。

脈伏者。有留飲也。其人欲自利。利反快者。所留之飲。從利而減也。雖利。心下續

堅滿者。未盡之飲。復注心下也。然雖未盡而有欲去之勢。故以甘遂、半夏因其勢而導之。甘草與甘遂相反。而同用之者。蓋欲其一戰而留飲盡去。因相激而相成也。芍藥、白蜜不特安中抑緩藥毒耳。

甘遂半夏湯方

甘遂大者三枚

半夏十二枚以水一升煮取半升去滓

芍藥五枚

甘草如指大一枚炙

右四味。以水二升。煮取半升。去滓。以蜜半升和藥汁。煎取八合。頓服之。

脈浮而細滑。傷飲。脈弦數。有寒飲。冬夏難治。脈沉而弦者。懸飲內痛。病懸飲者。十棗湯主之。

傷飲。飲過多也。氣資於飲。而飲多反傷氣。故脈浮而細滑。則飲之徵也。脈弦數而有寒飲。則病與脈相左。魏氏所謂飲自寒而挾自熱是也。夫相左者。必相持。冬則時寒助飲。欲以熱攻。則脈數必甚。夏則時熱助脈。欲以寒治。則寒飲為礙。故曰難治。脈沉而弦。飲氣內聚也。飲內聚而氣擊之。則痛。十棗湯蠲飲破癖。其力頗猛。三因方以三味為末。棗肉和丸。名十棗丸。亦良。

十棗湯方

芫花熬

甘遂

大戟各等分

右三味搗篩。以水一升五合。先煮肥大棗十枚。取八合。去滓。內藥末。強人服一錢匕。羸人服半錢。平旦溫服之。不下者。明日更加半錢。得快利後。糜粥自養。病溢飲者。當發其汗。大青龍湯主之。小青龍湯亦主之。

水氣流行。歸於四肢。當汗出而不汗出。身體重痛。謂之溢飲。夫四肢陽也。水在陰者。宜利。在陽者。宜汗。故以大青龍發汗去水。小青龍則兼內飲而治之者耳。徐氏曰。大青龍合桂麻而去芍藥。加石膏。則水氣不甚而挾熱者宜之。倘飲多而寒伏。則必小青龍為當也。

大青龍湯方

麻黃六兩

桂枝

甘草各二兩

生薑三兩

杏仁四十個

大棗十二枚

石膏如鷄子大一枚

右七味。以水九升。先煮麻黃減二升。去上沫。內諸藥。煮取三升。去滓。溫服一升。取微似汗。汗多者。溫粉粉之。

小青龍湯方

麻黃去節三兩

芍藥三兩

五味子半升

乾薑三兩

甘草炙

細辛

桂枝各三兩

半夏半升

右八味。以水一斗。先煮麻黃減二升。去上沫。內諸藥。煮取三升。去滓。溫服一升。隔間支飲。其人喘滿。心下痞堅。面色黧黑。其脈沉緊。得之數十日。醫吐下之不愈。木防己湯主之。虛者即愈。實者三日復發。復與不愈者。宜木防己湯去石膏加茯苓芒硝湯主之。

支飲上為喘滿。而下為痞堅。則不特礙其肺。抑且滯其胃矣。面色黧黑者。胃中成聚榮衛不行也。脈浮緊者為外寒。沉緊者為裏實。裏實可下。而飲氣之實。非常法可下。痰飲可吐。而飲之在心下者。非吐可去。宜其得之數十日。醫吐下之而不愈也。木防己。桂枝。一苦一辛。並能行水氣而散結氣。而痞堅之處。必有伏陽。吐下之餘。定無完氣。書不盡言。而意可會也。故又以石膏治熱。人參益虛。於法可謂密矣。其虛者外雖痞堅。而中無結聚。即水去氣行而愈。其實者中實有物。氣暫行而復聚。故三日復發也。魏氏曰。後方去石膏加芒硝者。以其既散復

聚。則有堅定之物。留作包囊。故以堅投堅而不破者。卽以栗投堅而卽破也。加茯苓者。亦引飲下行之用耳。

### 木防己湯方

木防己三兩

石

膏如雞子大二枚

桂枝二兩

人參四兩

右四味。以水六升。煮取二升。分溫再服。

### 木防己去石膏加茯苓芒硝湯方

木防己

桂

枝各二兩

茯苓

人參各四兩

芒硝三合

右五味。以水六升。煮取二升。去滓。內芒硝。再微煎。分溫再服。微利則愈。心下有支飲。其人苦冒眩。澤瀉湯主之。

水飲之邪。上乘清陽之位。則爲冒眩。冒者。昏冒而神不清。如有物冒蔽之也。眩者。目眩轉而乍見玄黑也。澤瀉瀉水氣。白朮補土氣以勝水也。高鼓峰云。心下有水飲。格其心火。不能下行。而但上衝頭目也。亦通。

### 澤瀉湯方

澤瀉 瀉五兩 白朮 二兩

右二味。以水二升。煮取一升。分溫再服。

支飲胸滿者。厚朴大黃湯主之。

胸滿疑作腹滿。支飲多胸滿。此何以獨用下法。厚朴、大黃。與小承氣同。設非腹中痛而閉者。未可以此輕試也。

厚朴大黃湯方

厚朴 一尺 大黃 六兩 枳實 四枚

右三味。以水五升。煮取二升。分溫再服。

支飲不得息。葶藶大棗瀉肺湯主之。

不得息。肺滿而氣閉也。葶藶入肺。通閉泄滿。用大棗者。不使傷正也。

葶藶大棗瀉肺湯方

見肺癰

嘔家本渴。渴者為欲解。今反不渴。心下有支飲故也。小半夏湯主之。

此為飲多而嘔者言。渴者飲從嘔去。故欲解。若不渴。則知其支飲仍在。而嘔亦未止。半夏味辛性燥。辛可散結。燥能蠲飲。生薑制半夏之悍。且以散逆止嘔也。



小半夏湯方

半夏一升

生薑半升

右二味。以水七升。煮取一升半。分溫再服。

腹滿。口舌乾燥。此腸間有水氣。已椒蘆黃丸主之。

水既聚於下。則無復潤於上。是以腸間有水氣。而口舌反乾燥也。後雖有水。飲之入。祇足以益下趨之勢。口燥不除。而腹滿益甚矣。防已療水濕。利大小便。椒目治腹滿。去十二種水氣。葶蘆大黃。泄以去其閉也。渴者知胃熱甚。故加芒硝。經云。熱淫於內。治以鹹寒也。

已椒蘆黃丸方

防已

椒目

葶蘆

大黃各一

右四味。末之。蜜丸如梧子大。先食飲服一丸。日三服。稍增。口中有津液渴者。加芒硝半兩。

卒嘔吐。心下痞。膈間有水。眩悸者。小半夏加茯苓湯主之。

飲氣逆於胃。則嘔吐。滯於氣。則心下痞。凌於心。則悸。蔽於陽。則眩。半夏、生薑。止

嘔降逆。加茯苓去其水也。

小半夏加茯苓湯方

半夏一升

生姜半斤

茯苓四兩

右三味。以水七升。煮取一升五合。分溫再服。

假令瘦人。臍下有悸。吐涎沫而顛眩。此水也。五苓散主之。

瘦人不應有水。而臍下悸。則水動於下矣。吐涎沫。則水逆於中矣。甚而顛眩。則水且犯於上矣。形體雖瘦。而病實爲水。乃病機之變也。顛眩卽頭眩。苓、朮、猪、澤、甘、淡滲泄。使腸間之水。從小便出。用桂者。下焦水氣。非陽不化也。曰多服煖水汗出者。蓋欲使表裏分消其水。非挾有表邪而欲兩解之謂。

五苓散方

澤瀉一兩

猪苓

茯苓

白朮各三分

桂枝二分

右五味爲末。白飲服方寸匕。日三服。多服煖水汗出愈。

附方

外臺茯苓飲。治心胸中有停痰宿水。自吐出水後。心胸間虛。氣滿不能食。消痰氣令能食。

茯苓

人參

白朮

枳實

橘皮

生薑

右六味。以水六升。煮取一升八合。分溫三服。如人行八九里進之。

欬家其脈弦。爲有水。十棗湯主之。

脈弦爲水。欬而脈弦。知爲水。飲漬入肺也。十棗湯逐水氣。自大小便去。水去則肺寧而欬愈。按許仁則論飲氣咳者。由所飲之物停滯在胸。水氣上衝。肺得此氣。便成欬嗽。經久不已。漸成水病。其狀不限四時晝夜。遇諸動嗽物。卽劇。乃至雙眼突出。氣如欲斷。汗出大小便不利。吐痰飲涎沫無限。上氣喘急。肩息。每旦眼腫。不得平眠。此卽欬家有水之證也。著有乾棗三味丸方亦佳。大棗六十枚。葶藶一升。杏仁一升。合搗作丸。桑白皮飲下七八丸。日再稍稍加之。以大便通利爲度。

十棗湯方見上

夫有支飲家。欬煩。胸中痛者。不卒死。至一百日或一歲。宜十棗湯。

胸中支飲。擾亂清道。趙氏所謂動肺則欬。動心則煩。搏擊陽氣則痛者是也。其甚者榮衛遏絕。神氣乃亡。爲卒死矣。否則延久不愈。至一百日或一歲。則猶有可治。爲其邪差緩而正得持也。然以經久不去之病。而仍與十棗攻擊之藥者。豈非以支飲不去。則其欬煩胸痛必無止期。與其事敵以苟安。不如悉力一決之。猶或可圖耶。然亦危矣。

久欬數歲。其脈弱者可治。實大數者死。其脈虛者必苦冒。其人本有支飲在胸中故也。治屬飲家。

久欬數歲不已者。支飲漬肺而欬。欬久不已。則欬久不愈也。欬久者其氣必虛。而脈反實大數。則其邪猶盛。以猶盛之邪。而臨已虛之氣。其能久持乎。故死。若脈虛者。正氣固虛。而飲氣亦衰。故可治。然欬雖衰而正不能禦。亦足以上蔽清陽之氣。故其人必苦冒也。此病爲支飲所致。去其飲則病自愈。故曰治屬飲家。欬逆倚息不得臥。小青龍湯主之。

倚息。倚几而息。能俯而不能仰也。肺居上焦而司呼吸。外寒內飲。壅閉肺氣。則

欬逆上氣。甚則但坐不得臥也。麻黃、桂枝散外入之寒。半夏消內積之飲。細辛、乾薑治其欬滿。芍藥、五味、監麻桂之性。使入飲去邪也。

小青龍湯方見上

青龍湯下已。多唾口燥。寸脈沉。尺脈微。手足厥逆。氣從小腹上衝胸咽。手足痺。其面翕熱如醉狀。因復下流陰股。小便難。時復冒者。與茯苓、桂枝、五味、甘草湯治其氣衝。

服青龍湯已。設其人下實不虛。則邪解而病除。若虛則麻黃、細辛、辛甘溫散之。品雖能發越外邪。亦易動人衝氣。衝氣衝脈之氣也。衝脈起於下焦。挾腎脈上行至喉嚨。多唾口燥。氣衝胸咽。面熱如醉。皆衝氣上入之候也。寸沉尺微。手足厥而痺者。厥氣上行而陽氣不治也。下流陰股。小便難。時復冒者。衝氣不歸而仍上逆也。茯苓、桂枝能抑衝氣使之下行。然逆氣非斂不降。故以五味之酸斂其氣。土厚則陰火自伏。故以甘草之甘補其中也。

桂苓五味甘草湯方

桂枝

茯苓各四兩

五味半升

甘草三兩炙

右四味。以水八升。煮取三升。去滓。分溫三服。

衝氣即低。而反更欬胸滿者。用桂苓五味甘草湯。去桂加乾薑、細辛以治其欬滿。服前湯已。衝氣即低。而反更欬胸滿者。下焦衝逆之氣既伏。而肺中伏匿之寒飲續出也。故去桂枝之辛而導氣。加乾薑、細辛之辛而入肺者。合茯苓、五味、甘草。消飲驅寒。以洩滿止欬也。

苓甘五味薑辛湯方

茯苓四兩

甘草

乾薑

細辛兩三

五味子半升

右五味。以水八升。煮取三升。去滓。溫服半升。日三。

欬滿即止。而更復渴。衝氣復發者。以細辛、乾薑為熱藥也。服之當遂渴。而渴反止者。為支飲也。支飲者。法當冒。冒者必嘔。嘔者復內半夏以去其水。

衝脈之火。得表藥以發之。則動。得熱藥以逼之。亦動。而辛熱氣味。既能劫奪胃中之陰。亦能布散積飲之氣。仲景以為渴而衝氣動者。自當治其衝氣。不渴而冒與嘔者。則當治其水飲。故內半夏以去其水。而所以治渴而衝氣動者。惜未

之及也。約而言之。衝氣爲麻黃所發者。治之如桂、苓、五味、甘草。從其氣而導之矣。其爲薑、辛所發者。則宜甘、淡、鹹、寒。益其陰以引之。亦自然之道也。若更用桂枝。必扞格不下。卽下亦必復衝。所以然者。傷其陰故也。

苓甘五味薑辛半夏湯方

茯苓四兩

甘草

細辛

乾

薑

各二兩

半夏

五

味升各半

右六味。以水八升。煮取三升。去滓。溫服半升。日二服。

水去嘔止。其人形腫者。加杏仁主之。其證應內麻黃。以其人遂痺。故不內之。若逆而內之者。必厥。所以然者。以其人血虛。麻黃發其陽故也。

水在胃者。爲冒。爲嘔。水在肺者。爲喘。爲腫。嘔止而形腫者。胃氣和而肺壅未通也。是惟麻黃可以通之。而血虛之人。陽氣無偶。發之最易厥脫。麻黃不可用矣。杏仁味辛能散。味苦能發。力雖不及。與證適宜也。

苓甘五味加薑辛半夏杏仁湯方

茯苓四兩

甘草

乾薑

細

辛

各三兩

五味

半夏

杏仁各半升

右七味。以水一斗。煮取三升。去滓。溫服半升。日三服。

若面熱如醉。此爲胃熱上衝熏其面。加大黃以利之。

水飲有挾陰之寒者。亦有挾陽之熱者。若面熱如醉。則爲胃熱隨經上衝之證。胃之脈上行於面故也。卽於消飲藥中。加大黃以下其熱。與衝氣上逆。其面翕熱如醉者不同。衝氣上行者。病屬下焦陰中之陽。故以酸溫止之。此屬中焦陽明之陽。故以苦寒下之。

苓甘五味加薑辛半杏大黃湯方

茯苓四兩

甘草二兩

乾薑

細辛各三兩

五味

半夏

杏仁各半升

大黃三兩

右八味。以水一斗。煮取三升。去滓。溫服半升。日三服。

先渴後嘔。爲水停心下。此屬飲家。小半夏加茯苓湯主之。

先渴後嘔者。本無嘔病。因渴飲水。水多不下而反上逆也。故曰此屬飲家。小半夏止嘔降逆。加茯苓去其停水。蓋始雖渴而終爲飲。但當治飲而不必治其渴。



也。

小半夏加茯苓湯方見上

### 消渴小便不利淋病脈證治第十三

厥陰之爲病。消渴。氣上衝心。心中疼熱。飢而不欲食。食則吐衄。下之利不止。

此邪熱入厥陰而成消渴。成氏所謂邪愈深者。熱愈甚也。氣上衝心。心中疼熱者。火生於木。肝氣通心也。飢而不欲食者。木喜攻土。胃虛求食。而客熱復不能消穀也。食即吐衄者。衄無食而動。聞食臭而出也。下之利不止者。胃氣重傷。而邪熱下注也。夫厥陰風木之氣。能生陽火。而燥陰津。津虛火實。藏燥無液。求救於水。則爲消渴。消渴者。水入不足以制火。而反爲火所消也。

寸口脈浮而遲。浮即爲虛。遲即爲勞。虛則衛氣不足。勞則榮氣竭。趺陽脈浮而數。浮即爲氣。數即消穀而大堅。氣盛則溲數。溲數則堅。堅數相搏。即爲消渴。

診寸口而知榮衛之並虛。診趺陽而知胃氣之獨盛。合而觀之。知爲虛勞內熱。而成消渴也。夫所謂氣盛者。非胃氣盛也。胃中之火盛也。火盛則水穀去而胃

乃堅。如土被火燒而堅硬如石也。故曰數卽消穀而大堅。胃旣堅硬。水入不能浸潤。但從旁下轉。而又爲火氣所迫而不留。故曰氣盛則溲數。溲數則堅。愈數愈堅。愈堅愈數。是以飲水多而渴不解也。

男子消渴。小便反多。以飲一斗。小便亦一斗。腎氣丸主之。

男子以腎爲事。腎中有氣。所以主氣化。行津液。而潤心肺者也。此氣旣虛。則不能上至。氣不至。則水亦不至。而心肺失其潤矣。蓋水液屬陰。非氣不至。氣雖屬陽。中實含水。水之與氣。未嘗相離也。腎氣丸中有桂附。所以斡旋腎中頽墮之氣。而使上行心肺之分。故名曰腎氣。不然。則滋陰潤燥之品。同於飲水無濟。但益下趨之勢而已。馴至陽氣全消。有降無升。飲一溲二而死不治。夫豈知飲入於胃。非得腎中真陽。焉能游溢精氣。而上輸脾肺耶。按消渴證。有太陰厥陰陽明少陰之異。係太陰者。心熱移肺也。係厥陰者。風勝則乾。抑火從木出也。係陽明者。火燔而土燥也。係少陰者。水虛不能制火也。然此不言水虛不能制火。而言火虛不能化水。則法之變而論之精也。惟火不化水。故飲一斗。水亦一斗。不然。未有不爲火所消者矣。推而言之。厥陰內熱之渴。

水爲熱所消。其小便必不多。陽明內堅之渴。水入不能內潤而從旁轉。其小便雖數而出亦必少也。

腎氣丸方

見婦人雜病

脈浮。小便不利。微熱消渴者。宜利小便發汗。五苓散主之。

熱渴飲水。水入不能已其熱。而熱亦不能消其水。於是水與熱結。而熱浮水外。故小便不利。而微熱消渴也。五苓散利其與熱俱結之水。兼多飲煖水取汗。以去其水外浮溢之熱。熱除水去。渴當自止。

五苓散方

見痰飲

渴欲飲水。水入則吐者。名曰水逆。五苓散主之。

熱渴飲水。熱已消而水不行。則逆而成嘔。乃消渴之變證。曰水逆者。明非消渴而爲水逆也。故亦宜五苓散去其停水。

渴欲飲水不止者。文蛤散主之。

熱渴飲水。水入不能消其熱。而反爲熱所消。故渴不止。文蛤味鹹性寒。寒能除熱。鹹能潤下。用以折炎上之勢。而除熱渴之疾也。

文蛤散方

文蛤五兩

右一味杵爲散。以沸湯五合。和服方寸匕。淋之爲病。小便如粟狀。小腹弦急。痛引臍中。

淋病有數證。云小便如粟狀者。卽後世所謂石淋是也。乃膀胱爲火熱燔灼。水液結爲滓質。猶海水煎熬而成鹹鹼也。小腹弦急。痛引臍中者。病在腎與膀胱也。按巢氏云。淋之爲病。由腎虛而膀胱熱也。腎氣通於陰。陰水液下流之道也。膀胱爲津液之府。腎虛則小便數。膀胱熱則水下澁。數而且澁。淋瀝不宣。故謂之淋。其狀小便出少起多。小腹弦急。痛引於臍。又有石淋、勞淋、血淋、氣淋、膏淋之異。詳見本論。其言頗爲明晰。可補仲景之未備。

跌陽脈數。胃中有熱。卽消穀引飲。大便必堅。小便則數。胃中有熱。消穀引飲。卽後世所謂消穀善飢。爲中消者是也。胃熱則液乾。故大便堅。便堅則水液獨走前陰。故小便數。亦卽前條消渴胃堅之證。而列於淋病之下。疑錯簡也。

淋家不可發汗。發汗則便血。

淋家熱結在下。而反發其汗。熱氣乘心之虛。而內擾其陰。則必便血。

小便不利者。有水氣。其人若渴。括樓瞿麥丸主之。

此下焦陽弱氣冷。而水氣不行之證。故以附子益陽氣。茯苓瞿麥行水氣。觀方後云。腹中溫為知。可以推矣。其人若渴。則是水寒偏結於下。而燥火獨聚於上。故更以薯蕷括樓根。除熱生津液也。夫上浮之燄。非滋不熄。下積之陰。非煖不消。而寒潤辛溫。並行不悖。此方為良法矣。欲求變通者。須於此三復焉。

### 括樓瞿麥丸方

薯蕷

茯苓各三兩

括樓根二兩

附子炮一枚

瞿麥一兩

右五味末之。煉蜜丸如梧子大。飲服二丸。日三服。不知。增至七八丸。以小便利。腹中溫為知。

小便不利。蒲灰散主之。滑石白魚散。茯苓戎鹽湯。并主之。

蒲。香蒲也。寧原云。香蒲去濕熱。利小便。合滑石為清利小便之正法也。別錄云。

白魚開胃下氣。去水氣。血餘療轉胞。小便不通。合滑石爲滋陰益氣。以利其小便者也。綱目戎鹽卽青鹽。鹹寒入腎。以潤下之性。而就滲利之職。爲驅除陰分水濕之法也。仲景不詳見證。而並出三方。以聽人之隨證審用。殆所謂引而不發者歟。

蒲灰散方

蒲灰半分

滑石三分

右二味。杵爲散。飲服方寸匕。日三服。

滑石白魚散方

滑石

亂髮燒

白魚各二分

右三味。杵爲散。飲服方寸匕。日三服。

茯苓戎鹽湯方

茯苓半斤

白朮二兩

戎鹽彈丸大一枚

右三味。先將茯苓、白朮煎成。入戎鹽再煎。分溫三服。渴欲飲水。口乾燥者。白虎加人參湯主之。

此肺胃熱盛傷津。故以白虎清熱。人參生津止渴。蓋卽所謂上消兩消之證。疑亦錯簡於此也。

白虎加人參湯方見渴病

脈浮發熱。渴欲飲水。小便不利者。猪苓湯主之。

此與前五苓散病證同。而藥則異。五苓散行陽之化。熱初入者宜之。猪苓湯行陰之化。熱入久而陰傷者宜之也。

按渴欲飲水。本文共有五條。而脈浮發熱。小便不利者。一用五苓。爲其水與熱結故也。一用猪苓。爲其水與熱結。而陰氣復傷也。其水入則吐者。亦用五苓。爲其熱消而水停也。渴不止者。則用文蛤。爲其水消而熱在也。其口乾燥者。則用白虎加人參。爲其熱甚而津傷也。此爲同源而異流者。治法亦因之各異如此。學者所當細審也。

猪苓湯方

猪苓去皮

茯苓

阿膠

滑石

澤瀉各一

右五味。以水四升。先煮四味。取二升。去滓。內膠烱消。溫服七合。日三服。

### 水氣病脈證并治第十四

師曰。病有風水。有皮水。有正水。有石水。有黃汗。風水其脈自浮。外證骨節疼痛惡風。皮水其脈亦浮。外證胛腫。按之沒指。不惡風。其腹如鼓。不渴。當發其汗。正水其脈沉遲。外證自喘。石水其脈自沉。外證腹滿不喘。黃汗其脈沉遲。身發熱。胸滿。四肢頭面腫。久不愈。必致癰膿。

風水。水爲風激。因風而病水也。風傷皮毛。而濕流關節。故脈浮。惡風而骨節疼痛也。皮水。水行皮中。內合肺氣。故其脈亦浮。不兼風。故不惡風也。其腹如鼓。卽內經鑿鑿然不堅之意。以其病在皮膚。而不及腸臟。故外有脹形。而內無滿喘也。水在皮者。宜從汗解。故曰當發其汗。正水。腎臟之水自盛也。石水。水之聚而不行者也。正水乘陽之虛而侵及上焦。故脈沉遲而喘。石水因陰之盛而結於少腹。故脈沉腹滿而不喘也。黃汗。汗出沾衣如蘘汁。得之濕熱交病。而濕居熱外。其盛於上而陽不行。則身熱胸滿。四肢頭面腫。久則侵及於裏而榮不通。則



逆於肉理而爲癰膿也。

脈浮而洪。浮則爲風。洪則爲氣。風氣相搏。風強則爲癰疹。身體爲癢。癢者爲泄風。久爲痂癩。氣強則爲水。難以俛仰。風氣相擊。身體洪腫。汗出乃愈。惡風則虛。此爲風水。不惡風者。小便通利。上焦有寒。其口多涎。此爲黃汗。

風。天之氣。氣。人之氣。是皆失其和者也。風氣相搏。風強則氣從風而侵淫肌體。故爲癰疹。氣強則風從氣而鼓湧水液。故爲水。風氣並強。兩相搏擊。而水液從之。則爲風水。汗之則風去而水行。故曰汗出乃愈。然風水之病。其狀與黃汗相似。故仲景於此復辨其證。以惡風者爲風水。不惡風者爲黃汗。而風水之脈浮。黃汗之脈沉。更不必言矣。

寸口脈沉滑者。中有水氣。面目腫大有熱。名曰風水。視人之目窠上微腫。如蠶新臥起狀。其頸脈動。時時欬。按其手足上。陷而不起者。風水。

風水其脈自浮。此云沉滑者。乃水脈。非風脈也。至面目腫大有熱。則水得風而外浮。其脈亦必變而爲浮矣。仲景不言者。以風水該之也。目窠上微腫。如蠶新臥起狀者。內經所謂水爲陰。而目下亦陰。聚水者必微腫。先見於目下是也。頸

脈動者。頸間人迎脈動甚。風水。上湊故也。時時欬者。水漬入肺也。按其手足上陷而不起。與內經以手按其腹。隨手而起。如裹水之狀者不同。然腹中氣大。而肢間氣細。氣大則按之隨手而起。氣細則按之窅而不起。而其浮腫則一也。太陽病。脈浮而緊。法當骨節疼痛。反不疼。身體反重而痠。其人不渴。汗出即愈。此爲風水。惡寒者。此爲極虛。發汗得之。渴而不惡寒者。此爲皮水。身腫而冷。狀如周痺。胸中窒。不能食。反聚痛。暮躁不得眠。此爲黃汗。痛在骨節。欬而喘。不渴者。此爲肺脹。其狀如腫。發汗則愈。然諸病此者。渴而下利。小便數者。皆不可發汗。太陽有寒。則脈緊。骨疼。有濕則脈濡。身重。有風則脈浮。體痠。此明辨也。今得傷寒。脈而骨節不疼。身體反重而痠。即非傷寒。乃風水外勝也。風水在表而非裏。故不渴。風固當汗。水在表者亦宜汗。故曰汗出即愈。然必氣盛而實者。汗之乃愈。不然則其表益虛。風水雖解。而惡寒轉增矣。故曰惡寒者。此爲極虛。發汗得之。若其渴而不惡寒者。則非病風。而獨病水。不在皮外。而在皮中。視風水爲較深矣。其證身腫而冷。狀如周痺。周痺爲寒濕痺。其陽皮水爲水氣淫於膚也。胸中窒。不能食者。寒襲於外。而氣窒於中也。反聚痛。暮躁不得眠者。熱爲寒鬱。而

寒甚於暮也。寒濕外淫。必流關節。故曰此爲黃汗。痛在骨節也。其欬而喘不渴者。水寒傷肺。氣攻於表。有如腫病。而實同皮水。故曰發汗則愈。然此諸病。若其人渴而下利。小便數者。則不可以水氣當汗而槩發之也。仲景丁寧之意。豈非慮人之津氣先亡耶。

或問前二條云。風水外證。骨節疼。此云骨節反不疼。身體反重而痠。前條云皮水不渴。此云渴何也。曰。風與水合而成病。其流注關節者。則爲骨節疼痛。其侵淫肌體者。則骨節不疼。而身體痠重。由所傷之處不同故也。前所云皮水不渴者。非言皮水本不渴也。謂腹如鼓而不渴者。病方外盛而未入裏。猶可發其汗也。此所謂渴而不惡寒者。所以別於風水之不渴而惡風也。程氏曰。水氣外留於皮。內薄於肺。故令人渴是也。

裏水者。一身面目黃腫。其脈沉。小便不利。故令病水。假令小便自利。此亡津液。故令渴。越婢加朮湯主之。方見中風

裏水。水從裏積。與風水不同。故其脈不浮而沉。而盛於內者。必溢於外。故一身面目悉黃腫也。水病小便當不利。今反自利。則津液消亡。水病已而渴病起矣。

越婢如朮。是治其水。非治其渴也。以其身面悉腫。故取麻黃之發表。以其腫而  
且黃。知其濕中有熱。故取石膏之清熱。與白朮之除濕。不然則渴而小便利者。  
而顧犯不可發汗之戒耶。或云此治小便利。黃腫未去者之法。越婢散肌表之  
水。白朮止渴生津也。亦通。

跌陽脈當伏。今反緊。本自有寒疝瘕。腹中痛。醫反下之。即胸滿短氣。跌陽脈當  
伏。今反數。本自有熱消穀。小便數。今反不利。此欲作水。

跌陽雖係胃脈。而出於陰部。故其脈當伏。今反緊者。以其腹中宿有寒疾故也。  
寒則宜溫而反下之。陽氣重傷。即胸滿短氣。其反數者。以其胃中有熱故也。熱  
則當消穀而小便數。今反不利。則水液日積。故欲作水。夫陰氣傷者。水爲熱畜  
而不行。陽氣竭者。水與寒積而不下。仲景並舉二端。以見水病之原有如此也。  
寸口脈浮而遲。浮脈則熱。遲脈則潛。熱潛相搏。名曰沉。跌陽脈浮而數。浮脈即熱。  
數脈即止。熱止相搏。名曰伏。沉伏相搏。名曰水。沉則絡脈虛。伏則小便難。虛難相  
搏。水走皮膚。即爲水矣。

熱而潛。則熱有內伏之勢。而無外發之機矣。故曰沉。熱而止。則熱有留滯之象。

而無運行之道矣。故曰伏。熱留於內而不行。則水氣因之而畜。故曰沉伏相搏。名曰水。熱留於內。則氣不外行。而絡脈虛。熱止於中。則陽不下化。而小便難。以不化之水。而當不行之氣。則惟有浸淫軀殼而已。故曰虛難相搏。水走皮膚。卽爲水矣。此亦所謂陰氣傷者。水爲熱畜不下者也。寸口脈弦而緊。弦則衛氣不行。卽惡寒。水不沾流。走於腸間。少陰脈緊而沉。緊則爲痛。沉則爲水。小便卽難。

此二條並陽衰陰勝之證。而寸口則主衛氣。少陰則主腎陽。主衛氣者。寒從外得。而陽氣被抑。主腎陽者。寒自內生。而氣化不速。亦卽所謂陽氣竭者。水與寒積而不行者也。

脈得諸沉。當責有水。身體腫重。水病脈出者死。

水爲陰。陰盛故令脈沉。又水行皮膚。榮衛被遏。亦令脈沉。若水病而脈出。則真氣反出邪水之上。根本脫離。而病氣獨勝。故死。出與浮迥異。浮者盛於上而弱於下。出則上有而下絕無也。

夫水病人目下有臥蠅。面目鮮澤。脈伏。其人消渴。病水腹大。小便不利。其脈沉絕。

者有水。可下之。

目下有臥蠶者。目下微腫。如蠶之臥。經所謂水在腹者。必使目下腫也。水氣足以潤皮膚而壅榮衛。故面目鮮澤。且脈伏不起也。消渴者。陽氣被鬱而生熱也。病水。因水而爲病也。夫始因水病而生渴。繼因消渴而益病水。於是腹大。小便不利。其脈沉絕。水氣瘀壅而不行。脈道被遏而不出。其勢亦太甚矣。故必下其水。以通其脈。

問曰。病下利後渴飲水。小便不利。腹滿因腫者。何也。答曰。此法當病水。若小便自利。及汗出者。自當愈。

下利後陰亡無液。故渴欲飲水。而土虛無氣。不能制水。則又小便不利。腹滿因腫。知其將聚水爲病矣。若小便利。則從下通。汗出則從外泄。水雖聚而旋行。故病當愈。然其所以汗與利者。氣內復而機自行也。豈辛散淡滲所能強責之哉。心水者。其身重而少氣。不得臥。煩而躁。其人陰腫。肝水者。其腹大。不能自轉側。脇下腹痛。時時津液微生。小便續通。肺水者。其身腫。小便難。時時鴨漚。脾水者。其腹大。四肢苦重。津液不生。但苦少氣。小便難。腎水者。其腹大。臍腫腰痛。不

得溺。陰下濕如牛鼻上汗。其足逆冷。面反瘦。

心陽藏也。而水困之。其陽則弱。故身重而少氣也。陰腫者。水氣隨心氣下交於腎也。肝病喜歸脾。脾受肝之水而不行。則腹大不能轉側也。肝之府在脇。而氣連少腹。故脇下腹痛也。時時津液微生。小便續通者。肝喜衝逆。而主踈泄。水液隨之而上下也。肺主氣化。治節一身。肺以其水行於身。則腫。無氣以化其水。則小便難。鴨澹如鴨之後。水糞雜下也。脾主腹而氣行四肢。脾受水氣。則腹大四肢重。津氣生於穀。穀氣運於脾。脾濕不運。則津液不生而少氣。小便難者。濕不行也。身半以下。腎氣主之。水在腎。則腰痛。臍腫。腹大也。不得溺。陰下濕如牛鼻上汗。其足逆冷者。腎為陰。水亦為陰。兩陰相得。陽氣不行。而濕寒獨勝也。面反瘦者。面為陽。陰盛於下。則陽衰於上也。

師曰。諸有水者。腰以下腫。當利小便。腰以上腫。當發汗。乃愈。

腰以下為陰。陰難得汗而易下泄。故當利小便。腰以上為陽。陽易外泄。故當發汗。各因其勢而利導之也。

師曰。寸口脈沉而遲。沉則為水。遲則為寒。寒水相搏。趺陽脈伏。水穀不化。脾氣衰

則驚漉。胃氣衰則身腫。少陽脈卑。少陰脈細。男子則小便不利。婦人則經水不通。經爲血。血不利則爲水。名曰血分。

此合診寸口。趺陽而知爲寒。水勝而胃陽不行也。胃陽不行。則水穀不化。水穀不化。則脾胃俱衰。脾氣主裏。故衰則驚漉。胃氣主表。故衰則身腫也。少陽者。生氣也。少陰者。地道也。而俱受氣於脾胃。脾胃衰。則少陽脈卑。而生氣不榮。少陰脈細。而地道不通。男子則小便不利。婦人則經血不通。而其所以然者。則皆陽氣不行。陰氣乃結之故。曰血分者。謂雖病於水。而實出於血也。

師曰。寸口脈沉而數。數則爲出。沉則爲入。出則爲陽實。入則爲陰結。趺陽脈微而弦。微則無胃氣。弦則不得息。少陰脈沉而滑。沉則爲在裏。滑則爲實。沉滑相搏。血結胞門。其瘕不寫。經絡不通。名曰血分。

此合診寸口。趺陽。少陰。而知其氣壅於陽。胃虛於中。而血結於陰也。出則爲陽實者。肺被熱而治不行也。弦則不得息者。胃受制而氣不利也。夫血結在陰。惟陽可以通之。而胃虛受制。肺窒不行。更何恃而開其結。行其血耶。惟有凝聚癥閉。轉成水病而已。故曰血結胞門。其瘕不寫。經絡不通。名曰血分。亦如上條所



云也。但上條之結。爲血氣虛少而行之不利也。此條之結。爲陰陽壅鬱而欲行不能也。仲景並列於此。以見血分之病。虛實不同如此。

問曰。病有血分。水分。何也。師曰。經水前斷。後病水。名曰血分。此病難治。先病水。後經水斷。名曰水分。此病易治。何以故。去水其經自下。

此復設問答。以明血分。水分之異。血分者。因血而病。爲水也。水分者。因水而病。及血也。血病深而難通。故曰難治。水病淺而易行。故曰易治。

問曰。病者苦水。面目身體四肢皆腫。小便不利。脈之不言水。反言胸中痛。氣上衝咽。狀如炙肉。當微咳喘。審如師言。其脈何類。師曰。寸口脈沉而緊。沉爲水。緊爲寒。沉緊相搏。結在關元。始時尙微。年盛不覺。陽衰之後。榮衛相干。陽損陰盛。結寒微動。腎氣上衝。咽喉塞噎。脇下急痛。醫以爲留飲。而大下之。氣繫不去。其病不除。復重吐之。胃家虛煩。咽燥欲飲水。小便不利。水穀不化。面目手足浮腫。又與葶藶丸下水。當時如小差。食飲過度。腫復如前。胸脇苦痛。象若奔豚。其水揚溢。則欬喘逆。當先攻擊衝氣。令止。乃治欬。欬止。其喘自差。先治新病。病當在後。此水氣先得。而衝氣後發之證。面目肢體俱腫。咽喉噎塞。胸脇滿痛。有似留飲。

而實挾衝氣也。衝氣宜溫降。不宜攻下。下之亦未必去。故曰氣繫不去。其病不除。醫乃不知而復吐之。胃氣重傷。胃液因盡。故咽燥欲飲水。而小便不利。水穀不化。且聚水而成病也。是當養胃氣以行水。不宜徑下其水。水雖下。終必復聚。故暫差而尋復如前也。水聚於中。氣衝於下。其水揚溢。上及肺位。則咳且喘逆。是不可攻其水。當先止其衝氣。衝氣既止。然後水氣可去。水去則欬與喘逆俱去矣。先治新病。病當在後者。謂先治其衝氣。而後治其水氣也。

風水脈浮身重。汗出惡風者。防己黃耆湯主之。腹痛者加芍藥。

此條義詳痙濕喝篇。雖有風水風濕之異。然而水與濕非二也。

防己黃耆湯方

見痙

風水惡風。一身悉腫。脈浮不渴。續自汗出。無大熱。越婢湯主之。

此與上條證候頗同。而治特異。麻黃之發陽氣。十倍防己。乃反減黃耆之實表。增石膏之辛寒。何耶。脈浮不渴。或作脈浮而渴。渴者熱之內熾。汗爲熱逼。與表虛出汗不同。故得以石膏清熱。麻黃散腫。而無事兼固其表也。

越婢湯方

麻黃六兩

石膏半斤

生薑三兩

甘草二兩

大棗十二枚

右五味。以水六升。先煮麻黃去上沫。內諸藥。煮取三升。分溫三服。惡風加附子一枚。風水加朮四兩。

皮水爲病。四肢腫。水氣在皮膚中。四肢聶聶動者。防己茯苓湯主之。

皮中水氣。浸淫四末。而壅遏衛氣。氣水相逐。則四肢聶聶動也。防己、茯苓、善驅水氣。桂枝得茯苓。則不發表而反行水。且合黃耆、甘草。助表中之氣。以行防己、茯苓之力也。

防己茯苓湯方

防己

黃耆

桂枝各三兩

茯苓六兩

甘草二兩

右五味。以水六升。煮取二升。分溫三服。

裏水。越婢加朮湯主之。甘草麻黃湯亦主之。

裏水。即前一身面目黃腫。脈沉。小便不利之證。越婢湯義見前。甘草、麻黃亦內

助土氣。外行水氣之法也。

越婢加朮湯方見上

甘草麻黃湯方

甘草二兩

麻黃四兩

右二味。以水五升。先煮麻黃去上沫。內甘草。煮取三升。溫服一升。重覆汗出。不汗再服。慎風寒。

水之爲病。其脈沉小。屬少陰。浮者爲風。無水虛脹者爲氣。水發其汗即已。脈沉者。宜麻黃附子湯。浮者宜杏子湯。

水氣脈沉小者屬少陰。言腎水也。脈浮者爲風。即風水也。其無水而虛脹者。則爲氣病而非水病矣。氣病不可發汗。水病發其汗則已。然而發汗之法。亦有不  
同。少陰則當溫其經。風水即當通其肺。故曰脈沉者宜麻黃附子湯。脈浮者宜杏子湯。沉謂少陰。浮謂風也。

麻黃附子湯方

麻黃三兩

甘草二兩  
炮

附子一枚

右三味。以水七升。先煮麻黃去上沫。內諸藥。煮取二升半。溫服八合。日三服。

杏子湯方

缺恐是麻黃杏  
仁甘草石膏湯

厥而皮水者。蒲灰散主之。

厥而皮水者。水邪外盛。隔其身中之陽。不行於四肢也。此厥之成於水者。去其水則厥自愈。不必以附子、桂枝之屬助其內伏之陽也。蒲灰散義見前。

蒲灰散方

見消渴

問曰。黃汗之爲病。身體腫。發熱。汗出而渴。狀如風水。汗沾衣。色正黃。如蘗汁。脈自沉。何從得之。師曰。以汗出入水中浴。水從汗孔入得之。宜耆芍桂酒湯主之。

黃汗之病。與風水相似。但風水脈浮。而黃汗脈沉。風水惡風。而黃汗不惡風。爲異。其汗沾衣。色正黃。如蘗汁。則黃汗之所獨也。風水爲風氣外合水氣。黃汗爲水氣內遏熱氣。熱被水遏。水與熱得。交蒸互鬱。汗液則黃。黃耆、桂枝、芍藥。行陽益陰。得酒則氣益和。而行愈周。蓋欲使榮衛大行。而邪氣畢達耳。云苦酒阻者。欲行而未得遽行。久積藥力。乃自行耳。故曰服至六七日乃解。按前第二條云。小便通利。上焦有寒。其口多涎。此爲黃汗。第四條云。身腫而冷。

狀如周痺。此云黃汗之病。身體腫。發熱汗出而渴。後又云劇者不能食。身疼重。小便不利。何前後之不侔也。豈新久微甚之辨歟。夫病邪初受。其未鬱爲熱者。則身冷。小便利。口多涎。其鬱久熱甚者。則身熱而渴。小便不利。亦自然之道也。耆芍桂酒湯方

黃耆五兩

芍藥

桂枝各三兩

右三味。以苦酒一升。水七升相合。煮取三升。溫服一升。當心煩。服至六七日乃解。若心煩不止者。以苦酒阻故也。

黃汗之病。兩脛自冷。假令發熱。此屬歷節。食已汗出。又身嘗暮盜汗出者。此榮氣也。若汗出已反發熱者。久久其身必甲錯。發熱不止者。必生惡瘡。若身重。汗出已輒輕者。久久必身潤。潤卽胸中痛。又從腰以上汗出。下無汗。腰臑弛痛。如有物在皮中狀。劇者不能食。身疼重。煩躁。小便不利。此爲黃汗。桂枝加黃耆湯主之。

兩脛自冷者。陽被鬱而不下通也。黃汗本發熱。此云假令發熱。便爲歷節者。謂脛熱。非謂身熱也。蓋歷節黃汗。病形相似。而歷節一身盡熱。黃汗則身熱而脛冷也。食已汗出。又身嘗暮盜汗出者。榮中之熱。因氣之動而外浮。或乘陽之

間而潛出也。然黃汗鬱證也。汗出則有外達之機。若汗出已反發熱者。是熱與汗俱出於外。久而肌膚甲錯。或生惡瘡。所謂自內之外而盛於外也。若汗出已身重輒輕者。是濕與汗俱出也。然濕雖出而陽亦傷。久必身潤而胸中痛。若從腰以上汗出。下無汗者。是陽上通而不下通也。故腰臍弛痛。如有物在皮中狀其病之劇。而未經得汗者。則窒於胸中而不能食。壅於肉理而身體重。鬱於心而煩躁。閉於下而小便不通利也。此其進退微甚之機。不同如此。而要皆水氣傷心之所致。故曰此為黃汗。桂枝黃耆亦行陽散邪之法。而尤賴飲熱稀粥取汗。以發交鬱之邪也。

桂枝加黃耆湯方

桂枝

芍藥

甘草

黃耆各二兩

生薑三兩

大棗十二枚

右六味。以水八升。煮取三升。溫服一升。須臾啜熱稀粥一升餘。以助藥力。溫覆取微汗。若不汗更服。

師曰。寸口脈遲而濇。遲則為寒。濇為血不足。跌陽脈微而遲。微則為氣。遲則為寒。

寒氣不足。卽手足逆冷。手足逆冷。則榮衛不利。榮衛不利。則腹滿脇鳴相逐。氣轉勝。勝。榮衛俱勞。陽氣不通。卽身冷。陰氣不通。卽骨疼。陽前通則惡寒。陰前通則痺。不仁。陰陽相得。其氣乃行。大氣一轉。其氣乃散。實則失氣。虛則遺溺。名曰氣分。微則爲氣者。爲氣不足也。寒氣不足。該寸口跌陽爲言。寒而氣血復不足也。寒氣不足。則氣無氣而逆冷。榮衛無源而不利。由是臟腑之中。真氣不充。而客寒獨勝。則腹滿脇鳴相逐。氣轉勝。勝。卽後所謂失氣。遺溺之端也。榮衛俱勞者。榮衛俱乏竭也。陽氣溫於表。故不通則身冷。陰氣榮於裏。故不通卽骨疼。不通者。虛極而不能行。與有餘而壅者不同。陽前通則惡寒。陰前通則痺。不仁者。陽先行而陰不與俱行。則陰失陽而惡寒。陰先行而陽不與俱行。則陽獨滯而痺。不仁也。蓋陰與陽常相須也。不可失。失則氣機不續。而邪乃着。不失則上下交通。而邪不容。故曰陰陽相得。其氣乃行。大氣一轉。其氣乃散。失氣。遺溺。皆相失之徵。曰氣分者。謂寒氣乘陽之虛。而病於氣也。

氣分。心下堅大如盤。邊如旋盤。桂枝薑棗麻辛附子湯主之。

氣分。卽寒氣乘陽之虛。而結於氣者。心下堅大如盤。邊如旋盤。其勢亦已甚矣。



然不直攻其氣。而以辛甘溫藥。行陽以化氣。視後人之襲用枳、朴、香、砂者。工拙懸殊矣。云當汗出如蟲行皮中者。蓋欲使既結之陽。復行周身而愈也。

桂甘薑棗麻辛附子湯方

桂枝

生

薑各三兩

細辛二兩

甘草

麻黃各二兩

附子一枚

大棗十二枚

右七味。以水七升。先煮麻黃去上沫。內諸藥。煮取二升。分溫三服。當汗出如蟲行皮中即愈。

心下堅大如盤。邊如旋盤。水飲所作。枳朮湯主之。

證與上同。曰水飲所作者。所以別於氣分也。氣無形。以辛甘散之。水有形。以苦泄之也。

枳朮湯方

枳實七枚

白朮二兩

右二味。以水五升。煮取三升。分溫三服。腹中臈即當散也。

附方

外臺防己黃耆湯 治風水脈浮爲在表。其人或頭汗出。表無他病。病者但下重。  
從腰以上爲和。腰以下當腫及陰。難以屈伸。方經

# 金匱要略心典

漢 南陽 張 機 仲景原著  
清 吳門 尤 怡 在涇集註  
鄞縣 曹赤電 炳章 圈校

## 卷下

### 黃痺病脈證并治第十五

寸口脈浮而緩。浮則爲風。緩則爲痺。痺非中風。四肢苦煩。脾色必黃。瘥熱以行。  
脈浮爲風。脈緩爲濕。云爲痺者。風與濕合而痺也。然非風痺疼痛之謂。故又曰。  
痺非中風。所以然者。風得濕而變熱。濕應脾而內行。是以四肢不疼而苦煩。脾  
臟瘥熱而色黃。脾者四運之軸也。脾以其所瘥之熱。轉輸流布。而肢體面目盡  
黃矣。故曰瘥熱以行。  
跌陽脈緊而數。數則爲熱。熱則消穀。緊則爲寒。食即爲滿。尺脈浮爲傷腎。跌陽脈

緊爲傷脾。風寒相搏。食穀卽眩。穀氣不消。胃中苦濁。濁氣下流。小便不通。陰被其寒。熱流膀胱。身體盡黃。名曰穀疸。

趺陽脈數爲熱者。其熱在胃。故消穀。脈緊爲寒者。其寒在脾。故滿。滿者必生濕。胃熱而脾濕。亦黃病之原也。尺脈浮爲傷腎者。風傷腎也。趺陽脈緊爲傷脾者。寒傷脾也。腎得風而生熱。脾得寒而生濕。又黃病之原也。濕熱相合。其氣必歸脾胃。脾胃者。倉廩之官也。穀入而助其熱。則眩。穀不消而氣以瘀。則胃中苦濁。濁氣當出下竅。若小便通。則濁隨溺去。今不通。則濁雖下流而不外出。於是陰受其濕。陽受其熱。轉相流被而身體盡黃矣。曰穀疸者。病雖始於風寒。而實成於穀氣耳。

額上黑。微汗出。手足中熱。薄暮卽發。膀胱急。小便自利。名曰女勞疸。腹如水狀。不治。

腎勞而熱。黑色上出。猶脾病而黃外見也。額於部爲庭。靈樞云。庭者顏也。又云。腎病者。顴與顏黑。微汗出者。腎熱上行。而氣通於心也。手足心熱。薄暮卽發者。病在裏在陰也。膀胱急者。腎熱所逼也。小便自利。病不在府也。此得之房勞過。

度。熱從腎出。故名曰女勞瘵。若腹如水狀。則不特陰傷。陽亦傷矣。故曰不治。心中懊懣而熱。不能食。時欲吐。名曰酒瘵。

懊懣。鬱悶不寧之意。熱內畜則不能食。熱上衝則時欲吐。酒氣熏心而味歸脾胃也。此得之飲酒過多所致。故名酒瘵。陽明病。脈遲。食難用飽。飽則發煩頭眩。小便必難。此欲作穀瘵。雖下之。腹滿如故。所以然者。脈遲故也。

脈遲。胃弱。則穀化不速。穀化不速。則穀氣鬱而生熱。而非胃有實熱。故雖下之。而腹滿不去。傷寒裏實。脈遲者。尙未可攻。况非裏實者耶。

夫病酒黃瘵。必小便不利。其候心中熱。足下熱。是其證也。酒黃瘵者。或無熱。清靜了了。腹滿欲吐鼻燥。其脈浮者。先吐之。沉弦者。先下之。酒瘵心中熱。欲吐者。吐之愈。

酒之濕熱。積於中而不下出。則爲酒瘵。積於中則心中熱。注於下則足下熱也。酒黃瘵者。心中必熱。或亦有不熱。清靜了了者。則其熱不聚於心中。而或從下積爲腹滿。或從上衝爲欲吐鼻燥也。腹滿者可下之。欲吐者可因其勢而越之。

既腹滿且欲吐。則可下亦可吐。然必審其脈浮者。則邪近上。宜先吐。脈沉弦者。則邪近下。宜先下也。

酒疸下之。久久爲黑疸。目青面黑。心中如噉蒜狀。大便正黑。皮膚爪之不仁。其脈浮弱。雖黑微黃。故知之。

酒疸雖有可下之例。然必審其腹滿脈沉弦者而後下之。不然。濕熱乘虛陷入血中。則變爲黑疸。目青面黑。皮膚不仁。皆血變而瘀之徵也。然雖曰黑疸。而其原則仍是酒家。故心中熱氣熏灼。如噉蒜狀。一如懊憹之無奈也。且其脈當浮弱。其色雖黑。當微黃。必不如女勞疸之色純黑而脈必沉也。

師曰。病黃疸。發熱煩渴。胸滿口燥者。以病發時火劫其汗。兩熱所得。然黃家所得。從濕得之。一身盡發熱而黃。肚熱。熱在裏。當下之。

煩滿燥渴。病發於熱。而復以火劫之。以熱遇熱。相得不解。則發黃疸。然非內兼濕邪。則熱與熱相攻。而反相散矣。何疸病之有哉。故曰黃家所得。從濕得之。明其病之不獨因於熱也。而治此病者。必先審其在表在裏。而施或汗或下之法。若一身盡熱而腹熱尤甚。則其熱爲在裏。裏不可從表散。故曰當下。

脈沉渴。欲飲水。小便不利者。皆發黃。腹滿。舌痿黃。躁不得睡。屬黃家。

脈沉者。熱難外泄。小便不利者。熱不下出。而渴飲之水。與熱相得。適足以蒸鬱成黃而已。脾之脈。連舌本。散舌下。腹滿。舌痿。脾不行矣。脾不行者。有濕。躁不得睡者。有熱。熱濕相搏。則黃瘧之候也。

黃瘧之病。當以十八日爲期。治之十日以上瘥。反劇爲難治。

土無定位。寄王於四季之末各十八日。黃者土氣也。內傷於脾。故即以土王之數。爲黃病之期。蓋謂十八日脾氣至而虛者當復。即實者亦當通也。治之十日以上差者。邪淺而正勝之。則易治。否則邪反勝正而增劇。所謂病勝藏者也。故難治。

瘧而渴者。其瘧難治。瘧而不渴者。其瘧可治。發於陰部。其人必嘔。陽部。其人振寒而發熱也。

瘧而渴。則熱方熾而濕且日增。故難治。不渴。則熱已減而濕亦自消。故可治。陰部者。裏之臟腑。關於氣。故嘔。陽部者。表之軀殼。屬於形。故振寒而發熱。此陰陽內外淺深微甚之辨也。

穀疸之病。寒熱不食。食即頭眩。心胸不安。久久發黃。爲穀疸。茵陳蒿湯主之。

穀疸爲陽明濕熱瘀鬱之證。陽明既鬱。榮衛之源壅而不利。則作寒熱。健運之機窒而不用。則爲不食。食入則適以助濕熱而增逆滿。爲頭眩。心胸不安而已。茵陳、梔子、大黃。苦寒通泄。使濕熱從小便出也。

茵陳蒿湯方

茵陳蒿 六兩

梔子 十四枚

大黃 二兩

右三味。以水一斗。先煮茵陳減六升。內二味。煮取三升。去滓。分溫三服。小便當利。尿如皂角汁狀。色正赤。一宿腹減。黃從小便去也。

黃家日晡所發熱而反惡寒。此爲女勞得之。膀胱急。少腹滿。身盡黃。額上黑。足下熱。因作黑疸。其腹脹如水狀。大便必黑。時澹。此女勞之病。非水病也。腹滿者難治。硝石礬石散主之。

黃家日晡所本當發熱。乃不發熱而反惡寒者。此爲女勞腎熱所致。與酒疸、穀疸不同。酒疸、穀疸熱在胃。女勞疸熱在腎。胃淺而腎深。熱深則外反惡寒也。膀胱急。額上黑。足下熱。大便黑。皆腎熱之徵。雖少腹滿脹。有如水狀。而實爲腎熱。



而氣內畜。非脾濕而水不行也。惟是證兼腹滿。則陽氣併傷。而其治爲難耳。硝石鹹寒除熱。礬石除痼熱在骨髓。骨與腎合。用以清腎熱也。大麥粥和服。恐傷胃也。

### 硝石礬石散方

硝石熬黃

礬石燒等分

右二味爲散。大麥粥汁和服方寸匕。日三服。病隨大小便去。小便正黃。大便正黑。是其候也。

酒痺心中懊懣。或熱痛。梔子大黃湯主之。

酒家熱積而成實。爲心中懊懣。或心中熱痛。梔子、淡豉徹熱於上。枳實、大黃除實於中。亦上下分消之法也。

### 梔子大黃湯方

梔子十四枚

大黃二兩

枳實五枚

豉一升

右四味。以水六升。煮取二升。分溫三服。

諸病黃家。但利其小便。假令脈浮。當以汗解之。宜桂枝加黃耆湯主之。

小便利。則濕熱除而黃自已。故利小便爲黃家通法。然脈浮則邪近在表。宜從汗解。亦脈浮者先吐之之意。但本無外風而欲出汗。則桂枝發散之中。必兼黃耆固衛。斯病去而表不傷。抑亦助正氣以逐邪氣也。

桂枝加黃耆湯方

見水

諸黃。猪膏髮煎主之。

此治黃疸不濕而燥者之法。按傷寒類要云。男子女人黃疸。飲食不消。胃脹。熱生黃衣在胃中有燥屎使然。猪膏煎服則愈。蓋濕熱經久。變爲堅燥。譬如罨麵熱久則濕去而乾也。本草猪脂利血脈。解風熱。亂髮消瘡。開關格。利水道。故曰病從小便出。

猪膏髮煎方

猪膏半斤

亂髮

如雞子大三枚

右二味。和膏中煎之。髮消藥成。分再服。病從小便出。千金云。太醫校尉史脫家婢黃病。服此胃中燥糞下便差。神驗。

黃疸病。茵陳五苓散主之。

此正治濕熱成瘧者之法。茵陳散結熱。五苓利水去濕也。

### 茵陳五苓散方

茵陳十分

五苓散五分

右二味和先食飲服方寸匕。日三服。

黃瘧腹滿。小便不利而赤。自汗出。此為表和裏實。當下之。宜大黃硝石湯。  
腹滿。小便不利而赤。為裏實。自汗出。為表和。大黃硝石亦下熱去實之法。視梔  
子大黃及茵陳蒿湯較猛也。

### 大黃硝石湯方

大黃

黃蘗

硝石各四

梔

子十五枚

右四味以水六升。煮取二升。去滓。內硝更煮取一升。頓服。

黃瘧病。小便色不變。欲自利。腹滿而喘。不可除熱。熱除必噦。噦者。小半夏湯主之。  
便清自利。內無熱徵。則腹滿非裏實。喘非氣盛矣。雖有瘧熱。亦不可以寒藥攻  
之。熱氣雖除。陽氣則傷。必發為噦。噦。呃逆也。魏氏謂胃陽為寒藥所墜。欲升而  
不能者是也。小半夏溫胃止噦。噦止。然後溫理中藏。使氣盛而行健。則喘滿除。

黃病去。非小半夏能治疸也。

小半夏湯方見痰飲

諸黃。腹痛而嘔者。宜柴胡湯。

腹痛而嘔。病在少陽。脾胃病者。木邪易張也。故以小柴胡散邪氣。止痛嘔。亦非

小柴胡能治諸黃也。

柴胡湯方即小柴胡湯見嘔吐

男子黃。小便自利。當與虛勞小建中湯。

小便利者。不能發黃。以熱從小便去也。今小便利而黃不去。知非熱病。乃土虛而色外見。宜補中而不可除熱者也。夫黃疸之病。濕熱所鬱也。故在表者汗而發之。在裏者攻而去之。此大法也。乃亦有不濕而燥者。則變清利爲潤導。如豬膏髮煎之治也。不熱而寒。不實而虛者。則變攻爲補。變寒爲溫。如小建中之法也。其有兼證錯出者。則先治兼證而後治本證。如小半夏及小柴胡之治也。仲景論黃疸一證。而於正變虛實之法。詳盡如此。其心可謂盡矣。

附方

瓜蒂散 治諸黃。方見

按刪繁方云服訖。吐出黃汁。亦治脈浮欲吐者之法也。

千金麻黃醇酒湯 治黃瘰。

麻黃三兩

右一味。以美酒五升。煮取二升半。頓服盡。冬月用酒。春月用水煮之。

驚悸吐衄下血胸滿瘀血病證并治第十六

寸口脈動而弱。動即為驚。弱則為悸。

驚則氣亂。故脈動。悸屬裏虛。故脈弱。動即為驚者。因驚而脈動。病從外得。弱則為悸者。因弱而為悸。病自内生。其動而且弱者。則內已虛。而外復干之也。

師曰。尺脈浮。目睛暈黃。衄未止。暈黃去。目睛慧了。知衄今止。

尺脈浮。知腎有游火。目睛暈黃。知肝有畜熱。衄病得此。則未欲止。蓋血為陰類。為腎肝之火熱所逼。而不守也。若暈黃去。目睛且慧了。知不獨肝熱除。腎熱亦除矣。故其衄今當止。

又曰。從春至夏衄者太陽。從秋至冬衄者陽明。

血從陰經並衝任而出者則爲吐。從陽經並督脈而出者則爲衄。故衄病皆在陽經。但春夏陽氣浮。則屬太陽。秋冬陽氣伏。則屬陽明爲異耳。所以然者。就陰陽言。則陽主外。陰主內。就三陽言。則太陽爲開。陽明爲闔。少陽之脈不入鼻額。故不主衄也。

或問衄皆在陽是已。然所謂尺脈浮。目睛暈黃者。非陰中事乎。曰。前所謂尺脈浮。目睛暈黃者。言火自陰中出。非言衄自陰中來也。此所謂太陽陽明者。言衄所從出之路也。誰謂病之在陽者。不卽爲陰之所迫而然耶。

衄家不可汗。汗出必額上陷。脈緊急。直視不能眴。不得眠。

血與汗皆陰也。衄家復汗。則陰重傷矣。脈者血之府。額上陷者。額上兩旁之動脈。因血脫於上而陷下不起也。脈緊急者。寸口之脈血不榮而失其柔。如木無液而枝廼勁也。直視不眴不眠者。陰氣亡則陽獨勝也。經云。奪血者無汗。此之謂夫。

病人面無色。無寒熱。脈沉弦者衄。脈浮弱。手按之絕者下血。煩欬者必吐血。

面無色。血脫者色白不澤也。無寒熱。病非外感也。衄因外感者。其脈必浮大。陽氣重也。衄因內傷者。其脈當沉弦。陰氣厲也。雖與前尺脈浮不同。其爲陰之不清則一也。若脈浮弱。按之絕者。血下過多。而陰脈不充也。煩欬者。血從上溢。而心肺焦燥也。此皆病成而後見之診也。

夫吐血。欬逆上氣。其脈數而有熱。不得臥者死。

脈數身熱。陽獨勝也。吐血。欬逆上氣。不得臥。陰之燄也。以旣燄之陰。而從獨勝之陽。有不盡不已之勢。故死。

夫酒客欬者。必致吐血。此因極飲過度所致也。

酒之熱毒。積於胃。而熏於肺。則欬。久之肺絡熱傷。其血必隨欬而吐出。云此因極飲過度所致者。言當治其酒熱。不當治其血也。

寸口脈弦而大。弦則爲減。大則爲芤。減則爲寒。芤則爲虛。虛寒相搏。此名爲革。婦人則半產漏下。男子則亡血。

此條已見虛勞病中。仲景復舉之者。蓋謂亡血之證。有從虛寒得之者耳。亡血不可發其表。汗出卽寒慄而振。

亡血者亡其陰也。更發其表。則陽亦傷矣。陽傷者外不固。故寒慄。陰亡者內不守。故振振動搖。前衄血復汗。爲竭其陰。此則并亡其陽。皆所謂粗工嗜嗜者也。病人胸滿唇痿。舌青口燥。但欲漱水不欲嚥。無寒熱。脈微大來遲。腹不滿。其人言我滿。爲有瘀血。病者如有熱狀。煩滿口乾燥而渴。其脈反無熱。此爲陰伏。是瘀血也。當下之。

此二條辨瘀血之見證。胸滿者。血瘀而氣爲之不利也。唇痿舌青。血不榮也。口燥欲漱水者。血結則氣燥也。無寒熱。病不由表也。脈微大來遲。血積經隧。則脈瀯不利也。腹不滿。其人言我滿。外無形而內實有滯。知其血積在陰。而非氣壅在陽也。故曰爲有瘀血。

如有熱狀。卽下。所謂煩滿口乾燥而渴也。脈無熱。不數大也。有熱證而無熱脈。知爲血瘀不流。不能充澤所致。故曰此爲陰伏。陰伏者。陰邪結而伏於內也。故曰當下。

火邪者。桂枝去芍藥加蜀漆牡蠣龍骨救逆湯主之。

此但舉火邪二字。而不詳其證。按傷寒論云。傷寒脈浮。醫以火迫劫之。亡陽。必



驚狂起臥不安。又曰。太陽病。以火熏之。不得汗。其人必躁。到經不解。必圜血。名爲火邪。仲景此條。殆爲驚悸下血。備其證歟。桂枝湯去芍藥之酸。加蜀漆之辛。蓋欲使火氣與風邪一時並散。而無少有留滯。所謂從外來者。驅而出之於外也。龍骨牡蠣。則收斂其浮越之神與氣爾。

桂枝去芍藥加蜀漆牡蠣龍骨救逆湯方

桂枝三兩  
去皮

甘草二兩  
炙

龍骨四兩

牡蠣五兩  
熬

生薑三兩

大棗十二枚

蜀漆三兩  
洗去腥

右爲末。以水一斗二升。先煮蜀漆。減二升。內諸藥。煮取三升。去滓。溫服一升。

心下悸者。半夏麻黃丸主之。

此治飲氣抑其陽氣者之法。半夏蠲飲氣。麻黃發陽氣。妙在作丸與服。緩以圖之。則麻黃之辛甘不能發越津氣。而但升引陽氣。卽半夏之苦辛。亦不特蠲除飲氣。而并和養中氣。非仲景神明善變者。其熟能與於此哉。

半夏麻黃丸方

半夏

麻黃各等分

右二味末之。煉蜜和丸。小豆大。飲服三丸。日三服。

吐血不止者。柏葉湯主之。

按仁齋直指云。血遇熱則宣行。故止血多用涼藥。然亦有氣虛挾寒。陰陽不相為守。榮氣虛散。血亦錯行者。此乾薑艾葉之所以用也。而血既上溢。其浮盛之勢。又非溫藥所能禦者。故以柏葉抑之使降。馬通引之使下。則妄行之血順而能下。下而能守矣。

### 柏葉湯方

柏葉

乾薑各三兩

艾三把

右三味。以水五升。取馬通汁一升。合煮取一升。分溫再服。千金加阿膠三兩。亦佳。

下血。先便後血。此遠血也。黃土湯主之。

下血先便後血者。由脾虛氣寒。失其統御之權。而血為之不守也。脾去肛門遠。故曰遠血。黃土溫燥入脾。合白朮附子以復健行之氣。阿膠生地黃甘草以益脫竭之血。而又慮辛溫之品。轉為血病之厲。故又以黃芩之苦寒。防其太過。所

謂有制之師也。

### 黃土湯方

甘草

乾地黄

白朮

附子炮一兩

阿膠

黃芩各三兩

竈中黃土半斤

右七味。以水八升。煮取三升。分溫三服。

下血先血後便。此近血也。赤豆當歸散主之。

方見狐惑

下血先血後便者。由大腸傷於溼熱。而血滲於下也。大腸與肛門近。故曰近血。赤小豆能行水濕。解熱毒。當歸引血歸經。且舉血中陷下之氣也。

心氣不足。吐血衄血。瀉心湯主之。

心氣不足者。心中之陰氣不足也。陰不足則陽獨盛。血為熱迫。而妄行不止矣。大黃、黃連、黃芩。瀉其心之熱。而血自寧。寇氏云。若心氣獨不足。則當不吐衄也。此乃邪熱因不足而客之。故令吐衄。以苦泄其熱。以苦補其心。蓋一舉而兩得之。此說亦通。濟衆方用大黃、生地汁治衄血。其下熱涼血。亦瀉心湯類耳。

### 瀉心湯方

大黃二兩

黃連

黃芩各一

右三味。以水三升。煮取一升。頓服之。

### 嘔吐噦下利病脈證治第十七

夫嘔家有癰膿。不可治嘔。膿盡自愈。

癰膿。胃中有癰。膿從嘔出也。是因癰膿而嘔。膿盡癰已。則嘔自愈。不可概以止吐之藥治之也。

先嘔却渴者。此爲欲解。先渴却嘔者。爲水停心下。此屬飲家。嘔家本渴。今反不渴者。心下有支飲故也。此屬支飲。

嘔家必有停痰宿水。先嘔却渴者。痰水已去。而胃陽將復也。故曰此爲欲解。先渴却嘔者。因熱飲水過多。熱雖解而飲旋積也。此嘔因積飲所致。故曰此屬飲家。嘔家本渴。水從嘔去故也。今反不渴者。以宿有支飲在心下。愈動而愈出也。故曰此屬支飲。

問曰。病人脈數。數爲熱。當消穀引飲。而反吐者。何也。師曰。以發其汗。令陽微。膈氣

虛。脈乃數。數爲客熱。不能消穀。胃中虛冷故也。脈弦者虛也。胃氣無餘。朝食暮吐。變爲胃反。寒在於上。醫反下之。令脈反弦。故名曰虛。

脈數爲熱。乃不能消穀引飲而反吐者。以發汗過多。陽微膈虛所致。則其數爲客熱上浮之數。而非胃實氣熱之數矣。客熱如客之寄。不久即散。故不能消穀也。脈弦爲寒。乃不曰寒而曰虛者。以寒在於上。而醫反下之所致。故其弦非陰寒外加之弦。而爲胃虛生寒之弦矣。胃虛且寒。陽氣無餘。則朝食暮吐而變爲胃反也。讀此知數脈弦脈。均有虛候。曰熱曰寒。蓋淺之乎言脈者耳。

寸口脈微而數。微則無氣。無氣則榮虛。榮虛則血不足。血不足則胸中冷。此因數爲客熱。而推言脈微而數者。爲無氣而非有熱也。氣者榮之主。故無氣則榮虛。榮者血之源。故榮虛則血不足。榮衛俱虛。則胸中之積而爲宗氣者少矣。故胸中冷。

合上二條言之。客熱固非真熱。不可以寒治之。胸中冷亦非真冷。不可以熱治之。是皆當以溫養真氣爲主。真氣冲和純粹之氣。此氣浮則生熱。沉則生冷。溫之則浮微自收。養之則虛冷自化。若熱以寒治。寒以熱治。則真氣愈虛。寒熱內

賊。而其病益甚矣。

跌陽脈浮而濇。浮則爲虛。濇則傷脾。脾傷則不磨。朝食暮吐。暮食朝吐。宿穀不化。名曰胃反。脈緊而濇。其病難治。

此因胃氣無餘。變爲胃反。而推言其病之井在於脾也。夫胃爲陽。脾爲陰。浮則爲虛者。胃之陽虛也。濇則傷脾者。脾之陰傷也。穀入於胃而運於脾。脾傷則不能磨。脾不磨則穀不化。而朝食者暮當下。暮食者朝當下。若穀不化。則不得下。不得下。必反而上出也。夫脾胃土也。土德本緩。而脈反緊。則肝有餘。土氣本和。而脈反濇。則血不足。藏真不足。而賊邪有餘。故曰難治。

病人欲吐者。不可下之。

病人欲吐者。邪在上而氣方逆。若遽下之。病氣必與藥氣相爭。而正乃蒙其禍矣。否則裏虛邪入。病氣轉深。或痞或利。未可知也。故曰不可下之。

噦而腹滿。視其前後。知何部不利。利之愈。

噦而腹滿者。病在下而氣溢於上也。與病人欲吐者不同。故當視其前後二陰。知何部不利而利之。則病從下出。而氣不上逆。腹滿與噦俱去矣。

嘔而胸滿者。吳茱萸湯主之。

胸中陽也。嘔而胸滿。陽不治而陰乘之也。故以吳茱萸散陰降逆。人參、薑、棗補中益陽氣。

吳茱萸湯方

吳茱萸 一升

人

參 三兩

生

薑 六兩

大

棗 十二枚

右四味。以水五升。煮取三升。溫服七合。日三服。

乾嘔吐涎沫。頭痛者。吳茱萸湯主之。

乾嘔吐涎沫。上焦有寒也。頭者諸陽之會。爲陰寒之邪上逆而痛。故亦宜茱萸湯以散陰氣而益陽氣。

嘔而腸鳴。心下痞者。半夏瀉心湯主之。

邪氣乘虛。陷入心下。中氣則痞。中氣既痞。升降失常。於是陽獨上逆而嘔。陰獨下走而腸鳴。是雖三焦俱病。而中氣爲上下之樞。故不必治其上下。而但治其中。黃連、黃芩苦以降陽。半夏、乾薑辛以升陰。陰升陽降。痞將自解。人參、甘草則補養中氣。以爲交陰陽通上下之用也。

半夏瀉心湯方

半夏洗半斤

黃芩

乾薑

人參各三兩

甘草炙三兩

黃連一兩

大棗枚十二

右七味。以水一斗。煮取六升。去滓。再煮取三升。溫服一升。日三服。

乾嘔而利者。黃芩加半夏生薑湯主之。

此傷寒熱邪入裏作利。而復上行爲嘔者之法。而雜病肝胃之火。上衝下注者。亦復有之。半夏生薑散逆於上。黃芩芍藥除熱於裏。上下俱病。中氣必困。甘草大棗合芍藥生薑以安中而正氣也。

黃芩加半夏生薑湯方

黃芩

生薑各三兩

甘草二兩

芍藥一兩

半夏半升

大棗枚十二

右六味。以水一斗。煮取三升。去滓。溫服一升。日再夜一服。

諸嘔吐。穀不得下者。小半夏湯主之。

嘔吐穀不得下者。胃中有飲。隨氣上逆。而阻其穀入之路也。故以半夏消飲。生



薑降逆。逆止飲消。穀斯下矣。

小半夏湯方

見痰飲

嘔吐而病在膈上。後思水者解。急與之。思水者。猪苓散主之。

病在膈上。病膈間有痰飲也。後思水者。知飲已去。故曰欲解。即先嘔却渴者。此爲欲解之義。夫飲邪已去。津液暴竭。而思得水。設不得。則津亡而氣亦耗。故當急與。而嘔吐之餘。中氣未復。不能勝水。設過與之。則舊飲方去。新飲復生。故宜猪苓散以崇土而逐水也。

猪苓散方

猪苓

茯苓

白

朮

各等分

右三味。杵爲散。飲服方寸匕。日三服。

嘔而脈弱。小便復利。身有微熱。見厥者難治。四逆湯主之。

脈弱便利而厥。爲內虛且寒之候。則嘔非火邪。而是陰氣之上逆。熱非實邪。而是陽氣之外越矣。故以四逆湯救陽驅陰爲主。然陰方上衝。而陽且外走。其離決之勢。有未可即爲順接者。故曰難治。或云嘔與身熱爲邪實。厥利脈弱爲正

虛。虛實互見。故曰難治。四逆湯舍其標而治其本也。亦通。

### 四逆湯方

附子生一兩

乾薑半兩

甘草炙二兩

右二味。以水三升。煮取一升二合。去滓。分溫再服。強人可大附子一枚。乾薑三兩。

嘔而發熱者。小柴胡湯主之。

嘔而發熱。邪在少陽之經。欲止其嘔。必解其邪。小柴胡則和解少陽之正法也。

### 小柴胡湯方

柴胡半斤

半夏一升

黃芩

人參

甘草

生薑各三兩

大枣十二枚

右七味。以水一斗。煮取六升。去滓。再煎取三升。溫服一升。日三服。

胃反嘔吐者。大半夏湯主之。

胃反嘔吐者。胃虛不能消穀。朝食而暮吐也。又胃脈本下行。虛則反逆也。故以半夏降逆。人參、白蜜益虛安中。東垣云。辛藥生薑之類治嘔吐。但治上焦氣壅。

表實之病。若胃虛穀氣不行。胸中閉塞而嘔者。惟宜益胃推揚穀氣而已。此大  
半夏湯之旨也。

### 大半夏湯方

半夏二升

人參三兩

白蜜一升

右三味。以水一斗二升。和蜜揚之二百四十遍。煮藥取二升半。溫服一升。餘分  
再服。

食已即吐者。大黃甘草湯主之。

經云。清陽出上竅。濁陰出下竅。本乎天者親上。本乎地者親下也。若下既不通。  
必反上逆。所謂陰陽反作。氣逆不從。食雖入胃。而氣反出之矣。故以大黃通其  
大便。使濁氣下行。濁道而嘔吐自止。不然。止之降之無益也。東垣通幽湯治幽  
門不通。上衝吸門者。亦是此意。但有緩急之分耳。  
再按。經云。陽氣者閉塞。地氣者冒明。雲霧不精。則上應白露不下。夫陽氣。天氣  
也。天氣閉。則地氣干矣。雲霧出於地。而雨露降於天。地不承。則天不降矣。可見  
天地陰陽。同此氣機。和則俱和。乖則並乖。人與天地相參。故肺氣象天。病則多

及二陰脾胃。大小腸象地。病則多及上竅。丹溪治小便不通。用吐法以開提肺氣。使上竅通而下竅亦通。與大黃甘草湯之嘔吐。法雖異而理可通也。

大黃甘草湯方

大黃四兩

甘草一兩

右二味。以水三升。煮取一升。分溫再服。

胃反吐而渴欲飲水者。茯苓澤瀉湯主之。

猪苓散治吐後飲水者。所以崇土氣。勝水氣也。茯苓澤瀉湯治吐未已。而渴欲飲水者。以吐未已。知邪未去。則宜桂枝甘薑散邪氣。苓朮澤瀉消水氣也。

茯苓澤瀉湯方

茯苓半斤

澤瀉四兩

甘草

桂枝各二兩

白朮三兩

生薑四兩

右六味。以水一斗。煮取三升。內澤瀉。再煮取二升半。溫服八合。日三服。吐後渴欲得水而貪飲者。文蛤湯主之。兼主微風。脈緊頭痛。

吐後水去熱存。渴欲得水。與前猪苓散證同。雖復貪飲。亦止熱甚而然耳。但與

除熱導水之劑足矣。乃復用麻黃、杏仁等發表之藥者。必兼有客邪鬱熱於肺。不解故也。觀方下云。汗出即愈。可以知矣。曰兼主微風脈緊頭痛者。以麻杏甘石本擅驅風發表之長耳。

### 文蛤湯方

文蛤五兩

麻黃

甘草

生薑各三兩

石膏五兩

杏仁五十粒

大棗十二枚

右七味。以水六升。煮取二升。溫服一升。汗出即愈。

乾嘔吐逆吐涎沫。半夏乾薑散主之。

乾嘔吐逆。胃中氣逆也。吐涎沫者。上焦有寒。其口多涎也。與前乾嘔吐涎沫頭痛不同。彼為厥陰。陰氣上逆。此是陽明寒涎逆氣不下而已。故以半夏止逆消涎。乾薑溫中和胃。漿水甘酸。調中引氣止嘔噦也。

### 半夏乾薑散方

半夏

乾薑各等分

右二味。杵為散。取方寸匕。漿水一升半。煮取七合。頓服之。

病人胸中似喘不喘。似嘔不嘔。似噦不噦。徹心中憤憤然奈者。生薑半夏湯主之。寒邪搏飲。結於胸中而不得出。則氣之呼吸往來。出入升降者阻矣。似喘不喘。似嘔不嘔。似噦不噦。皆寒飲與氣相搏互擊之證也。且飲水邪也。心陽藏也。以水邪而逼處心藏。欲却不能。欲受不可。則徹心中憤憤然無奈也。生薑半夏湯。即小半夏湯而生薑用汁。則降逆之力少。而散結之力多。乃正治飲氣相搏。欲出不出者之良法也。

生薑半夏湯方

半夏半升

生薑汁一升

右二味。以水三升。煮半夏。取二升。內生薑汁。煮取一升半。小冷分四服。日三夜一。嘔止。停後服。

乾嘔噦。若手足厥者。橘皮湯主之。

乾嘔噦。非反胃。手足厥。非無陽。胃不和。則氣不至於四肢也。橘皮和胃氣。生薑散逆氣。氣行胃和。嘔噦與厥自已。末可便認陽虛而遽投溫補也。

橘皮湯方

橘皮四兩

生薑半斤

右二味。以水七升。煮取三升。溫服一升。下咽即愈。

噦逆者。橘皮竹茹湯主之。

胃虛而熱乘之。則作噦逆。橘皮、生薑和胃散逆。竹茹除熱止嘔噦。人參、甘草、大棗益虛安中也。

橘皮竹茹湯方

橘皮二斤

竹茹二升

大棗三十枚

生薑半斤

甘草五兩

人參一兩

右六味。以水一斗。煮取三升。溫服一升。日三服。

夫六腑氣絕於外者。手足寒。上氣脚縮。五臟氣絕於內者。利不禁。下甚者。手足不仁。

六腑爲陽。陽者主外。陽絕不通於外。爲手足寒。陽不外通。則并而上行。爲上氣脚縮也。五藏爲陰。陰者主內。陰絕不守於內。則下利不禁。甚者不交於陽。而隧道痺閉。爲手足不仁也。

下利脈沉弦者下重。脈大者爲未止。脈微弱數者爲欲自止。雖發熱不死。

沉爲裏爲下。沉中見弦。爲少陽之氣滯於下而不得越。故下重。大爲邪盛。又大則病進。故爲未止。徐氏曰。微弱者正衰邪亦衰也。數爲陽脈。於微弱中見之。則爲陽氣將復。故知利欲自止。雖有身熱。勢必自已。不得比於下利熱不止者死之例也。

下利手足厥冷。無脈者。灸之不溫。若脈不還。反微喘者死。少陰負趺陽者爲順也。下利厥冷無脈。陰亡而陽亦絕矣。灸之所以引旣絕之陽。乃厥不同。脈不還。而反微喘。殘陽上奔。大氣下脫。故死。下利爲土負水勝之病。少陰負趺陽者。水負而土勝也。故曰順。

下利有微熱而渴。脈弱者令自愈。下利脈數。有微熱。汗出。令自愈。設脈緊爲未解。下利脈數而渴者。令自愈。設不差。必圜膿血。以有熱故也。下利脈反弦。發熱身汗者愈。

微熱而渴者。胃陽復也。脈弱者。邪氣衰也。正復邪衰。故令自愈。脈數亦陽復也。微熱汗出者。氣方振而勢外達。亦爲欲愈之候。設脈緊則邪尙盛。必能與正



相爭。故爲未解。脈數而渴。陽氣已復。亦下利有微熱而渴之意。然脈不弱而數。則陽之復者已過。陰寒雖解。而熱氣轉增。將更傷陰而圉膿血也。弦脈陰陽兩屬。若與發熱身汗並見。則弦亦陽也。與脈數有微熱汗出正同。故愈。按上數條。皆是傷寒邪氣入裏之候。故或熱或渴。或汗出。或脈數。陽氣既復。邪氣得達。則愈。若雜病濕熱下利之證。則發熱口渴。脈數均非美證。內經云。下利身熱者死。仲景云。下利手足不逆冷。反發熱者不死。蓋內經所言者。雜病濕熱下利之證。仲景所言者。傷寒陰邪內入之證。二者不可不分也。

下利氣者。當利其小便。

下利氣者。氣隨利失。卽所謂氣利是也。小便得利。則氣行於陽。不行於陰而愈。故曰當利其小便。喻氏所謂急開支河者是也。

下利寸脈反浮數。尺中自濇者。必圉膿血。

寸浮數者。陽邪強也。尺中濇者。陰氣弱也。以強陽而加弱陰。必圉膿血。

下利清穀。不可攻其表。汗出必脹滿。

清與圉同。卽完穀也。是爲裏虛氣寒。乃不溫養中土。而反攻令汗出。則陽氣重

虛。陽虛者。氣不化。故脹滿。

下利脈沉而遲。其人面少赤。身有微熱。下利清穀者。必鬱冒汗出而解。病人必微厥。所以然者。其面戴陽。下虛故也。

喻氏曰。下利脈沉遲。而面少赤。身微熱者。陰盛而格陽在上在外也。若其人陽尚有根。其格出者。終必復返。陽返而陰未肯降。必鬱冒少頃。然後陽勝而陰出。爲汗。陰出爲汗。陰邪乃解。自不下利矣。陽入陰出。儼有龍戰於野。其血玄黃之象。病人能無微厥乎。

下利後脈絕。手足厥冷。晬時脈還。手足溫者生。脈不還者死。

下利後脈絕。手足厥冷者。陰先竭而陽後脫也。是必俟其晬時經氣一週。其脈當還。其手足當溫。設脈不還。其手足亦必不溫。則死之事也。

下利後腹脹滿。身體疼痛者。先溫其裏。乃攻其表。溫裏宜四逆湯。攻表宜桂枝湯。下利腹脹滿。裏有寒也。身體疼痛。表有邪也。然必先溫其裏。而後攻其表。所以然者。裏氣不充。則外攻無力。陽氣外泄。則裏寒轉增。自然之勢也。而四逆用生附。則寓發散於溫補之中。桂枝有甘芍。則兼固裏於散邪之內。仲景用法之精。

如此。

四逆湯方見上

桂枝湯方

桂枝

白芍

生薑各三兩

甘草二兩

大棗十二枚

右五味。㕮咀。以水七升。微火煮。取三升。去滓。適寒溫。服一升。服已須臾。啜稀熱粥一升。以助藥力。溫覆令一時許。遍身烝烝微似有汗者。益佳。不可令如水流漓。病必不除。若一服汗出病差。停後服。

下利三部脈皆平。按之心下堅者。急下之。宜大承氣湯。下利脈遲而滑者。實也。利未欲止。急下之。宜大承氣湯。下利脈反滑者。當有所去。下乃愈。宜大承氣湯。下利已差。至其年月日時復發者。以病不盡故也。當下之。宜大承氣湯。

下利有裏虛臟脫者。亦有裏實府閉者。昔人所謂利者不利是也。按之心下堅。其證的矣。脈雖不實大。而亦未見微弱。自宜急下。使實去則利止。通因通用之法也。脈遲為寒。然與滑俱見。則不為寒而反為實。以中實有物。能阻其脈行。

之機也。夫利因實而致者。實不去則利不已。故宜急下。病已差而至其時復發者。陳積在脾也。脾主信。故按期復發。是當下之。令陳積去。則病本拔而愈。

大承氣湯方見瘕

下利讞語者。有燥屎也。小承氣湯主之。

讞語者。胃實之徵。為有燥屎也。與心下堅脈滑者大同。然前用大承氣者。以因實而致利。去之惟恐不速也。此用小承氣者。以病成而適實。攻之恐傷及其正也。

小承氣湯方

大黃四兩

枳實三枚

厚朴三兩

右三味。以水四升。煮取一升二合。去滓。分溫二服。得利則止。

下利便膿血者。桃花湯主之。

此治濕寒內淫。藏氣不固。膿血不止者之法。赤石脂理血固脫。乾薑溫胃驅寒。粳米安中益氣。崔氏去粳米加黃連。當歸。用治熱利。乃桃花湯之變法也。

桃花湯方

赤石脂用一斤一半全

乾薑一兩

粳米一升

右三味以水七升煮米熟去滓溫服七合內赤石脂末方寸匕日三服若一服愈餘勿服。

熱利下重者白頭翁湯主之。

此治濕熱下注及傷寒熱邪入裏作利者之法。白頭翁湯苦以除濕寒以勝熱也。

### 白頭翁湯方

白頭翁

黃連

黃柏

秦皮各三兩

右四味以水七升煮取三升去滓溫服一升不愈更服。

下利後更煩按之心下濡者爲虛煩也。梔子豉湯主之。

下利後更煩者熱邪不從下減而復上動也。按之心下濡則中無阻滯可知。故曰虛煩。香豉梔子能撤熱而除煩得吐則熱從上出而愈因其高而越之之意也。

### 梔子豉湯方

梔

子

十枚

香

豉

四合

右二味。以水四升。先煮梔子。得二升半。內豉。煮取一升半。去滓。分二服。溫進一服。得吐則愈。

下利清穀。裏寒外熱。汗出而厥。通脈四逆湯主之。

挾熱下利者。久則必傷脾陰。中寒清穀者。甚則并傷腎陽。裏寒外熱。汗出而厥。有陰內盛而陽外亡之象。通脈四逆。即四逆加乾薑一倍。所謂進而求陽。以收散亡之氣也。

通脈四逆湯方

附

子生一枚

乾

薑

三兩強人可四兩

甘

草

二兩炙

右三味。以水三升。煮取一升二合。去滓。分溫再服。

下利肺痛。紫參湯主之。

趙氏曰。大腸與肺合。大抵腸中積聚。則肺氣不行。肺有所積。大腸亦不固。二害互為病。大腸病而氣塞於肺者痛。肺有積者亦痛。痛必通用。紫參通九竅。利大小腸。氣通則痛愈。積去則利自止。喻氏曰。後人有疑此非仲景之方者。夫詎知

腸胃有病。其所關全在肺氣耶。程氏疑是腹痛。本草云。紫參治心腹積聚。寒熱邪氣。

### 紫參湯方

紫參半斤

甘草三兩

右二味。以水五升。先煮紫參取二升。內甘草。煮取一升半。分溫三服。氣利。訶黎勒散主之。

氣利。氣與屎俱失也。訶黎勒瀉腸而利氣。粥飲安中益腸胃。頓服者。補下治下。制以急也。

### 訶黎勒散方

訶黎勒煨十枚

右一味為散。粥飲和頓服。

### 附方

千金翼小承氣湯 治大便不通。噦數譫語。上方見  
外臺黃芩湯 治乾嘔下利。

此與前黃芩加半夏生薑湯治同。而無芍藥、甘草、生薑。有人參、桂枝、乾薑。則溫裏益氣之意居多。凡中寒氣少者。可於此取法焉。其小承氣湯。即前下利譫語有燥屎之法。雖不贅可也。

黃芩

人參

乾薑各三兩

桂枝一兩

大棗

十二枚

半夏

半斤

右六味以水七升。煮取三升。溫分三服。

### 瘡癰腸癰浸淫病脈證并治第十八

諸浮數脈。應當發熱。而反洒淅惡寒。若有痛處。當發其癰。師曰。諸癰腫。欲知有膿無膿。以手掩腫上。熱者為有膿。不熱者為無膿。

浮數脈皆陽也。陽當發熱。而反洒淅惡寒者。衛氣有所遏而不出也。夫衛主行榮氣者也。而榮過實者。反能阻遏其衛。若有痛處。則榮之實者已兆。故曰當發其癰。癰腫之候。膿不成。則毒不化。而毒不聚。則膿必不成。故以手掩其腫上。熱者毒已聚。則有膿。不熱者毒不聚。則無膿也。



腸癰之爲病。其身甲錯。腹皮急。按之濡。如腫狀。腹無積聚。身無熱。脈數。此爲腸內有癰膿。薏苡附子敗醬散主之。

甲錯。肌皮乾起。如鱗甲之交錯。由榮滯於中。故血燥於外也。腹皮急。按之濡。氣雖外鼓。而病不在皮間也。積聚爲腫脹之根。脈數爲身熱之候。今腹如腫狀。而中無積聚。身不發熱。而脈反見數。非腸內有癰。榮鬱成熱。而何。薏苡破毒腫。利腸胃爲君。敗醬一名苦菜。治暴熱火瘡。排膿破血爲臣。附子則假其辛熱以行鬱滯之氣爾。

### 薏苡附子敗醬散方

薏苡仁 十分

附子 二分

敗醬 五分

右三味。杵爲散。取方寸匕。以水二升。煎減半。頓服。小便當下。

腫癰者。少腹腫痞。按之卽痛如淋。小便自調。時時發熱。自汗出。復惡寒。其脈遲緊者。膿未成。可下之。脈洪數者。膿已成。不可下也。大黃牡丹湯主之。

腫癰。疑卽腸癰之在下者。蓋前之癰在小腸。而此之癰在大腸也。大腸居小腸之下。逼處膀胱。致小腹腫痞。按之卽痛如淋。而實非膀胱爲害。故仍小便自調。

也。小腸爲心之合。而氣通於血脈。大腸爲肺之合。而氣通於皮毛。故彼脈數身無熱。而此時時發熱。自汗出。復惡寒也。脈遲緊者。邪暴遏而榮未變。云可下者。謂可下之令其消散也。脈洪數者。毒已聚而榮氣腐。云不可下者。謂雖下之而亦不能消之也。大黃牡丹湯。腸癰已成未成。皆得主之。故曰有膿當下。無膿當下血。

大黃牡丹湯方

大黃四兩

牡丹一兩

桃仁五十

冬瓜仁半升

芒硝三合

右五味。以水六升。煮取一升。去滓。內芒硝。再煎沸。頓服之。有膿當下。如無膿當下血。

問曰。寸口脈浮微而瀋。法當亡血。若汗出。設不汗出者。云何。曰。若身有瘡。被刀斧所傷。亡血故也。

血與汗皆陰也。陰亡。則血流不行。而氣亦無輔。故脈浮微而瀋也。經云。奪血者無汗。奪汗者無血。茲不汗出而身有瘡。則知其被刀斧所傷而亡其血。與汗出

不止者。迹雖異而理則同也。

病金瘡。王不留行散主之。

金瘡。金刃所傷而成瘡者。經脈斬絕。榮衛沮弛。治之者必使經脈復行。榮衛相貫而後已。王不留行散。則行氣血和陰陽之良劑也。

王不留行散方

王不留行十分八月採

蒴藋細葉十分七月採

甘草十分八月採

桑東南根白皮十分三月採

黃芩二分

川椒三分

厚朴二分

乾薑二分

芍藥二分

右九味。王不留行、蒴藋、桑皮三味。燒灰存性。各別杵篩。合治之為散。服方寸匕。小瘡即粉之。大瘡但服之。產後亦可服。如風寒。桑根勿取之。前三物陰乾百日。排膿散方

枳實十分六枚

芍藥六分

桔梗二分

右三味。杵為散。取雞子黃一枚。以藥散與雞黃相等。揉和令相得。飲和服之。日一服。

枳實苦寒。除熱破滯爲君。得芍藥則通血。得桔梗則利氣。而尤賴雞子黃之甘潤。以爲排膿化毒之本也。

排膿湯方

甘草二兩 桔梗三兩 生薑一兩 大枣十枚

右四味。以水三升。煮取一升。溫服五合。日再服。

此亦行氣血和榮衛之劑。

浸淫瘡。從口起。流向四肢者可治。從四肢流來入口者不可治。浸淫瘡。黃連粉主之。

浸淫瘡。義如藏府經絡篇中。黃連粉方未見。大意以此爲濕熱浸淫之病。故取黃連一味爲粉。粉之。苦以燥濕。寒以除熱也。

跌蹶手指臂腫轉筋狐疝蚘蟲病脈證治第十九

師曰。病跌蹶。其人但能前不能却。刺腠入二寸。此太陽經傷也。

人身經絡。陽明行身之前。太陽行身之後。太陽傷。故不能却也。太陽之脈。下貫

膕內。刺之所以和利其經脈也。膕、足肚也。

病人常以手指臂腫動。此人身體瞶瞶者。藜蘆甘草湯主之。

濕痰凝滯關節則腫。風邪襲傷經絡則動。手指臂腫動。身體瞶瞶者。風痰在膈。攻走肢體。陳無擇所謂痰涎留在胸膈上下。變生諸病。手足項背。牽引釣痛。走易不定者是也。藜蘆吐上膈風痰。甘草亦能取吐。方雖未見。然大略是湧劑耳。

李氏

轉筋之爲病。其人臂脚直。脈上下行。微弦。轉筋入腹者。雞屎白散主之。

肝主筋。上應風氣。肝病生風。則爲轉筋。其人臂脚直。脈上下行。微弦。經云。諸暴強直。皆屬於風也。轉筋入腹者。脾土虛而肝木乘之也。雞爲木畜。其屎反利脾氣。故取治是病。且以類相求。則尤易入也。

### 雞屎白散方

雞屎白爲散。取方寸匕。以水六合。和溫服。

陰狐疝氣者。偏有大小。時時上下。蜘蛛散主之。

陰狐疝氣者。寒濕襲陰。而舉丸受病。或左或右。大小不同。或上或下。出沒無時。

故名狐疝。蜘蛛有毒。服之能令人利。合桂枝辛溫入陰。而逐其寒濕之氣也。

蜘蛛散方

蜘蛛十枚 熬焦

桂枝半兩

右二味爲散。取八分一匕。飲和服。日再。蜜丸亦可。

問曰。病腹痛有蟲。其脈何以別之。師曰。腹中痛。其脈當沉。若弦。反洪大。故有蚘蟲。腹痛脈多伏。陽氣內閉也。或弦者。邪氣入中也。若反洪大。則非正氣與外邪爲病。乃蚘動而氣厥也。然必兼有吐涎心痛等證。如下條所云。乃無疑耳。

蚘蟲之爲病。令人吐涎心痛。發作有時。毒藥不止者。甘草粉蜜湯主之。

吐涎。吐出清水也。心痛。痛如咬啮。時時上下是也。發作有時者。蚘飽而靜。則痛立止。蚘飢求食。則痛復發也。毒藥。卽錫粉、雷丸等殺蟲之藥。毒藥者。折之以其所惡也。甘草粉蜜湯者。誘之以其所喜也。白粉。卽鉛白粉。能殺三蟲。而雜於甘草、白蜜之中。誘使蟲食。甘味既盡。毒性旋發。而蟲患乃除。此醫藥之變詐也。

甘草粉蜜湯方

甘草二兩

白粉一兩

白蜜四兩

右三味。以水三升。先煮甘草取二升。去滓。內粉蜜。攪令和。煎如薄粥。溫服一升。差即止。

蚘厥者。當吐蚘。令病者靜而復時煩。此為藏寒。蚘上入其膈。故煩。須臾復止。得食而嘔。又煩者。蚘聞食臭出。其人當自吐蚘。蚘厥者。烏梅丸主之。蚘動而厥。心痛吐涎。手足冷也。蚘動而上逆。則當吐蚘。蚘暫安而復動。則病亦靜而復時煩也。然蚘之所以時安而時上者何也。蟲性喜溫。藏寒則蟲不安。而上膈。蟲喜得食。藏虛則蚘復上而求食。故以人參、薑、附之屬。益虛溫胃為主。而以為梅、椒、連之屬。苦酸辛氣味。以折其上入之勢也。

### 烏梅丸方

烏梅	三百個	細辛	六兩	乾薑	十兩	黃連	一斤
當歸		川椒	各四兩	附子	炮	桂枝	
人參		黃柏	各六兩				

右十味。異搗篩。合治之。以苦酒漬烏梅一宿。去核蒸之。五升米上。飯熟。搗成泥。和藥令相得。內臼中與蜜杵二千下。丸如梧子大。先食飲服十丸。日三服。稍增。

至二十九。禁生冷滑臭等物。

婦人妊娠病脈證治第二十

師曰。婦人得平脈。陰脈小弱。其人渴。不能食。無寒熱。名妊娠。桂枝湯主之。於法六十日。當有此證。設有醫治逆者。却一月加吐下者。則絕之。

平脈。脈無病也。卽內經身有病而無邪脈之意。陰脈小弱者。初時胎氣未盛。而陰方受蝕。故陰脈比陽脈小弱。至三四月經血久蓄。陰脈始強。內經所謂手少陰脈動者。妊子。千金所謂三月尺脈數是也。其人渴。妊子者內多熱也。一作嘔亦通。今妊婦二三月。往往惡阻不能食是已。無寒熱者。無邪氣也。夫脈無故而身有病。而又非寒熱邪氣。則無可施治。惟宜桂枝湯和調陰陽而已。徐氏云。桂枝湯外證得之。爲解肌和榮衛。內證得之。爲化氣調陰陽也。六十日當有此證者。謂妊娠兩月。正當惡阻之時。設不知而妄治。則病氣反增。正氣反損。而嘔瀉有加矣。絕之。謂禁絕其醫藥也。婁全善云。嘗治一二婦惡阻病吐。前醫愈治愈吐。因思仲景絕之之旨。以炒糯米湯代茶。止藥月餘漸安。



婦人宿有癥病。經斷未及三月。而得漏下不止。胎動在臍上者。此爲癥瘕害。妊娠六月動者。前三月經水利時。胎也。下血者。後斷三月。衄也。所以血不止者。其癥不去故也。當下其癥。桂枝茯苓丸主之。

癥。舊血所積。爲宿病也。癥瘕害者。宿病之氣。害其胎氣也。於法妊娠六月。其胎當動。今未三月。胎不當動而忽動者。特以癥瘕害之之故。是六月動者。胎之常。三月動者。胎之變也。夫癥病之人。其經月當不利。經不利。則不能受胎。茲前三月經水適利。胞宮淨而胎可結矣。胎結故經斷不復下。乃未三月而衄血仍下。亦以癥瘕害之之故。是血留養胎者。其常。血下不止者。其變也。要之。其癥不去。則血必不守。血不守。則胎終不安。故曰當下其癥。桂枝茯苓丸。下癥之力。頗輕且緩。蓋恐峻厲之藥。將并傷其胎氣也。

### 桂枝茯苓丸方

桂枝

茯苓

丹皮

桃

仁去皮熬

芍藥各等分

右五味末之。煉蜜丸如兔屎大。每日食前服一丸。不知。加至三丸。

婦人懷妊六七月。脈弦發熱。其胎愈脹。腹痛惡寒。少腹如扇。所以然者。子藏開故也。當以附子湯溫其藏。

脈弦發熱。有似表邪。而乃身不痛而腹反痛。背不惡寒而腹反惡寒。甚至少腹陣陣作冷。若或扇之者然。所以然者。子藏開不能合。而風冷之氣乘之也。夫藏開風入。其陰內勝。則其脈弦爲陰氣。而發熱且爲格陽矣。胎脹者。胎熱則消。寒則脹也。附子湯方未見。然溫裏散寒之意。概可推矣。

師曰。婦人有漏下者。有半產後因續下血。都不絕者。有妊娠下血者。假令妊娠腹中痛爲胞阻。膠艾湯主之。

婦人經水淋瀝。及胎產前後下血不止者。皆衝任脈虛。而陰氣不能守也。是惟膠艾湯爲能補而固之。中有芎歸。能於血中行氣。艾葉利陰氣。止痛安胎。故亦治妊娠胞阻。胞阻者。胞脈阻滯。血少而氣不行也。

膠艾湯方

乾地黄	六兩	川芎		阿膠		甘草	各二兩
艾葉		當歸	各三兩	芍藥	四兩		

右七味。以水五升。清酒三升。合煮取三升。去滓。內膠令消盡。溫服一升。日三服。不差更作。

婦人懷妊。腹中疝痛。當歸芍藥散主之。

按說文疝音絞。腹中急也。乃血不足而水反侵之也。血不足而水侵。則胎失其所養。而反得其所害矣。腹中能無疝痛乎。芎歸芍藥益血之虛。苓朮澤瀉除水之氣。趙氏曰。此因脾土爲木邪所客。穀氣不舉。濕氣下流。搏於陰血而痛。故用芍藥多他藥數倍。以瀉肝木。亦通。

### 當歸芍藥散方

當歸

川芎各三兩

芍藥一斤

茯苓

白朮各四兩

澤瀉半斤

右六味。杵爲散。取方寸匕。酒和。日三服。

妊娠嘔吐不止。乾薑人參半夏丸主之。

此益虛溫胃之法。爲妊娠中虛而有寒。飲者設也。夫陽明之脈。順而下行者也。有寒則逆。有熱亦逆。逆則飲必從之。而妊娠之體。精凝血聚。每多蘊而成熱者。

矣。按外臺方。青竹茹、橘皮、半夏各五兩。生薑、茯苓各四兩。麥冬、人參各三兩。爲治胃熱氣逆嘔吐之法。可補仲景之未備也。

乾薑人參半夏丸方

乾薑

人

參各一兩

半夏二兩

右三味末之。以生薑汁糊爲丸。梧子大。飲服十丸。日三服。

妊娠小便難。飲食如故。當歸貝母苦參丸主之。

小便難而飲食如故。則病不由中焦出。而又無腹滿身重等證。則更非水氣不行。知其血虛熱鬱。而津液瀯少也。本草當歸補女子諸不足。苦參入陰利竅除伏熱。貝母能療鬱結。兼清水液之源也。

當歸貝母苦參丸方

當歸

貝母

苦參各四兩

右三味末之。煉蜜丸如小豆大。飲服三丸。加至十丸。

妊娠有水氣。身重。小便不利。洒淅惡寒。起卽頭眩。葵子茯苓散主之。

妊娠小便不利。與上條同。而身重惡寒頭眩。則全是水氣爲病。視虛熱液少者。

霄壤懸殊矣。葵子、茯苓滑竅行水。水氣既行。不淫肌體。身不重矣。不侵衛陽。不惡寒矣。不犯清道。不頭眩矣。經曰。有者求之。無者求之。盛虛之變。不可不審也。

### 葵子茯苓散方

葵子一升

茯苓三兩

右二味。杵爲散。飲服方寸匕。日二服。小便利則愈。

婦人妊娠宜常服當歸散主之。

妊娠之後。最慮濕熱傷動胎氣。故於芎、歸、芍藥養血之中。用白朮除濕。黃芩除熱。丹溪稱黃芩、白朮爲安胎之聖藥。夫芩、朮非能安胎者。去其濕熱而胎自安耳。

### 當歸散方

當歸

黃芩

芍藥

川芎各一

白朮半斤

右五味。杵爲散。酒服方寸匕。日再服。妊娠常服即易產。胎無疾苦。產後百病悉主之。

妊娠養胎。白朮散主之。

妊娠傷胎。有因濕熱者。亦有因濕寒者。隨人藏氣之陰陽而各異也。當歸散。正治濕熱之劑。白朮散。白朮。牡蠣。燥濕。川芎。溫血。蜀椒。去寒。則正治濕寒之劑也。仲景並列於此。其所以詔示後人者深矣。

白朮散方

白朮

川芎

蜀椒去汗

牡蠣各三分

右四味。杵為散。酒服一錢匕。日三服。夜一服。但苦痛加芍藥。心下毒痛。倍加芎藭。心煩吐痛。不能食飲。加細辛一兩。半夏大者二十枚。服之。後更以醋漿水服之。若嘔。以醋漿水服之。復不解者。小麥汁服之。已後渴者。大麥粥服之。病雖愈。服之勿置。

婦人傷胎懷身。腹滿不得小便。從腰以下重。如有水狀。懷身七月。太陰當養不養。此心氣實。當刺瀉勞宮及關元。小便微利則愈。

傷胎。胎傷而病也。腹滿不得小便。從腰以下重。如有水氣。而實非水也。所以然者。心氣實故也。心。君火也。為肺所畏。而妊娠七月。肺當養胎。心氣實則肺不敢

降。而胎失其養。所謂太陰當養不養也。夫肺主氣化者也。肺不養胎。則胞中之氣化阻。而水乃不行矣。腹滿便難身重。職是故也。是不可治其肺。當刺勞宮以瀉心氣。刺關元以行水氣。使小便微利。則心氣降。心降而肺自行矣。勞宮心之穴。關元腎之穴。

### 婦人產後病脈證治第二十一

問曰。新產婦人有三病。一者病瘕。二者病鬱冒。三者大便難。何謂也。師曰。新產血虛多汗出。喜中風。故令病瘕。亡血復汗。寒多。故令鬱冒。亡津液胃燥。故大便難。瘕。筋病也。血虛汗出。筋脈失養。風入而益其勁也。鬱冒。神病也。亡陰血虛。陽氣遂厥。而寒復鬱之。則頭眩而目瞤也。大便難者。液病也。胃藏津液。而滲灌諸陽。亡津液胃燥。則大腸失其潤而便難也。三者不同。其爲亡血傷津則一。故皆爲產後所有之病。

產婦鬱冒。其脈微弱。嘔不能食。大便反堅。但頭汗出。所以然者。血虛而厥。厥而必冒。冒家欲解。必大汗出。以血虛下厥。孤陽上出。故頭汗出。所以產婦喜汗出者。亡

陰血虛。陽氣獨盛。故當汗出。陰陽乃復。大便堅。嘔不能食。小柴胡湯主之。

鬱冒雖有客邪。而其本則爲裏虛。故其脈微弱也。嘔不能食。大便反堅。但頭汗出。津氣上行而不下逮之象。所以然者。亡陰血虛。孤陽上厥。而津氣從之也。厥者必冒。冒家欲解。必大汗出者。陰陽乍離。故厥而冒。及陰陽復通。汗乃大出而解也。產婦新虛。不宜多汗。而此反喜汗出者。血去陰虛。陽受邪氣而獨盛。汗出則邪去。陽弱而後與陰相和。所謂損陽而就陰是也。小柴胡主之者。以邪氣不可不散。而正虛不可不顧。惟此法爲能解散客邪。而和利陰陽耳。

小柴胡湯方吐見嘔

病解能食。七八日更發熱者。此爲胃實。宜大承氣湯主之。

病解能食。謂鬱冒解而能受食也。至七八日更發熱。此其病不在表而在裏。不屬虛而屬實矣。是宜大承氣以下裏實。

大承氣湯方見瘕

產後腹中疝痛。當歸生薑羊肉湯主之。兼主腹中寒疝。虛勞不足。

產後腹中疝痛。與妊娠腹中疝痛不同。彼爲血虛而濕擾於內。此爲血虛而寒



動於中也。當歸、生薑溫血散寒。孫思邈云。羊肉止痛利產婦。

當歸生薑羊肉湯方

見寒症

產後腹痛。煩滿不得臥。枳實芍藥散主之。

產後腹痛。而至煩滿不得臥。知血鬱而成熱。且下病而礙上也。與虛寒疝痛不同矣。枳實燒令黑。能入血行滯。同芍藥為和血止痛之劑也。

枳實芍藥散方

枳實燒令黑太過

芍藥等分

右二味。杵為散。服方寸匕。日三服。并主癰膿。大麥粥下之。

師曰。產婦腹痛。法當以枳實芍藥散。假令不愈者。此為腹中有瘀血着臍下。宜下瘀血湯主之。亦主經水不利。

腹痛服枳實芍藥而不愈者。以有瘀血在臍下。着而不去。是非攻堅破積之劑。不能除矣。大黃、桃仁、蟅蟲。下血之力頗猛。用蜜丸者。緩其性。不使驟發。恐傷上二焦也。酒煎頓服者。補下治下。制以急。且去疾。惟恐不盡也。

下瘀血湯方

大黃三兩

桃

仁二十個

蠶

蟲二十枚  
去足熬

右三味末之。煉蜜和爲四丸。以酒一升煮一丸。取八合頓服之。新血下如豚肝。產後七八日。無太陽證。少腹堅痛。此惡露不盡。不大便。煩躁發熱。切脈微實。更倍發熱。日晡時煩躁者。不食。食則譫語。至夜即愈。宜大承氣湯主之。熱在裏。結在膀胱也。

無太陽證者。無頭痛惡寒之表證也。產後七八日。少腹堅痛。惡露不盡。但宜行血去瘀而已。然不大便。煩躁發熱。脈實則胃之實也。日晡爲陽明旺時。而煩躁甚於他時。又胃熱之驗也。食氣入胃。長氣於陽。食入而助胃之熱。則譫語。至夜陽明氣衰而譫語愈。又胃熱之驗也。故曰熱在裏。結在膀胱。裏即陽明。膀胱即少腹。蓋謂不獨血結於下。而亦熱聚於中也。若但治其血而遺其胃。則血雖去而熱不除。即血亦未必能去。而大承氣湯中大黃枳實均爲血藥。仲景取之者。蓋將一舉而兩得之歟。產後風續續數十日不解。頭微疼。惡寒。時時有熱。心下悶。乾嘔汗出。雖久。陽旦證續在者。可與陽旦湯。

產後中風。至數十日之久。而頭疼寒熱等證不解。是未可卜度其虛。而不與解之散之也。陽旦湯治傷寒太陽中風挾熱者。此風久而熱續在者。亦宜以此治之。夫審證用藥。不拘日數。表裏既分。汗下斯判。上條裏熱成實。雖產後七八日。與大承氣而不傷於峻。此條表邪不解。雖數十日之久。與陽旦湯而不慮其散。非通於權變者。未足以語此也。

陽旦湯方

即桂枝湯加黃芩

產後中風。發熱面正赤。喘而頭痛。竹葉湯主之。

此產後表有邪而裏適虛之證。若攻其表。則氣浮易脫。若補其裏。則表多不服。竹葉湯用竹葉、葛根、桂枝、防風、桔梗、解外之風熱。人參、附子、固裏之脫。甘草、薑、棗以調陰陽之氣。而使其平。乃表裏兼濟之法。凡風熱外淫而裏氣不固者。宜於此取則焉。

竹葉湯方

竹葉一把

葛根三兩

防風

桔梗

桂枝

人參

甘草各一

附子一枚

生

薑

五兩

大

棗

十五枚

右十味。以水一斗。煮取二升半。分溫三服。覆使汗出。頭項強。用大附子一枚。破之。如豆大。前藥揚去沫。嘔者加半夏半升洗。

婦人乳中虛。煩亂嘔逆。安中益氣。竹皮大丸主之。

婦人乳中虛。煩亂嘔逆者。乳子之時。氣虛火勝。內亂而上逆也。竹茹、石膏、甘寒清胃。桂枝、甘草辛甘化氣。白薇性寒入陽明。治狂惑邪氣。故曰安中益氣。

竹皮大丸方

生竹茹

石

膏

各二分

桂枝

白

薇

各一分

甘草七分

右五味末之。棗肉和丸。彈子大。飲服一丸。日三夜二服。有熱倍白薇。煩喘者加柏實一分。

產後下利虛極。白頭翁加甘草阿膠湯主之。

傷寒熱利下重者。白頭翁湯主之。寒以勝熱。苦以燥濕也。此亦熱利下重。而當產後虛極。則加阿膠救陰。甘草補中生陽。且以緩連柏之苦也。

白頭翁加甘草阿膠湯方

白頭翁

甘草

阿膠各二兩

秦皮

黃連

藥皮各三兩

右六味。以水七升。煮取二升半。內膠令消盡。分溫三服。

附方

千金三物黃芩湯。治婦人在草蓐。自發露得風。四肢苦煩熱。頭痛者。與小柴胡湯。頭不痛。但煩者。此湯主之。

黃芩一兩

苦參二兩

乾地黄四兩

右三味。以水六升。煮取二升。溫服一升。多吐下蟲。

此產後血虛風入而成熱之證。地黄生血。苦參、黃芩除熱也。若頭痛者。風未全變為熱。故宜柴胡解之。

千金內補當歸建中湯。治婦人產後虛羸不足。腹中刺痛不止。吸吸少氣。或苦少腹急。痛引腰背。不能食飲。產後一月日得服四五劑為善。令人強壯。宜

當歸四兩

桂枝

生薑各三兩

芍藥六兩

甘草二兩

大棗

十二枚

右六味。以水一斗。煮取三升。分溫三服。一日令盡。若大虛加飴糖六兩。湯成內之於火上煖令飴消。若去血過多。崩傷內衄不止。加地黃六兩。阿膠二兩。合八味湯成。內阿膠。若無當歸。以芎藭代之。若無生薑。以乾薑代之。

婦人雜病脈證并治第二十二

婦人中風。七八日續來寒熱。發作有時。經水適斷者。此爲熱入血室。其血必結。故使如瘧狀。發作有時。小柴胡湯主之。

中風七八日。寒熱已止而續來。經水纔行而適斷者。知非風寒重感。乃熱邪與血俱結於血室也。熱與血結。攻其血則熱亦去。然雖結而寒熱如瘧。則邪既留連於血室。而亦侵淫於經絡。設攻其血。血雖去。邪必不盡。且恐血去而邪得乘虛盡入也。仲景單用小柴胡湯。不雜血藥一味。意謂熱邪解而乍結之血自行耳。

婦人傷寒發熱。經水適來。晝日明了。暮則譫語。如見鬼狀者。此爲熱入血室。治之

無犯胃氣及上二焦必自愈。

傷寒發汗過多者。邪氣離表則入陽明。經水適來者。邪氣離表則入血室。蓋虛則易入。亦惟虛者能受也。晝日明了。暮則譫語者。血爲陰。暮亦爲陰。陰邪遇陰乃發也。然熱雖入而血不結。其邪必將自解。治之者但無犯胃氣及上二焦陽氣而已。仲景蓋恐人誤以發熱爲表邪未解。或以譫語爲陽明胃實。而或攻之。或汗之也。

婦人中風發熱惡寒。經水適來。得之七八日。熱除脈遲身涼和。胸脇滿如結胸狀。譫語者。此爲熱入血室也。當刺期門。隨其實而取之。

熱除脈遲身涼和而譫語者。病去表而之裏也。血室者。衝任之脈。肝實主之。肝之脈布脇肋。上貫膈。其支者復從肝別上膈。注於肺。血行室空。熱邪獨勝。則不特入於其宮。而亦得游其部。是以胸脇滿如結胸狀。許叔微云。邪氣畜血。併歸肝經。聚於膈中。結於乳下。以手觸之則痛。非湯劑可及。故當刺期門。期門。肝之募。隨其實而取之者。隨其結之微甚。刺而取之也。

陽明病下血譫語者。此爲熱入血室。但頭汗出。當刺期門。隨其實而瀉之。漉然汗

出者愈。

陽明之熱。從氣而之血。襲入胞宮。即下血而譫語。蓋衝任之脈。並陽明之經。不  
必乘經水之來。而後熱得入之。故彼爲血去而熱入。此爲熱入而血下也。但頭  
汗出者。陽通而閉在陰也。此雖陽明之熱。而傳入血室。則仍屬肝家。故亦當刺  
期門以瀉其實。刺已。周身濺然汗出。則陰之閉者亦通。故愈。

婦人咽中如有炙轆。半夏厚朴湯主之。

此凝痰結氣。阻塞咽嗌之間。千金所謂咽中帖帖。如有炙肉。吞不下。吐不出者  
是也。半夏厚朴。生薑辛以散結。苦以降逆。茯苓佐半夏利痰氣。紫蘇芳香入肺  
以宣其氣也。

半夏厚朴湯方

半 夏 一 升

厚 朴 三 兩

茯 苓 四 兩

生 薑 五 兩

蘇 葉 二 兩

右五味。以水一斗。煮取四升。分溫四服。日三夜一服。

婦人藏燥。喜悲傷欲哭。象如神靈所作。數欠伸。甘麥大棗湯主之。



藏燥。沈氏所謂子宮血虛。受風化熱者是也。血虛藏燥。則內火擾而神不寧。悲傷欲哭。有如神靈。而實爲虛病。前五藏風寒積聚篇。所謂邪哭使魂魄不安者。血氣少而屬於心也。數欠伸者。經云。腎爲欠。爲噫。又腎病者。善伸數欠。顏黑。蓋五志生火。動必關心。藏陰既傷。窮必及腎也。小麥爲肝之穀。而善養心氣。甘草大棗。甘潤生陰。所以滋藏氣而止其燥也。

### 甘麥大棗湯方

甘草三兩

小麥一升

大棗十枚

右三味。以水六升。煮取三升。分溫三服。亦補脾氣。

婦人吐涎沫。醫反下之。心下即痞。當先治其吐涎沫。小青龍湯主之。涎沫止。乃治痞。瀉心湯主之。

吐涎沫。上焦有寒也。不與溫散而反下之。則寒內入而成痞。如傷寒下早例也。然雖痞而猶吐涎沫。則上寒未已。不可治痞。當先治其上寒。而後治其中痞。亦如傷寒例。表解乃可攻痞也。

### 小青龍湯方

見肺癰

瀉心湯方

見驚悸

婦人之病。因虛積冷結氣。爲諸經水斷絕。至有歷年。血寒積結胞門。寒傷經絡。凝堅在上。嘔吐涎唾。久成肺癰。形體損分。在中盤結。繞臍寒疝。或兩脇疼痛。與藏相連。或結熱中。痛在關元。脈數無瘡。肌若魚鱗。時著男子。非止女身。在下來多。經候不勻。令陰掣痛。少腹惡寒。或引腰脊。下根氣街。氣衝急痛。膝脛疼痛。奄忽眩冒。狀如厥癰。或有憂慘。悲傷多嗔。此皆帶下。非有鬼神。久則羸瘦。脈虛多寒。三十六病。千變萬端。審脈陰陽。虛實緊弦。行其鍼藥。治危得安。其雖同病。脈各異源。子當辨記。勿謂不然。

此言婦人之病。其因約有三端。曰虛。曰冷。曰結氣。蓋血脈貴充悅。而地道喜溫。和。生氣欲條達也。否則血寒經絕。胞門閉而經絡阻矣。而其變證。則有在上。在中。在下之異。在上者。肺胃受之。爲嘔吐涎唾。爲肺癰。爲形體消損。病自下而至。上。從炎上之化也。在中者。肝脾受之。或寒疝繞臍。或脇痛連藏。此病爲陰。或結熱中。痛在關元。或脈數肌乾。甚則并着男子。此病爲熱中。爲陰陽之交。故或從寒化。或從熱化也。在下者。腎藏受之。爲經脫不勻。爲陰中掣痛。少腹惡寒。或上

引腰脊。下根氣街。及膝脛疼痛。腎藏爲陰之部。而衝脈與少陰之大絡。並起於腎故也。甚則奄忽眩冒。狀如厥癰。所謂陰病者。下行極而上也。或有憂慘悲嘆。狀如鬼神者。病在陰。則多怒及悲愁不樂也。而總之曰此皆帶下。帶下者。帶脈之下。古人列經脈爲病。凡三十六種。皆謂之帶下病。非今人所謂赤白帶下也。至其陰陽虛實之機。鍼藥安危之故。苟非醫者辨之有素。烏能施之而無誤耶。三十六病者。十二癰。九痛。七害。五傷。三癰也。

問曰。婦人年五十所。病下利數十日不止。暮即發熱。少腹裏急腹滿。手掌煩熱。脣口乾燥。何也。師曰。此病屬帶下。何以故。曾經半產。瘀血在少腹不去。何以知之。其證脣口乾燥。故知之。當以溫經湯主之。

婦人年五十所。天癸已斷而病下利。似非因經所致矣。不知少腹舊有積血。欲行而未得遽行。欲止而不能竟止。於是下利窘急。至數十日不止。暮即發熱者。血結在陰。陽氣至暮。不得入於陰。而反浮於外也。少腹裏急腹滿者。血積不行。亦陰寒在下也。手掌煩熱。病在陰。掌亦陰也。脣口乾燥。血內瘀者。不外榮也。此爲瘀血作利。不必治利。但去其瘀而利自止。吳茱萸、桂枝、丹皮入血散寒而行。

其瘀。芎歸、芍藥、麥冬、阿膠以生新血。人參、甘草、薑、夏以正脾氣。蓋瘀久者榮必衰。下多者脾必傷也。

溫經湯方

吳茱萸三兩

當歸

芎藭

芍藥

人參

桂枝

阿膠

丹皮

生薑

甘草各二兩

半夏半升

麥冬一升

右十二味。以水一斗。煮取三升。分溫三服。亦主婦人少腹寒。久不受胎。兼治崩中去血。或月水來過多。及至期不來。帶下。經水不利。少腹滿痛。經一月再見者。土瓜根散主之。

婦人經脈流暢。應期而至。血滿則下。血盡復生。如月盈則虧。月晦復朏也。惟其不利。則畜洩失常。似通非通。欲止不止。經一月而再見矣。少腹滿痛。不利之驗也。土瓜根主內痺瘀血。月閉。蠱蟲蠕動逐血。桂枝、芍藥行榮氣而正經脈也。

土瓜根散方

土瓜根

芍藥

桂枝

蠱蟲各三分

右四味。杵爲散。酒服方寸匕。日三服。

寸口脈弦而大。弦則爲減。大則爲芤。減則爲寒。芤則爲虛。寒虛相搏。此名爲革。婦人則半產漏下。旋覆花湯主之。

本文已見虛勞篇中。此去男子亡血失精句。而益之曰旋覆花湯主之。蓋專爲婦人立法也。詳本草旋覆花治結氣。去五臟間寒熱。通血脈。葱主寒熱。除肝邪。絳帛入肝理血。殊與虛寒之旨不合。然而肝以陰藏而舍少陽之氣。以生化爲事。以流行爲用。是以虛不可補。解其鬱聚。卽所以補。寒不可溫。行其血氣。卽所以溫。固不可專補其血。以傷其氣。亦非必先散結聚。而後溫補。如趙氏、魏氏之說也。

### 旋覆花湯方

旋覆花三兩

葱十四莖

新絳少許

右三味。以水三升。煮取一升。頓服之。

婦人陷經。漏下黑不解。膠薑湯主之。

陷經。下而不止之謂。黑則因寒而色瘀也。膠薑湯方未見。然補虛溫裏止漏。阿

膠、乾薑二物已足。林億云。恐是膠艾湯。按千金膠艾湯有乾薑。似可取用。

婦人少腹滿如敦狀。小便微難而不渴。生後者。此爲水與血俱結在血室也。六黃甘遂湯主之。

敦音對。按周禮注。槃以盛血。敦以盛食。蓋古器也。少腹滿如敦狀者。言少腹有形高起如敦之狀。與內經脇下大如覆杯之文略同。小便難。病不獨在血矣。不渴。知非上焦氣熱不化。生後即產後。產後得此。乃是水血並結。而病屬下焦也。故以大黃下血。甘遂逐水。加阿膠者。所以去瘀濁而兼安養也。

大黃甘遂湯方

大黃四兩

甘遂

阿膠各二兩

右三味。以水三升。煮取一升。頓服。其血當下。

婦人經水不利下。抵當湯主之。

經水不利下者。經脈閉塞而不下。比前條下而不利者有別矣。故彼兼和利。而此專攻逐也。然必審其脈證並實而後用之。不然。婦人經閉。多有血枯脈絕者矣。雖養衝任。猶恐不至。而可強責之哉。

抵當湯方

水 蛭 熬

蟲 蟲 熬 各 三十

桃 仁 二十

大 黃 酒 三 兩 浸

右四味爲末。水五升。煮取三升。去滓。溫服一升。婦人經水閉不利。藏堅癖不止。中有乾血。下白物。礬石丸主之。

藏堅癖不止者。子藏乾血。堅凝成癖而不去也。乾血不去。則新血不榮。而經閉不利矣。由是蓄洩不時。胞宮生濕。濕復生熱。所積之血。轉爲濕熱所腐。而成白物。時時自下。是宜先去其藏之濕熱。礬石却水除熱。合杏仁破結潤乾血也。

礬石丸方

礬 石 三分 燒

杏 仁 一分

右二味。末之。煉蜜丸。棗核大。內藏中。劇者再內之。

婦人六十二種風。腹中血氣刺痛。紅藍花酒主之。

婦人經盡產後。風邪最易襲入腹中。與血氣相搏。而作刺痛。刺痛。痛如刺也。六十二種未詳。紅藍花苦辛溫。活血止痛。得酒尤良。不更用風藥者。血行而風自去耳。

紅藍花酒方

紅藍花一兩

右一味。酒一大升。煎減半。頓服一半。未止再服。

婦人腹中諸疾痛。當歸芍藥散主之。

婦人以血為主。而血以中氣為主。中氣者。土氣也。土燥不生物。土濕亦不生物。芎歸芍藥滋其血。苓朮澤瀉治其濕。燥濕得宜。而土能生物。疾痛並蠲矣。

當歸芍藥散方

見妊

婦人腹中痛。小建中湯主之。

榮不足則脈急。衛不足則裏寒。虛寒裏急。腹中則痛。是必以甘藥補中。緩急為主。而合辛以生陽。合酸以生陰。陰陽和而榮衛行。何腹痛之有哉。

小建中湯方

見虛

問曰。婦人病。飲食如故。煩熱不得臥。而反倚息者。何也。師曰。此名轉胞。不得溺也。以胞系了戾。故致此病。腎氣丸主之。

飲食如故。病不由中焦也。了戾與繚戾同。胞系繚戾而不順。則胞爲之轉。胞轉



則不得溺也。由是下氣上逆而倚息。上氣不能下通而煩熱不得臥。治以腎氣者。上焦之氣腎主之。腎氣得理。庶療者順。戾者平。而閉乃通耳。

### 腎氣丸方

乾地黄八兩

山藥

山茱萸各四兩

澤瀉

丹皮

茯苓各三兩

桂枝

附子炮各一兩

右八味末之。煉蜜和丸。梧子大。酒下十五丸。加至二十丸。日再服。婦人陰寒。溫陰中坐藥。蛇床子散主之。

陰寒。陰中寒也。寒則生濕。蛇床子溫以去寒。合白粉燥以除濕也。此病在陰中而不關藏府。故但內藥陰中自愈。

### 蛇床子散方

蛇床子

右一味末之。以白粉少許。和合相得。如棗大。綿裹內之。自然溫。

少陰脈滑而數者。陰中即生瘡。陰中蝕瘡爛者。狼牙湯洗之。

脈滑者濕也。脈數者熱也。濕熱相合。而係在少陰。故陰中即生瘡。甚則蝕爛不

已。狼牙味酸苦。除邪熱氣。疥癬惡瘡。去白蟲。故取治是病。

狼牙湯方

狼牙 三兩

右一味。以水四升。煮取半升。以綿纏筋如繭。浸湯瀝陰中。日四遍。胃氣下泄。陰吹而正喧。此穀氣之實也。膏髮煎主之。

陰吹。陰中出聲。如大便失氣之狀。連續不絕。故曰正喧。穀氣實者。大便結而不通。是以陽明下行之氣。不得從其故道。而乃別走旁竅也。猪膏髮煎潤導大便。便通。氣自歸矣。

膏髮煎方

見黃

小兒疳蟲蝕齒方

雄黃

葶藶

右二味末之。取臘月猪脂鎔。以槐枝綿裹頭四五枝。蘸藥烙之。

金匱要略心典終

〔清〕

尤在涇

編集

金

匱

翼

中國醫學大成

# 金匱翼提要

清、尤在涇集撰。在涇幼習儒。長精醫學。於古方書靡不博通。其治病處。一以仲景爲宗。迺註仲景傷寒曰貫珠集。註金匱卽前金匱心典是也。間又取雜病古今實驗諸方討論之。集爲八卷。其卷一爲中風、濕症、瘟疫。其卷二爲痰飲、飲食、血症。其卷三爲膈噎、虛勞、發熱、惡寒、瘧疾。其卷四爲尸注、癲狂、黃疸、消渴、水氣、脹滿、積聚。其卷五頭項、背臂、眩暈、耳、鼻、口、舌、齒、咽喉。其卷六心痛、胃脘痛、腹痛、腰痛、脅痛、四肢腫、顫振、脚氣、痺症。卷其七咳嗽、喘、嘔吐、泄瀉、痢疾。其卷八夢遺、便閉、閉癰、交腸、淋症、痧症、診候生死要法等類。評其證候。析其治法。表裏虛實之辨。補瀉溫涼之用。開卷瞭然如指掌焉。足補金匱之所未備。實能羽翼金匱。顏曰金匱翼。真名副其實也。

## 徐序

傷寒而外。金匱一書。又雜症之大法門也。吾吳尤在涇先生。學術淵深。天機敏妙。嘗以其吟咏自得之餘。究心靈素。有金匱心典集注。北田讀書錄行世。又出其生平見聞。所以羽翼金匱者。條分縷晰。列爲八卷。祖述仲景遺意。薈萃各家之說。參以論斷。所謂廣長舌大法輪。可想見先生濟世婆心矣。余生也晚。不獲親炙先生。討論精奧。讀其書如見其人焉。聞諸故老云。先生鍵戶著書。絕意榮利。一時名宿如方東華。顧秀野。沈歸愚。李客山諸君。相與結城南之社。其詩採入國朝別裁集。爲時所誦習者已久。晚年爲人治病多奇中。蓋歷數十年精意研殫。宜其神妙莫測。是書余得之及門平舟沈子。復於星門陳子處借校。譌正缺補。名之曰金匱羽翼。竊仿傷寒附翼之義。夫科舉之學。揣摩家猶曰中式。况於病乎。則是書爲金匱羽翼。而先生爲仲聖功臣矣。是爲序。

嘉慶十有八年癸酉三月長洲後學徐錦書於心太平軒

# 柏序

聞之著書難。選書尤難。醫理之難知也。其書汗牛充棟。欲別贗存真。如披沙揀金。覽之博。尤貴擇之精。吾鄉尤在涇先生通儒也。邃於醫理。所著醫書數種。已刻者早已家置一編。而治雜病一書。祇存鈔本。是書之必傳於後。無庸贅述。獨惜其未廣所傳也。吾宗澹安大兄。昔同遊西疇夫子門。析疑賞奇。師深喜其好學。迄今積三十年。孜孜不倦。宜其乞方踵至。名動公卿。乃復虛懷若谷。雖盛暑晚歸。余至必剪燭深談也。嘗出郭氏傷寒論補亡。尤氏雜病兩書。正譌補缺。相與商確者久之。今尤氏書校刊已成。促其先付剞劂。名之曰金匱翼。尤氏固爲仲聖功臣。而澹安亦屬尤氏知己矣。是爲序。

弟柏雪峰氏拜書

# 尤序

余姪在涇。幼習儒業。長精於醫。於古方書靡不畢貫。而治病處方。一以仲景爲宗。既以其道活人。慮無以昭後世也。迺註仲景金匱。卽世所傳金匱心典是也。間又取雜病討論之。集爲八卷。詳其證候。析其治法。表裏虛實之辨。補瀉溫涼之用。開卷瞭然如指掌焉。嗚呼。此道之難知也久矣。今睹是書。抑何其深切而著明也。惜其所註仲景傷寒論名貫珠集者。余不得而見之。然在涇不專以醫名。其所爲詩必宗老杜。一如其醫之必宗仲景云。

乾隆三十三年歲次戊子 嶽岩老人世輔書於虎邱山塘之思永堂

# 金匱翼目錄

## 卷一

中風統論	一
卒中入法	二
開關	三
固脫	四
泄大邪	五
轉大氣	八
逐痰涎	九
除熱風	一〇
通竅隧	一一
灸膺穴	一二

中風失音不語	一七
口眼歪斜	一九
偏風	二〇
歷節痛風	二二
鶴膝風	二六
風緩	二七
風瘙癢	二九
諸濕統論	三〇
散濕之劑	三二
滲利之劑	三三
下濕之劑	三四
上下分清之劑	三四



瘟疫大法……………三六

卷二

痰飲統論……………一

治痰七法……………二

攻逐……………三

消導……………六

和……………九

補……………〇

溫……………〇

清……………三

潤……………四

飲食……………五

傷食……………五

傷酒……………一八

不能食……………一九

穀勞……………二三

食亦……………二四

諸血統論……………二五

風熱吐血……………二六

鬱熱失血……………二七

暑毒失血……………二九

畜熱吐血……………三〇

氣逆失血……………三二

勞傷失血……………三三

陽虛失血……………三四

傷胃吐血……………三五

鼻衄……………三六

卷三

齒紐	三九
舌紐	四〇
大紐	四一
大便下血統論	四二
結陰便血	四二
濕熱便血	四四
中虛脫血	四五
腸痔下血	四六
溲血	四七
膈噎反胃統論	一
痰膈	三
血膈	四

氣膈	七
蟲膈	九
雜療方	一〇
虛勞統論	一一
虛勞營衛不足	一三
肺勞	一五
心勞	一七
腎勞	一八
脾勞	一九
風勞	二一
熱勞	二四
乾血勞	二八
傳尸勞	二九
發熱統論	三一

勞倦發熱	三三
火鬱發熱	三三
血虛發熱	三四
陽浮發熱	三五
痰積發熱	三五
瘀血作熱	三六
骨蒸熱	三六
食積酒毒發熱	三七
惡寒	四四
瘧疾統論	四六
風瘧	四九
溫瘧	四九
濕瘧	五〇
痺瘧	五一

卷四

牡瘧	五一
痰瘧	五二
食瘧	五三
虛瘧	五四
瘵瘧	五五
尸疰	一
五尸	一
諸疰	五
鬼迷鬼擊	六
癲狂驚癇	七
黃疸	一四
穀疸	一六

酒疸	一九
女勞疸	二〇
陰黃	二一
虛黃	二三
表邪發黃	二三
急黃	二五
消渴統論	二五
水病	三〇
風水	三〇
皮水	三一
石水	三四
腎水	三五
脹滿統論	三六
脾脹	三六

肝脹	三九
臌脹	四〇
血脹	四一
食脹	四二
熱脹	四三
寒脹	四四
實脹	四五
虛脹	四六
積聚統論	四七
肥氣	四八
伏梁	五〇
痞氣	五〇
息賁	五一
奔豚	五一

氣積……………五一

血積……………五二

伏瘕……………五三

石瘕瘕聚……………五四

米瘕……………五四

肉積……………五五

通治諸積……………五六

## 卷五

頭痛統論……………一

風頭痛……………四

熱厥頭痛……………六

濕熱頭痛……………七

寒溼頭痛……………九

痰厥頭痛……………九

腎虛頭痛……………一二

肝厥頭痛……………一三

食積頭痛……………一四

血虛頭痛……………一四

氣虛頭痛……………一五

偏頭痛……………一七

雷頭風……………一八

大頭痛……………一九

項背痛……………二一

臂痛……………二二

眩暈……………二三

風虛眩暈……………二四

肝厥頭暈……………二五

下虛眩暈	二五
熱風頭眩	二六
耳病統論	二六
風聾	二七
厥聾	二九
腎虛耳聾	三〇
膿耳聾耳	三一
鼻	三二
鼻淵鼻塞	三三
舌	三五
舌脹舌出	三五
口	三六
口瘡	三六
齒	三八

卷六

齒痛	三八
咽喉	四二
客熱咽痛	四四
客寒咽痛	四七
咽痛失音	四八
咽喉妨悶	四九
喉痺諸法	五一
心痛統論	一
熱厥心痛	三
心寒痛	四
心虛痛	六
氣刺心痛	七

血瘀心痛	八
虺蛟心痛	九
胃脘痛	一一
痰積胃脘痛	一一
肝乘胃痛	一二
腎逆胃痛	一二
腹痛	一三
寒冷腹痛	一三
熱痛	一六
冷熱痛	一七
風痛	一八
食積痛	一九
死血痛	二一
腰痛	二一

風虛腰痛	二二
濕冷腰痛	二三
濕熱腰痛	二四
腎虛腰痛	二五
食積腰痛	二七
瘀血腰痛	二七
脇痛統論	二八
肝鬱脇痛	二九
肝虛脇痛	三〇
腎虛胸脇痛	三二
肝火脇痛	三二
汚血脇痛	三三
息積	三五
四肢腫	三六

顫振……………三七

脚氣之源……………三七

脚氣痺攣……………三八

脚氣脚膝腫痛……………四〇

脚氣少腹不仁……………四一

脚氣上氣……………四二

脚氣衝心……………四三

脚氣腫滿漸成水狀……………四五

脚氣差後復發……………四五

痺症統論……………四六

行痺……………四七

痛痺……………四八

著痺……………四九

熱痺……………五二

## 卷七

腸痺……………五三

胞痺……………五四

臂痺……………五五

攣症……………五六

咳嗽統論……………一

冷嗽……………二

熱嗽……………四

鬱熱嗽……………七

飲氣嗽……………八

食積欬嗽……………一一

燥欬……………一二

虛寒嗽……………一四



腎咳	一五
欬嗽失音	一六
喘統論	一八
痰實肺閉	一九
水氣乘肺	一九
寒邪入肺	二〇
令火爍肺	二一
腎虛氣逆	二一
胸喘	二二
血積肝傷	二四
嘔吐統論	二四
剛壯之劑	二六
清涼之劑	二六
消痰逐水之劑	二七

消食去積之劑	二九
行氣之劑	三〇
去風和胃之劑	三一
理中安虵之劑	三一
導利之劑	三二
益胃之劑	三三
欬嗽嘔吐痰血飲食	三三
泄瀉諸症統論	三四
濕瀉	三五
寒瀉	三七
熱瀉	三九
久泄	四〇
腎泄	四三
飧泄	四五

痢疾治法統論……………四八

分治痢症諸方……………五〇

寒下之劑……………五〇

和利之劑……………五一

疎解之劑……………五三

溫通之劑……………五四

溫補之劑……………五四

冷澀之劑……………五五

和養之劑……………五六

## 卷八

夢遺精滑……………一

清心之劑……………二

清燥濕熱之劑……………四

秘固精氣之劑……………七

赤白濁……………八

便悶統論……………九

虛悶……………一〇

實悶……………一二

風悶……………一三

冷悶……………一四

熱悶……………一四

氣悶……………一五

閉癰遺溺……………一六

小便不通……………一八

小便不禁……………二一

交腸……………二三

諸淋……………二三

沙石淋……………二五

勞淋……………二七

血淋……………二八

氣淋……………三〇

膏淋……………三二

疝症統論……………三三

溫劑之劑……………三五

逐水之劑……………三八

除濕之劑……………三八

降心火之劑……………三九

和血之劑……………四〇

散氣之劑……………四〇

寒熱兼行之劑……………四一

逐氣流經之劑……………四二

診候生死要法……………四二

# 金匱翼

清 吳門 尤 怡在涇編集

鄞縣 曹赤電炳章圈校

## 卷一

### 中風統論

中風之病。昔人有真類之分。蓋以賊風邪氣所中者爲真。痰火食氣所發者爲類也。以愚觀之。人之爲病。有外感之風。亦有內生之風。而天人之氣。恆相感召。真邪之動。往往相因。故無論賊風邪氣從外來者。必先有肝風爲之內應。卽痰火食氣從內發者。亦必有肝風之始基。設無肝風。亦祇爲他病已耳。寧有卒倒偏枯歪僻牽引等症哉。經云。風氣通於肝。又云。諸風掉眩。皆屬於肝。諸濕腫滿。皆屬於脾。諸寒收引。皆屬於腎。由此觀之。則中風之病。其本在肝。猶中涇之屬於脾。中寒之屬於腎也。雖五藏各有中風之症。然風在他藏。則又顯他藏之證矣。豈如今人之所

謂中風哉。而其爲病則有藏府經絡淺深之異。口眼歪邪。絡病也。其邪淺而易治。手足不遂。身體重痛。經病也。邪差深矣。故多從倒仆後見之。卒中昏厥。語言錯亂。府病也。其邪爲尤深矣。大抵倒仆之候。經府皆能有之。其倒後神清識人者在經。神昏不識人者在府耳。至於唇緩失音。耳聾目瞶。遺尿聲鼾等症。則爲中藏。病之最深者也。然其間經病兼府者有之。藏病連經者有之。府藏經絡齊病者有之。要在臨病詳察也。至於真邪虛實之故。治法通塞之宜。苟不預爲講求。何以應斯倉卒哉。夫邪氣所觸者。邪風暴至。真氣反陷。經絡府藏卒然不得貫通。不相維繫。內經所謂邪風之至。疾如風雨是也。藏邪所發者。藏氣內虛。肝風獨勝。卒然上攻九竅。旁溢四肢。如火之發。如泉之達。而不可驟止。肝象木而應風。而其氣又暴故也。又邪氣所觸者。風自外來。其氣多實。肝病所發者。風從內出。其氣多虛。病虛者氣多脫。病實者氣多閉。脫者欲其收。不收則死。閉者欲其通。不通亦死。約言治要。蓋有八法。茲用條列於後。神而明之。存乎其人耳。又五藏中風分治之方。余見古方龐雜失旨。不適於用。謹刪正五方。并錄出以備檢用云。

卒中八法

夫醫之治病。猶將之禦敵。宰之治民也。禦敵有法。奇正虛實。隨機應變。不知法。則不足以禦敵矣。治民有道。刑政教化。以時而施。不明道。則不足以臨民矣。病有陰陽表裏虛實緩急之殊。醫有寒溫汗下補瀉輕重之異。不知此。則不足以臨病矣。故立中風八法。以應倉卒之變。至於隨證緩調。另詳其法於後。蓋病千變。藥亦千變。凡病皆然。不獨中風。余於此首言之者。亦一隅三反之意爾。

一曰開關

卒然口噤。目張。兩手握固。痰壅氣塞。無門下藥。此爲閉證。閉則宜開。不開則死。搐鼻。揩齒。探吐。皆開法也。

白礬散聖濟治急中風。口閉涎止。欲垂死者。

白礬生二兩生薑升一兩連皮搗水二合

右二味。合研濾。分三服。旋旋灌之。須臾吐出痰毒。眼開風退。方可服諸湯散救治。若氣衰力弱。不宜吐之。

又方

白礬如搗指大豆皮二粒去膜

右將二味。於新瓦上煨令焦赤爲度。煉蜜丸。芡實大。每用一丸。綿裹。放患人口中。近喉處良久。吐痰立愈。一方加牙皂一錢。煨研取三分。吹鼻中。

急救稀涎散 本事 治中風涎潮。口噤氣閉不通。

猪牙皂角 四梗肥實不蛀者去黑皮

晉 礬 光明者一兩

右爲細末和勻。輕者半錢。重者一錢匕。溫水調灌下。不大嘔吐。但微微冷涎出。一二升。便得醒。次緩緩調治。大服亦恐過傷人。孫兆方

勝金丸 本事 治同前。

生薄荷 半兩

猪牙皂角

二兩槌碎。水一升。二味浸。杵汁。慢火熬成膏。

瓜蒂末

藜蘆末 各一兩

硃砂 半兩

右將硃砂末一分。與二味末研勻。用膏子搜和。丸如龍眼大。以餘硃砂爲衣。溫酒化一丸。甚者二丸。以吐爲度。得吐即省。不省者不可治。

二曰固脫

猝然之候。但見目合。口開。遺尿。自汗者。無論有邪無邪。總屬脫症。脫則宜固。急在元氣也。元氣固。然後可以圖邪氣。

參附湯

人參

製附子

用參須倍於附。或等分不拘五錢或一兩。酌宜用。薑水煎服。有痰加竹瀝。

三曰泄大邪

昔人謂南方無真中風病。多是痰火氣虛所致。是以近世罕有議解散者。然其間賊風邪氣亦間有之。設遇此等。豈清熱益氣理痰所能愈哉。續命諸方所以不可竟廢也。俟大邪既泄。然後從而調之。

小續命湯 河間云。中風面加五色。有表症。脈浮而惡寒。拘急不仁。此中風也。宜以加減續命。隨症治之。古今錄驗

麻黃

桂枝

杏仁

芍藥

甘草

人參

川芎

防己

黃芩各一兩

附子半兩

防風半兩

右為粗末。每服五七錢。水一盞半。生薑五片。煎至一盞去滓。稍熱服。食前。加減法。無汗惡寒。加麻黃、防風、杏仁。有汗惡風。加桂枝、芍藥、杏仁。無汗身



熱不惡風。加葛根二兩。桂枝、黃芩各依本方加一倍。有汗、身熱、不惡寒。加石膏、知母各二兩。甘草一兩。無汗、身寒。加附子半兩。乾薑二兩。甘草三兩。有汗、無熱。加桂枝、附子、甘草各依本方加一倍。肢節攣痛。或木不仁。加羌活四兩。連翹六兩。凡中風不審六經之加減。雖治之。不能去其病也。  
戴氏加減法。多怒。加羚羊角。熱而渴。去附子。加秦艽。恍惚錯語。加茯神、遠志。不得睡。加棗仁。不能言。加竹瀝。神虛無力。去麻黃。加人參。  
又雲岐子加減。見維繩類方

三化湯。潔古河間云。中風外有六經之形證。先以加減續命湯。隨症汗之。內有便溺之阻隔。復以三化湯下之。

厚朴

枳實

大黃

羌活各等分

右剉如麻豆大。每服三兩。水三升。煎至一升半。終日服之。以微利為度。經云。脾胃太過。則令人四肢不舉。又曰。土太過則敦阜。阜高也。敦厚也。既厚而又高。則令除去。此真膏粱之疾。非肝腎經虛之候也。何以明之。經云。三陰三陽發病。為偏枯痿易。王注云。三陰不足。則發偏枯。三陽有餘。則為

痿易。易爲變易常用。而痿弱無力也。其治宜三化湯。瀉令氣弱。陽衰土平而愈。若脾虛則四肢亦不用也。經云。土不及則卑監。卑者下也。監者陷也。坑也。四肢皆稟氣於胃。而不得至經。必因於脾。乃得稟也。今脾不能爲胃行其津液。四肢不得稟水穀氣。日以益衰。脈道不利。筋骨肌肉皆無氣以生。故不用焉。其治則宜十全散。加減四物。去邪留正也。按續命三化。並攻泄大邪之劑。人壯氣實者宜之。若氣弱無力者。不可用也。余故錄肘後等方於後。以備參用。蓋醫者法必求備。而用必極慎也。

肘後紫方

療中風脊強身痙如弓

雞屎二升

大豆一升

防風三兩

水二升。先煮防風取三合汁。豆雞矢二味。熬令黃赤色。用酒二升。淋之去滓。然後入防風汁。和分再服。相去人行六七里。覆取汗。避風。

荊芥散

治中風口噤。四肢搐搦。或角弓反張。

荊芥

一味。略炒爲末。酒服二錢。

賈似道云。此方出曾公談藝錄。前後用之甚驗。其子名順者。病此已革。服之立定。真再生丹也。華佗愈風散。治婦人產後中風口噤。手足痠癢如角弓。或產後血暈不省人事。四肢強直。或心眼倒築。吐瀉欲死者。亦只此一味。微炒爲末。每服三錢。豆淋酒調服。或童子小便服之。口噤則挾齒灌下。藥下如神。王貺指迷方。加當歸等分。水煎服。

豆淋酒法

黑豆二升。熬令聲絕。酒二升。納鎗中急攪。以絹濾取清。頓服取汁。續命煮散。復營衛却風邪。

桂枝七分

白芍

甘草

防風

獨活

人參

熟地黃

當歸

川芎

荊芥穗

細辛

遠志去心

乾葛

半夏各五分

右剉作一貼。入薑三片。水煎服。

四曰轉大氣

大氣、不息之真氣也。不轉則息矣。故不特氣厥類中。即真中風邪。亦以轉氣為先。經云。大氣一轉。邪氣乃散。此之謂也。

八味順氣散嚴氏

凡患中風者。先服此順養真氣。次進治風藥。

人參

白朮

茯苓

陳皮

青皮

台州烏藥

香白芷各一兩

甘草半兩

右咬咀。每服三錢。水一盞。煎七分。溫服。

勻氣散良方

即順風勻氣散。

白朮

烏藥一錢

人參

天麻一錢

沉香

青皮

白芷

木瓜

紫蘇

甘草各五分

右剉作一貼。薑三片。水煎服。

### 五曰逐痰涎

或因風而動痰。或因痰而致風。或邪風多附頑痰。或痰病有如風病。是以掉搖眩暈。倒仆昏迷等證。風固有之。痰亦能然。要在有表無表。脈浮脈滑為辨耳。風病兼

治痰則可。痰病兼治風則不可。

滌痰湯 治中風痰迷心竅。舌強不能言。

南星製半 夏泡七次各二錢 枳實熬炒 茯苓各二錢

橘紅半錢 石菖蒲 人參各一錢 竹茹七分

水一鍾半。生薑五片。煎八分。食後服。

清心散 治風痰不開。

薄荷 青黛 礪砂各二錢 牛黃

冰片各三分

右爲細末。先以蜜水洗舌。後以薑汁擦舌。將藥末蜜水調稀。擦舌本上。

六曰除熱風

內風之氣。多從熱化。昔人所謂風從火出者是也。是證不可治風。惟宜治熱。內經云。風淫於內。治以甘涼。外臺云。中風多從熱起。宜先服竹瀝湯。河間云。熱盛而生風。或熱微風甚。即兼治風也。或風微熱甚。但治其熱。即風亦自消也。

竹瀝湯 治熱風。心中煩悶。言語蹇澀。

竹瀝

荆瀝各五

生薑汁三合

右三味相和。溫服三合。以酒調服。良。一方竹瀝、荆瀝、梨汁各二合。陳醬汁半合。相合。微煎一二沸。濾清。細細灌入口中。治中風不語。昏沉不識人。一方竹瀝五合。人乳汁二合。三年陳醬汁半合。三味相和。分三服。治熱風。舌強不得語。心神煩悶。一方竹瀝二升。生葛汁一升。生薑汁三合。三味相和。溫分三服。日夜各一服。

地黃煎 治熱風。心煩悶。及脾胃間熱。不下食。

生地汁

枸杞根汁各二升

生薑汁一升

酥三升

荆瀝

竹瀝各五

天冬

人參各八兩

茯苓六兩

梔子仁

大黃各四兩

右先煎地黃等汁成膏。餘五物為散。內攪調。每服一匕。日再。漸加至三七。覺利減之。

### 七曰通竅隧

風邪中人。與痰相搏。閉其經隧。神暴昏。脈暴絕者。急與蘇合。至寶之屬以通之。蓋

惟香藥。爲能達經隧通神明也。

蘇合香丸

白朮

硃砂研

烏犀角屑

青木香

香附

訶子煨取肉

白檀香各二兩

龍腦研五錢

薰陸香

安息香另末無灰酒一升熬膏

沉香二兩

蘇合香油入安息香膏內各一兩

麝香研七錢半

丁香

華撥各二兩

右爲細末。入研藥勻。用安息香膏。并煉白蜜和劑。每服旋丸。如梧桐子大。清晨取并花水。溫冷任意化服四丸。溫酒亦得。空心服。

至寶丹方詳維綱茲不贅

八曰灸膻穴

中風卒倒者。邪氣暴加。真氣反陷。表裏氣不相通故也。灸之不特散邪。抑以通表裏之氣。又真氣暴虛。陽絕於裏。陰陽二氣不相維繫。藥石卒不能救者。亦惟灸法。爲能通引絕陽之氣也。

灸風中腑。手足不遂等症。

百會一穴。在頂中央旋毛中陷可容豆許

髮際是兩耳前兩穴。

肩髃二穴。在肩端兩骨間陷者宛宛中舉臂取之

曲池二穴。在肘外輔屈肘曲骨中以手拱胸取之橫紋頭陷中是

風市二穴。在膝外兩筋間平立舒下手指頭盡處陷者宛宛中

足三里二穴。在膝眼下三寸胫外廉兩筋間

絕骨二穴。在足外踝上三寸動脈中

灸風中臟。氣塞涎潮。不語昏危者。下火立效。

百會一穴。

大椎一穴。一名百勞在項後第一椎上陷中

風池二穴。在顛顙後髮際陷中

肩井二穴。在肩上陷解中缺盆上大骨前一寸半以三指按取之當其中指下陷者中是

曲池二穴。



間使二穴。在掌後三寸兩筋間陷中

足三里二穴。

灸風中脈。口眼歪斜。

聽會二穴。在耳前陷中張口得之動脈應手

頰車二穴。在耳下八分

地倉二穴。在俠口吻旁四分近下有脈微動者是

凡喎向右者。爲左邊脈中風而緩也。宜灸左喎陷中二七壯。喎向左者。爲右邊脈中風而緩也。宜灸右喎陷中二七壯。艾炷大如麥粒。頻頻灸之。以取盡風氣。口眼正爲度。

灸中風卒厥。危急等症。

神闕。用淨鹽炒乾。納臍中令滿。上加厚薑一片蓋之。灸百壯。至五百壯。愈多愈妙。薑焦則易之。

丹田。臍下三寸氣海。臍下五寸二穴俱連命門。爲生氣之海。經脈之本。灸之皆有大效。

凡灸法炷如蒼耳大。必須大實。其艾又須大熟。初得風之時。當依此次第灸之。火下卽定。千金翼云。愈風之法。火艾特有奇能。針石湯藥。皆所不及也。灸法。頭面上炷艾。宜小不宜大。手足上乃可粗也。又須自上而下。不可先灸下。後灸上。

趙氏曰。口之喎。灸以地倉。目之斜。灸以承泣。苟不效。則灸人迎。夫氣虛風實。而爲偏。上不得出。下不得入。真氣爲風邪所陷。故宜灸經云。陷下則灸之。是也。

范子默記崇寧中。凡兩中風。始則口眼歪邪。次則涎潮閉塞。左右共灸十二穴。得通氣。十二穴者。聽會、頰車、地倉、百會、肩髃、曲池、風市、足三里、絕骨、髮際、大椎、風池也。依而用之。無不立效。

羅謙甫云。凡治風。莫如續命湯之類。然此可以扶持疾病。要收全功。必須艾火爲良。

已上八法。不過約言治要耳。而風氣善行數變。證狀不一。茲更備舉諸風。條列如左。學者習而通焉。則思過半矣。

擬五藏中風分治之方

新定腎風菰蓉丸

菰蓉

熟地

防風

虎骨

山藥

牛膝各一兩

黑豆

石斛

當歸

獨活各七錢半

蜜丸梧子大。每百丸。空腹食前酒下。

新定肺風人參湯

人參一兩

麻黃八錢

羚羊角三錢

白薜皮三錢

防風一兩

桔梗五錢

杏仁廿一

石膏七錢

甘草五錢

右爲散。每服三錢。水煎。去滓溫服。

新定脾風白朮湯

白朮

白茯苓

防風

防己各七錢五分

人參

甘草各五錢

白芍

附子

麻黃

薏仁各一兩

右剉如麻豆大。每服三錢。水煎。入生薑汁半分。同煎取七分。去滓。服無時。日三。

新心風犀角丸

人參二兩

犀角一兩

遠志

生地黃

天冬各五錢

石菖蒲五錢

赤箭

紫石英各五錢

防風七錢

茯苓三兩

細辛三錢

丹砂辰砂一兩即

龍腦

麝香各一錢

右爲末。蜜丸雞豆大。每服一丸。溫酒下無時。

新肝風天麻散

天麻二兩

川芎一兩

人參一兩

羚羊角五錢一兩

犀角七錢

烏蛇三寸

柏子仁

酸棗仁

鈎藤各一兩半

甘菊一兩

右爲散。豆淋酒下一錢匕。漸加至二錢匕。日三。夜一。

中風失音不語

失音者。語無音聲。蓋卽瘖也。夫喉嚨者。氣之所上下也。會厭者。聲音之門戶也。其氣宣通。則聲音無所阻礙。若風邪搏於會厭。則氣道不宣。故令人失音。其邪氣入藏者。則井不能言語也。外臺云。肝風其口不能言。脾風聲不出。或上下手。又云。脾之脈挾喉連舌本。心之別脈係舌本。今心脾藏受風邪。故舌強不得語也。河間云。內奪而厥。謂腎脈虛弱。其氣厥不至舌下。則舌瘖不能言。足廢不能用。經名瘖痺。地黃飲子主之。比而論之。失音者。語言如故。而聲音不出。爲藏之虛也。舌強不能語。雖語而蹇澁不清。痰涎風氣之所爲也。不語者。絕無語言。非神昏不知人。卽藏氣厥不至舌下。要須分別治之。

河間地黃飲子

熟地黃

巴戟去心

石斛

山茱萸

菴蓰酒浸

附子炮

五味子

肉桂

白茯苓

麥冬

石菖蒲

遠志去心

右爲末。每服三錢。水一盞半。生薑五片。棗一枚。薄荷七葉。同煎至八分。服無時。滌痰湯

清心散二方並見前

寶鑑扶神散

扶神心炒一兩

薄荷二兩

蠟梢去毒五錢

右爲末。每服一二錢。溫酒調下。此治風氣挾痰不語之劑。

### 口眼歪斜

足陽明脈。循頰車。手太陽脈。循頸上頰。二經俱受風寒。筋急引頰。令人口喎僻。目不能正視。又云風入耳中。亦令口喎。緣坐臥處對耳有竅。爲風所中。筋牽過一邊。連眼皆緊。睡著一眼不合者是也。外臺治中風面目相引。口喎。牙車急。及舌不得轉方。

獨活三兩

竹瀝

生地黄汁各一升

三味合煎。取一升。頓服之。卽愈。

又方

牡蠣

礬石

附子

竈下黃土

右各等分爲末。取三年雉鳥冠血。和藥敷其上。候復故。便洗去之。千金翼云。左喎塗右。右喎塗左。

戴元禮云。有無故口眼喎斜。投以中風藥不效。蓋緣骨虛中受風邪所致。當於此求之。不可例作尋常中風治之。又方

草麻子去殼爛搗。右喎塗左。左喎塗右。或以鱧血入麝香少許塗之。

## 偏風

偏風者。風邪偏客身之一邊也。其狀或左或右。手不能舉。足不能履。內經所謂風邪之氣。各入其門戶。所中則爲偏風是也。亦有陰陽偏廢。左右不相貫通。或凝痰死血。壅塞經絡者。其狀與偏風等也。蓋左右者。陰陽之道路。不可偏也。偏則陰陽傾而隔矣。經絡者。血氣所流注。不可塞也。塞則氣血壅而廢矣。和利陰陽。疏滌經絡。治內傷之道也。大藥攻邪。針熨取汗。治外感之道也。

甄權防風湯 療偏風

防風一兩

羌活一兩

川芎一兩

白芷一兩

葛根二兩

杏仁二兩

白朮一兩

人參二兩

牛膝一兩

狗脊一兩

草薢一兩

薏仁二兩

麻黃四兩

石膏二兩

桂心二兩

生薑五兩

水一斗二升。煮取三升。分三服。服一劑覺好。更進一劑。灸風池、肩髃、曲池、支溝、

五樞、陽陵泉、巨墟、下廉、合七穴一度。灸之即差。外臺

麻子仁湯聖濟

治偏風手足不遂。口眼喎斜。

麻子仁

黑豆者緊小

鵲糞各二

垂柳枝者半寸長

四味。先以酒七升。煮柳枝取五升。炒鵲糞、麻仁、黑豆等令黃。乘熱投柳枝酒內。須更去滓。令淨。每服旋取。溫服二合至三合。空心。臨臥各一服。

活絡丹

川烏

草烏並泡去皮

膽星各六

地龍去土焙乾

乳香去油

沒藥各二錢

蜜丸桐子大。每服二三十九丸。溫酒下。



戴氏云。病症有終身不愈者。其在腰。或屈而不能伸。或伸而不能屈。在手足亦然。治法活血爲多。多服四物湯。吞活絡丹佳。

夜合醞酒方 治中風手足攣縮不能屈伸。

夜合枝

桑枝

槐枝

柏枝

石榴枝

各生用五兩

羌活二兩

防風五兩

糯米五升

黑豆

用五升者生

細麴七斤

共十味。以水五斗浸五枝。同煎取二斗五升。去滓。浸米豆二宿蒸熟。與麴羌活二味。採和造酒。依常醞法。封七日。壓去糟。取清酒三合。至五合。時飲之。令常有酒氣。勿令過醉亂氣。

熨法 治中風骨節疼痛。

天麻

半夏

細辛各二兩

絹袋二個。各盛藥令勻。蒸熱。交互熨痛處。汗出則愈。數日再熨。

# 歷節痛風

歷節風者。血氣衰弱。風寒襲入關節。不得流通。真邪相攻。所歷之節。悉皆疼痛。故謂歷節風也。病甚則使人短氣自汗。頭眩欲吐。肢節攣曲。不可屈伸。亦有熱毒流入四肢者。不可不知。

歷節腫痛。的是濕病。由飲酒當風。或汗出入水所致。經云。濕流關節是也。挾寒者。其痛如掣。挾風者。黃汗自出。其遍身走癢。澈骨疼痛。晝靜夜劇。發如蟲嚙者。謂之白虎歷節。

沒藥散

沒藥研半兩

虎脛骨酥炙三兩

二味搗末。每服二錢。溫酒調下。日三。

大棗湯

大棗十五枚

附子一枚

甘草一兩

黃耆四兩

麻黃五兩

生薑二兩

水七升。煮取三升。每服一升。日三。

白頭翁酒 治諸風攻痛。四肢百節。

白頭翁草一握。搗以醇酒投之。頓服。

又方

黑豆升半

威靈仙二兩

桑根白皮一兩

三味用醇酒一升半。煎取八合去滓。頓服之。桑皮換桑枝佳。張杲嘗患兩臂痛。服諸藥無效。一教取桑枝一小升切細炒香。以水三大升。煎取二升。一日服盡。無時數劑而愈。

犀角湯 治熱毒流入四肢。歷節腫痛。千金

犀角二兩

羚羊角一兩

前胡

黃芩

梔子仁

射干各三兩

大黃

升麻各四兩

豉一兩

水九升。煮取三升。去滓。分三服。一方有獨活一兩半。元參、生乾地黃各一兩。牛蒡根半兩。無黃芩。射干、大黃。蓋熱毒非苦寒不能瀉而去之。而熱傷陰氣者。又須甘寒以滋益之。至於攻走骨節。則獨活、牛蒡根尤有專長也。

白花蛇散

白花蛇酒浸二兩去皮何首烏去黑皮

蔓荊實

牛膝酒浸各四兩

威靈仙

荊芥穗

旋覆花各二兩

七味搗末。每一錢。溫酒調下。空心臨臥服。

牛膝湯

牛膝酒浸

當歸

赤芍各一兩

虎骨酥炙令黃二兩

芒硝別研

芎藭各半兩

桃仁去皮尖雙仁勿用二兩

七味爲散。每服空心溫酒調下一錢至二錢。

抵聖散

虎脰骨不計多少打破酒浸薰酒旋炙令黃脆爲度

一味爲散。每服半錢。入薄荷末一錢。人參末半錢。煎乳香酒調下。

仁齋云。虎骨酥炙黃。搥碎如米。每骨一升。以酒三升。浸五日。空心服一盞。冷則煖之。

麝香丸。治白虎歷節。諸風疼痛。游走無定。狀如蟲螫。晝靜夜劇。及一切手足不

測疼痛。

大川烏八角者三

全蠍個三十用

黑豆粒二十用

地龍錢去土五

右爲細末。入麝香半字。分三同研勻。糯米飲糊丸。如菉豆大。每服七丸。甚者十

丸。夜臥令膈空。溫酒下。微出冷汗一身。便瘥。

許叔微云。予得此方。凡是歷節。及不測疼痛。一二服便瘥。在歙州日。有一貴家婦人。遍身走注疼痛。至夜則發。如蟲嚙其肌。多作鬼邪治。予曰。此正歷節痛。三服愈。

### 鶴膝風

#### 蟬蛻丸

蟬蛻一條頭

白附子

阿魏

桂心

白芷各一

乳香三分

當歸

芍藥

北漏蘆

威靈仙

地骨皮

牛膝

羌活

安息香

生桃仁各一兩同沒藥三分

右十六味。蟬蛻、桃仁、白附、阿魏、桂心、白芷、安息香、乳香、沒藥九味。同童子小便并酒二升炒熟。冷後。入餘藥爲丸。蜜丸彈子大。空心溫酒化下一丸。蠍也。氣味全。

甘辛平有毒主諸風癱瘓及中風半身不遂口眼歪斜語澀手足抽掣

## 風緩

風緩。卽攤緩。其候四肢不舉。筋脈關節無力。不可收攝者。謂之攤。其四肢雖能舉動。而肢節緩弱。憑物不能運用者。謂之緩。或以左爲攤。右爲緩。則非也。但以左得之病在左。右得之病在右耳。推其所自。皆氣血虛耗。肝腎經虛。陰陽偏廢而得之。或有始因他病。服吐下之藥過度。亦使真氣內傷。營衛失守。一身無所稟養而然也。聖濟

風緩者。風邪深入而手足爲之弛緩也。夫脾主肌肉四肢。胃爲水穀之海。所以流布水穀之氣。周養一身。脾胃旣虛。肢體失其所養。於是風邪襲虛。由腠理而入肌肉。由肌肉而入脾胃。安得不爲之緩廢乎。又人之一身。筋骨爲壯。肝主筋。腎主骨。肝腎氣虛。風邪襲之。亦有肢體緩弱之症。是當先去風而後益之。仁齋

天麻浸酒方 治攤緩風。不計深淺。久在牀枕。

天麻

龍骨

虎骨

骨碎補

烏蛇酒浸去皮骨

白花蛇同上

羌活

獨活

惡實根

牛膝各半

松節剉

敗龜板酥炙

乾熟地黃

當歸

川芎

茄根

附子一枚泡去皮臍

大麻仁

原蠶沙炒各一兩

共十九味。以咀如麻豆。用酒二斗浸。密封。春夏三日。秋冬七日。每一盞。不拘時溫服。

四斤丸 治風寒濕毒。與氣相搏。筋骨緩弱。四肢痠疼痺。

宣木瓜去穢切

天麻

牛膝焙

菰蓉洗切

右四味各一斤。用好酒浸三日。外用熟附子、虎骨酥炙各二兩為末。用浸藥酒調麴糊丸。桐子大。每服三四十丸。食前溫酒或豆淋酒下。一方加當歸三兩。乳香、沒藥、五靈脂各半兩。麝香一錢。名大四斤丸。

新定

人參

黃耆各半

白朮

何首烏

肉蓯蓉

兔絲子

牛膝各四

白茯苓

川草薢

骨碎補

狗脊

川附子各三兩

川烏

羌活

防風

地龍

全蠍各一兩

右爲末。酒糊丸。梧子大。每服五十丸。溫酒下。

### 風瘙癢

風瘙癢者。表虛衛氣不足。風邪乘之。血脈留滯。中外鼓作。變而生熱。熱卽瘙癢。久不瘥。淫邪散溢。搔之則成瘡也。

防風湯淋洗方

防風

苦參

益母草各三兩

白蒺藜炒五兩

荊芥穗

蔓荊實

枳殼各二兩

每用三兩。水一斗。煎至八升。乘熱淋洗患處。

### 松葉酒方

松葉一斤。酒一斗。煮三升。日夜服。出汗。



胡麻散 治脾肺風毒。攻注皮膚瘙癢。手足生瘡。及遍身痞癰。發赤黑靨子。肌熱疼痛。

胡麻炒令香熱

枳殼各二

防風

蔓荊實

威靈仙

苦參

何首烏米泔浸透去黑皮炒乾

川芎

荊芥穗

甘草炙各一兩

薄荷半兩

右爲散。每服二錢。溫酒下。或煉蜜丸。梧子大。每服三十丸。

洗方思永堂松年大伯常用此方治遍身瘡癰作癢以之浴身後先父用之無不效

紫背浮萍半碗

稀荻草一握

蛇牀子五錢

蒼耳子一兩

防風五錢

煎湯熏洗數次。無不愈者。

### 諸濕統論

濕氣不一。有天之濕。霧露雨是也。天本乎氣。故先中表之營衛。有地之濕。水泥是也。地本乎形。故先傷皮肉筋骨血脈。有飲食之濕。酒水乳酪之類是也。傷於脾胃。

有汗液之濕。汗液亦濕也。止感於外。有人氣之濕。太陰濕土之所化也。乃動於中。天之濕。汗之地之濕。滲之。飲食之濕。在上吐之。在中奪之。在下者引而竭之。汗液之濕。亦以汗取之。人氣之濕。屬太陰所化。在氣交之分。土兼四氣。寒熱溫涼。升降浮沉。備在其中。當分上下中外而治。以兼化四氣。淫佚上下中外。無處不到也。大率在上則病頭重胸滿嘔吐。在外則身重腫脹。在下則足脛跗腫。在中則腹脹中滿痞塞。其所用藥。亦兼寒熱溫涼。以爲佐使而治之。

濕之爲病。有自外入者。有自内生者。必審其方土之病本。東南地下。多陰雨。地濕。凡受必從外入。多自下起。是以重腿脚氣者多。治當汗散。久者宜疏通滲泄。西北地高。人食生冷濕麵。或飲酒後。寒氣怫鬱。濕不能越。或腹皮脹疼。甚則中滿水蠱。或週身浮腫如泥。按之不起。此皆自內而生者也。審其元氣多少。而通利其二便。責其根在內者也。然方土內外。亦互相有之。但多少不同。須對症施治。不可執一也。

中濕與風寒氣合者爲痹。其寒多者爲痛。爲浮腫。非朮附桂不能去也。其風多者爲煩劇。爲流走。非麻黃薏苡烏頭不能散也。其濕多者爲堅滿。爲氣閉。非甘遂葶

蘼、枳、朮不能泄也。

散濕之劑

麻黃加朮湯 金匱云。濕家身煩疼。可與麻黃加朮湯。發其汗為宜。慎不可以火攻之。

麻黃 三兩 去節

桂枝 二兩 去皮

甘草 一兩 炙

白朮 四兩

杏仁 七十個 去皮尖

水九升。先煮麻黃減二升。去上沫。內諸藥。煮取二升半。去滓。溫服八合。覆取微汗。

按此治寒濕在表之劑也。寒固當汗。而濕在表者。亦非汗不解。故以麻黃散寒。以白朮除濕。取微汗者。汗大出。則濕反不去也。

麻黃杏仁薏苡甘草湯

治風濕一身盡疼。發熱日晡所劇。此病傷於汗出當風。

或久傷取冷所致也。

方詳金匱 玆不贅

羌活勝濕湯 東垣

治濕氣在表。脈浮身重。不能轉側。自汗。或額上多汗。此為風

濕。

羌活

獨活各一錢

川芎

藁本

防風

炙甘草各五分

蔓荊子三分

如腰痛中冷。沉沉然者。有寒濕也。加酒洗漢防己。附子各五分。按此治風濕在腠理。及關節之劑。吳鶴皋云。無竅不入。惟風藥為能。故凡關節之病。非羌獨等不能到也。

滲利之劑

五苓散

通治諸濕腫滿。嘔逆泄瀉。痰飲濕瘧。身痛身重。

猪苓

茯苓

白朮

澤瀉

桂

為末。每服三錢。服後多飲熱水。汗出愈。

腎著湯三因

治傷濕身重。腰冷如坐水中。

乾薑

茯苓各四兩

甘草炙

白朮生各二兩

右每服四錢。水一盞。煎七分。空心溫服。已上溫利之劑。濕兼寒者宜之。

清熱滲濕湯

黃柏鹽水炒

黃連

茯苓

澤瀉各一錢

蒼朮

白朮各一錢半

甘草五分

水二鍾。煎八分服。

此清滲之劑。濕而熱者宜之。

下濕之劑

舟車神佑丸

甘遂

芫花

大戟各一兩

大黃二兩

青皮

陳皮

木香

檳榔各半兩

黑牽牛四兩末

輕粉一錢

取蟲加蕪荑半兩。

爲末。水丸空心服。治法服法詳載準繩痰飲門

青木香丸方見

上下分消之劑

除濕湯百一 治傷濕發熱惡寒。身重自汗。骨節疼痛。小便閉。大便溏。腰脚痺冷。

皆因坐臥卑濕。或冒雨露。或著濕衣所致。

半夏麴炒

厚朴薑製

蒼朮米泔浸炒 生白朮

藿香葉

橘紅

白茯苓各一兩

炙甘草七錢

右咬咀。每服四錢。薑七片。棗一枚。水煎。食前溫服。

升麻除濕湯 治傷濕。腫瀉腸鳴腹痛。

升麻

柴胡

羌活

防風

半夏

益智仁

神麴

澤瀉各五錢

麥蘖麵

陳皮

猪苓

甘草各三錢

蒼朮一錢

右作一服。生薑三片。棗二枚。水煎去滓。空心服。

東垣云。雖有治濕必利小便之說。若濕從外來而入裏。用滲利之劑以除之。是降之又降。重竭其陽。而復益其陰也。故用升陽風藥。即差。大法云。濕淫所勝。必助風以平之也。愚謂濕病用風藥者。是助升浮之氣。以行沉滯之濕。非以風勝之之謂也。又濕在上在表者。多挾風氣。非汗不能去也。荆防羌麻祛風之品。豈能行濕之

事哉。

## 瘟疫大法

瘟疫之病。近代諸家。多與溫病同論。以其聲稱之同。與病形之似也。然而瘟疫者。天地之厲氣也。最爲惡毒。感之而病者。往往致死。其甚者。致於滅門。若冬春間之溫病。苟調治得理。則未必致死。亦必不傳染多人。故其方法。宜應別論。且也歲運有太過不及之殊。天時有恆雨恆暘之異。是以疫厲之行。亦有表裏寒溫熱濕之分。其可以一概論哉。約而言之。計有三門。若其表裏俱病。而盛於表者。則用東垣普濟消毒之法。若其病不在表。又不在裏。而獨行中道者。則用吳又可達原飲之法。若其表熱既盛。裏症復急。治表治裏。救療不及者。則用陶尚文三黃石膏湯之法。此瘟疫入手法門也。亦有邪氣獨盛於表。而裏無熱症者。則活人敗毒散之治也。亦有寒濕獨行。而病在肌皮胸膈者。則東坡聖散子之證也。合前三法。共爲五法。以余所見。則未有不兼裏者。而有寒濕而無蓄熱。亦十中未得其一二也。然而法不可不備。惟用之者。得其當耳。因並錄五方於左。以見瘟疫之端如此。其病稍

久。或六七日。或十餘日。熱深不解者。則同傷寒溫熱治之。

普濟消毒飲子東垣

黃芩酒製

黃連酒製各

人參三錢

陳皮

元參各二錢

甘草

連翹

板藍根

馬勃

牛蒡子

僵蠶

升麻各一錢

柴胡五分

桔梗三分

泰和二年四月。民多疫厲。初覺憎寒壯熱體重。次傳頭面腫盛。目不能開。上喘咽。喉不利。口燥舌乾。俗云大頭傷寒。諸藥雜治終莫愈。漸至危篤。東垣曰。身半以上。天之氣也。邪熱客於心肺之間。上攻頭目而為腫耳。須用芩連等藥。共為細末。半用湯調。時時稍熱服之。半用蜜丸嚥化。服盡良愈。活者甚衆。如大便秘。加酒蒸大黃一錢。或二錢以利之。腫勢甚者。以砭針刺之。或加防風、川芎、薄荷、當歸各五錢。水煎。時時服之。

達原飲

檳榔二錢

草果五分

厚朴一錢

芍藥一錢



甘草五分

黃芩

知母一錢

右七味。以水二鍾。煎八分服。

吳又可曰。疫癘之邪。從口鼻而入。舍於伏脊之內。去表不遠。附胃亦近。乃表裏之分界。卽內經瘧論所謂橫連膜原是也。感之淺者。或俟有觸而發。感之深者。中而卽病。其始陽格於內。營衛運行之機。阻遏於表。遂覺凜凜惡寒。甚則四肢厥逆。至陽氣困鬱而通。厥回而中外皆熱。昏昧不爽。壯熱自汗。此時邪伏膜原。縱使有汗。熱不得解。必俟伏邪已潰。表氣潛行於內。精氣自內達表。表裏相通。振慄大汗。邪方外出。此名戰汗。脈靜身涼而愈也。若伏邪未盡。必復發熱。其熱有久有淺。因所感之輕重。與元氣之盛衰也。要皆始先惡寒。旣而發熱。至於發出。方顯變症。其症或從外解。或從內陷。外解則易。內陷則險。更有先後表裏不同。有先表後裏者。有先裏後表者。有但表而不復裏者。有但裏而不復表者。有表而裏再表者。有裏而表再裏者。有表裏分傳者。有表多於裏者。有裏多於表者。此爲九傳。從外解者。或發煩。或戰汗。自汗。從內陷者。胸膈痞悶。心下脹滿。腹滿燥結便閉。熱結旁流。協熱下利。或嘔吐惡心。譫語舌黃。及黑胎芒刺等症。因症用治。脈不浮不沉而數。晝夜

皆熱。日晡益甚。頭疼身痛。不可用辛熱藥汗之。又不可下。宜用達原飲以透膜原之邪爲當也。若見各經。加入引各經藥。不可熱滯。感之輕者。舌胎亦薄。脈亦不甚數。如此者。或從汗解。如不能得汗。邪氣盤錯於膜原。表裏不相通達。未可強汗。衣被逼汗。湯火劫汗也。感之重者。舌上胎如粉膩。藥後反從內陷。舌根先黃。漸至中央。此邪漸入胃也。前方加大黃下之。若脈長洪而數。汗多大渴。此邪氣適離膜原。欲表未表。白虎湯症也。如舌上純黃色。兼見裏症。此邪已入胃。乃承氣湯症也。有兩三日即離膜原者。有半月十日不傳者。有初得之四五日。厭厭聶聶。至五六日。陡然勢張者。凡元氣勝者。毒易傳化。元氣薄者。邪不易化。即不易傳。不傳則邪不去。淹留日久。愈沉愈伏。因誤進參耆。愈壅愈固。不死不休矣。

三黃石膏湯

治瘟疫大熱無汗。發狂不識人。

石膏 三錢

黃芩

黃連

黃柏 各一錢五分

豆豉 半合

麻黃 一錢

梔子 五枚

右作一服。水二盞。煎至一盞三分。連進三五劑。愈。按。疫邪充斥內外。爲頭痛身熱。爲煩渴悶亂。發狂不識人。欲表之則裏已急。欲

裏之則表不退。此方清裏解外。合爲一方。譬之大軍壓境。孤城四面受圍。雖欲不潰。不可得矣。或千金雪煎。或古今錄驗麥奴丸並佳。稍輕者。大青消毒湯。又時病表裏大熱欲死方。

大黃

寒水石

芒硝

石膏

升麻

麻黃

葛根

紫葛等分

右爲末。方寸匕。水服。日二。

聖散子

東坡

治一切山嵐瘴氣。時行瘟疫。傷寒風濕等疾。有非常之功。如李待

詔所謂內寒外熱。上實下虛者。此藥尤效通神。宋嘉佑中。黃州民病疫瘴大行。得此藥瘥活者。不可勝記。蘇東坡撰文勒石以廣其傳。聖散子之功效益著。徽州鄭尙書在金陵。用此治傷寒。活人甚衆。故知其大能散寒濕。驅除瘴瘧。實有超凡之效也。

蒼朮

防風

厚朴

豬苓

澤瀉

白芷

川芎

赤芍藥

藿香

柴胡

麻黃

升麻

羌活

獨活

枳殼

細辛

吳茱萸炮

藁本

茯苓各七錢

石菖蒲

草豆蔻

夏薑

炙甘草二兩

大附子一枚

右爲粗末。每服三錢。水二鍾。棗一枚。煎八分。稍熱服。

活人敗毒散

羌活

獨活

前胡

柴胡

枳殼

白茯苓

桔梗

人參各一兩

川芎一兩

甘草半兩

右爲細末。每服二錢。水一盞。入生薑二片。煎至七分。溫服。或沸湯點亦得。

金匱翼卷一 瘟疫大法

# 金匱翼

清 吳門 尤 怡在涇編集

鄞縣 曹赤電炳章圈校

## 卷二

### 痰飲統論

人之有形。藉水飲以滋養。水之所化。憑氣脈以宣流。蓋三焦者。水穀之道路。氣脈之所終始也。若三焦調適。氣脈平均。則能宣通水液。行入於經。化而爲血。灌漑周身。設三焦氣澀。脈道不通。則水飲停滯。不得宣行。因之聚成痰飲。爲病多喘。古方論痰有四。痰飲、懸飲、溢飲、支飲是也。詳見金匱要略。然又有留飲、癖飲、流飲、伏飲之異。其聚而不散者曰留飲。僻處脇下者曰癖飲。流移不定者曰流飲。沉伏於內者曰伏飲。又因酒而成癖者曰酒癖。因寒多所致者曰冷痰。因熱邪所傷者曰熱痰。病雖多端。悉由三焦不調。氣道否澀而生病焉。是以氣行卽水行。氣滯卽水滯。

故知飲之爲病。在人最多。善治者。以宣通其氣脈爲先。則飲無所凝滯。所以治痰飲者。當以溫藥和之。蓋人之氣血得溫則宣流也。及結而成堅癥。則兼以消痰破飲之劑攻之。

痰之源不一。有因熱而生者。有因氣而生者。有因風而生者。有因驚而生者。有因積飲而生者。有多食而生者。有因暑而生者。有傷冷物而成者。有因脾虛而成者。其爲病也。驚痰則成心痛癰疾。熱痰則成煩躁懊懣。頭風爛眼。風痰則成癱瘓。大風眩暈。暗風悶亂。飲痰成脇痛。四肢不舉。每日嘔吐。食痰成瘰癧。口臭痞氣。暑痰頭昏眩暈。黃疸頭疼。冷痰骨痺。四肢不舉。氣刺痛。酒痰飲酒不消。但得酒。次日又吐。脾虛生痰。食不美。反胃嘔吐。氣痰攻注。走刺不定。丹溪

痰生於脾胃。宜實脾燥溼。又隨氣而升。宜順氣爲先。分導次之。又氣升屬火。順氣在於降火。熱痰則清之。溼痰則燥之。風痰則散之。鬱痰則開之。頑痰則軟之。食痰則消之。在上者吐之。在中者下之。又中氣虛者。宜固中氣以運痰。苦攻之太過。則胃氣虛而痰愈甚矣。節齋

## 治痰七法

一日攻逐

古云。治痰先補脾。脾復健運之常。而痰自化。然停積既甚。譬如溝渠瘀壅。久則倒流逆上。污濁臭穢。無所不有。若不決而去之。而欲澄治已壅之水。而使之清。無是理也。故須攻逐之劑。

神仙墜痰丸

黑牽牛取頭末

皂角酥炙

白礬生一

為末。水丸桐子大。酒下三五十丸。

控涎丹

甘遂

大戟

白芥子等分

右為末。糊丸。臨臥薑湯服五七丸至十丸。痰猛加丸數。

李時珍曰。痰涎為物。隨氣升降。無處不到。入心則成癲癇。入肺則壅竅。為喘欬背冷。入肝則膈痛乾嘔。寒熱往來。入經絡則麻痺疼痛。入筋骨則牽引釣痛。入皮肉則癰癰腫。陳無擇三因方。並以控涎丹主之。殊有奇功。一名妙應丸。又人忽患胸背手足腰項筋骨牽引釣痛。走易不定。或手足冷痺。氣脈不通。此乃痰涎伏在



心膈上下。隨氣攻注。隧道閉塞所致。誤認癰瘰非也。須以此藥治之。  
十棗湯

芫花醋炒

甘遂麵裹

大戟各等分

右爲細末。以水一升半。煮大棗十枚至八合。去滓調藥末。強人一錢匕。弱人五分。平旦服之。不下更加五分。下後以糜粥調養之。河間云。芫花之辛以散飲。大戟之苦以泄水。其甘遂直達水氣所結之處。乃泄水飲之聖藥也。

礞石滾痰丸 王隱君曰。痰病古今未詳。方書雖有五飲諸飲之異。而莫知其病之源。或頭風作眩。目暈耳鳴。或口眼蠕動。眉稜耳輪痛癢。或四肢遊風腫硬。似疼非疼。或齒頰痛。牙齒浮痛。或噯氣吞酸。心下嘈雜。或痛或噦。咽嗑不利。咯之不出。嚥之不下。其痰似墨。或如破絮。桃膠蜆肉之狀。或心下如停冰鐵。心氣冷痛。夢寐奇怪。失志癲癇。或足腕痠疼。腰背骨節卒痛。或四肢筋骨疼痛。難以名狀。並無常處。或手臂痛麻。狀若風溼。或脊上一條如線之寒起者。或渾身習習如臥芒刺者。或眼粘溼癢。口糜舌爛。喉痺等證。或繞項結核。狀若瘰癧。或胸腹間有如二氣交紐。噎息煩悶。有如煙水上衝。頭面烘熱。或中風癱瘓。或勞瘵在

其之疾。或風毒脚氣。或心下怔忡。如畏人捕。或喘欬嘔吐。或嘔冷涎墨汁綠水。甚爲肺癰腸毒便膿攣跛。內外爲病百端。皆痰所致。其狀不同。難以盡述。蓋津液既凝爲痰。不復周潤三焦。故口燥咽乾。大便秘結。面如枯骨。毛髮焦槁。婦人則因此月水不通。若能逐去敗痰。自然服餌有效。余用滾痰丸以愈諸疾。今特相傳於世云。

青礞石一兩

沉香五錢

大黃酒蒸熟切

黃芩各入

右將礞石打碎。用焰硝一兩。同入瓦罐。鹽泥固濟。曬乾火煨。石色如金爲度。研末。和諸藥。水丸如梧子大。白湯食後服。人壯氣實者。可至百丸。服後仰臥。令藥在胸膈間。除徐而下。除逐上焦痰滯惡物過膈。然後動作。食湯水。方能中病。明日當下痰積惡物。若不下。加十丸。

愚按。痰之與飲。同類而異名者耳。痰者。食物所化。飲者。水飲所成。故痰質稠而飲質稀也。痰多從火化。飲多從寒化。故痰宜清而飲宜溫也。痰多膠固一處。飲多流溢上下。故痰可潤而飲可燥也。是以控涎十棗。爲逐飲之真方。礞石滾痰。乃下痰之的藥。易而用之。罕有獲效者矣。學者辨之。

二曰消導

凡病痰飲未盛。或雖盛而未至堅頑者。不可攻之。但宜消導而已。消者。損而盡之。導者。引而去之也。

和劑二陳湯 治痰飲爲患。或嘔逆惡心。或頭眩心悸。或中脘不快。或食生冷。飲酒過度。脾胃不和。並宜服之。

半夏 薑製

橘紅 各五

白茯苓 三兩

甘草 半兩

右咬咀。每服四錢。水一瓊。薑七片。煎八分。熱服無時。一方有大棗一枚。本方加枳實、桔梗。名桔梗半夏湯。

濟生導痰湯

半夏 夏湯洗七

天南星 皮泡去

赤茯苓

枳實

橘紅 各一

甘草 炙半

右咬咀。每服四錢。水薑煎。食後溫服。

青礞石丸 治食積成痰。

青礞石 敲碎如棗子大。以焰硝二兩同入鍋。煨黃色。

茯苓

半夏 夏湯洗

天南星煨火

黃芩各五錢

風化硝三錢金屑者冬月以絹袋盛懸風前化之

右為細末。神麴糊入薑汁為丸如梧子大。每服三五十丸。薑湯送下。一方加

薑汁、菖蒲、滑石。一方無南星。有白朮。一方有枳實。倍礞石。一方加蒼朮

五錢。滑石一兩。

又方

半夏

陳皮

白朮

白茯苓

大黃

黃芩

人參

炙甘草

礞石各一兩

沉香五錢

右為末。以竹瀝一大碗半。薑汁三匙。拌勻晒乾。如此五六度。仍以竹瀝薑汁糊丸。小豆大。每百丸。臨臥薑湯吞下。

又方

牽牛頭末二兩

滑石二兩

大黃一兩

木香

黃芩

礞石

枳殼

青皮

陳皮

檳榔各五錢

沉香二錢

爲末。水丸桐子大。薑湯下五十丸。

半夏丸 治膈痰結實滿悶喘逆。

半夏薑汁製 皂莢五挺去皮揉

生薑五兩同半夏搗作餅炙乾

爲末。蜜爲丸。梧子大。薑湯下二十丸。

治熱痰結在胸膈。咯吐不出。滿悶作痛。名痰結。又脇下痛。作寒熱。欬嗽氣急。亦痰結也。

製半夏

陳皮

赤苓錢各一

桔梗

枳殼

瓜蒌仁各七

黃連

黃芩

梔子

貝母

蘇子

桑皮

杏仁

芒硝各五

木香

甘草各三

右剉作一貼。薑三片。同煎至半。納芒硝溶化。去滓。又入竹瀝。薑汁調服。

鶴頂丹 治諸頑痰迷塞。關竅不通。聲音不出。

白礬黃丹各一兩。火煨爲末。麵糊丸。麻子大。每服三十丸。研末。入全蠍少許。薑

湯調灌之。吐痰立愈。

青州白丸子 治風痰壅盛。嘔吐眩暈及癱瘓中風。

半夏七兩

南星三兩

白附子二兩

川烏五錢

右共爲細末。清水浸。春五夏三秋七冬十日。朝夕擾水。候日數足。乃取納生絹袋中。濾過其滓。再研再濾。以盡爲度。澄清去水。晒乾爲末。以糯米粥清糊丸。菉豆大。薑湯吞下三五十丸。局方如癱瘓風。以溫酒送下。如小兒驚風。薄荷湯下。百一選方加川芎二兩。天麻、殭蠶、全蠍各一兩。並生用。爲細末。麵糊丸。瑞竹堂方加天麻、全蠍、木香、枳殼各一兩。

三曰和

始因虛而生痰。繼因痰而成實。補之則痰益固。攻之則正不支。惟寓攻於補。庶正復而痰不滋。或寓補於攻。斯痰去而正無損。是在辨其虛實多寡而施之。

橘皮湯

半夏製五兩

茯苓

陳皮各三兩

細辛

青皮

桔梗

枳殼

甘草

炙各二兩

人參

旋覆花去萼各一兩

右剉散。每服三錢。生薑五厚片。煎服。

六君子湯

人參

白朮

茯苓

甘草錢半

陳皮

半夏錢一

水二錢。薑五片。煎至一鍾。去滓。不拘時服。

四曰補

夫痰卽水也。其本在腎。痰卽液也。其本在脾。在腎者氣虛水泛。在脾者土虛不化。攻之則彌盛。補之則潛消。自非聖知。罕能得其故也。

濟生腎氣丸

四君子湯

苓桂朮甘湯

五曰溫

凡痰飲停凝心膈上下。或痞或嘔或利。久而不去。或雖去而復生者。法當溫之。蓋痰本於脾。溫則能健。痰生於溼。溫則易行也。

千金半夏湯 治冷痰。

白朮三兩

半夏一升

生薑八兩

茯苓

人參

桂心

甘草炙

附子二兩炮各

水八升。煮三升。分溫服。

吳茱萸湯

吳茱萸

人參

半夏薑製

桂心各二兩

茯苓二兩

甘草一兩

薑棗湯煎三錢。空心溫服日二。

聖濟總錄曰。氣為陽。陽不足者。不能消導水飲。則聚而成痰。浸漬腸胃。上為嘔逆。吐酸。下為洞泄。寒中久不已。則令人消瘦。少氣倚息。妨於飲食。昔人治痰飲。多以溫藥和之。為此故也。

沉香茯苓丸 溫脾胃。利胸嘔。和氣血。

沉香一兩

白茯苓

半夏製

人參

丁香二兩

甘草

陳皮去白

肉豆蔻煨



檳榔五錢

共末。蜜丸。桐子大。薑湯下二十丸。

本事神朮丸

茅山蒼朮一斤去生芝麻半兩水二瓊

大棗十五枚去核研

右三味搜和。乘熱入臼杵丸如梧子大。乾之。每日空腹溫湯吞下五十丸。加至一百丸。二百丸。忌桃李雀蛤。初服心膈微燥。進山梔散一服。不燥矣。

許叔微云。予平生有二疾。一則藏府下血。二則膈中停飲。血有時而止。停飲則無時而愈。始因年少時夜坐爲文。左向伏几案。是以飲食多墜向左邊。中夜以後。稍困乏。則飲酒兩三杯。既臥就枕。又向左邊側睡。氣壯盛時殊不覺。三五年後。覺酒止從左邊下。漉漉有聲。脇痛。飲食殊減。十數日必嘔吐數升酸水。暑月止。是右邊身有汗。熱熱常潤。左邊病處絕燥。徧訪名醫。及海上方服之。少有驗。間或中病止。得月餘復作。其補則如天雄、附子、礬石。其利則如牽牛、大戟、甘遂。備嘗之矣。予後揣度之。已成癖囊。如潦水之有科臼。不盈科不行。水盈科而後行者也。清者可行。濁者依然停蓄。蓋下無路以決之也。是以積之五七日。必稍吐去而稍寬。數日復

作。夫脾土惡溼。而水則流溼。莫若燥脾以勝溼。崇土以填科臼。則疾當去矣。於是悉屏諸藥。一味服蒼朮。三月而疾愈。自此一向服數年。不嘔不吐。胸膈寬。飲啖如故。暑月汗周體而身涼。飲亦當中下。前此飲漬於肝。目亦多昏眩。其後燈下能書細字。皆蒼朮之力也。予初用茅朮。半月後。止用燥烈味極辛者。削去皮不浸。極有力。而亦自然不燥也。山梔散。用山梔一味。乾爲之末。沸湯點服。故知久坐不可伏向一邊。時或運動。亦消息之法。

### 六曰清

或因熱而生痰。或因痰而生熱。交結不解。相助爲虐。是以欲去其痰。必先清其熱。昔人所謂痰因火盛逆上者。治火爲先也。其證咽喉乾燥。或塞或壅。頭目昏重。或欬吐稠粘。面目赤熱。潔古小黃丸。

南星

半夏

黃芩各一兩

爲末。薑汁浸。蒸餅爲丸。桐子大。每五七十丸。生薑湯下。食後服。二陳湯加黃芩。連翹。山梔。桔梗。薄荷亦佳。

聖濟鵝梨煎丸 治熱痰。涼心肺。利胸隔。解毒補虛益氣。

鵝梨大者二十枚 去皮取汁 皂莢十條 去皮生地黄取汁

薄荷取生搗汁 白蜜入兩同膏上 人參 白茯苓

半夏各一 檳榔煨三分 青皮炒去白 桔梗

甘草炙各三分

石共為末。搗膏為丸。梧子大。荆芥湯下二十丸。日二。一方有木香、菴蓉、白蔘、

藜山藥、白朮、羌活、防風。

聖濟千金散 治熱痰壅盛。胸膈不利。

半夏薑汁 蛤粉各五錢 甘草 凝水石三錢

右共末。水下三錢。空心服。以利為度。一方有羌活。

七曰潤

肺虛陰涸。枯燥日至。氣不化而成火。津以結而成痰。是不可以辛散。不可以燥奪。

清之則氣自化。潤之則痰自消。

杏仁煎 治燥痰在肺中。上氣欬嗽。或心胸煩熱。

杏仁去皮尖

生薑汁

白蜜

飴糖各半

桑皮

貝母

木通各一兩二錢半

紫苑

五味各一

右剉碎。用水三升。熬至半升。去滓。入前杏仁等四味。再熬成膏。每服一匕。含化。

一方有款冬。知母。一方有生地汁。紫蘇子。

節齋化痰丸 治鬱痰老痰。膠固稠粘。難於咯唾。

天門冬

片芩酒炒

瓜蒌仁

橘紅

海石粉各半

香附鹽水炒

芒硝

桔梗

連翹各五錢

青黛二錢

右爲末。煉白蜜入薑汁少許。和丸櫻桃大。細嚼一丸。清湯下。

飲食

傷食

傷食者。飲食自倍。腸胃乃傷也。當分上中下三焦而治。在上吐之。在中消之。在下

奪之。

羅太無云。大抵內傷之理。傷之微者。但減食一二日。所傷之物。自得消化。此良法也。若傷之稍重者。以藥內消之。傷之太重者。以藥除下之。瓜蒂散。宿食在上脘。用此吐之。所謂在上者。因而越之也。

瓜蒂炒

赤豆分煮等

右爲細末。以豉七合煮汁和散。一匕服。一法溫漿水調服一錢匕。取吐爲度。經云。上部有脈。下部無脈。其人當吐不吐者死。謂食塞於上。而脈絕於下也。何者。陽火之根。本於地下。陰水之源。出於天上。食塞於上。是絕五藏之源。源絕則水不下流。兩尺脈絕。吐去上焦之物。而脈自通。如不能吐。則非食病。而是根蒂之先拔。故死。或以陰陽水三升。煮白鹽一升。令消。分三服。則吐去所食即愈。出千金方。紅丸子。壯脾胃。消宿食。去膨脹。

京三稜

蓬朮

青皮去白

陳皮五斤各

炮薑

胡椒各三斤

右爲末。醋麵糊丸。梧子大。礬紅爲衣。每服三十丸。食後薑湯下。易簡方有阿魏。

治食索粉成積方

紫蘇濃煎汁。加杏仁泥服之即散。

治食狗肉不消。心下堅。或腹脹。口乾大渴。心急發熱。狂言妄語。或洞下。

杏仁一升。去皮尖研。以沸湯三升。和絞汁三服。狗肉原片皆出淨。或以蘆根煮飲之亦消。

千金治所食不消方

取其餘類燒作末。酒服方寸匕。便吐其宿食即瘥。

按、飲食停滯中脘。雖藉藥力爲之消磨。然所以運行藥力者胃氣也。故有屢經消食行氣而食不下者。余即於前所用藥內。加人參一二錢。治之如神。學者不可不知。

備急方 治寒飲食過傷。心腹卒痛如錐刺。

川大黃末

乾薑末

巴

豆去油用霜

右各等分。和合一處研勻。煉蜜爲丸。小豆大。溫水下一丸。實者加一丸。一云每服三丸。未知更服三丸。腹中轉鳴。當吐下便愈。

東垣導滯丸 治傷溼熱之物。不得旋化而作痞滿。悶亂不安。便閉者。

黃芩

茯苓

白朮

黃連各三錢

澤瀉二錢

枳實

神麴各五錢

大黃煨一兩

右爲末。湯浸蒸餅爲丸。食遠沸湯下五十丸。

鶴年云。傷食與停食。宜分兩項。傷食者。飲食自倍。腸胃乃傷。病在不及消化。停食不論食之多少。或當食而怒。或當食而病。在氣結而不能化也。治傷食宜偏重於食。或吐。或下。或消。若停食則偏重在氣。惟理氣而兼之以消。吐下之法。不可用也。大都傷食當分上中下三焦。而停食則專在胃脘也。

### 傷酒

千金療卒大醉恐腸爛方。

作湯著大器中漬之。冷復易之。酒自消。夏月亦用之佳。

又方 絞茅根汁飲二升。

又方 搗生葛汁飲之。無鮮者。乾葛煎服亦佳。

又方 粳米一升。水五升。煮使極爛。漉去滓。飲之良。  
葛花解醒湯 治酒病。嘔逆心煩。胸滿不食。小便不利。

青皮三分

木香半錢

橘紅

人參

猪苓

茯苓各一錢半

神麴

澤瀉

乾薑

白朮各二錢

白蔻仁

砂仁

葛花各半

右爲極細末。每服三錢。白湯調服。但得微汗。則酒病去矣。

羅謙甫云。夫酒者大熱有毒。氣味俱陽。乃無形之物也。若傷之。止當發散。使汗出。則愈。最妙法也。其次莫如利小便。二者乃上下分消其溼。何酒病之有。今之治此者。乃用酒癥丸。大熱之劑下之。又用牽牛。大黃下之。是無形元氣病。反傷有形陰血。乖誤甚矣。

## 不能食

不能食者。胃中元氣虛也。然有虛冷虛熱之異。宜分別治之。



消食丸 治數年不能食。

麥蘗

麴各一升

乾薑炮

烏梅焙各四兩

蜜丸。服十五丸。日再加至四十丸。亦治反胃。

又方

神麴炒黃二兩

麥蘗炒黃二兩

烏梅四兩

乾木瓜半兩

茯苓

甘草炙各二錢五分

蜜丸。櫻桃大。每服一丸。不拘時細嚼。白湯下。一方無木瓜。有人參、乾薑。

又方

豉心熬末一升

麥芽

麴各一兩熬

川椒出汗一升

乾薑末一升

右五味篩。以蜜拌。食後酒服方寸匕。

以上三方。並治胃虛冷。不能食之劑。

資生丸 健脾開胃。消食止瀉。調和臟腑。滋養營衛。

白朮

米泔水浸用山黃土拌九

橘紅

山查蒸

神 麵二炒各 白茯苓 晒乾一兩五錢

人 參上乳浸透三兩 白豆蔻 微炒

川 連薑汁炒 桔 梗炒 藿 香 澤 瀉錢炒各三

扁 豆炒 蓮 肉各一兩 麥芽麵炒 山 藥炒 甘 草蜜炙

芡 實兩五錢 薏 仁兩三

右爲末。煉蜜丸。每服二錢。細嚼淡鹽湯下。

凝神散 收斂胃氣。清涼肌表。

人 參 白 朮 茯 苓 山 藥各一錢

扁 豆 知 母 生 地黃 粳 米

甘 草錢各一 淡竹葉 地骨皮 麥 冬錢各五

右作一服。水二鍾。薑三片。紅棗一枚。煎一鍾。食遠服。

高鼓峰云。腎爲胃之關。關門不利。升降息矣。關門卽氣交之中。天之樞也。故腎旺則胃陰足。胃陰足則思食。若關門枯槁。腎水不能上達。當急以六味加歸芍養之。若血燥大腸乾枯。有黑屎積疊胃底。則當以熟地五錢。當歸三錢。白芍、桃仁二錢。

麻仁三錢。微微潤之。視其形體如常。氣血尙足。即於前方內可加大黃二錢。助血藥大腸一順利。胃自開矣。一開之後。大劑六味。左歸等類。不數服之。方有濟也。

以上治胃虛氣熱之劑。

范汪療胃氣虛不能食。四肢重短氣。調和五藏并療諸病調中湯方。

薤白切一

枳實炙六枚

橘皮三枚

大棗十二枚

粳米三合

香豉六合

水六升。先煮薤白得四升。內諸藥。煮取一升半。適寒溫服。一方有生薑一兩。

延年無枳實有茯苓人參。

按此以甘辛氣味和暢胃陽。推揚穀氣。虛者延年方較良。

本事治脾腎虛弱全不進食二神丸

破故紙炒四兩

肉苁蓉生二兩

右爲細末。用大肥棗四十九枚。生薑四兩。切片同煮棗爛。去薑取棗剝去皮核。用肉研爲膏。入藥和杵丸如梧子大。每服三十丸。鹽湯下。有人全不進食。服補藥皆不效。予授此方服之。頓然能食。此病不全作脾虛。蓋腎氣虛弱。真元衰劣。

譬如金鼎之中。置之米穀。下無火力。雖終日不熟。其何能化。黃魯直嘗記服兔絲子。淘淨酒浸曝乾爲末。日抄數匙以酒下。十日外。飲啖如湯沃雪。亦此理也。寬中進食丸。滋形氣。喜飲食。

人參

炮薑

青皮錢各一

大麥芽炒

縮砂仁炒

甘草炙各一錢半

白茯苓

橘紅

澤瀉

白朮錢各三

枳實四錢

荳蔻五錢

猪苓七錢

神麴炒

木香各五分

半夏七錢

右爲末。湯浸蒸餅爲丸。桐子大。每服三十丸。溫米湯送下。食前。

### 穀勞

穀勞者。胃受水穀。其氣虛弱。不能傳化。穀盛氣虛。則令人怠惰嗜臥。肢體煩重。腹滿善飢。而不能食。食已則發。穀氣不行使然也。沉香湯

沉香

白朮土炒

紫厚朴薑汁炒各一兩

人參

白茯苓

半夏薑製

木香

草豆蔻

甘草

陳皮

黑乾薑

生薑大棗水煎三錢。溫服。日二。

肘後云。飽食便臥。得穀勞病。令人四肢煩重。嘿默欲臥。食畢輒甚。用大麥蘖一升。椒一兩。並炒。乾薑三兩。搗末。每服方寸匕。日三。

### 食亦

內經曰。大腸移熱於胃。善食而瘦。謂之食亦。夫胃爲水穀之海。所以化氣味而爲營衛者也。胃氣和。飲食有節。氣血盛而膚革充盈。若乃胃受邪熱。消燂穀氣。不能變化精血。故善食而瘦也。病名食亦。言雖食亦若飢也。又胃移熱於膽。亦名食亦。以膽爲陽木。熱氣乘之。則燂土而消穀也。

甘露飲 治胃熱善食。不生肌肉。

生地

熟地

天冬

麥冬

片苓

石斛

枇杷葉

甘草

枳殼

茵陳一兩

水煎三錢服。

### 諸血統論

失血諸證。妄行於上則吐衄。衰涸於內則虛勞。妄返於下則便紅。積熱膀胱。癰閉尿血。滲透腸間。則爲腸風。陰虛陽搏。則爲崩中。溼蒸熱瘀。則爲滯下。熱極腐化。則爲膿血。火極似水。則血色紫黑。熱勝於陰。則發爲瘡瘍。溼滯於血。則發爲痛痺。癰疹皮膚。則爲冷痺。蓄之在上。其人喜狂。蓄之在下。其人喜忘。血出上七竅爲血溢。大小便下血爲血泄。然內經云。溢則後血。是血下出。亦可云溢。正不必拘也。

先見血。後見痰嗽。多是陰虛。先見痰嗽。後見血。多是痰火積熱。

凡吐衄血太甚不止。當防其血暈。用茅根燒酒將醋灑之。令鼻嗅氣。以遏其勢。或薰然以冷水噴其面。使驚則止。

血虛眩暈卒倒。不可艾灸驚哭叫動。動則乘虛而死矣。須以當歸、川芎、白芍、熟地

黃、黃耆、人參、白朮、茯苓、陳皮、荊芥穗、甘草各七分。棗二枚。烏梅一個。同煎服。凡用血藥不可單行單止。又不可純用寒涼。必加辛溫升藥。如用寒涼藥用酒煎。酒炒之類。乃寒因熱用也。久患血證而不歸元。久服藥而無效者。以川芎爲君則效。丹溪凡嘔吐血。若出未多。必有瘀於胸膈者。當先消而去之。驟用補法。血瘀成熱。多致不起。

業師薛一瓢先生。治陸元賓勞傷吐血。後日漸消瘦。有時發寒熱。飲食減少。微有乾欬。四肢無力。語亦懶。師用大當歸一隻。重二兩者。木器槌鬆。陳酒煎。令服三劑。以其人素不飲酒。改用酒水各半煎。果三服而諸病皆愈。

### 風熱吐血

風、陽邪也。熱、火氣也。併入絡中。則血溢絡外。其證乍寒乍熱。咳嗽口乾。煩躁者是也。宜以辛涼入血之藥治之。  
聖惠荊芥地黃湯

荊芥穗爲末。生地汁調服二錢。  
駱隆吉曰。風火既熾。當滋腎水。此以荊芥發陽邪。而以地黃養陰氣也。  
聖濟荊芥穗散

荊芥穗

山梔仁

片苓

蒲黃

水煎五錢溫服。晚再服。以差爲度。

### 鬱熱失血

鬱熱失血者。寒邪在表。閉熱於經。血爲熱迫。而溢於絡外也。勿用止血之藥。但疎其表。鬱熱得舒。血亦自止。若表已解而熱不消。血不止者。然後以清熱降血之藥治之。若肺氣已虛。客熱不去。欬嗽咽乾。吐血嗽血者。宜以甘潤養血爲主。而以辛藥涼肺佐之。如大阿膠丸之類。  
寶鑑大阿膠丸

阿膠微炒

生地黃

熟地黃

卷柏

乾山藥

五味子

雞蘇葉

大薊各一兩



茯苓

柏子仁另研

百部

遠志

人參

麥門冬

防風各半

右爲細末。煉蜜彈丸子大。煎小麥、麥門冬湯下一丸。食後。

大薊飲子 解鬱熱。止吐衄。亦治辛熱物傷肺胃。嘔吐血。名肺疽。

大薊根洗

犀角鎊

升麻

桑白皮炙

蒲黃炒

杏仁去皮尖各二錢

甘草炙

桔梗炒各一兩

水二鍾。生薑五片。煎至一鍾。不拘時服。

和劑龍腦雞蘇丸 治胸中鬱熱欬嗽。吐血衄血。涼上膈。止虛煩。

雞蘇淨葉一斤即龍腦薄荷

生乾地黃末六兩後入

人參

阿膠

蒲黃

麥冬

柴胡

劉同木通以沸湯大半升浸

甘草一兩

右爲細末。以蜜二升。先煉一二沸。然後下生地黃末。不住手攪。時時入絞下柴胡、木通汁。慢慢熬成膏。勿令焦。然後將其餘藥末同和爲丸。如豌豆大。每服二十丸。熱水下。

側柏散 治鬱熱內損心肺。吐血下血。出如湧泉。口鼻俱流。須臾不救。服此即安。

側柏葉兩 蒸乾二兩 荊芥穗燒灰 人參各一

右爲末。每服三錢。入白麵二錢。新汲水調如稀糊。噉服。

### 暑毒失血

暑毒失血者。脈大氣喘。多汗煩渴。蓋心主血。而暑氣喜歸心也。此病多於酒客。及陰虛之人有之。

千金治酒客瘟疫中熱毒乾嘔吐血方。

蒲黃

犀角

括蕓根

甘草各二

桑寄生

葛根各三

水七升。煮三升。分三服。

局方枇杷葉散 治暑毒攻心。嘔吐鮮血。

香薷二錢

厚朴

甘草

麥冬

木瓜

茅根各一

陳皮

枇杷葉

丁香各五分  
爲末。每服二錢。薑水煎服。

### 畜熱吐血

畜熱吐血者。熱畜血中。因而妄行。口鼻皆出。勢如湧泉。膈上熱。胸中滿痛。脈洪大。弦長。按之有力。精神不倦。或血是紫黑成塊者。須用生地黃、赤芍、茜根、牡丹皮、三製大黃、滑石、桃仁泥之屬。從大便導之。此非釜底抽薪之法。不能奪火熱上湧之勢也。

海藏云。畜血喜忘如狂。身熱尿黑者。痰已甚也。但小腹滿。小便不利者輕也。滑伯仁曰。血溢血泄諸畜血證。其始也。予率以桃仁、大黃行血破滯之劑。折其銳氣。而後區別治之。雖往往獲效。然猶不得其所以然也。後來四明遇故人蘇伊舉。間論諸家之術。伊舉云。吾鄉有善醫者。忘其姓字。每治失血畜妄。必先以快藥下之。或問失血復下。虛何以當。則曰。血既妄行。迷失故道。不去血利瘀。則以妄爲常。曷以禦之。且去者自去。生者自生。何虛之有。予聞之愕然曰。昔者之疑。今釋然矣。

按、去者自去。生者自生。人易知也。瘀者未去。則新者不守。人未易知也。細心體驗自見。

### 簡要濟衆

川大黃一兩爲末。每服一錢。以生地汁一合。水半盞。煎三五沸。服無時。藕汁茯苓飲

生藕汁

小薊根汁

生地黄汁

茯苓

蒲黃炒黑

後二味。等分爲末。每服二錢。用三汁調下。

按、虛人未可下者。宜此法清熱。且利瘀也。

按、千金云。凡吐血後。體中但惓惓。心中不悶者。輒自愈。假令煩躁。心中悶亂。紛紛嘔吐。顛倒不安者。當急以瓜蒂、杜蘅、人參等。吐去清黃汁。或血一二升無苦。蓋謂中有瘀血不盡故也。然與其湧而上之。不若導而下之。之爲順也。吐法昔人且不忍。而況於下法乎。

### 直指方

鮮生地黃搗汁煮飲。日數升良。

四生丸 治吐血衄血。熱妄行乘於陰也。

生荷葉

生艾葉

側柏葉

生地黃等分

右搗爛爲丸。如雞子大。每服一丸。用水二鍾。煎一鍾。去滓服。一方有生薄荷葉。無荷葉。

十灰散 治嘔吐衄嗽血。

大蓳

小蓳

柏葉

荷葉

茅根

茜根

大黃

梔子

棕櫚皮

牡丹皮

右等分。燒存性。出火毒。研爲極細末。用生藕汁及生蘿蔔汁。磨松墨半碗。調服五錢卽止。

### 氣逆失血

氣逆失血者。血從氣逆。得之暴怒而厥也。經云。陽氣者。大怒則形氣絕。而血菀於

上。使人薄厥。又怒則氣逆。甚則嘔血。及飧泄是也。必有胸脇滿痛等證。宜芍藥、陳皮、枳殼、貝母之屬。行其氣而血自下。或肝火因氣而逆者。必有煩躁燥渴等證。宜芍藥、生地黃、丹皮、芩、連之屬。降其火而血自寧。

小烏沉湯

烏藥去心

甘草炒一兩

香附子炒砂盆新去毛

右爲細末。每服一錢。不拘時沸湯點。

按大怒氣逆。必有火熱從之上行。宜以黃連、青黛、香附、柴胡、甘草、山梔等藥。平其肝則自愈。獨進溫燥。寧無偏勝之弊。且非古人抑怒全陰之意。

### 勞傷吐血

勞傷吐血者。經所謂用力太過。則絡脈傷是也。蓋絡脈之血。隨經上下。往來不休。若絡脈有傷損之處。其血因得滲漏而出矣。如是者。須和養血氣。安順謹調。使損者復完。則血脈循行如故。所謂勞者逸之是也。此等未關藏氣。但體性堅凝。尙可望其生全。若不能如此。而或縱情違理。絡脈完已復損。則必無幸矣。

髮灰散

亂髮燒灰

每服二錢。米醋湯調服。亦治小兒尿血。

治吐血不止

將本人血。磁鍋焙乾爲末。每一錢二分。以參麥煎湯調下即止。

凡吐粉紅色痰涎者。是肺絡損傷而血滲也。治以鮮藕、白糯米、紅棗三物煎湯頻服之久自愈。此方係正白旗遲維職所授。用之良驗。遲公曾任崇明及六合縣係一榜出身三

世明醫

### 陽虛失血

陽虛失血者。脾胃氣虛。不能固護陰氣也。仁齋直指云。血遇熱則宣流。故止血多用涼劑。然亦有氣虛挾寒。陰陽不相爲守。榮氣虛散。血亦錯行。所謂陽虛陰必走是耳。外證必有虛冷之狀。其血色必黯黑而不鮮。法當溫中。使血自歸經絡。可用理中湯加南木香。或甘草乾薑湯。其效甚著。曹氏云。吐血須煎乾薑甘草湯與服。

或四物理中湯亦可。若服生地黃、竹茹、藕汁。去生便遠。

三因云。理中湯能止傷胃吐血。以其最理中脘。分利陰陽。安定血脈也。

按經云。榮氣出於中焦。是以脾胃爲統血之司。而甘溫氣味。有固血之用也。世醫畏其能動血。雖遇當用而不敢用者多矣。厥疾不瘳。誰之過歟。或有仿千金例於伏龍肝、甘草、乾薑、白朮之中。加阿膠之潤。黃芩之苦。以折炎上之勢。而復既脫之陰。亦內經甚者從之之意也。

理中湯

甘草乾薑湯二方見金匱心典

黑神散和劑

黑豆炒半升

乾熟地黃酒浸

當歸去蘆酒製

肉桂去粗皮

乾薑炮

甘草炙

芍藥

蒲黃各四兩

右爲細末。每服二錢。酒半盞。童子小便半盞。不拘時煎服。凡吐血脈微。身涼惡風者。須於地黃、芍藥中加肉桂一錢。虛冷人多有此證。

傷胃吐血



傷胃吐血者。酒食過飽。胃間不安。或強吐之。氣脈貫亂。損傷心胃。血隨嘔出也。簡易黑神散。治傷酒食。醉飽過度。胃絡內傷。及低頭掬損吐血。致多口鼻俱出。

百草霜不拘多少  
杯居者佳

右研細。每服二錢。糯米湯下。喜涼水者。新汲水調服。

### 鼻衄

鼻衄有表寒裏熱之異。表寒者。傷寒不解。而閉熱於經也。詳傷寒門。裏熱者。陽明之熱。而血爲熱迫也。宜犀角地黄湯主之。或陽明之熱。不得下通。而反至壅者。宜拔萃犀角地黄湯通其下。而上自愈。

諸衄血家。不可與白虎湯。虛者亦不可與。卒得之。腹痛而利者。但可溫之。羅謙甫云。經歷晉才卿。膏粱而飲。至春病衄。易醫數四。皆用苦寒之劑。俱欲勝其熱而已。然終不愈。而飲食起居。浸不如初。肌寒而時躁。言語無聲。口氣臭穢。惡冷風。而其衄之餘滴。則未絕也。彼惟知見血爲熱。而以苦寒攻之。抑不知苦瀉土。土脾胃也。脾胃人之所以爲本者。今火爲病。而瀉其土。火固未嘗除。而土已病矣。主

病則胃虛。胃虛則營氣不能滋榮百脈。元氣不循天度。氣隨陰化。而無聲肌寒也。粗工嘻嘻。以爲可治。熱病未已。寒病復起。此之謂也。

項彥章治一婦。患衄三年許。醫以血得熱則淖溢。與瀉心涼血之劑。益困。衄出數滴。輒昏去。六脈微弱。而寸爲甚。曰。肝藏血而心主之。今寸口脈微。知心虛也。心虛則不能主血。故逆而妄行。法當補心。兼養脾氣。脾者心之子。實則心不虛也。與琥珀諸補心藥。遂安。

按。心虛補脾。卽千金脾旺則氣感於心之意。然補脾藥未議及。竊謂當兼補脾陰。不當專補脾氣也。

犀角地黄湯 易老云。治鼻衄。此藥爲最勝。

犀角

芍藥

丹

皮各半

生地四錢

甘草五分

水一鍾半。煎八分服。拔萃加大黃、黃連、黃芩、茅花湯。

白茅花水煎濃汁兩碗。分二服。如無花。以根代之。

人參蓮心散

人參一錢 蓮子心一分

共爲末。以水空心下二錢。以差爲度。一方蓮子心五十個。糯米五十粒。爲末酒調服。治勞心吐血。

髮灰散

髮灰一錢 人中白五分 麝香一分

用少許吹鼻中。立愈。

元珠雞蘇散

雞蘇葉 黃耆 生地 阿膠

白茅根各一兩 麥門冬去心

桔梗 蒲黃炒

貝母去心 甘草錢五

每服四錢。薑三片。水煎服。

麥門冬飲子 治脾肺虛弱。氣促精神短少。衄血吐血。

人參 麥門冬 當歸各五錢 五味子五個

黃耆 甘草 芍藥各一錢 紫苑一錢

右咬咀。分作二服。水二盞。煎至一盞。去滓。溫服。食後。一方有生地。無甘草。芍藥。紫苑。名清肺飲子。

### 齒衄

齒衄。有手足陽明與足少陰之異。蓋手陽明入下齒中。足陽明入上齒中。而腎主骨。齒又爲骨之餘也。大抵屬陽明者。多有餘。故有便閉口臭。齒齦腫痛等證。凡素嗜肥甘。或善飲胃強者。多有之。屬少陰者。多不足。故口不臭。牙不痛。雖痛不甚。但齒搖不堅。凡陰虛羸瘦好色者。多有之。而宜清宜補。爲治迥別。不可不分也。元珠云。齒衄多陽明熱盛所致。緣手足陽明俱入齒中。而衝任二脈。並附陽明。陽明者。多氣多血之經也。陽明有熱。發則隨經上入齒中。血如潮湧。疼痛不已。甚則昏昧。予率用三製大黃末二錢。枳殼湯少加童便調下。並去黑糞數塊。其血頓止。要知腎虛出血者。其血必點滴而出。齒亦悠悠而疼。決不如此之暴且甚也。東垣清胃飲。治醇酒厚味。或補胃熱藥太過。以致牙疼不可忍。牽引頭腦。滿面發熱。或齦齒腐潰。出血不止。此陽明火也。

生地黄一錢五分

升麻

當歸

牡丹皮

犀角

連翹各一錢

甘草

黃連各五分

水煎服。

按陽明實熱。上熏口齒者。宜此清之。若大便閉結不通者。須加大黃。從下奪之。

外臺方 治滿口齒出血。枸杞根洗。煎湯漱嚥驗。

元戎地黄引子 治腎虛齒衄不止。

熟地黄

生地黄

地骨皮

枸杞子等分

焙乾爲末。每服二錢。蜜湯調服。無時。

寶鑑用治衄血往來久不愈。日三服。良。

安腎丸 治腎虛陰火上炎。服涼藥而愈甚者。宜淡鹽湯送下三五錢。間進黑錫

丹。方見喘證

或用腎氣丸煎服效。鶴年

## 舌衄

舌衄者。舌出血不止也。心主血。在竅爲舌。若心藏蘊熱。血得熱而妄行。或溢於心

之竅。則有舌上出血之證。甚者出如湧泉。

### 聖濟阿膠散

阿膠炒

黃耆蜜炙

蒲

黃新者一兩

共末。用生地黃汁。空心調下二錢。

### 千金方

亂髮燒灰。水服方寸匕。日三服。

### 大衄血汗

大衄者。口鼻耳目皆出血是也。由熱氣乘虛入血。則血妄行。與衛氣錯溢於竅也。阿膠湯主之。

### 阿膠湯

阿膠蛤粉炒一兩

蒲黃五錢

水煎去滓。入生地黃汁服。急以帛繫兩乳。神白散治血汗。

用人中白瓦上炙。研末入麝香少許和勻。空心酒下二錢。一方有髮灰。聖惠散 治大紐久紐及諸竅出血不止。

人中白一團。雞子大。綿五兩燒研。每服二錢。溫水服。

## 大便下血統論

許學士云。予苦疾三十年。畜下血藥方。近五十餘品。其間或驗或否。或始驗而久不應者。或初不驗棄之。再服有驗。未易歷談。大抵此病品類不同。對病則易愈。如下清血色鮮者。腸風也。血濁而色黯者。藏毒也。肛門射如血線者。脈痔也。亦有一種下部虛。陽氣不升。血隨氣而降者。仲景云。脈弦而大。弦則爲減。大則爲芤。減則爲寒。芤則爲虛。寒虛相搏。此名爲革。婦人則半產漏下。男子則亡血失精。此下部虛而下血者是也。若得革脈。卻宜服溫補藥。蟲痔宜熏。千金用蝟皮艾者佳。予嘗作頗得力。

黑地黄丸頗佳簡年

結陰便血

結陰便血者。以風冷之邪。結於陰分而然。蓋邪在五藏。留而不去。是之謂結陰。邪內結不得行。則病歸血分。故爲便血。經曰結陰者。便血一升。再結二升。三結三升。正此之謂。宜外灸中脘、氣海、三里。以引胃氣。散風邪。內以平胃地榆湯溫散之。劑止之。景岳

寶鑑平胃地榆湯 治邪陷陰分。結陰便血。

陳皮

厚朴

蒼朮

甘草

地榆

人參

白朮

當歸

芍藥

升麻

乾葛

茯苓

神麴

乾薑炒

香附各等分

右咬咀。每服五錢。加薑棗煎。空心服。一方無香附。有附子、益智。

胃風湯

治風冷乘虛入客腸胃。水穀不化。及下血久而無度者。卽入物湯去地

黃、甘草。加官桂等分。每服二錢。水一大盞。粟米百餘粒。同煎七分。去滓。稍熱服。

蓋亦陰結之類。爲陰氣內結。故去甘寒而加辛熱。結者散之也。

經驗方



荊芥一味。略炒爲末。米飲服二錢。

地榆湯。河間曰。陰結便血者。以陰氣內結。不得外行。血氣無宗。滲入腸下。致使漸多。此湯治之。

地榆四兩

甘草三兩半生

縮砂七枚

右爲末。每服五錢。水三盞。煎至一半。去滓溫服。

### 溼熱便血

溼熱便血者。血濁而色黯。滑氏所謂足太陰積熱。久而生溼。從而下流也。赤豆當歸散主之。若但熱而無溼者。腹中痛。血色鮮。連蒲散主之。

赤豆當歸散

赤小豆

三升浸令芽出晒乾

當歸

十兩

右二味。杵爲散。漿水服方寸匕。日三服。

連蒲散

生地

當歸

白芍

枳殼

川芎

槐角

黃芩各一錢

黃連

蒲黃炒各一錢二分

水二鍾煎八分服。

泊宅編云。乾柿燒灰。米飲服二錢。本草柿治腸癖。解熱毒。消宿血。又百一選方云。

曾通判子病下血十年。用此方一服而愈。

王煥之知舒州。下血不止。郡人陳宜父。令其四時取柏葉。其方如春取東枝之類。

燒灰調二錢服而愈。

潔古芍藥黃連散。治腹痛下血有熱。

芍藥

黃連

當歸各半

大黃一錢

淡桂五分

甘草炙二錢

每服五錢。水煎。痛甚者。調木香、檳榔末一錢。用淡桂者。略借辛溫以助藥力。且拔病本也。一方平胃散。加槐花、當歸、枳殼、烏梅。丹溪

## 中虛脫血

中者脾胃也。脾統血。脾虛則不能攝血。脾化血。脾虛則不能運化。是皆血無所主。因而脫陷妄行。其血色不甚鮮紅。或紫或黑。此陽敗而然。故多無熱證。而或見惡心嘔吐。宜理中湯溫補脾胃。中氣得理。血自歸經矣。

理中湯

理物湯 卽理中四物合劑。

黃土湯

白朮

甘草

附子

地黃

阿膠

黃芩各三兩

竈心黃土半升

水八升。煮取三升。分溫三服。

### 腸痔下血

本事治腸痔在腹內有鼠爛出血方

白蕪荑

貫衆

狼牙根

椿東引枝

槐東引枝白皮者各一分白蟪頭炙一個

雄黃半兩

蝟皮一分

右爲末。臘月猪脂和爲丸。如彈子大。綿裹內下部。日三易。

### 附方

木 耳五錢

浸一宿洗淨。空心生食。禁茶湯半日許。如嫌淡。少加鹽。三服必愈。但不能除根耳。鶴年自試驗過

### 洩血

洩血有虛有實。實者下焦結熱。血爲熱迫。尿血成淋。虛者房勞內傷。血失統御。溺血不已。亦有心藏有熱。熱乘於血。血滲小腸而尿血者。當參合脈證治之。凡小便血出。成淋作痛。或雜尿而出者。從膀胱中來也。如血出不痛者爲尿血。乃心移熱於小腸。血從精竅中來也。濟生小薊飲子 治下焦結熱之劑。

生 地四兩

小薊根

滑 石

通 草

蒲 黃炒

淡竹葉

藕 節

當 歸

山梔仁

甘草炙各半兩

右咬咀。每服四錢。水一盞煎分。空心溫服。一方有白茅根、阿膠。

鹿茸散 治下元虛憊。小便尿血。日夜不止之劑。

鹿茸酒洗去毛酥炙令黃

生地黃焙

當歸焙各二兩

蒲黃一合

冬葵子兩半

右爲極細末。每服三錢匕。空心溫酒調服。日二。一方煉蜜爲丸。如梧子大。每

服二十丸。食前炒鹽湯下。

如神散 治心藏有熱。熱乘於血之劑。

阿膠蛤粉炒一兩

山梔

車前子

黃芩

甘草炙各二錢半

右爲細末。每服半錢或一錢。井華水調服。日三。此方合犀角、地黃湯用之良。

髮灰散 亂髮燒存性爲末。每服二錢。以醋二合湯少許調服。或以側柏葉汁調

糯米粉和丸。梧子大。湯服五十丸。

鹿角膠丸 治房室勞傷。小便出血。

鹿

角一兩成珠炒

沒藥

油髮灰各六錢

右爲末。取白茅根汁打糊爲丸。梧子大。空心鹽湯吞七八十丸。

金匱翼卷二 渡血

# 金匱翼

清 吳門 尤 怡在涇編集

鄞縣 曹赤電炳章圈校

## 卷三

### 膈噎反胃統論

膈、隔也。飲食入咽。不得輒下。噎塞膈中。如有阻隔之者。故名曰膈。噎。又其病正在膈間。食不得下。氣反上逆。隨復吐出。故又名膈氣。反胃者。飲食入胃。全無阻隔。過一二時。輒復吐出。有反還之意。故曰反胃。甚者朝食暮吐。暮食朝吐。有翻傾之義。故亦名翻胃。不似噎隔之噎。然後吐。不噎則不吐也。噎隔之病。有虛有實。實者或痰或血。附着胃脘。與氣相搏。翳膜外裹。或復吐出。膈氣暫寬。旋復如初。虛者津枯不澤。氣少不充。胃脘乾癯。食澁不下。虛則潤養。實則疏瀹。不可不辨也。



飲食下咽。不得入胃爲噎。食不下通。氣反上逆爲塞。東垣乃謂陽氣不得出者爲塞。陰氣不得降者爲噎。豈非謂入食從陰而氣出從陽耶。其文則深。其旨反晦。至謂先用陽藥治本。後用堵塞瀉標。吾不知其何所謂矣。

子和論膈噎。累累數百言。謂三陽結熱。前後閼澁。下旣不通。必反上行。所以噎食不下。夫膈噎。胃病也。始先未必燥結。久之乃有大便秘少。若羊矢之證。此因胃中津氣上逆。不得下行而然。乃胃病及腸。非腸病及胃也。又因河間三乙承氣之治。謂噎膈之病。惟宜用下。結散陽消。其疾自愈。夫脘膈之病。豈下可去。雖仲景有大黃甘草東垣有通幽潤腸等法。爲便秘嘔吐者立。然自是食入輒吐之治。非所論於食噎不下也。獨其所謂慎勿頓攻。宜先潤養。小著湯丸。累累加用。關局自透。或用苦酸微湧。膈涎因而治下。藥勢易行。設或不行。蜜苦鹽下導。始終勾引。兩藥相通者。其言甚善。蓋痰血在脘。不行不愈。而藥過病所。反傷真氣。非徒無益矣。故以小丸累加。適至病所。無過不及。以半爲期。則治噎之道也。但須審是痰是血而行之耳。

膈噎之證。大都年踰五十者。是津液枯槁者居多。若壯年氣盛。非血卽痰。近見

有津液枯槁之劑。治一少年肥實男子。至死不悟。哀哉。鶴年  
先嬌傳一方云。用燒酒一斤。浸海蜇花頭一斤。入磁瓶內。埋地數年。則海蜇化  
為水矣。取飲半酒杯妙。鶴年又識

## 痰膈

痰膈因七情傷於脾胃。鬱而生痰。痰與氣搏。升而不降。遂成噎膈。其病令人胸膈  
痞悶。飲食輒噎。不得下入胃中。必反上逆而嘔。與痰俱出。治法宜調陰陽。化痰下  
氣。陰陽平勻。氣順痰下。病斯已矣。  
和劑四七湯。治喜怒憂思悲恐驚之氣。結成痰涎。狀如破絮。或如梅核。在咽喉  
之間。咯不出。嚥不下。此七情所為也。中脘痞悶。氣不舒快。或痰飲嘔逆惡心。並  
皆治之。

半夏夏錢製二分

茯苓六一錢

紫蘇葉八分

厚朴薑製一分

水一盞。生薑七片。紅棗二枚。煎至八分。不拘時服。

丁沉透膈湯和劑

治脾胃不和。痰逆惡心。或時嘔吐。飲食不進。十膈五噎。痞塞

不通。並皆治之。

人參

砂仁

香附各一兩

青皮

木香

肉豆蔻

白豆蔻

丁香各半兩

陳皮

藿香

沉香

厚朴各七分

草果

半夏

神麴各二錢半

甘草一兩

麥芽五錢

白朮二兩

每服四錢。水一盞。薑三片。棗一枚。不拘時熱服。

滌痰丸

半夏麴

枯礬

皂角炙刮去弦子

元明粉

白茯苓

枳殼各等分

右爲末。霞天膏和丸。量人虛實用之。

血膈

丹溪治一少年。食後必吐出數口。却不盡出。膈上時作聲。面色如平人。病不在脾

胃。而在膈間。其得病之由。乃因大怒未止。輒食麵。故有此證。想其怒甚。則血菀於上。積在膈間。礙氣升降。津液因聚。爲痰爲飲。與血相搏而動。故作聲也。用二陳加香附、韭汁、蘿蔔子二日。以瓜蒂散。敗醬吐之。再一日又吐。痰中見血一盞。次日復吐。見血一鍾而愈。

一中年人。中脘作痛。食已乃吐。面紫霜色。兩關脈瀯。乃血病也。因跌仆後。中脘卽痛。投以生新血推陳血之劑。吐血片碗許而愈。

一中年婦人反胃。以四物加帶白陳皮。留尖去皮桃仁。生甘草、酒紅花。濃煎入驢尿。以防生蟲。與數十貼而安。

一人咽膈間。常覺有物閉悶。飲食妨礙。脈瀯稍沉。形色如常。以飲熱酒所致。遂用生薑汁。每服半盞。日三服。至二斤而愈。

一人食必屈曲下膈。梗澁微痛。脈右甚瀯而關沉。左却和。此汚血在胃脘之口。氣因鬱而爲痰。必食物所致。詢其去臘。日飲剗剗酒三盞。遂以生韭汁冷飲細呷之。盡半斤而愈。

一貧叟病噎膈。食入卽吐。胸中刺痛。或令取韭汁入鹽梅滷汁少許細呷。得入漸

加。忽吐稠涎數升而愈。

此亦仲景治胸痺用薤白。取其辛溫。能散胃脘痰涎惡血之義也。愚謂此不獨辛溫散結之義。蓋亦鹹能潤下。而酸味最能開膈胃。止嘔吐。品味不雜。而意旨周密。殊可取也。

一婦年及五十。身材略瘦小。勤於女工。得噎膈證半年矣。飲食絕不進。而大便燥結。不行者十數日。小腹隱隱然疼痛。六脈皆沉伏。以生桃仁七個。令細嚼。杵生薑汁一盞送下。片時許。病者云。胸中略覺寬舒。以四物六錢。加括蕒仁一錢。桃仁泥半錢。酒蒸大黃一錢。酒紅花一分。煎成止藥一錢。取新溫羊乳汁一錢。合而服之。半日後下宿糞若干。明日腹中痛止。漸可進稀粥而少安。後以四物出入加減。合羊乳汁服五六十貼而安。

江應宿治一老婦。年近七旬。患噎膈。胃脘乾燥。屬血虛有熱。投五汁湯。二十餘日而愈。其方蘆根汁、藕汁、甘蔗汁、牛羊乳、生薑汁少許。餘各半錢。重湯煮溫。不拘時徐徐服。

滋血潤腸湯 治血枯及死血在膈。飲食不下。大便燥結。

當歸酒洗三錢

芍藥煨

生地黄各一錢半

紅花酒洗

桃仁去尖炒皮

大黃酒煨

枳殼一錢炒各

水一鍾半煎七分入韭菜汁半酒盡食前服。

秦川剪紅丸良方

雄黃另研

木香各五錢

檳榔

三稜煨

蓬朮煨

貫仲去毛

乾漆炒煨

陳皮各一兩

大黃半一兩

右麵和丸梧子大每五十丸食前米飲送下吐出瘀血及下蟲爲效。

### 氣膈

氣膈病使人煩懣食不下時嘔沫淳于意作下氣湯治此疾一日氣下二日能食三日愈然下氣湯方不傳。

一村夫因食新笋羹噉納間忽爲一噎延及一年百藥不效王中陽乃以葶撥麥芽炒青皮去穰人參苦桔梗柴胡白朮南木香高良薑半夏麴共爲末每服一錢。

水煎熱服。次日病家報云。病者昨已痛極。自己津唾亦嚥不下。服藥幸納之胸中。沸然作聲。覺有生意。敢求前劑。況數日不食。特游氣未盡。擬待就木。今得此藥。可謂還魂散也。王遂令其搗碎。米煮粥。將熟卽入藥。再煎一沸。令啜之。一吸而盡。連服數劑。得回生。因名曰還魂散。食以之。治七情致病。吐逆不定。面黑目黃。日漸瘦損。傳爲噎證者多驗。但忌油膩魚腥粘滑等物。

永類鈴方。治噎膈不食。黃犬乾餓數日。用生粟或米乾飼之。俟其下糞。淘洗米粟令淨。煮粥入薤白一握。泡熟去薤。入沉香末二錢食之。

救急療氣噎方

半夏

柴

胡各三兩

生

薑三兩

羚羊角

犀角

桔

梗

昆

布

通草

炙甘草

各二兩

水八升。煮三升。分三服。

療因食卽噎塞如炙轡在膈不下方

射干六分

升麻四分

桔梗四分

木通一錢

赤苓八分

百合八分

紫苑頭二枚

水二大升。煎九合。去渣。分溫三服。食遠。

### 蟲膈

張文仲備急方。言幼年患反胃。每食羹粥諸物。須臾吐出。貞觀中許奉御兄弟。及柴蔣諸名醫奉勅調治。竟不能療。漸疲困。候絕旦夕。忽一衛士云。服驢小便極效。遂服二合。後食只吐一半。哺時再服二合。食粥便定。次日奏知。宮中五六人患反胃者同服。一時俱瘥。此物稍有毒。服之不可過多。須熱飲之。病深者七日當效。後用屢驗。

廣五行記。永徽中絳州有僧。病噎數年。臨死遺言。令破喉視之。得一物。似魚而有兩頭。遍體悉是肉鱗。致鉢中跳躍不止。以諸味投鉢。悉爲水。時寺中刈藍作靛。試取少許置鉢中。蟲繞鉢畏避。須臾蟲化爲水。後人以靛治噎疾。每效。

### 治梅核膈氣方

取半青半黃梅子。每個用鹽一兩。淹一日夜。晒乾。又浸又晒。至水盡乃止。用青錢



三個。夾二梅。麻線縛定。通裝磁確內。封埋地下。百日取出。每用一梅含之。嚥汁入喉。卽消。收一年者。治一人。收二年者。治二人。其妙絕倫。

昆布丸 治五噎。咽喉妨塞。食飲不下。

昆布洗

麥門冬

天門冬並去心焙

訶黎勒去核各一兩五錢

木通

川大黃微炒

川朴硝

郁李仁湯浸去皮微炒

桂心

百合各一兩

羚羊角屑

杏仁去皮尖

蘇子微炒

射干各五錢

柴胡去蘆

陳皮去白

檳榔各二錢半

右爲細末。煉蜜和搗三百杵。丸如梧子大。每服三十丸。不拘時。熱酒送下。夜飯後。用綿裹彈子大一丸。嚥化。

### 雜療方

普濟方云。反胃吐食。藥物不下。結腸三五日。至七八日。大便不通。如此者必死。昔金州周禪師。得正胃散方於異人。十痊八九。君子收之。可濟人命。用白水牛喉一

條。去兩頭節。并筋膜脂肉。及如阿膠黑片。臨時旋炙。用米醋一盞浸之。微火炙乾。淬之。再炙再淬。醋盡爲度。研末。厚紙包收。或遇陰濕時。微火烘之。再收。遇此疾。每服一錢。食前陳米飲調下。輕者一服立效。

集驗療反胃朝食暮吐暮食朝吐方  
羊肉去脂膜作脯。以好蒜齏空腹任意食之。立見效驗。

聖濟總錄治咽喉妨礙。如有物吞吐不利方

杵頭糠

人參各一錢

石蓮肉炒二錢

水煎服。日三次。

### 虛勞統論

虛勞一曰虛損。蓋積勞成虛。積虛成弱。積弱成損也。虛者空虛之謂。損者破散之謂。虛猶可補。損則罕有復完者矣。

古有五勞、五蒸、六極、七傷之名。而不一其說。然五勞者。主五藏。心勞、肝勞、脾勞、肺勞、腎勞是也。五蒸者。主軀體。膚蒸、肉蒸、脈蒸、筋蒸、骨蒸也。六極者。氣極、血極、筋極、

肌極、精極、骨極。合內外兼陰陽者也。七傷者。大飽傷脾。大怒氣逆傷肝。強力舉重。久坐濕地傷腎。形寒飲冷傷肺。憂愁思慮傷心。大恐懼不節傷志。風雨寒暑傷形。合形藏神而言者也。外此所謂志勞、憂勞、瘦勞、思勞及陰寒、陰痿、裏急、精速等證。爲七傷者皆非也。

損證有自上至下者。有自下至上者。而皆以中氣爲主。故難經一損損於肺。皮聚而毛落。二損損於心。血脈虛弱。不能榮於藏腑。婦人則月水不通。三損損於胃。飲食不爲肌膚。此自上而下者也。一損損於腎。骨痿不能起於牀。二損損於肝。筋緩不能自收持。三損損於脾。飲食不能消尅。此自下而上者也。機要云。虛損之疾。寒熱因虛而感也。感寒則損陽。故損自上而下。治之宜以辛甘淡。過於胃則不可治也。感熱則損陰。故損自下而上。治之宜以苦酸鹹。過於脾則不可治也。夫脾胃居中。而運水穀。脾胃氣盛。四藏雖虛。猶能溉之。不然則四藏俱失其養矣。得不殆乎。故曰過於脾胃者不治。治損之法。莫善於難經。謂損其肺者。益其氣。損其心者。調其營衛。損其脾者。調其飲食。適其寒溫。損其肝者。緩其中。損其腎者。益其精。蓋肺主氣。益之使充也。心主

血。而營衛者血之源。和之使無偏也。脾運水穀。而主肌肉。調之適之。毋困其內。亦無傷其外也。肝苦急。緩之使疎達也。腎主精。益之使不匱也。後人不辨損在何藏。概與養陰清火。術亦疎矣。陳藏器諸虛用藥凡例。本出千金。此在初學。殊足以爲準則。若夫得心應手。神明變化。端不在此區區形迹間也。

### 虛勞營衛不足

虛勞營衛不足者。脈極虛芤遲。短氣裏急。四支痠疼。腹中痛。或悸或衄。或手足煩熱。咽乾口燥。宜甘酸辛藥調之。甘以緩急。酸以養陰。辛以養陽也。

#### 小建中湯方

白芍

六兩

甘草

桂枝

生

薑各三兩

大棗

十二枚

膠

飴一升

虛甚者。加黃耆一兩半。

右六味。以水七升。煮取三升。去滓。內膠飴。更上微火消解。溫服一升。日三服。深

師治虛勞腹滿。食少泄瀉者。無膠飴。有人參二兩。半夏一升。必效方。治虛勞失精。加龍骨白斂各一兩。古今錄驗。治虛勞裏急。小腹急痛。氣引胸脇。或心痛短氣。以乾薑代生薑。加當歸四兩。

經云。肝生於左。肺藏於右。心位在上。腎處在下。脾居四臟之中。生育營衛。通行津液。一有不調。則失所育所行矣。必以此湯溫健中臟。故名建中。中藏者。脾胃也。脾欲緩。急食甘以緩之。故以飴糖爲君。甘草爲臣。桂枝辛熱散也。潤也。營衛不足。潤而散之。芍藥酸寒。收也。泄也。津液不足。收而行之。故以芍桂爲佐。生薑辛熱。大棗甘溫。胃者衛之源。脾者榮之本。衛不足。益之必以辛。榮不足。補之必以甘。甘辛相合。脾胃健而榮衛通。故以薑棗爲使也。

大建中湯方 治內虛裏結少氣。手足厥冷。小腹攣急。或腹滿弦急。不能食。起卽微汗。陰縮。或腹中寒痛。或脣口乾。精自出。或手足乍寒乍熱。而煩冤酸疼。不能久立。多夢失精。

黃耆	當歸	桂心	芍藥
人參	甘草	半夏	黑附子
	錢各一		炮各二
			錢半

每服五錢。水二觔。薑三片。棗二枚。煎一觔。去滓。食前溫服。本方加白朮、茯苓、麥冬、川芎、熟地、茯苓。各十四味。建中湯。皆補益榮衛之劑也。炙甘草湯。治虛勞不足。汗出而悶。脈結悸。行動如常。不出百日。危急者。十一日死。

炙甘草四兩

桂枝

生薑各三兩

麥冬去心

麻仁各半升

人參

阿膠各二兩

大棗二十枚

生地黃一斤

右九味。以酒七升。水八升。先煮八味。取三升。去滓。內膠消盡。溫服一升。日三服。

朱雀湯。治勞傷心氣。變生諸疾。

雄雀肉一隻取炙

赤小豆一合

人參

赤苓

紫石英

小麥

大棗肉各一兩

紫苑

遠志

丹參各半兩

炙甘草半錢

右細剉拌勻。每服三錢。用水一盞。煎六分。去滓。食遠溫服。奇效。

肺勞

肺勞者。呼吸少氣。咳嗽喘急。嗌乾氣極。則皮毛焦乾。津枯力乏。腹脹喘鳴。由預事而憂。或風邪久住而成。宜分邪正冷熱而治之。

紫苑湯 治氣極。皮毛焦枯。四肢無力。喘急。短氣不足以息。

紫苑茸洗

乾薑炮

黃耆

人參

五味子

鐘乳粉

杏

仁去殼炒

甘

草炙各分

右呔咀。每服四錢。水一盞。薑三片。棗一枚。煎服無時。

葛可久保和湯 治風寒久嗽成勞。及肺燥成痿者。服之決效。

知母

貝母

天冬

麥冬

款冬各三錢

花粉

薏仁

杏仁炒去皮尖各二錢

粉草炙

紫苑

五味子

馬兜鈴

百合

桔梗各一錢

阿膠

生地黄

當歸

紫蘇

薄荷各五分

生薑三片

右水煎。入飴糖一匙。服三日三服。食後進。

一方無地黃。有百部。若血盛。加蒲黃、茜根、藕節、大薊、茅花根。痰盛。加半夏。

橘紅、茯苓、枳實、炒括蕓。喘盛加桑白皮、陳葶藶子、蘇子。熱盛加炒黑山梔、黃連、黃芩、連翹。風熱加防風、金沸草、甘菊花。寒盛加桂枝、五味子。臘月加乾薑。

### 心勞

心勞者。恍惚驚悸。少顏色。熱則煩心。口乾溺澀。寒則內慄。夢多恐怖。由曲運神機而成。熱則清之。寒則溫之。養血安神則一也。

遠志引子 治心勞虛寒。夢寐驚悸。

遠志去心

茯神去木

肉桂

人參

棗仁炒

黃耆

當歸各一兩

甘草炙半兩

右㕮咀。每服四錢。水一盞。薑五片。煎服無時。

麥門冬湯 治心勞虛熱。唇口赤。煩渴溺澀。

麥門冬去心

遠志甘草煮

人參

黃芩

生地黃

茯神

石膏煨各一兩

甘草炙半兩



煎服法同前。

腎勞

腎勞之證。面黑足冷。耳聾膝軟腰痛。少腹拘急。小便不利。八味腎氣丸主之。此爲腎藏不足。內生寒冷。王太僕所謂腎虛則寒動於中也。

八味腎氣丸方

熟地黄八兩

萸肉

山藥各四兩

牡丹皮

建澤瀉

白茯苓各三兩

附子製

肉桂各一兩

右爲末。煉蜜丸如桐子大。每服七八十丸。空心滾湯下。

本方加五味子、鹿茸。

薯蕷丸 補丈夫一切病。不能具述方。

薯蕷

枸杞子

續斷

茯苓

牛膝

兔絲子

巴戟

杜仲各一兩

菴蓉二兩

五味子

山萸肉

蛇牀子各一兩

右爲散。酒調方寸匕。日三夜二。禁醋蒜。

### 治腎勞精敗面黑方

肉蓯蓉四兩。水煮令爛。薄細切。研精。羊肉。分爲四度。下五味。以米煮粥。空心食。

聖濟總錄

許學士本事方。唐鄭相國云。予爲南海節度使時。年七十有五。粵地卑濕。傷於內。外。衆疾俱作。陽氣衰絕。乳石補益之藥。一切不應。元和七年。有訶陵國舶主獻此方。經七八日而覺應驗。自爾常服。其功神驗。十年二月。罷郡歸京。錄方傳之。其方用破故紙十兩。揀洗爲末。用胡桃肉去皮十二兩。研如泥。卽入前藥末。更以好煉蜜和勻如飴。盛瓷器中。且日以溫酒化藥一匙服之。不飲酒。溫熟水化下。彌久則延年益氣。悅心明目。補益筋骨。但禁食芸薹。羊血。蕃人呼爲補骨脂丸。

### 脾勞

脾勞之證。食不化。心腹痞滿。嘔吐吞酸。面色痿黃。甚者。心腹常痛。大便泄利。手足逆冷。骨節痠疼。日漸消瘦。由脾胃久積風冷之氣所致。亦名冷勞。木香猪肚丸主

之。

木香猪肚丸方

木香

附子

郁李仁

乾薑

陳皮

麥冬各一兩

肉豆蔻一兩

熟艾

驚甲

柴胡

神麴各二兩

厚朴薑水炒

鍾乳粉

桂心各五錢

共末。用雄猪肚一具。去脂膜切細。入好米醋三升。煮爛研細。入末搗和。丸梧子大。空心溫酒米飲任下二十丸。

千金治虛補勞方

羊肚一具切

白朮一升

右二味。以水二斗。煮取六升。每服二升。日三。

又方

猪肚一具

人參五兩

蜀椒

乾薑各二兩

葱白七兩

白梁米半升

右六味。以咀諸藥。令相得。和米內肚中。縫合勿令泄氣。取四斗半水。緩火煮爛。空腹食之。大佳。兼下少飯。

濟生白朮湯 治脾勞虛寒。嘔吐不食。腹痛泄瀉。胸滿善噫。

人參

白朮

草果

肉豆蔻煨熟裏

厚朴

陳皮

木香

麥芽各一兩

炙草半兩

每服四錢。水一盞。薑五片。棗一枚。煎服無時。

### 風勞

風勞之證。肌骨蒸熱。寒熱往來。痰嗽盜汗。黃瘦毛焦口臭。或成疳利。由風邪淹滯經絡。瘀鬱而然。其病多著於肝。亦名肝勞。

寶鑑秦艽鱉甲散

鱉甲醋炙一兩

柴胡

地骨皮

秦艽

知母

當歸各半兩

右爲粗末。每服半兩。水一盞。入烏梅一枚。青蒿五葉。同煎至七分。去滓溫服。臨臥空心各一服。如嗽多。可加阿膠、麥冬、五味。元戎有桃柳枝各七個。薑三片。爲柴胡驚甲散。大便硬者服之。大便溏者。半氣半血。服逍遙散。元珠云。體虛之人。最易感於邪氣。當先和解。微汗微利之。從其性而治之。次則調之。醫者不知邪氣加於身而未除。便行補劑。邪氣得補。遂入經絡。往往至死。不可不知也。

柴胡飲子 太無

人參

黃芩

炙草

大黃

芍藥

柴胡

當歸 各半兩

每服四錢。水薑煎。溫服。

麥煎散 治少男室女。骨蒸黃瘦。盜汗肌熱。口臭。婦人血風。攻注四肢。熱門方見發

良方團魚丸 治骨蒸勞嗽累效。

貝母

前胡

知母

杏仁 各一兩

柴胡 半兩

用團魚二個。同煮熟。取肉連汁食之。將藥焙乾爲末。再以團魚骨甲。煮汁一盞。

和藥丸梧子大。每服二三十丸。煎黃耆六一湯。空心送下。病既安。仍服黃耆六一湯方調理。

廣濟療骨蒸肺熱。每至日晚。即惡寒壯熱。頰色微赤。不能下食。日漸羸瘦方。

生地黄切三兩

葱白一把

香豉二兩

炙甘草五錢

童子小便二升

右五味以地黄等。於小便中浸一宿。平晨煎兩沸。絞去滓。澄取一升二合。分溫二服。相去如人行七八里。服一劑。差止。

直指全鱉丸 此與良方團魚丸治同。

知母

貝母

杏仁浸去皮各三兩

柴胡二兩

川芎一兩

當歸

明阿膠炒酥各半兩

右麤截。入厚磁器中。用中等活鱉一個。生宰去頭。以鱉肉并血并藥。用醇酒五升。同浸一宿。密紙封。次早慢火同煮香熟。令病者隨意食之。只留鱉甲并骨并藥。焙乾為末。以浸藥酒汁調米粉為糊。丸桐子大。每七十九。米飲下。傷寒餘熱未盡。或失於調攝。致欬嗽寒熱。吐血衄血。纏綿日久。狀如勞瘵。此皆

元氣虛。邪氣留著。例用養氣生血藥。兼小柴胡、青蒿、鱉甲。或前胡、犀角、石膏等。隨證加減。無有不愈者。切不可純用補劑。亦不可誤認為虛損勞怯。輕用杜仲、熟地、山萸等溫補之藥也。

熱勞

熱勞者。因虛生熱。因熱而轉虛也。其證心神煩躁。面赤唇焦。身熱氣短。或口舌生瘡是也。明醫雜著云。人之一身。陽常有餘。陰常不足。況節慾者少。過慾者多。精血既虧。相火必旺。火旺則陰愈消。而勞瘵、咳嗽、咯血、吐血等證見矣。故宜常補其陰。使陰與陽齊。則水能制火。而水升火降。斯無病矣。

補陰丸方

黃柏去皮酒炒 知母去皮毛酒炒 龜板酥炙透 杞子

鎖陽酥炙 白芍酒炒 天冬去心各 熟地酒蒸

五味一兩 乾薑炒紫色三錢

右為末。入煉蜜及猪脊髓三條。和勻杵丸。桐子大。每服八九十丸。空心淡鹽湯

送下。寒月可用溫酒下。丹溪原方。有陳皮、牛膝、當歸、虎骨、無杞子、天冬、五味、乾薑。用酒煮羊肉爲丸。

### 瓊玉膏

生地黃四斤

茯苓十二兩

人參六兩

白蜜一斤

右先將生地黃熬汁去滓。入蜜煉稠。再將參、苓細末和入磁罐封。水煮半日。白湯化服。臞仙加琥珀、沉香各五錢。按虛勞之人。氣血多有鬱聚之處。故雖形衰氣弱。而脇下迫塞。不得左右臥者。虛中有實也。臞仙於滋補之中。寓通行之意。如張僧繇畫龍。一經點睛。通體皆靈。而用之者。往往獲效。是豈徒參、苓、蜜之力哉。

### 大造丸

紫河車一具

一具米泔洗淨少加酒蒸極爛以山藥末搗和焙乾

敗龜板一酥炙

天冬

麥冬各一兩

熟地半兩

夏加五味七錢。

右除熟地另杵外。共爲末。用酒煮米糊。同熟地搗膏。丸桐子大。或蜜丸亦可。每



服八九十丸。空心臨臥鹽湯下。冬月酒下。婦人去龜板。加當歸二兩。

大補天丸 治男婦虛損勞傷。形體羸瘦。腰背疼痛。遺精帶濁。

紫河車初胎者一具。米泔浸淨。入小砂罐內。加水一碗。煮

知母乳炒

龜板酥炙各三兩

黃柏蜜炙三兩

熟地五兩

肉蓯蓉

牛膝

麥冬

山藥炒

虎脰骨酥炙

黃耆蜜炙

茯苓各半

杜仲

何首烏

人參

白芍各一兩

枸杞二兩

生地酒洗

天冬

當歸

北五味各一兩

冬加乾薑半兩炒焦。

右爲細末。用猪脊髓三條蒸熟。加煉蜜和搗爲丸。根子大。每服八十九。空心淡

鹽湯下。冬月酒下。

治骨蒸便澹口渴者方

青蒿

烏梅

秦艽

甘草

小麥

水煎服。

草還丹 治陰虛骨蒸。

青蒿五升 童便三斗

文武火熬。約童便減至二斗。去青蒿。再煎至一升。入猪膽七個。再熬數沸。用甘草末收和爲丸。梧子大。每服五十丸。

又方

鮮地骨皮三錢 紅棗七枚

煎湯代茶。日一劑。

治骨蒸神效。若治童勞。加燕窩一錢。鵪年

黃耆煎 治虛勞客熱。肌肉消瘦。四肢倦怠。五心煩熱。口燥咽乾。頰赤心忪。日晡潮熱。夜有盜汗。胸脇不利。減食多濁。欬唾稠粘。時有膿血。

黃耆 知母 桑白皮 炙甘草

赤芍藥 紫苑各半 地骨皮 秦艽

白茯苓 生地 柴胡各六錢 肉桂

人參

苦桔梗各三錢三分

鱉甲酥炙

天冬各一兩

半夏五錢

右爲粗末。每服三錢。水一盞。煎至七分。去滓。食後溫服。一名人參黃耆散。

### 乾血勞

乾血。血瘀而乾也。瘀則生熱。內傷肝肺。發熱咳嗽。日以益甚。不已則成勞。金匱所謂經絡營衛氣傷。內有乾血。肌膚甲錯。兩目黯黑者是也。

大黃蠱蟲丸

大黃二兩五錢

黃芩二兩

甘草三兩

桃仁

杏仁

蠱蟲

蠱蟲

蟬各一

芍藥

乾地黄

乾漆一兩

水蛭百枚

右爲末。蜜丸小豆大。酒服五丸。日三服。

王念西云。虛勞發熱。未有不有瘀血者。而瘀血未有不有內傷者。人之起居飲食。一有失節。便能成傷。瘀積之血。牢不可拔。新生之血。不得周灌。與日俱積。其人尙

有生理乎。仲景施活人手眼。以潤劑濡乾血。以蠕動啖血之物。行死血。死血既去。病根以剗。而後可從事於滋補矣。陳大夫百勞丸。可與此互用。喻嘉言曰。此世俗所稱乾血勞之良治。血結在內。手足脈必相失。宜服此方。然必兼大補劑。瓊玉膏之類服之。

按、相失者不相得也。血結脈不通使然。

陳大夫百勞丸 治一切勞瘵積滯。疾不經藥壞者宜服。

錦紋大黃

去皮及黑心四錢

乳香

沒藥

當歸

各一錢

人參

二錢

桃仁

去皮尖另研如泥

蝨蟲

水蛭

各十四枚炒

右爲極細末。煉蜜丸。桐子大。都作一服。可百丸。五更用百勞水下。取惡物爲度。

服白粥十日。

按、都作一服。服當作劑。劑、量也。量病之輕重而製其大小也。云取惡物爲度。則非一服令盡可知。

## 傳尸勞

張雞峰云。傳尸勞者。緣尸疰。及挾邪精鬼氣而成者也。大概寒熱淋露。沉沉默默。不的知其所苦。而無處不惡。積年累月。漸就委頓。既死之後。又復傳易他人者。是也。茲須以通神明。去惡氣諸藥治之。

百一選方 治傳尸勞

天靈蓋三錢酥炙黃為末秤驚

甲極大者醋炙黃為末

桃仁二錢五分去皮尖研

青蛇腦為小豆許酥炙色轉

虎糞內骨

安息香半兩以絹篩過

檳榔為二錢半別麝

香別一錢

青蒿取近梢三四寸細剉六兩

豉三百粒

楓葉二十片

葱根個二十破

童便半升

桃柳李桑東引枝各七莖長七寸

右先將青蒿桃李柳桑枝楓葉葱豉以官升量水三升煎至半升去滓入安息香天靈蓋虎糞內骨驚甲桃仁童便同煎取汁去滓有四五合將檳榔麝香同研均調作一服早晨溫服以被覆出汗恐汗內有細蟲以帛拭之即焚此帛相次須瀉必有蟲下如未死以大火焚之並棄長流水內所用藥切不可令病人知之日後亦然十來日後氣體復原再進一服

癩肝散

癩肝一具。陰乾杵末。飲服方寸匕。日三。未愈再服。肘後云。此方甚效。

寶鑑紫河車丸 治傳尸勞服三月必平復。其餘勞證。須數服神效。

紫河車一具。用米泔水浸一宿洗淨焙乾。

驚 甲酥炙

桔 梗去蘆

胡黃連

芍 藥

大 黃

敗鼓皮心醋炙

貝 母去心

龍膽草

黃藥子

知 母各二錢半

芒 硝

犀 角

蓬 朮各一錢半

硃 砂研二錢

右爲細末。煉蜜丸如梧子大。硃砂爲衣。食前溫酒服二十丸。如膈熱。食後服。重病不過一料。

發熱統論

有表而熱者。謂之表熱。無表而熱者。謂之裏熱。故苦以治五臟。五臟屬陰而居於內。辛者以治六腑。六腑屬陽而居於外。故曰內者下之。外者發之。飲食勞倦爲內傷元氣。元氣傷則真陽下陷。內生虛熱。故東垣發補中益氣之論。

用人參、黃耆等甘溫之藥。大補其氣。而提其下陷。此用氣藥以補氣之不足者也。勞心好色。內傷真陰。陰血既傷。則陽氣偏勝。而變爲火矣。此謂陰虛火旺。勞瘵之症。故丹溪發陽有餘陰不足之論。用四物加黃柏、知母。補其陰而火自降。此用血藥以補血之不足者也。益氣補陰。皆內傷症也。一則因陽氣之下陷而升提之。一則因陰火之上升而滋降之。一升一降。迥然不同矣。節齋

平旦發熱。熱在行陽之分。肺氣主之。故用白虎湯以瀉氣中之火。日晡潮熱。熱在行陰之分。腎氣主之。故用地骨皮散以瀉血中之火。白虎湯治脈洪。故抑之。使秋氣得以下降也。地骨皮散治脈弦。故舉之。使春氣得以上升也。

治熱之法有五。一曰和。二曰取。三曰從。四曰折。五曰奪。假令小熱之病。當以涼藥和之。和之不已。次用取。爲熱勢稍大。當以寒藥取之。取之不已。次用從。爲熱勢既甚。當以溫藥從之。謂藥氣溫也。味隨所爲。或以寒因熱用。味通所用。或寒以溫用。或以汗發之。不已。又用折。爲病勢極甚。當以逆制之。制之不已。當以下奪之。下奪之不已。又用屬。爲求其屬以衰之。緣熱深陷在骨髓。無法可出。針藥所不能及。故求屬以衰之。求屬之法。是同聲相應。同氣相求之道也。如或又不已。當廣求其法。

而治之。譬如孫子之用兵。在山谷。則塞淵泉。在水陸。則把渡口。在平川廣野。當清野千里。塞淵泉者。刺俞穴。把渡口者。奪病發時前。清野千里。如肌羸瘦弱。當廣服大藥以養正。

### 勞倦發熱

勞倦發熱者。積勞成倦。陽氣下陷。則虛熱內生也。其症身熱心煩。頭痛惡寒。懶言惡食。脈洪大而空。狀類傷寒。切戒汗下。但服補中益氣湯一二服。得微汗則已。非正發汗。乃陰陽氣和。自然汗出也。

補中益氣湯

黃耆蜜炙錢半

人參

炙甘草一錢

白朮土炒

陳皮

當歸各五分

升麻

柴胡各三分

右加薑三片。棗二枚水煎。本方加芍藥、五味。名調中益氣湯。

### 火鬱發熱



火鬱者。陽氣爲外寒所遏。不得宣行。鬱而成火。或因胃中過食冷物。鬱遏陽氣於脾土之中。令人心煩。手足心熱。骨髓中熱如火燎。此爲鬱熱。經云。火鬱則發之。東垣火鬱湯

升麻

葛根

白芍藥

柴胡根各一兩

防風

炙甘草各五錢

右咬咀。每服三四錢。水二大盞。入連鬚葱白三寸煎。去滓。稍熱服。

### 血虛發熱

血虛發熱。亦從勞倦得之。東垣云。飢困勞役之後。肌熱煩躁。困渴引飲。目赤面紅。晝夜不息。其脈大虛。按之無力。經云。脈虛則血虛。血虛則發熱。症象白虎。惟脈不長實爲辨也。誤服白虎。旬日必變。

### 當歸補血湯

黃耆一兩

當歸二錢

生地黄五錢

生草一錢

右作一服。水煎溫服。食前。

## 陽浮發熱

陽氣虛浮。其端有二。或脾胃氣虛。陽浮於外。其症上見嘔惡。下爲溏泄。其脈大而  
不實。身雖大熱。切忌寒涼。宜甘辛溫藥溫其中。使土厚則火自斂也。或腎虛火不  
歸經。游行於外。其症煩渴引飲。面赤舌刺唇黑。足心如烙。或冷如冰。其脈洪大無  
倫。按之微弱。宜八味腎氣丸之屬導火下行也。

理中湯

八味腎氣丸

方見虛勞門

王肯堂云。相火寄於命門。命門者。男子以藏精。女子以繫胞。因嗜慾竭之。火無所  
附。故厥而上行。桂附與火同氣。而其味辛能開腠理。致津液。通氣道。據其窟宅而  
招之。同氣相求。火必降下矣。且火從腎出者。是水中之火也。火可以水折。而水中  
之火。不可以水折。故巴蜀有火井焉。得水則熾。得火則熄。則桂附者。固治浮游相  
火正劑歟。

## 痰積發熱

積痰發熱者。其脈弦滑。其證胸膈痞塞。背心疼痛。活人書所謂中脘有痰。令人憎寒發熱。狀類傷寒。但頭不痛。項不強。爲異。

### 瘀血作熱

瘀血發熱者。其脈濇。其人但漱水而不欲嚥。兩脚必厥冷。少腹必結急。是不可以寒治。不可以辛散。但通其血。則發熱自止。  
當歸承氣湯

當歸

大黃錢各四

芒硝

甘草錢各二

右咬咀入薑煎。一方無芒硝。有芍藥。名清涼飲子。

### 骨蒸熱

骨蒸熱者。熱伏於內。而氣蒸於外也。其證肌熱盜汗。黃瘦口臭。久而不愈。此骨蒸伏熱。營衛不通之所致也。少男室女多有此證。  
麥煎散方見虛勞門

柴胡梅連散 治骨蒸勞熱。久而不愈。三服除根。其效如神。

柴胡

人參

黃芩

甘草

胡黃連

當歸

芍藥各半

右爲末。每服三錢。童便一盞。烏梅一個。猪膽五匙。猪脊髓一條。韭根半錢。水一鍾。同煎至七分。去滓。溫服。無時。原方有前胡。無人參。黃芩。甘草。當歸。芍藥。余蓋從柴胡飲子增入。以備補虛瀉熱之用。去前胡者。不欲重散也。

### 食積酒毒發熱

食積者。當暮發熱。惡聞食臭。時時噉腐。其脈滑或實。活人所謂傷食令人頭痛。脈數發熱。但左手人迎脈平和。身不疼是也。酒毒者。脈數溺赤。經云。酒氣與穀氣相搏。熱盛於中。故熱遍於身。內熱而溺赤是也。

加味越鞠丸

蒼朮

神麴

香附

黑山梔

撫芎

針砂

山查

右爲末。糊丸。桐子大。溫服無時。

酒煮黃連丸

黃連八兩。用酒二斗。入瓦罐內。重湯煮爛。取出晒乾爲末。滴水丸。桐子大。每五十丸。食前溫水下。

分治藏府。上下血氣諸熱。

錢氏瀉青丸 治肝熱。

當歸焙

龍膽草

川芎

山梔

羌活

防風

大黃

右爲末。蜜丸。雞頭子大。每服一丸。一方彈子大。竹葉湯化下一丸。

龍薈丸 治肝藏積熱。

當歸焙

龍膽草

梔子

黃連

黃柏

黃芩 各一錢

大黃

蘆薈

青黛 各半

木香 二錢

麝香 別研分

右爲末。煉蜜丸。如小豆大。小兒如蘇子大。每二十丸。生薑湯下。

外臺麥門冬飲 療心勞不止口赤乾燥。心悶。肉毛焦色。

生麥冬去心一升

陳粟米一升

雞子白枚二十七

淡竹葉切三升

右先以水一斗。煮粟米。竹葉取九升。去滓。澄清接取七升。冷下雞子白攪五百轉。去上沫。下麥門冬。煮取三升。分三服。

濟生黃芩湯 治心熱。口瘡煩渴。小便不利。

生地

木通

甘草

黃連

黃芩

麥冬

梔仁

澤瀉

每服四錢。水一盞。薑三片。煎服無時。

瀉黃散 治脾熱。口臭。咽乾。目黃。

蘆香葉七錢

山梔一兩

石膏半兩

防風四兩

甘草二兩

右剉同蜜酒拌。微炒香爲末。每服二錢。水一盞。煎清汁飲。

外臺療脾熱方

石膏一斤碎

生地汁一升

淡竹葉切五

赤蜜一升

水一斗二升。煮竹葉取七升。去滓。內石膏。煮取一升五合。去滓。下地黃汁。兩沸。下蜜。煎取三升。細細服。

瀉白散 治肺熱。

桑白皮炒黃

地骨皮各一兩

甘草炙半兩

右爲末。每服二三錢。水一盞。入粳米百粒煎。食後服。易老加黃連。海藏云。加山梔、黃芩。方能瀉之。

東垣滋腎丸 治腎熱。

黃柏三兩

知母二兩

桂半錢

右爲末。熟水丸。桐子大。每七八十丸至百丸。食前百沸湯下。

外臺三黃湯 治腎熱。大小便悶塞。耳鳴色黑。

大黃切別漬

黃芩

芒硝各三兩

梔子十四枚

甘草炙一兩

右以水四升。先煮三物。取一升五合。去滓。下大黃。更煎兩沸。下芒硝。分三服。外臺梔子煎 治膽實熱。精神不守。

梔子二十枚

甘竹茹炒一兩

香豉六合

大青

橘皮各一兩

赤蜜三合

水六升。煎取一升七合。去滓。下蜜。更上微火。煎兩沸。分再服。

導赤散 治小腸實熱。小便赤澀而渴。

生地黄

木通

甘草各等

右爲末。每服三錢。水一盞。入竹葉七片。同煎至五分。食後溫服。丹溪云。導赤散。正小腸藥也。

瀉白湯 治大腸實熱。腹脹不通。俠臍痛。食不化。口生瘡。喘不能久立。

淡竹葉

黃芩

梔子仁

柏皮炙各

茯苓

芒硝各一兩

生地黄三兩

橘皮半兩

右剉。每四錢。入薑棗煎。空心服。

千金竹葉湯 治胃熱。

竹葉

小麥各一

知母

石膏各三兩

黃芩

茯苓

麥冬各二兩

人參一兩



生薑五兩

括蕒根

半夏

甘草各一兩

右咬咀。以水一斗。煮竹葉、小麥。取八升去滓。內諸藥。煮取三升。分三服。老小分五服。

千金地黃煎

生地黃汁三四升

茯苓

知母

葳蕤各四兩

括蕒根五兩

竹瀝三合

生薑汁

白蜜

生麥冬汁

生地骨皮汁各一石

膏八兩

右以水一斗二升。先煮諸藥。取三升。去滓。下竹瀝、生地黃、麥冬汁。微火熬四五沸。下蜜薑汁。微火煎。取六升。初服四合。日三夜一。加至六合。夏月作散服之。東垣云。發熱而不能食。自汗短氣者。虛也。以甘寒之劑瀉熱補氣。能食而熱。口舌乾燥。大便難者。以辛苦大寒之劑下之。瀉熱補水。當細分之。不可概論。涼膈散。治上焦積熱。煩躁。面赤頭昏。咽痛喉痺。口瘡頰腫。便溺悶赤。譫妄。睡臥不安。一切風壅。

新薄荷

連翹

黃芩

梔子

甘草各半

大黃

芒硝各半

右末。每服二三錢。竹葉七片。蜜三匙煎。食後服。與四物各半服。能益血洩熱。名雙和散。本事加赤芍。乾葛。治諸熱病累效。玉機云。輕者宜桔梗湯。本方去硝黃。加桔梗。舟楫之品。浮而上之。去膈中無形之熱。且不犯下二焦也。

入正散

治下焦積熱。二便澀。口渴咽乾。舌瘡血淋。

大黃

瞿麥

木通

滑石

扁蓄

車前子

山梔

甘草各等分

右爲末。每服二錢。入燈心。水煎服。

通膈丸本事

治上焦虛熱。肺腕咽膈。有氣如煙搶上。

人參

川黃連

茯苓各三兩

硃砂一分

真片腦少許

右爲細末。研勻。煉蜜丸如梧子大。熟水下三五丸。日二三服。

四順清涼飲子

治血分熱。

大黃蒸

甘草炙

當歸

芍藥各等分

右呖咀。每服五錢。用水一盞半。薄荷十葉。同煎至七分。去滓溫服。潔古云。涼風至而草木實。清涼飲子。乃秋風撤熱之劑也。

海藏桔梗湯 治氣分熱。

桔梗

連翹

山梔

薄荷

黃芩

甘草各等分

右爲粗末。竹葉白水煎。溫服。汗之。熱服。

### 惡寒

惡寒。有陽虛陽鬱之異。陽虛者。宜補而溫之。陽鬱者。宜開發上焦。以升陽明之氣。丹溪所謂久病惡寒。當用解鬱是也。

桂枝加人參附子湯 治陽虛。腠理不固。惡寒自汗。其脈浮虛。

桂枝

白芍各半

甘草炙一兩

附子炮半個

人參半兩

每服五錢。生薑三片。棗一枚。水煎服。

陽鬱治案

進士周。年近四十。得惡寒證。服附子數百貼。而病益甚。脈弦而緩。遂以江茶入生薑汁。香油些少。調飲之。吐痰一升許。減大半。又與通聖散。去麻黃。硝黃。加當歸。地黃。百貼而安。

一女子惡寒。用苦參。赤小豆各一錢。爲末。薑水調飲之。吐痰甚多。繼用南星。川芎。蒼朮。黃芩。酒打麵爲丸。服愈。元珠云。上焦不通。則陽氣抑遏。而皮膚分肉。無以溫之。故寒慄。東垣升陽益胃湯。用升發之劑。開發上焦。以升陽明之氣。出於表而溫之也。丹溪吐出溼痰。亦開發上焦。使陽氣隨吐伸發出外而溫之也。故寒慄皆愈。二者乃陽鬱表寒之要。大建中湯。療中虛怯寒。

黃耆

當歸

桂心

白芍

各二錢

人參

甘草

半夏

黑附

炮去皮各二錢半

右八味。㕮咀。每服五錢。水二盞。薑三片。棗二枚。煎至一盞。去滓。食後溫服。羅謙甫治。院董誠彥。夏月勞役過甚。煩渴不止。極飲潼乳。又傷冷物。遂自利。腸

鳴腹痛。四肢逆冷。冷汗自出。口鼻氣亦冷。六脈如蛛絲。時發昏憤。衆太醫議以葱熨臍下。又以四逆湯五兩。生薑二十片。連鬚葱白九莖。水三升。煮取一升。去滓涼服。至夜半。氣溫身熱。思粥飲。至天明而愈。許魯齋先生聞知。嘆曰。病有輕重。方有大小。治有緩急。僉院之病。非大方從權。急治不能愈也。

昔有一婦人。惡寒特甚。盛暑亦必服皮衣數件。晝夜常坐臥牀褥。飲食如常。亦一無所苦。更名醫數百。終莫能治。補瀉寒熱溫涼。備嘗之矣。一醫以玉屏風散。大劑煎水。以大鍋令患者熏蒸。半日許。汗出得愈。鶴年識

### 瘧疾統論

少陽膽爲風木之府。瘧家寒熱之邪。必歸少陽。是以瘧脈多弦。少陽居半表半裏之間。其氣從陽則熱。從陰則寒也。瘧者金火交沴。故其病寒熱並作也。氣分受邪。發於六陽時。血分受邪。發於六陰時。淺者每日一發。深者間日一發。極深者三日發也。淺者屬陽。陽性易動。故日行之氣。觸著便發。深者屬陰。陰性常靜。故日行之氣。屢觸而始發也。

瘧發時。雖大熱大渴。必以淡生薑湯適寒溫飲之。若恣飲冷水瓜果。脾胃轉傷。邪氣不達。綿延難愈。

凡瘧疾多熱。久而不解者。其人必本陰虛。法當益陰除熱。非當歸、鱉甲、製首烏、牛膝之屬。不能除也。多寒而久不解者。其人必本陽虛。法當甘溫散邪。非乾薑、附子、桂枝、人參之屬。不能已也。

瘧邪在陽者。其證多汗。感而即發。邪不能留。其留藏不去者。惟陰邪耳。陰邪不能作汗。雖以汗藥發之。亦不得。惟甘潤和陰。如當歸、牛膝之屬。多服久服。自能出汗而解也。

傷寒往來寒熱。勞瘵寒熱如瘧。傷食、勞役、脚氣、疝氣、腫毒初起。俱有寒熱。陰虛證。每日午後發熱惡寒。至晚亦得微汗而解。脈弦而數。但不大弦為辨耳。俱不可誤認為瘧也。凡病寒熱有期者。瘧也。無期者。諸病也。

凡瘧病自陰而漸陽。自遲而漸早者。由重而輕也。自早而漸遲。自陽而漸陰者。由輕而重也。凡感邪極深。發愈晏而作愈遲者。必使漸早漸近。方是佳兆。故治此疾者。春夏為易。秋冬為難。

瘧邪必從汗出。邪在陰者。必汗出至足乃佳。然非麻葛輩可發。但開鬱通經。其邪熱即散而爲汗矣。其虛者。非參耆歸地。則終不能得汗也。

古稱風寒暑濕皆能成瘧。然必客於營衛之舍。然後成瘧。不爾不成瘧也。夫營之有舍。猶人之有傳舍也。營衛之氣。日行一周。歷五臟六腑。十二經絡之界分。必其舍有邪。與日行之衛氣相遇。則病作。離則病休。故發作有時。與傷寒大異也。俗有傷寒變瘧。瘧變傷寒之說。愚謂傷寒變瘧者。本是瘧邪。因其氣特甚。故一發而不即止。迨汗出氣衰。乃復返於舍。而後日作。非傷寒能變瘧也。瘧變傷寒者。本是傷寒。因邪氣先中少陽。故寒熱如瘧。其邪遞引遞出。遍滿三陽之界。因而發熱不止。設不解。則又轉而之三陰。非瘧邪能變傷寒也。是以始先似瘧之證。熱雖退。身表尙有餘熱。不似瘧之熱退即涼也。始先似傷寒者。汗常浹體而熱不退。過一二日。忽振寒而發熱。或熱退一日而復作寒熱。非如傷寒之汗出即熱退而邪解也。學者智識既具。自當獨斷。豈可習焉不察。自同衆人也。久瘧不退。邪氣陷入陰分。虧損營血。有熱無寒。口燥唇乾。有似傷寒。人皆謂之變傷寒。不知其爲傳勞瘵也。脈將散大。或細數。而死期至矣。

## 風瘧

風瘧者脈浮多汗惡風。多於春時得之。經云。以春病者。惡風是也。亦有發於秋者。經云。夏暑汗不出者。秋成風瘧是也。楊仁齋云。風瘧是感風而得。惡風自汗煩躁頭疼。風陽氣也。故先熱後寒。可與解散風邪。

## 溫瘧

溫瘧者。先熱而後寒。與風瘧大略則同。其但熱而不寒者。經所謂得之冬。中於風。寒氣藏於骨髓之中。至春夏陽氣大發。邪氣與汗皆出。此病藏於腎。其氣先從內出之於外也。外臺云。病瘧六七日。但見熱者。溫瘧也。與夏傷暑而秋病瘧者不同。又有先傷風而後傷寒者。亦先熱而後寒。名曰溫瘧。與此亦不同。

## 桂枝白虎湯

知母六兩  
甘草二兩  
石膏一升  
桂枝三兩  
粳米六合



右剉。每服五錢。水一盞半。煎至八分。去滓溫服。汗出即愈。  
延年療溫瘧壯熱不能食知母鱉甲湯

知母

鱉甲炙

骨皮各三

常山二兩

竹葉一升

石膏四兩

水煎分三服。

濕瘧

濕瘧者。寒熱身重。肢節煩疼。脹滿。善嘔。自汗。陳無擇云。因汗出復浴。濕舍皮膚。及冒雨濕所致。當從太陽論治。除濕湯主之。寒多者。必兼溫。行陽氣也。  
除濕湯

半夏

厚朴

蒼朮米泔製各二兩

白朮生

藿香

橘紅

白茯苓各一兩

甘草炙七錢

右咬咀。每服四錢。薑七片。棗一枚。水煎。食前溫服。本方去白朮。加人參、草果、水薑、烏梅煎。即和劑人參養胃湯。脈無力寒多加薑附。脈有力熱多加芩、連、柴

胡。朴、蒼、薑、藿。發散也。半、果、苳、橘。劫痰也。人參惟虛人最宜。

### 痺瘧

痺、單也。言獨熱而無寒也。經云。陰氣孤絕。陽氣獨發。則熱而少氣煩冤。手足熱而欲嘔。名曰痺瘧。此以陽藏而病陽證。與諸瘧證亦不同。其治之之法有三。一者熱氣內蓄。而表有客寒。則當散以辛涼。一者客邪已解。而蘊熱獨盛。則當清以苦寒。或甘寒。一者邪火雖盛。而氣血已衰。真陰已耗者。急宜壯水固原也。

備急竹葉常山湯

治痺瘧及溫瘧。

常山三兩

淡竹葉一握

小麥一升

水五升。浸一宿。明旦煮取二升。分溫三服。

### 牡瘧

瘧多寒者。名曰牡瘧。金匱云然也。然牡當作牝。傳寫之誤耳。衛州書云。瘧多寒者。痰多也。痰爲水類。能遏絕其陽氣於裏。使不得外達。故寒多不熱。雖熱亦不甚也。

用蜀漆散者。吐去其痰。陽氣一伸。其疾自愈。夫牡屬陽。牝屬陰。寒多爲陰。故宜曰牝。

牡蠣湯

牡蠣

麻黃各四兩

蜀漆三兩

甘草二兩

右先取蜀漆三洗去腥。水八升。煮蜀漆麻黃等得六升。去沫。內餘藥。煮取二升。飲一升。吐復飲之。

痰瘧

痰瘧由夏月乘涼飲冷。及臥濕地。飢飽失時。脾胃不和。痰積中脘所致。其脈弦滑。其證胸痞嘔吐。或時眩暈者是也。微則消之。甚而實者。蜀漆常山之類。攻而去之。虛者四獸飲之。屬補而去之。

常山散

常山一兩。剉碎。以好酒浸一宿。瓦器煮乾爲末。每服二錢。水一盞。煎半盞去滓。停冷。五更服之。不吐不瀉效。

四獸飲

半夏

茯苓

人參

草果

陳皮

甘草減半

烏梅肉

白朮各等分

右咬咀。同薑棗等分。以鹽少許。淹服食頃。厚皮紙裹煨令香熟。焙乾。每服半兩。水煎。未發前併進三服。

### 食瘧

食瘧一名胃瘧。飲食無節。傷胃而成。其證腹痛中滿。不能食。食則嘔逆。噯腐吞酸。其脈氣口獨盛。戴復庵法。平胃散加草果、砂仁、吞紅丸子。方並見食門

先醒齋筆記。梁溪王興甫。偶食牛肉覺不快。後遂發瘧。飲食漸減。至食不下咽。已而水飲亦不下。曰。湯過喉間。嘔出作碧色。藥不受。小便一滴如赤茶。大便悶。醫皆束手。仲淳忽至。視之。令仰臥。以指按至心下。偏右大叫。因詢得其由。用丸藥一服。至喉輒不嘔。水道漸通。次日下黑物數塊如鐵。其病如失。丸藥用礬紅和平胃散作末。棗肉丸。白湯下三錢。

# 虛瘥

虛瘥者。或體虛而病瘥。或因瘥而致虛。六脈微弱。神氣倦怠。是以補養正氣為主。經云。瘥脈緩大虛。使用藥。不宜用針。蓋病瘥而脈虛。氣先餒矣。故不宜用針而宜用藥。所謂陰陽形氣俱不足者。勿刺以針。而調以甘藥也。

補中益氣湯 小建中湯

二方俱補虛散邪之劑。楊仁齋云。有中年人。藏府久虛。大便常滑。忽得瘥疾。嘔吐異常。惟專用人參。為能止嘔。其他瘥藥。並不可施。遂以二陳湯加人參。縮砂。倍用白豆蔻。一二服。病人因自覺氣脈頓平。於是寒熱不作。蓋白豆蔻能消能磨。流行三焦。營衛一轉。寒熱自平也。

新定人參烏梅散 治虛瘥久瘥。少氣不食。亦治勞瘥。勞瘥者。遇勞即發。經年不差者是。

人參 三錢

烏梅 一枚

黃耆

當歸

茯苓

陳皮 各一錢

鱉甲

製首烏

白朮錢二

右都作一服加薑煎。

### 痰瘧

痰瘧者。老瘧也。三日一發。其氣深固。卒不得出。有累年不愈者。亦曰三陰瘧。大抵瘧病在三陽者。宜汗。宜和。在三陰者。宜溫。宜利。甚者非吐下不能拔其病根也。其脇下有塊者。名曰瘧母。以驚甲丸主之。

千金常山丸

常山三兩

驚甲二兩

知母一兩

甘草五錢

蜜丸。梧子大。未發前酒服十丸。臨發一服。正發又一服。

驚甲丸

驚甲

香附各二兩

三稜

蓬朮各一兩

常山一兩

阿魏二錢

右並用醋浸。神麴糊丸。白湯下。梧子大五十丸。積消及半。即止。

仁齋云。瘧之經久而不歇。其故何耶。有根在也。曰飲。曰水。曰敗血是耳。瘧家多蓄痰涎。黃水。或停滯心下。則常山能吐之。或結癖脇間。則常山能破其癖而下之。其有純熱無寒。或蘊熱內實之證。投以常山。大便點滴而下。似泄不泄。須用北大黃爲佐。大泄數下。然後獲愈也。又婦人產後。敗血流經。亦能令人寒熱如瘧。至暮則發。發則身痛如被杖。宜通經活血之劑。鹿角屑和血止痛如神。

# 金匱翼

清

吳門

尤

怡在涇編集

鄞縣

曹赤電炳章圈校

## 卷四

### 尸注

### 五尸

惡氣所發。一病而五名也。其症令人寒熱淋瀝。沉沉默默。無處不惡。或腹痛脹急。不得氣息。上衝心胸。及攻兩脇。或礫礫踊起。或攣引腰脊是也。其得之疾。速如飛走狀者。名曰飛尸。停遁不消。去來無時者。名曰遁尸。沉痼在人藏府者。名曰沉尸。衝風則發者。名風尸。隱伏積年不除者。名伏尸。然雖有五者之名。其爲鬼惡邪氣則一也。亦可通以一法治之。



雄黃丸 治卒中飛尸。腹痛脹急。上衝心胸。及攻兩脇。或魄礫踊起。或攣引腰脊。

雄黃研 大蒜各一兩

二味。搗丸如彈子大。每服一丸。熱酒化下。未差更服。

蒺藜子丸 治同前。

蒺藜子炒去刺

為末。蜜丸小豆大。食後。水下二十丸。

木香丸

木香

丁香各三

鬼箭羽

桔梗

當歸

陳皮去白

紫蘇微炒各一兩

白檳榔煨十枚

桃仁去皮尖雙仁炒

右搗篩。每服五錢。水煎。溫服無時。日二。

蒸熨方 治遁尸。飛尸。及風毒腫。流入頭面四肢。

芥子蒸熟焙

為末。以鉛丹二兩拌勻。分作兩處。用疎皮袋盛之。更換蒸熱。以熨痛處。

麝香散 治卒中惡氣。心腹刺痛。

麝香一分

犀角屑

木

香

各半

爲末。每服二錢。空心熱水調下。日二。未止再服。

又方

韭

根

切一握

烏

梅

枚十四

吳茱萸

二兩半

焙乾

水五升。煮以病人櫛內。其中三沸。櫛浮者生。沉者死。煮三升。時飲之。

按櫛有通疏之用。浮屬陽。沉屬陰。陽主開而陰主閉。卒死客忤者。邪氣暴加。諸

陽乍閉。得陽而開則生。得陰而閉則死也。

本事方云。飛尸者。遊走皮膚。穿藏府。每發刺痛。變作無常。遁尸者。附骨入肉。攻鑿

血脈。每發不可得近。見尸喪。聞哀哭便發。風尸者。淫躍四肢。不知痛之所在。每發

昏沉。得風雪便作。沉尸者。纏骨結藏。衝心脇。每發絞切。遇寒冷便作。注尸者。舉身

沉重。精神錯雜。常覺昏廢。每節氣致變。輒成大惡。並宜用太乙神精丹。及蘇合香

丸。及忍冬葉。剉數斛。煮令浸。取汁煎之。如雞子大一枚。日三。

頃在徽城日。嘗修合神精丹一料。庚申。余家一婦人夢中見二蒼頭。一在前。一在

後。手中持一物。前者云到也。未。後應云到也。擊一下。爆然有聲。遂覺。覺後心一點。痛不可忍。昏閉一時許。予忽憶神精丹。有此一症。取三粒令服之。遂至府。過少頃。歸婦已無病矣。云服藥覺痛止神醒。今如常矣。日後相識。稍有邪氣。與一二服。無不應驗。方在千金中。乃治中風之要藥。但近世少得曾青。磁石為難合耳。

太乙神精丹

治客忤霍亂。腹痛脹滿。尸疰惡風。顛狂鬼語。蠱毒妖魅。

雄黃油煎七日

雌黃

硃砂

磁石

曾青各一兩

金芽石六錢

右各研細。將雌雄黃。硃砂。醋浸三日。曾青用好酒浸銅器中。紙封曝七日。如天陰。用火焙乾。六味同研勻。用砂盆盛。令藥滿。得三分許。以此准合子大小。先以赤石脂末固縫。外用六一泥固濟訖。候透乾。以晴明六合吉日。別用泥作三個柱子。高五寸。令平穩如鼎足狀。安合子。下置炭火三斤。逐漸添炭。常令及五斤。只在盒底。不得過口。煅五日為度。放冷水中浸。合子候透。剝去泥。將合子輕手取開。其藥精英五色。畫在蓋上。亦有三色者。純白為上。研細。棗肉為丸。如粟米大。每服一丸。米飲下。如噤口牙緊。斡開前齒。灌下醒。

# 諸疰

疰者。住也。邪氣停住而爲病也。皆因精氣不足。邪氣乘之。伏於筋脈。流傳藏府。深入骨髓。經久不已。時發時止。令人昏閉。無不痛處。其因風邪所觸者。則爲風疰。臨喪哭泣。死氣所感者。則爲尸疰。鬼邪所擊者。爲鬼疰。其風疰之去來擊痛。遊走無常者。又爲之走疰。其他又有氣血溫涼。勞泄等疰之名。病各不同。其爲停住不去。則一也。詳見千金外臺聖濟諸書。

羌活湯 治風疰。心腹刺痛。上攻胸背。

羌活

橘紅

大腹皮三倍各錢

桑白皮五兩錢

芎藭一兩

大豆炒一合

搗末。每服三錢。水煎溫服。良久再服。

杏仁丸 治尸疰。

杏仁雙仁去皮尖炒 亂髮灰錢各一

研勻。和丸如小豆大。每服五丸。猪膏酒下。

八毒丸 治鬼疰。中惡心痛。癰積、蠱注、鬼氣。

雄黃

珍珠

礬石

巴豆去皮炒去油心

丹皮各一

附子去皮臍三兩

藜蘆二兩

蜈蚣去頭足炙一條

右爲末。蜜丸如小豆大。米飲下二丸。得吐爲效。

一方用雄黃、礬石、硃砂、附子炮、藜蘆、丹皮、巴豆各一兩。蜈蚣一條爲末。蜜丸小豆

大。每服五七丸。冷白湯送下。無時。

厚朴丸 治一切氣疰。大腸結澀。背膊刺痛。及食物不消。奔豚氣逆。

厚朴薑汁炒一兩

桂心

大黃醋炒各二兩

桃仁去皮尖雙仁炒三兩

爲末。蜜丸如小豆。每服三十丸。米飲下。食後臨臥服。微利卽效。一方加附子

二兩。

### 鬼迷鬼擊

鬼迷者。心氣不足。精神衰弱。幽陰之氣。乘虛而感。令人喜怒不常。情思如醉。或狂言驚怖。向壁悲嘯。夢寐多魘。與鬼交通。乍寒乍熱。腹滿短氣。不食。診其脈。人迎氣

口。乍大乍小。乃鬼魅所持之候也。鬼擊之病。得之無漸。卒著人如矛戟所傷。令人胸脇腹滿。急痛不可按抑。或即吐血。或即下血。輕者獲免。重者或致不救。治宜符禁之法。兼辟邪安正之劑。

治鬼迷不醒方

雄黃一味。研如粉。吹入兩鼻中差。安息香取一皂子大。焚令煙起。邪自退。

治妖魅病人不言鬼方

生鹿角鎊。一味爲細末。每服一錢。一言即差。

治卒中鬼擊方

雞冠血一味。瀝口中。令下咽。仍破雞以搗心下。治即棄於道旁。

肘後方。治鬼擊諸病。卒然著人如刀刺狀。胸脇腹內切痛。不勝抑按。或吐血。鼻血下血。一名鬼排。以醇酒吹兩鼻內良。

千金方

吹醋少許入鼻中。

癩狂驚癇

狂病多火而屬陽。或以謀爲失志。或以思慮鬱結。屈無所伸。怒無所洩。以致肝膽氣逆。木火合邪。乘於心。則爲神魂不守。乘於胃。則爲暴橫剛強。故治此者。以治火爲先。或痰或氣。察其甚而兼治之。

生鐵斤四十

治痰火熱狂。墜痰鎮心。

入火燒赤。砧上搥之。有花出如蘭如蛾。紛紛落地者。是名鐵落。用水二斗。煮取一斗。用以煎藥。

石膏三兩

龍齒煨研

茯苓

防風兩各半

元參

秦艽兩各一

竹瀝一升

右咬咀。入鐵汁中。煮取五升。去滓。入竹瀝和勻。溫服二合。日五服。按此以重下氣。以寒抑熱之法。易老治一人病陽厥。怒狂罵詈。或歌或哭。六脈無力。身表如冰。發則叫呼高聲。因奪其食。又以大承氣湯下之。五七行瀉。穢數斗。身溫脈生而愈。蓋鐵落飲。以抑無形上怒之火。承氣湯。所以下有形內結之熱也。

真珠丸本事

治肝經因虛。內受風邪。臥則魂散而不守。狀若驚悸。

真珠三分另研極細

乾地黄

當歸各半

人參

棗仁

柏仁

犀角

茯神

沉香

龍齒各一

為細末。蜜丸梧子大。辰砂為衣。每服四五十丸。金銀薄荷湯下。日午夜臥各一服。

許學士云。肝藏魂者也。游魂為變。平人肝不受邪。故臥則魂歸於肝。神靜而得寐。今肝有邪。魂不得歸。是以臥則魂揚若離體也。此方以真珠母為君。龍齒佐之。真珠母入肝為第一。龍齒與肝同類故也。龍齒虎睛。今人例以為鎮心藥。不知龍齒安魂。虎睛定魄。蓋言類也。東方蒼龍木也。屬肝而藏魂。西方白虎金也。屬肺而藏魄。龍能變化。故魂遊而不定。虎能專精。故魄止而有守。予謂治魄不寧者。宜以虎睛。治魂飛揚者。宜以龍齒。萬物有成理而不失。亦在夫人達之而已。

寧志膏本事

人參

棗仁各一

辰砂五錢

乳香二錢



蜜丸彈子大。每服一丸。薄荷湯下。一方有琥珀、茯神、石菖蒲、遠志。名人參

琥珀丸。一方無人參。用酒調服。名靈苑辰砂散。

一僧忽患癲疾。不得眠臥。諸藥不效。孫兆曰。今夜睡著。明後日便愈也。但有鹹物。任與師吃。待渴卻來道。至夜僧果渴。孫以溫酒一角。調藥一服與之。有頃再索酒。與之半角。其僧便睡。兩日夜乃覺。人事如故。人問其故。孫曰。人能安神矣。而不能使神昏得睡。此乃靈苑中辰砂散也。人不能用之耳。

許學士云。予族弟緣兵火失心。製寧志膏與之。服二十粒。愈。親舊傳去。服之皆驗。靈苑云。服辰砂散訖。便令安臥。不可驚覺。待其自醒。即神魂定矣。萬一驚寐。不可復活。吳正甫少時心病。服此一劑。五日方寤。遂瘥。安神丸。治癲癇驚狂痰火之症。能鎮心安神。

人參

茯苓

棗仁炒

當歸

生地酒炒

黃連酒炒

橘紅

南星薑製各一兩

天竺黃五錢

雄黃

牛黃各二錢

琥珀

真珠各二錢

爲末。蜜丸。桐子大。硃砂爲衣。米飲下五十丸。忌動風辛熱之物。

本事驚氣丸

治驚憂積氣。心受風邪。發則牙關緊急。痰涎昏塞。醒則精神若癡。

附子

橘紅

天麻

南木香

僵蠶

白花蛇

麻黃錢各五

蘇子一兩

乾蠍一分

南星

洗浸薄切薑汁

硃砂一分

爲末。入龍腦麝香少許。同研極勻。蜜丸如龍眼大。每服一丸。金銀薄荷湯化下。

許叔微云。此予家秘方也。戊午年軍中有一人犯法褫衣。將受刃而得釋。神失如癡。余與一粒服訖而寐。及覺病已失矣。山東提轄張載揚妻。因避寇失心已數年。余授此方。不終劑而愈。又黃山沃巡檢彥妻。狂厥者踰年。更十餘醫不驗。予授此方。去附子加鐵粉。亦不終劑而愈。鐵粉非但化涎鎮心。至如推抑肝邪特異。若多恚怒。肝邪大甚。鐵粉能制伏之。素問云。厥陽怒狂。治以鐵落飲。金制木之義也。

茯苓丸

辰砂

石菖蒲

人參

遠志

茯苓

茯神

鐵粉

半夏麴

膽星各等分

爲細末。生薑四兩。取汁和水煮和丸。如桐子大。別用硃砂爲衣。每服十粒。加至二十粒。夜臥生薑湯下。此醫官都君方。余嘗用以療心疾。良驗。

鎮心丸 治心風。狂言多驚。迷悶恍惚。

人參

茯神

犀角各一兩

牛黃

鉛粉各半七錢

硃砂水飛

龍齒研

膽草

天竺黃研

遠志

生地各半兩

金箔五十片

鐵粉半七錢

爲細末。蜜丸。桐子大。每服七丸。竹葉湯送下。無時。

三因溫膽湯 治心虛膽怯。觸事易驚。或夢寐不祥。短氣悸乏。或自汗。譫妄不寐。合目則驚。此氣鬱生涎。涎與氣搏。故變生諸症。

半夏

枳實

竹茹各一兩

橘紅五錢

炙草四錢

每服四錢。水一盞半。生薑七片。棗一枚。煎七分。

十味溫膽湯 治症如前。而挾虛者宜之。

半夏

枳實

陳皮去白各二錢

棗仁炒

遠志肉湯製

熟地酒焙

竹茹

人參各一錢

茯苓五分

炙甘草五分

水二鍾。生薑五片。紅棗一枚。煎一鍾服。

滾痰丸王隱方見痰門

按、癲狂之病。屬痰熱相結。多在肝膽胞絡之間。余遇此症。輒投礞石滾痰丸二錢。下膠痰如桃膠蜆肉者五升許即愈。若痰少熱多。陽明內實者。當如羅謙甫之治醜斯兀闌。發狂熱渴。用大承氣一兩半。加黃連二錢。以下其熱。俾便通汗出乃愈。

丑寶丸 治一切癲癇怔忡。搐搦難治之疾。祛風清火。豁痰調氣。開心定志。安神鎮驚。

妙香丸 治驚癇百病。亦治傷寒潮熱。積熱結胸。發黃。狂走燥熱。大小便不通。  
巴豆三百粒去皮炒熟研如麵  
牛黃研  
膩粉研

龍腦研

麝

香研各三兩

辰

砂飛九兩

金箔九片研

研勻。煉黃蠟六兩。入白蜜三分同煉。合勻爲丸。每兩作三十丸。白湯下二丸。日二服。

通涎散 治忽患癲狂不止。或風涎暴作。氣塞倒仆。

瓜蒂五錢

爲末。每服一錢。井花水調下。涎出卽愈。如未出。含砂糖一塊。下咽。涎卽出。

鶴年云。予治崑山清水灣一人發狂。先爲刺百會、神庭、人中三穴。後以

蜀漆水拌炒熟一錢

龍骨煨

牡蠣煨各三錢

黃連五分

生大黃三錢

水煎服。一劑卽安。

按。狂症未有不從驚得者。龍齒最能安魂者也。未有無痰者。驚則氣逆。氣逆則痰聚。蜀漆最善劫痰者也。未有無火者。火性炎上。故登高而歌。棄衣而走。黃連能瀉心火。病屬陽明。故用大黃以瀉之。釜底抽薪法也。鶴年

黃疸

已食如飢。但欲安臥。一身面目及爪甲小便盡黃也。此為脾胃積熱。而復受風濕。瘀結不散。濕熱蒸鬱。或傷寒無汗。瘀熱在裏所致。是宜分別濕熱多少而治之。若面色微黃。而身體或青黑赤色皆見者。與純熱之症不同。當於濕家求之。加減五苓散。

茵陳

猪苓

白朮

赤苓

澤瀉

大茵陳湯

茵陳蒿半兩

大黃三錢

梔子四枚

水三升。先煮茵陳減一半。內二味。煮取一升。去滓。分三服。小便利出如皂角汁。一宿腹減。黃從小便出也。如大便自利者。去大黃。加黃連二錢。

寇宗奭治一僧。因傷寒發汗不徹。有留熱。面身皆黃。多熱。期年不愈方。

茵陳

山梔各三

秦艽

升麻各四錢

為散。每用三錢。水四合。去滓。食後溫服。五日病減。二十日悉去。寶鑑摘鼻瓜蒂散。

瓜蒂二錢

母丁香一錢

黍米四粒

赤豆五分

爲細末。每夜臥時。先含水一口。卻於兩鼻孔搐上半字。便睡至明日。取下黃水。許叔微云。夏有篙師病黃症。鼻內酸疼。身與目黃如金色。小便赤澀。大便如常。此病不在藏府。乃黃入清道中也。若服大黃。則必腹脹爲逆。當瓜蒂散搐之。令鼻中黃水出盡則愈。

孟詵方

瓜蒂

丁香

赤小豆各七枚

爲末。吹豆許入鼻。少時黃水流出。隔一日用。差乃止。一方用瓜蒂一味爲末。以大豆許吹鼻中。輕則半日。重則一日。出黃水愈。

### 穀疸

始於風寒。而成於飲食也。金匱云。風寒相搏。食穀卽眩。穀氣不消。胃中苦濁。濁氣下流。小便不通。陰被其寒。熱流膀胱。身體盡黃。名曰穀疸。又云。穀疸之爲病。寒熱不食。食卽頭眩。心胸不安。久久發黃。爲穀疸。茵陳蒿湯主之。

茵陳蒿湯茵陳湯大

此下熱之劑。氣實便悶者宜之。不然不可用。

茯苓茵陳梔子湯寶鑑 治穀疸。心下痞滿。四肢困倦。身目俱黃。心神煩亂。兀兀

欲吐。飲食遲化。小便瘀悶發熱。

茵陳一錢 茯苓五分 梔子 蒼朮去皮

白朮各三錢 黃連 枳殼 猪苓

澤瀉 陳皮 防己各二錢 黃芩六分

青皮一分

長流水煎。去滓。空心溫服。

梔子茵陳。洩濕熱而退黃。黃連枳殼。泄心下痞滿。熱能傷氣。黃芩主之。濕熱壅

胃。二朮青皮除之。濕熱流注經絡。膀胱二苓防己利之。

膽礬丸本事 治男婦食勞面黃虛腫。疰癖氣塊。

膽礬無石者 三兩 黃蠟二兩 大棗五十枚

用石器入頭醋三升。下膽礬大棗。慢火熬半日。取出棗子。去皮核。次下黃蠟。再



熬一二時如膏。入臘茶二兩同和。爲丸桐子大。每服二十九。茶清下。日三。

許叔微云。宗室趙彥才下血。面如蠟。不進食。蓋酒病致此。授此服之。終劑而血止。面色鮮潤。食亦如常。

治溼熱黃病。助脾去濕方。乾坤生意

針砂播淨鑪水淘白色以米醋於鐵銚內浸一宿炒乾再炒三五次候通紅二兩五錢

陳粳米半升水浸一夜搗粉作塊

熟黃半百草霜半一兩

右三味。搗千下。丸如桐子大。每服五十丸。用五加皮、牛膝根、木瓜根浸酒下。初服若瀉。其病本去也。

脾勞黃病方摘元

鍼砂四兩醋炒七次

乾漆燒存性二錢

香附三錢

平胃散五錢

爲末。蒸餅丸如桐子大。湯下。

萬病有積神方先醒齋筆記

蒼朮

厚朴薑汁炒

橘紅

甘草

查肉

茯苓

麥芽各二兩

檳榔一兩

綠

礬

醋煨研細  
一兩五錢

爲末。棗肉丸梧子大。每服一錢。白湯下。日三服。凡服礬者。忌食蕎麥、河豚。犯之即死。

予每治脫力勞傷。面黃能食。四肢無力。用造酒麴丸平胃散。加皂礬煨透針砂。淡醋湯下十丸。日二。

## 酒疸

小便不利。心中懊懣而熱。不能食。時時欲吐。面目黃。或發赤斑。由大醉當風入水所致。蓋酒濕之毒。爲風水所遏。不得宣發。則蒸鬱爲黃也。

茵陳蒿湯

治酒疸。心中懊懣。小便黃赤。

茵陳蒿

葛根

赤

苓各五錢

升麻

秦艽

括蕒根各三錢

山

梔五分

水煎三錢。溫服。日二。以差爲度。

小麥飲

生小麥二合。水煎取汁頓服。未差再服。

大黃湯 治酒疸懊懣。脛腫溲黃。面發赤斑。

大黃 兩二

山梔

枳實

豆

豉 各三

水煎四錢。溫服。日二。加茵陳亦得。

葛根湯 治生

乾葛 二錢

梔子 二錢

枳實

豆

豉 各一

炙甘草 五分

水煎。溫服。無時。

### 女勞疸

色慾傷腎得之。金匱云。額上黑。微汗出。手足心熱。薄暮即發。膀胱急。小便自利。名曰女勞疸。蓋黃疸熱生於脾。女勞疸熱生於腎。故黃疸一身盡黃。女勞疸身黃額上黑也。仁齋云。脾與腎俱病為黑疸。

凡房勞黃病。體重不眠。眼赤如硃。心下塊起若瘕。十死一生。宜灸心俞、關元二七

壯。及烙舌下。以婦人內衣燒灰。酒服二錢。  
范汪亦云。女勞疸氣短聲沉者。取婦女月經布和血燒灰。空腹酒服方寸匕。日再。  
不過三日必瘥。

### 陰黃

病本熱而變為陰。非陰症能發黃也。韓祇和云。病人三五日。服下藥太過。虛其脾胃。亡其津液。渴飲水漿。脾土為陰濕所加。與熱邪相會發黃。此陰黃也。當以溫藥治之。如兩手脈沉細遲。身體逆冷。皮膚粟起。或嘔吐。舌上有胎。煩躁。欲坐臥泥水中。遍身發黃。小便赤少。皆陰候也。

茵陳橘皮湯韓氏

治身黃。脈沉細數。熱而手足寒。喘嘔。煩躁不渴者。

茵陳

橘紅

生薑各一錢

半夏

茯苓各五錢

白朮二錢五分

水四升。煮取二升。分作四服。

小茵陳湯韓氏

治發黃。脈沉細。四肢及遍身冷。

附

子一作八片

炙草一兩

茵陳二兩

水四升。煮取二升。分三服。一方有乾薑。無甘草。名茵陳附子湯。韓氏

茵陳理中湯。治身冷面黃。脈沉細無力。或泄而自汗。小便清白。名曰陰黃。

人參

白朮

炮薑

炙草

茵陳

右咬咀。每服五錢。水煎。

羅謙甫治真定韓君祥。暑月勞役過度。渴飲涼茶。及食冷物。遂病。頭身肢節沉重。疼痛。汗下。寒涼屢投。不應轉變。身目俱黃。背惡寒。皮膚冷。心下硬。按之痛。脈緊細。按之空虛。兩寸脈短。不及本位。此症得之因時熱而多飲冷。加以寒涼過劑。助水乘心。反來侮土。先傷其母。後及其子。經所謂薄所不勝而乘所勝也。時值霖霖。濕寒相合。此為陰黃。以茵陳附子乾薑湯主之。內經云。寒淫於內。治以甘熱。佐以苦辛。濕淫所勝。平以苦熱。以淡滲之。以苦燥之。附子乾薑。辛甘大熱。散其中寒。為君。半夏。草薢。辛熱。白朮。陳皮。苦甘溫。健脾燥濕。為臣。生薑。辛溫。以散之。澤瀉。甘平。以滲之。枳實。苦辛。泄其痞滿。茵陳。苦微寒。其氣輕浮。佐以薑附。能去膚腠間寒濕。而

退其黃爲使也。煎服一兩。前症減半。再服悉愈。又與理中湯服之。數日得平復。李思訓謂發黃皆是陽症。凡云陰黃者。皆陽壞而成陰。非原有陰症也。茵陳乾薑湯是治熱症壞而成寒者之藥。學者要窮其源。蓋卽於本病主治藥內。加熱藥一味以溫之。如桂枝湯加大黃之意。

### 虛黃

病在中氣之虛也。其症小便自利。脈息無力。神思困倦。言語輕微。或怔忡眩暈。畏寒少食。四肢不舉。或大便不實。小便如膏。得之內傷勞役。飢飽失時。中氣大傷。脾不化血。而脾土之色。自見於外。金匱云。男子痿黃。小便自利。當與虛勞小建中湯。又略例云。內傷勞役。飲食失節。中州變寒之病而生黃者。非傷寒壞症。而只用建中理中。大建中足矣。不必用茵陳也。

### 表邪發黃

卽傷寒症也。東垣云。傷寒當汗不汗。卽生黃。邪在表者。宜急汗之。在表之裏。宜滲

利之。在半表半裏。宜和解之。在裏者宜急下之。在表者必發熱身痛。在裏者必煩熱而渴。若陽明熱邪內鬱者。必痞結脹悶也。

麻黃連翹赤小豆湯 發汗之劑。

麻黃去節

連翹

炙草

生薑各二兩

赤小豆一升

杏仁四十個去皮尖

生梓白皮一升

棗十二枚

勞水一斗先煮麻黃百沸。去上沫。內諸藥。煮取三升。分溫三服。半日服盡。

茵陳五苓散 滲利之劑。

茵陳蒿末一錢

五苓散五分

水調方寸匕。日三服。

柴胡茵陳五苓散 和解之劑。

五苓散一兩

茵陳五錢

車前子一錢

木通五分

柴胡一錢五分

分二服。水一盞半。燈心五十莖煎服。連進數服。小便清利愈。因酒後者。加乾葛二錢。

## 急黃

卒然發黃。心滿氣喘。命在頃刻。故名急黃也。有初得病。身體面目即發黃者。有初不知黃。死後始變黃者。此因脾胃本有蓄熱。穀氣鬱蒸。而復為客氣熱毒所加。故發為是病也。古云發熱心顫者。必發為急黃。

瓜蒂散廣濟 療急黃

瓜蒂

赤小豆

丁香

黍米各二枚

薰陸香

麝香等分

青布二方寸

右為細末。白湯下一錢。得下黃水。其黃則定。

## 消渴統論

消渴病有三。一、渴而飲水多。小便數。有脂如麋片。甜者。是消渴也。二、吃食多。不甚渴。小便少。似有油而數者。是消中也。三、渴飲水不能多。但腿腫。脚先瘦小。陰痿弱。數小便者。是腎消也。古今錄驗



消渴大禁有三。一飲酒。二房室。三鹹食及麵。能慎此者。雖不服藥。自可無他。不知此者。縱有金丹。亦不可救。慎之慎之。

李詞部曰。消渴之疾。發則小便味甜。按洪範云。稼穡作甘。以理推之。淋錫醋酒作脯法。須臾即皆能甜也。人飲食之後。滋味皆甜。積在中焦。若腰腎氣盛。則上蒸精氣。化入骨髓。其次為脂膏。其次為肌肉。其餘則為小便氣臊者。五藏之氣。味鹹者。潤下之味也。若腰腎虛冷。不能蒸化於上。穀氣則盡下而為小便。故甘味不變。下多不止。食飲雖多。而肌膚枯槁。譬如乳母。穀氣上泄。皆為乳汁。消渴疾者。穀氣下泄。盡為小便也。又肺為五藏之華蓋。若下有煖氣上蒸。即潤而不渴。若下虛極。即陽氣不能升。故肺乾而渴。譬如釜中有水。以板蓋之。若下有火力。則煖氣上騰。而板能潤。若無火力。則水氣不能上。板終不可得而潤也。故張仲景云。宜服八味腎氣丸。並不可食冷物。及飲冷水。此頗得效。故錄正方於後云。

八味腎氣丸

方見腎勞

服訖後。再服後方以壓之。

黃連二十

麥冬十二

苦參十分

生地七分

知母七分

牡蠣七分

括萎根七分

爲末。牛乳爲丸。桐子大。暴乾。漿水或牛乳下二十丸。日再服。病甚者。差後須服一載以上。卽永絕病根。一方有人參五兩。以上見本事方。

又療消渴。口苦舌乾方

麥冬五兩

花粉三兩

烏梅十核

小麥三合

茅根

竹茹各一

水九升。煎取三升。去滓分四五服。細細含咽。

療飲水不消。小便中如脂方崔氏

黃連

括藹根各五兩爲末

生地汁和併手丸。如桐子大。每食後牛乳下五十丸。日二服。一方用生括藹汁。生地汁。羊乳汁。和黃連任多少。衆手捻爲丸。如桐子大。麥冬飲服三十丸。漸加至四五十丸。輕者三日愈。重者五日愈。名羊乳丸。

麥冬飲子 治膈消。胸滿煩心短氣。

人參

茯苓

麥冬

知母

五味子

生地

生甘草

葛根

栝蘤根

右等分。咬咀。每服五錢。水二盞。竹葉十四片。煎至七分。去滓溫服。河間云。心移熱於肺。為膈消。膈消者。心肺有熱。胸滿煩心。津液燥少。短氣。久則引飲。為消渴也。麥冬飲子主之。

麥冬丸。消渴之人。愈與不愈。常須慮有大癰。以其內熱而小便數故也。小便數。則津液竭。津液竭。則經絡澀。經絡澀。則營衛不行。營衛不行。則熱氣留滯。必於大骨節間發癰疽而卒。當預備此藥。除腸胃實熱。兼服消渴方。

麥冬

茯苓

黃芩

石膏

玉竹

各八分

人參

龍膽草

各六分

升麻

枳實

五分

生薑

栝蘤根

各十分

枸杞根

為末。蜜丸。桐子大。茅根。粟米汁下。十丸。日二服。若渴。則與後藥。

栝蘤根

生薑

麥冬汁

蘆根

茅根

切三升

水一斗。煮取三升。分三服。

冬瓜飲子。治消渴能食。小便如脂。麩片。日夜無度。

冬瓜一箇。割開去穰。入黃連末十兩。仍將頂蓋好。熱灰中煨熟。去皮。細切研爛。用布取汁。每服一盞。日三夜二服。

葶藶丸。療消渴成水病浮腫方。

甜葶藶隔紙炒

瓜蒌根

杏仁麩炒

漢防己各一

為末。蜜丸。桐子大。每服三十丸。茯苓湯下。日三。

白朮散。治諸病煩渴。津液內耗。不問陰陽。皆可服之。大能止渴生津。

乾葛二兩

白朮

人參

茯苓

炙甘草

藿香

木香各一

為粗末。每服三錢。水一盞半。煎至一盞。溫服。

猪肚丸。治消渴。

猪肚洗淨

黃連

白梁米各五

花粉

茯苓各四

知母三兩

麥冬二兩

右六味為末。內猪肚中。縫塞。置甑中蒸極爛。乘熱入藥白中。搗為丸。若硬。加蜜。

丸。梧子大。每服三十丸。加至五十丸。日二。

### 水病

### 風水

水爲風激而上行也。其脈浮而洪。其症骨節疼痛。惡風。面目四肢皆腫。是宜驅散風氣爲主。風去則水自下也。

### 麻黃附子湯

麻黃三兩

甘草一兩

附子一枚

水七升。先煎麻黃。去上沫。內諸藥。煮取二升半。溫服八分。日三。此治風水

### 越婢湯

麻黃六兩

石膏半升

生薑三兩

大棗十五枚

甘草二兩

水六升。先煮麻黃。去上沫。內諸藥。煮取三升。分溫二服。此治風水

### 香薷丸

外臺

乾香薷五十斤

細剉內釜中以水淹之。出香薷上數寸。煮使氣盡。去滓澄清。慢火煎令可丸。丸如梧子大。每服五十丸。日三。稍加之。以小便利爲度。無所忌。

### 薷朮丸

乾香薷一斤

白朮七兩

先將白朮爲末。後濃煎香薷汁和丸。如桐子大。飲服十丸。日夜四五服。利小便良。

五加皮散和劑

五加皮

地骨皮

生薑皮

大腹皮

茯苓皮

以上三方。並苦辛淡利之法。東垣云。風水宜以辛散之。以苦瀉之。以澹滲利之。使上下分消其濕。

### 皮水

從肺閉得之。蓋肺主諸氣而行水道。肺閉則水不下行。而泛溢皮膚。狀與風水相似。但不惡風為異。

防己茯苓湯

防己

黃耆

桂枝各三兩

茯苓六兩

甘草二兩

水六升。煮取三升。分溫服。

崔氏療大腹水腫。上氣小便赤澀。頸脈動。不得臥方。

苦葶藶五兩 炒

杏仁二兩 炒黃

大棗四十枚 飯上蒸去皮核

先搗葶藶一百杵。再另搗杏仁三百杵。總和棗膏搗爛。丸如棗核大。空心服八丸。日晚食消。更服五丸。米飲下。三日後。平旦服五丸。晚服三丸。

葶藶散聖濟

治十種水氣。百方不愈。面目四肢俱腫。氣息喘急。眠臥不安。小便

漸澀。腹脹氣悶。水不入口。命垂危者。

椒目微炒

猪苓

澤瀉四兩

牽牛

苦葶藶六兩

加薑葱煎三錢。酒半鍾冲服。良久吃葱白粥一碗。酒一鍾。面東熱服。百日消盡。

### 白前湯

白前二兩

紫苑二兩

半夏五合

澤漆根三兩

水一斗。內藥誌水痕。後加水七升。微火煎令至痕邊。去滓內藥六種。

白朮二兩

吳茱萸五合

桂心三兩

人參一兩

乾薑一兩

括萎五合

微火煎取三升。分三服。小便當利。或溏下。勿怪。氣即降。腫即減。

海藻散 治男子婦人通身浮腫喘悶不便。

海藻

大戟

大黃

續隨子

去殼各一兩

剉碎。好酒二盞。淨碗內浸一宿。取出晒乾。後用

白牽牛頭末一兩

滑石半兩

甘遂熬炒黃一兩

青皮去白

橘紅各半兩

肉豆蔻一個

共前藥一處為細末。每服二錢。平明淡茶清調下。至辰時取下水二三行。腫減五六分。隔二三日。平明又一服。腫消。忌鹽魚肉百日。小兒只用一錢。五歲以下



用半錢。孕婦不可服。

# 石水

從膀胱不利得之。四肢瘦。腹大腫。是其症也。王太僕云。下焦爲分注之所。氣窒不利。則溢而爲水也。亦名裏水。其根在少腹是也。

## 鯉魚澤漆湯

鯉魚重二斤者一頭以

澤漆五兩

茯苓三兩

桑白皮三升

澤瀉五兩

將後四味。內魚汁中。煮取四升去渣。分四服。小便當利。腫漸消也。忌酢物。千金翼有赤小豆、甘草、麥冬、人參、生薑。一方無澤漆。有赤小豆、白朮、陳皮、葱白。千金療膀胱石水腹腫四肢瘦方。

桑白皮六兩

射干

茯苓

黃芩各四兩

澤瀉五兩

白朮四兩

澤漆一升

防己一兩

大豆三升

水五斗。先煮大豆取三斗。去滓澄清。取汁一斗。下諸藥。煮取三升。分溫三服。禹功散。張子和云。病水之人。如長川泛濫。非孟杓可取。必以神禹決水之法治之。故名禹功散。

黑牽牛頭末四兩 茴香爲一兩炒  
每服一二錢。以生薑自然汁調下。當轉下氣也。

### 腎水

腎爲水藏。而元陽寓焉。腎虛陽弱。水無所制而泛溢。肢體浮腫。咳嗽喘急。腰重足冷。小便不利。或因脾胃虛弱。治失其宜。元氣復傷而變症者。非金匱加減腎氣丸不效。

### 金匱腎氣丸

白茯苓三兩	附子五錢	牛膝	官桂
澤瀉	車前	山萸肉	山藥
丹皮 <small>各一兩</small>	熟地四兩		

爲末。和地黃膏。煉蜜丸。桐子大。每服七八十丸。空心白湯下。

### 脹滿統論

二陰一陽發病。善脹。心滿善噫者。腎膽同逆。三焦不行。氣畜於上也。三陽盛。入於陰。病臍脹而頭痛。言三陽之邪盛也。盛則滿。滿則溢。而入於陰之分矣。夫頭爲陽。腹爲陰。陰病故腹脹滿也。有所墮墜。惡血留內。腹中滿脹。不得前後。此上傷厥陰之脈。下傷少陰之絡。腹脹屬脾胃者。則飲食少。屬他藏府者。則飲食如常。其脹在皮膚孫絡之間者。飲食亦如常。其在腸胃膏膜之間者。則飲食亦少。其氣壅塞於五藏。則氣促急不食而病危矣。是故病在表者易治。在府者難治。入藏者不治。腹脹滿。氣不通者。加厚朴以破滯氣。腹中全悶。此非腹脹滿。乃散而不收。可加芍藥收之。是知氣急而脹。宜厚朴。氣散而脹。宜芍藥以收之。

### 脾脹

溼氣歸脾。壅塞不行。其脈濡。其體重。其便不利。大便澹而不暢。經云。諸濕腫滿。皆屬於脾。又土鬱之發。民病心腹脹跗腫是也。又脾土受濕。不能制水。水漬於腸胃。而溢於皮膚。漉漉有聲。怔忡喘息。即為水脹是也。  
小溫中丸 治脾虛肝實。不能運化。不可下之。

陳皮

半夏

神麴

茯苓各一兩

白朮二兩

生香附

針砂醋炒紅各一兩五錢 苦參炒

川連炒

厚朴各半兩

甘草三錢

為末。醋水各一盞。打糊為丸。桐子大。每服七八十丸。

白朮六錢

陳皮一錢

生薑一片

煎湯吞下。虛甚。加人參一錢。病輕者。服此丸六七兩。小便即長。病甚者。服一斤後。小便如常。

胃苓湯 和脾胃。去濕消脹。

蒼朮

厚朴薑汁炒

陳皮

白朮

茯苓各一錢

澤瀉

猪苓各一錢

甘草六分

官桂五分

加薑煎。

禹餘糧丸三四

許學士朱丹溪云。此方乃治膨脹之要藥。

蛇含石

大者三兩置新銚上入炭火中燒與銚子一般紅傾入醋中候冷取出研極細

禹餘糧石三百

真針砂

五兩淘淨炒乾入炭中燒紅傾淨磚上候冷研細

以上三物為主。其次量人虛實加入下項。

羌活

木香

茯苓

川芎

牛膝

酒浸

桂心

白蔻炒

茴香炒

蓬朮

附子

青皮

京三稜炮

白蒺藜

當歸

酒浸各半兩

為末。入前末拌勻。以湯浸蒸餅。搥去水。和藥再杵極勻。丸如桐子大。空心溫酒。白湯下三十丸。至五十丸。最忌鹽。一毫不可入口。否則發疾愈甚。但試服藥。即於小便內旋去。不動藏府病去。日二三服。兼以溫和調補。氣血藥助之。真神方。

也。

# 肝脹

怒動肝火逆於中焦。其症口苦脈弦。脇及小腹脹滿或痛。發則身熱氣逆是也。  
左金丸

黃連六兩

吳茱萸一兩

粥爲丸。椒目大。每服三十丸。白湯下。

按、繆刺論謂有所墮墜。惡血留內。腹中滿脹。不得前後。先飲利藥。此上傷厥陰之脈。下傷少陰之絡。是火逆之外。又有血滯一症。火無形。以苦辛平之。血有形。故以利藥行之。

新定

赤芍

生地

歸尾

桃仁各一錢

紅花

香附童便浸二錢

大黃酒浸一錢半

丹皮

青皮醋炒各八分

腹脹即氣

胸膈脹滿也。經云。濁氣在上。則生腹脹是也。宜升清降濁。蓋清不升。則濁不降也。又七情鬱結。氣道壅隔。上不得降。下不得升。腹大而四肢瘦削。即氣脹也。木香順氣湯

木香

蒼朮

草薢

青皮

益智仁

陳皮

澤瀉

茯苓

半夏

乾薑

吳茱萸各一分

升麻

柴胡錢各一

厚朴四分

人參

當歸各五分

水二盞。煎一盞。食前溫服。

通幽湯 東垣云。濁陰本歸六府而出下竅。今在上。是濁氣反行清道。氣亂於中。則脹作矣。治在幽門。泄其陰。潤其燥。使幽門通利。大便不閉。則濁陰得歸下地。膜脹腹滿俱去矣。

當歸

升麻

桃仁

紅花

甘草炙各一錢 生地 熟地各五錢  
一方加枳殼五分。本方加大黃、麻仁。名當歸潤腸湯。治同。

### 血脹

汚血成積。石瘕之屬也。經云。石瘕生於胞中。寒氣客於子門。子門閉塞。氣不得通。惡血當瀉不瀉。衃以留止。日以益大。如懷子狀。可導而下。  
經驗桃奴丸

桃奴

延胡索

殺鼠糞

香附

官桂

砂仁

五靈脂

桃仁去皮尖

爲末。每服三錢。溫酒調下。

雞矢醴散宣明

大黃

桃仁去皮

乾雞屎各等

爲末。每服二錢。水一盞。薑三片煎湯調下。

奪命丹 治瘀血入胞衣。脹滿難下。服此血卽消。胞衣自下。



炮附子半兩 牡丹皮一兩 乾漆一兩碎之  
為末。醋一升。大黃末一兩。同熬成膏。和勻。丸如桐子大。溫酒下五七丸。

食脹一名穀脹

飲食過節。停滯中焦。其症吞酸噯氣。惡聞食臭。得食則益甚。經云。飲食不節。起居不時者。陰受之。陰受之則入五藏。入五藏則膜滿閉塞是也。是宜消而去之。甚則下之。所謂中滿者。瀉之於內也。

枳實導滯丸

大黃一兩

枳實熬炒

黃芩

黃連俱酒炒

焦神麴各五錢

白朮土炒

茯苓三錢

澤瀉二錢

為末。蒸餅為丸。

人參丸外臺 療久心腹痛脹。痰飲。不下食。

人參

白朮

枳實各六分

厚朴

青木香

大黃

檳榔各六分

茯苓八分

橘皮五分

蜜丸桐子大。生薑大棗煎湯。送下二十丸。日二服。漸加至三十丸。無礙丸。治脾水橫流。四肢脹滿。

木香五錢

京三稜炮

蓬莪朮炮

檳榔

郁李仁

湯浸去皮

大腹皮二兩

為末。炒麥芽粉糊丸。桐子大。每服二十丸。生薑湯下。

### 熱脹

熱聚於裏。口乾便閉。經云。諸腹脹大。皆屬於熱是也。

枳殼剉散。治熱症脹滿。

厚朴

枳殼

桔梗各半

炙草一錢

大黃蒸三錢

剉每服三錢。薑五片。棗二枚。烏梅一枚。煎服。

愚按。熱脹有二。假令外傷風寒。有餘之邪。自表入裏。寒變為熱。而作胃實腹滿。

仲景以大承氣下之。亦有膏粱之人。濕熱鬱積於中。而成脹滿者。宜清熱導滯。東垣中滿分消丸主之。

中滿分消丸 治中滿熱脹。有寒者勿用。

黃芩二錢

黃連炒五錢

薑黃

白朮

人參

炙草

猪苓各一錢

茯苓

乾薑

砂仁各二錢

枳實

半夏各五錢

厚朴薑製一兩

知母炒四錢

澤瀉

陳皮各三錢

為末。蒸餅為丸。如桐子大。每服百丸。熱白湯下。食後。量病人虛實加減。

### 寒脹

其症有二。有寒氣襲表而脹於外者。經云。膚脹者。寒氣客於皮膚。蹙蹙然不堅。腹大。身盡腫。皮厚。以手按其腹。窅而不起。腹色不變。此其候也。有寒氣入裏而脹於內者。蓋陰氣凝聚。久而不散。內攻腸胃。則為寒中脹滿泄利之症。經云。藏寒生滿病是也。在表者。溫而散之。在裏者。溫而行之。

溫胃湯 治冷則氣聚。脹滿不下食。

熟附子

當歸

厚朴

人參

半麴

橘紅

生薑各一兩

炙甘草一兩

川椒去合口者三錢

剉散。每服三錢。

木香壅氣丸元戎

丁香

胡椒各三錢

郁李仁四錢

白丑

枳實各一兩

檳榔

木香

蠟尾各半兩

為細末。飯丸菴豆大。每服十丸。加至十五丸。薑湯下。此溫行之劑。治單腹脹最妙。若胸脇脹滿。一身面目盡浮。鼻塞咳逆。清涕出。當用小青龍湯二三服。分利其經。卻進消脹藥。

## 實脹

胃氣實則脹也。脈大堅。便悶。按之痛。仲景云。腹滿按之痛者為實。可下之。經云中

滿者瀉之愈。又云。下之則脹已是也。  
沉香交泰丸 治脹而大便燥結者。

沉香

橘紅

白朮各二錢

厚朴五錢

吳茱萸

枳實

青皮

木香

茯苓

澤瀉

當歸各二錢

大黃酒浸一兩

為末。蒸餅為丸。梧子大。每服五十丸。加至七八十丸。溫湯下。微利為度。

四妙丸 治老幼腹脹。血氣凝滯。用此寬腸順氣。

商州枳殼

厚而緣背者去穢

四兩分作四分。一用蒼朮一兩同炒。一用萊菔子一兩同

炒。一用乾漆一兩同炒。一用茴香一兩同炒。炒黃後。去四味。只取枳殼為末。以

四味煎汁。煮麵糊丸。梧子大。每食後。米飲下五十丸。

### 虛脹

中氣虛衰。脾胃不健。而三焦痞塞。是為氣虛中滿。經云。足太陰虛則鼓脹也。其脈  
栗。其色白。其症腹脹。按之不痛。漉泄腸鳴。宜溫養陽氣為主。塞因塞用也。

參朮健脾湯

人參

白朮

茯苓

陳皮

半夏

縮砂

厚朴

炙甘草三分

薑製各一錢

水薑煎服一方無甘草有麥芽山查因甘能滿中

積聚統論

積者。積累之謂。由漸而成。重而不移。聚者。聚散之謂。作止不常。痛無定所。故曰。積者陰氣。聚者陽氣。

積聚之病。非獨痰食氣血。卽風寒外感。亦能成之。然痰食氣血非得風寒。未必成積。風寒之邪。不遇痰食氣血。亦未必成積。經云。卒然多食。飲則腸滿。起居不節。用力過度。則絡脈傷。血溢腸外。與寒相搏。并合凝聚。不得散而成積。此之謂也。經論心肝腎皆有積。心曰伏梁。心下堅直。如梁木也。肝曰肥氣。脇下氣聚。如覆杯也。腎曰奔豚。往來上下。如豚之奔也。又有伏瘕。瘕聚。血瘕。伏瘕者。伏結於內。疝瘕者。衝痛如疝。瘕聚者。聚散不常。血瘕者。血凝成瘕也。難經又補脾肺之積。脾曰痞氣。氣

痞而不運。肺曰息賁。響有聲也。巢氏又有癥瘕之辨。謂其病不動者癥也。雖有癖。而可推移者瘕也。癥者徵也。有形可見也。瘕者假物成形也。張子和又分九積。酒積者。目黃口乾。食積者。酸浸心腹。氣積者。噎氣痞塞。涎積者。咽如拽鋸。痰積者。涕唾稠粘。癖積者。兩脇刺痛。水積者。足腫脹滿。血積者。打撲胸疼。肉積者。贅瘤核瘕。各治法詳見本方。

許學士云。大抵治積。或以所惡者攻之。所喜者誘之。則易愈。如礪砂、阿魏治肉積。神麴、麥芽治酒積。水蛭、蟲蟲治血積。木香、檳榔治氣積。牽牛、甘遂治水積。雄黃、膩粉治痰積。礞石、巴豆治食積。各從其類也。若用羣隊之藥。分其勢。則難取效。

## 肥氣

經曰。肝之積。名曰肥氣。在左脇下。如覆杯。有頭足。久不愈。令人發咳。痰瘕。連歲不已。欬。肺病也。積氣上攻。至肺則欬。侮所不勝也。痰瘕。三日瘕也。肝所生病。爲往來寒熱。連歲不已者。積不去。則瘕亦不已也。

溫白丸局方 通治五積及十種水氣。八種痞氣。五種淋疾。九種心痛。七十二種

風。三十六種遁尸疰忤。癰癩翻胃。噎塞脹滿不通。

紫苑去苗

菖蒲九節者去毛

吳茱萸湯洗七次焙乾

柴胡

厚朴薑製各一兩

桔梗去蘆

茯苓去皮

阜英去皮子炙

桂枝

乾薑炒

黃連

川椒去目及閉口者微炒出汗

巴豆去膜油

人參各半兩

川烏炮去錢八錢皮

為細末。入巴豆研勻。蜜丸桐子大。每服三丸。漸加至五丸七丸。生薑湯送下。臨

臥服。有孕忌服。易老云。本方治肥氣。加柴胡、川芎。

驚甲丸 治肥氣體瘦。飲食少思。

驚甲泥一枚重四兩者洗淨以醋和黃

京三稜炮剉

枳殼各三兩炒

木香忌火

桃仁去皮尖雙仁用麩炒微

右除驚甲外。俱搗為細末。後泥一風爐子。上開口。可安驚甲。取前藥末。并桃仁

膏內驚甲中。用好米醋二升。時時旋取入驚甲內。慢火熬令稠。取出藥。卻將驚

甲去泥淨。焙乾。搗為細末。與前藥同和。搗為丸。梧子大。每服二十丸。溫酒送下。



空心。臨臥各一服。

### 伏梁

經曰。心之積。名曰伏梁。起臍上。大如臂。上至心下。久不愈。令人煩心。心爲火藏。心受邪。則火內鬱而煩也。

溫白丸 加石菖蒲黃連桃仁。

桃奴散 治伏梁。氣在心下。結聚不散。

桃奴三兩

爲末。空心溫酒調下一錢。桃奴。是桃實著樹不落。正月中採者是也。

### 痞氣

經曰。脾之積。名曰痞氣。在胃脘。覆大如盤。久不愈。令人四肢不收。發黃疸。飲食不爲肌膚。脾氣行乎四肢。脾氣既痞。四肢無以受氣。故不收。猶不舉也。脾色黃而合肉。氣痞不運。熱鬱於中。故黃色外見。而肌膚日削也。

溫白丸 加吳茱萸、乾薑。

### 息賁

經曰。肺之積。名曰息賁。在右脇下。覆大如盂。久不已。令人灑淅寒熱。喘咳發肺壅。肺主氣而合皮毛。肺鬱成積。壅於內者。不能衛於外。故灑淅寒熱。痺於上者。不復降於下。故喘咳發肺壅。壅、癰也。

溫白丸 加人參、紫苑。

### 奔豚

經曰。腎之積。名曰奔豚。發於少腹。上至心下。若豚狀。或上或下無時。久不已。令人喘逆。骨痿少氣。腎爲水藏而喜凌心。故上至心下。奔突如豚。腎居下焦而善逆。故令人喘逆。腎合骨而爲氣之根。故骨痿少氣。

溫白丸 加丁香、茯苓、遠志。

### 氣積

氣滯成積也。凡憂思鬱怒。久不得解者。多成此疾。故王宇泰云。治積之法。理氣爲先。氣既升降。津液流暢。積聚何由而生。丹溪乃謂氣無形。不能作聚成積。只一消痰破血爲主。誤矣。天地間有形之物。每自無中生。何止積聚也。戴復庵只以一味大七氣湯。治一切積聚。其知此道歟。

大七氣湯

香附半錢

青皮

陳皮

桔梗

官桂

藿香

益智

莪朮

三稜各一錢

甘草半分

爲末。每服四五錢。薑三片。棗一枚。水煎服。肝積肥氣。用前湯煎熟待冷。卻以鐵器燒通紅。以藥淋之。乘熱服。肺積息賁。用前湯加桑皮。半夏。杏仁各五分。心積伏梁。用前湯加石菖蒲。半夏各五分。脾積痞氣。用前湯下紅丸子。腎積奔豚。用前方倍加茴香。炒棟子肉。此濟生方也。指迷有半夏。無三稜。統旨有元胡索。薑黃。草薢。無桔梗。

血積

痛有定處。遇夜則甚。其脈乳澹。婦人產後及跌撲努力者。多有此症。或憂怒傷其內。風寒襲於外。氣逆血寒。凝結成積。內經云。卒然外中於寒。若內傷於憂怒。則氣逆。六輪不通。溫氣不行。凝血蘊裏而不散。此之謂也。

加減四物湯東垣

治婦人血積。

熟地

當歸

川芎

芍藥

肉桂

廣皮

三稜

乾漆炒煙盡  
各等分

為粗末。每服二錢。水煎服。丹溪當歸丸。無桂。漆有神麴。百草霜。酒和丸。

## 伏瘕

經云。小腸移熱於大腸。為伏瘕。河間云。大腸熱氣菴結。津液消耗。腹痛祕澀。檳榔丸主之。

檳榔丸

檳榔

大黃剉碎  
炒

枳殼麸炒各  
二兩

木香

桃仁去皮  
尖炒

大麻仁另研  
一兩

爲末。蜜丸。桐子大。每服十丸。至十五丸。溫酒下。無時。

### 石瘕瘕聚

石瘕者。𧈧血留止。結硬如石。卽血瘕也。經云。寒氣客於子門。子門閉塞。氣不得通。惡血當瀉不瀉。𧈧以留止。日以益大。狀如懷子。月事不以時下。皆生於女子。可導而下。亦名瘕聚。經云。任脈爲病。男子七疝。女子瘕聚。此之謂也。

新定

大黃三錢用酒同三稜朮一宿去稜朮不用炒

桃仁三十粒去尖炒肉桂三錢

附子四錢木香一錢

青皮二錢當歸五錢

乾漆二錢半炒煙盡

爲末。酒糊丸。桐子大。每服五十丸。淡醋湯下。溫酒亦可。

### 米瘕

乾德中。浙江有慎恭道。肌瘦如勞。惟好食米。缺之則流清水。情似憂思。食米頃。頃

復如常。衆醫莫辨。後遇蜀僧道庶。以雞屎及白米各半合。共炒爲末。水一盞調服。良久。病者吐出如米形。遂差。其病爲米瘕是也。

### 肉積

阿魏丸

阿魏

山查肉各一兩

連翹五錢

黃芩六錢五分

右三味爲末。以阿魏醋煮爲糊丸。如梧子大。每服五六十丸。食前白湯下。

又方

治肉積蟲積。一應難消難化。腹中飽脹疼痛。皆能取效如神。不傷元氣。

京三稜

莪朮並醋炒

自然銅

蛇含石並醋淬七次各二錢

雄黃

蜈蚣全用焙燥一錢二分

辰砂

沉香各八分

鐵花粉用米醋炒一錢

天竺黃

阿魏

全蠍洗焙乾

蘆薈各四錢

冰片五分

右爲極細末。用雄猪膽汁煉爲丸。如桐子大。每服七八分。重者一錢。五更酒送。

下。塊消即止。不必盡劑。用黑狗膽汁丸尤妙。

通治諸積

宣明三稜湯 治癥瘕痞癖。積聚不散。堅滿痞脹。飲食不下。

京三稜二兩

白朮一兩

蓬朮

當歸各半兩

檳榔

木香各半兩

為末。每服三錢。沸湯調下。

三因散聚湯 治九氣積聚。狀如癥瘕。隨氣上下。發則心腹絞痛。攻刺腰脇。小脘腹脹。大小便不利。

半夏

檳榔

當歸各半兩

厚朴薑製

枳殼

茯苓

附子炮

川芎

吳茱萸湯炮

炙甘草各一兩

杏仁去皮尖

桂心

橘紅各二兩

為末。每服四錢。水一盞。薑三片。煎七分。空心溫服。大便不利加大黃。

諸積太倉丸

陳倉米四兩。以巴豆二十一粒。去皮同炒。至米香豆黑。勿令米焦。去豆不用。再入橘紅四兩爲末。和丸桐子大。薑湯送下五丸。日二。

萬病紫苑丸

卽溫白丸。加羌活、獨活、防風。

萬病感應丸

卽溫白丸。減去川椒。加下藥。

羌活

三稜

甘遂

杏仁

防風

各一兩

威靈仙一兩



金匱翼卷四 通治諸積

# 金匱翼

清 吳門 尤 怡在涇編集

鄞縣 曹赤電炳章圈校

## 卷五

### 頭痛統論

頭象天。六腑清陽之氣。五藏精華之血。皆會於此。然天氣所發六淫之邪。人氣所變五賊之逆。皆能相害。或蔽覆其清明。或瘀塞其經絡。因與真氣相薄而爲痛也。因風而痛者。抽掣惡風。有汗而痛。因暑熱而痛者。或有汗。或無汗。則皆惡熱而痛。因濕而痛者。痛而頭重。遇天陰尤甚。因痰飲而痛者。亦頭昏重而痛。憤憤欲吐。因寒而痛者。惡寒而脈絀急。氣虛而痛者。遇勞則痛甚。其脈大。血虛而痛者。善驚惕。其脈芤。

東垣治頭痛。大率皆以酒芩、酒連、酒柏加風劑。如清空膏、安神散、清上瀉火湯之

類。但雜用羌、防、升、柴、藁、蔓等藥。殊欠紀律。學者師其意可也。元珠茶調散。簡要可用。

治頭風久痛。須加芎、歸、紅花少許。非獨治風。兼和血止痛也。細茶最能清上風熱。久痛以之作引。彌佳。東垣、謙甫皆常用之。

許學士荆芥散。獨用荆芥治風。煨石膏治熱。何等簡要。東垣、清空膏諸方。蓋師其意而擴充之。

風痰頭痛。多兼嘔逆眩暈。若用風藥。其痰愈逆。其痛益甚。和劑玉壺丸。乃是的藥。東垣變爲白朮半夏天麻湯。則兼氣虛而言之耳。

腎厥頭痛。肝厥頭暈。本事方論之最詳。

玉真丸。硫黃、半夏。溫降之力彌大。石膏、硝石。寒下之能甚長。夫陰氣上逆。其來最暴。治以純陽。必多格拒。故須膏硝爲之佐使。令其相入而不覺其相傾耳。黑錫丹亦見此意。

茸珠丹有二方。一用硃砂、鹿茸二味爲丸。蓋亦補虛墜浮之意。一用硃砂同草烏、瞿麥、黃藥子火煨。獨取硃砂爲末作丸。此不特硃砂經火有毒。卽草烏之辛散。瞿

麥、黃藥之苦降。並已成灰。吹去不用。而顧需其相濟。詎可得耶。  
搐鼻諸方。本事獨用辛溫。東垣、河間並用辛涼。夫久畜之風。多化爲熱。而閉鬱之  
氣。非溫不通。隨病斟酌。從少從多。則賢者之責也。  
頭風餅子。有用五味子、全蠍、土狗各七個。醋和作餅者。用南星、川芎等分。同連鬚  
葱白搗爛作餅者。有用草麻子、乳香者。有用大黃、芒硝同井底泥搗貼者。然外治  
之藥。無論邪之寒熱。並宜辛溫開達。徒用苦寒。鬱閉益甚。苟非熱極。不可輕用。  
頭痛之因。非止一端。有風有寒。有濕有熱。有兼氣。兼氣者。如火與濕合。內經所謂  
少陽司天之政。二之氣。其熱鬱於上。頭痛、嘔吐、昏憤是也。有火勝水復者。內經所  
云歲金不及。炎火迺行。復則陰厥。且格陽反上行。頭腦戶痛。延及腦頂。發熱是也。  
有胃實者。經所謂頭痛耳鳴。九竅不利。腸胃之所生是也。有腎厥者。經所謂頭痛  
顛疾。下虛上實。過在足少陰。巨陽甚則入腎是也。有心熱者。經所謂心煩頭痛。病  
在膈中。過在手巨陽。少陰是也。有痰飲者。其病在脾。東垣所謂太陰痰厥。頭痛眼  
黑。嘔吐悶亂。亦濕勝也。有內風者。風從火化。其病在肝。不特厥陰之脈。與督脈上  
會於顛。蓋卽肝藏衝逆之氣。亦能上至顛頂也。又有真氣不守。厥而上行。天門真

痛。上引泥丸。名真頭痛。多不可治。古方云。與黑錫丹。灸百會穴。猛進參、附、烏、沉。或有可生。然天柱折者。亦難為力矣。

### 風頭痛

風頭痛者。風氣客於諸陽。諸陽之脈。皆上於頭。風氣隨經上入。或偏或正。或入腦中。稽而不行。與真氣相擊則痛。經云。風氣循風府而上。則為腦風是也。其挾寒挾熱。則隨症審而治之。

經驗治頭痛。風熱痛不可忍者方。元珠名茶調散

小川芎 一兩

香白芷 五錢

細芽茶 三錢

片黃芩 二兩酒拌炒如

是三次不可令焦

荆芥穗 四錢

薄荷葉 三錢

右細末。每服二三錢。茶清調下。一方有菊花、防風、殭蠶。

### 石膏散

石

膏二兩炭火

芎 一兩

炙甘草 半兩

右為末。每服一錢。葱白、好茶同煎湯調下。食後日二服。

一方決明子作枕。去頭風明目佳。

本事白附散 治風寒客於頭中。疼痛牽引兩目。遂至失明。

白附子一兩

麻黃

川烏

南

星

各半兩

全蠍五個

乾薑

硃砂

麝香

各二錢半

右爲細末。酒調一匙服。略睡少時效。

三五七散 治風寒入腦。頭痛惡寒目眩。

防風二兩

茱萸

炮薑

茯苓

各一兩

各五錢

細辛

炮附子各七錢五分

右爲細末。每服二錢。溫酒調下。局方

芎辛湯 治風寒溼在腦。頭痛眩暈嘔吐。

川芎三錢

細辛

白朮各半錢

甘

草一錢

右剉作一貼。入生薑五片。芽茶少許。水煎服。濟生

東垣云。高巔之上。惟風可到。故味之薄者。自地升天者也。所以頭痛。皆用風藥治之。然患痛人。血必不活。而風藥最能燥血。故有愈治而愈甚者。此其要尤在養血。

不可不審也。

### 熱厥頭痛

熱厥頭痛者。胃熱氣盛。不能下行也。其證頭中熱痛。雖嚴寒猶喜風寒。微來煖處。或見煙火。則痛復作。其脈數。或大者是也。

小清空膏

片苓細切。酒拌勻。晒乾爲末。茶清調下。

治熱厥頭痛方

大黃酒炒三次。爲末。茶清調服。

熱氣在頭。以風藥引之。則熱彌盛而痛益甚。大黃苦寒瀉熱。得酒則能上行瀉腦熱。昔人所謂鳥巢高巔。射而去之是也。茶性清上。故諸頭痛藥中多加用之。

新定

生地三錢	知母酒炒	黃芩 <small>酒炒各一錢</small>	薄荷
黑山梔	甘菊	甘草	荊芥 <small>各五分</small>

紅花三分

右作一服。水煎。食遠服。便閉加酒炒大黃一錢五分。此方治頭痛煩熱。喜見風寒。稍近煙火。則痛復作。或便閉不通者。往往取效。古法。動作輒頭重痛。熱氣潮者屬胃。丹溪云。頭痛如破。酒炒大黃半兩。茶清煎服。

### 溼熱頭痛

溼熱頭痛者。溼與熱合。交蒸互鬱。其氣上行。與清陽之氣相搏。則作痛也。東垣云。諸溼熱頭痛。清空膏主之。又云。溼熱在頭而頭痛者。必用苦吐之。或用搐鼻藥。清空膏。療風溼熱頭痛。上壅損目。及腦痛年深不止。

羌活

防風各一兩

柴胡七錢

川芎五錢

炙甘草半兩

黃連炒一兩

黃芩製三兩半酒炒

右爲細末。每服二錢。入茶少許。湯調如膏。抹在口內。少用白湯送下。臨臥。搐鼻散。

青黛

石膏

芒硝

鬱金



薄荷

牙皂

右爲末。搐鼻。

東垣白芷散。有白芷。無牙皂、青黛。

又頭重如山者。溼氣在頭也。用紅豆散。

紅豆十粒

麻黃

瓜蒂各五

連翹

羌活各三錢炒

右爲末。搐鼻。

透頂散 本事

細辛三莖表白者

瓜蒂七箇

丁香三粒

糯米七粒

冰片

麝香各一黑

右爲極細末。每一大豆許。患人隨左右搐之。良久。出涎一升許則安。此藥性

味視前搐鼻散稍溫也。當隨證審而用之。

子和神芎丸 治溼熱壅滯頭目。赤腫疼痛。大小便閉澀。

大黃

黃芩各二兩

牽牛生

滑石各四兩

黃連

薄荷葉

川芎各半兩

右爲末。滴水爲丸。梧子大。每服五十丸。食後溫水送下。

缺寒溼頭痛一門。鶴年補集

頭痛由於溼熱上壅者頗多。然亦有因寒溼者。金匱所云。頭痛鼻塞而煩。其脈大。自能飲食。腹中和無病。病在頭中寒溼。故鼻塞。納藥鼻中則愈。愚以爲本事透頂散。正治寒溼頭痛之劑。否則丁香。細辛。治溼熱頭痛。無乃以火救火歟。

### 痰厥頭痛

痰厥頭痛者。病從脾而之胃也。夫脾主爲胃行其津液者也。脾病則胃中津液不得宣行。積而爲痰。隨陽明之經上攻頭腦而作痛也。其證頭重悶亂。眩暈不休。兀兀欲吐者是也。

半夏白朮天麻湯 治太陰痰厥頭痛。眼黑頭旋。惡心煩亂。肢冷身重。

半夏

陳皮去白

麥

芽各七錢半

神麴

白朮五錢炒

黃芩炙

蒼朮

朮米泔浸

天麻

茯苓

人參

澤瀉

瀉各五錢半

黃柏二分

乾薑三分

稍熱服。食前。一方加生薑一片。  
外臺云。頭痛非冷非風。此膈有痰也。濃煎茶。啜一二升。探吐之。吐已復吐。候苦  
汁出乃止。不損人。待渴自止妙。

茶調散子和

瓜蒂好茶二味。等分爲末。每二錢。薑汁調。空心服之。取吐。  
半夏茯苓湯 治熱痰嘔逆頭痛。

半夏二錢

赤苓一錢

陳皮去白

甘草各五

黃芩五分

生薑三片

煎作一服。

頭痛連眼痛。此風痰上攻。用雨前茶、川芎、白芷、防風、天台烏藥、細辛、當歸爲末。湯  
調服。

防風飲子 療風痰氣。發卽頭旋。嘔吐不食。

防風

人參

橘皮各二

白朮

茯苓各三

生薑四兩

右剉碎。以水六升。煮取三升。去滓。分溫四服。一日服盡。忌醋、桃、李、雀肉、蒜、麵。直指方云。二陳湯加荊芥。治頭風。兼治痰壅酒壅。又云。頭風證。眉稜耳角俱痛。投以風藥不效。投以痰藥收功。眼目赤腫。羞明而痛。與之涼劑弗瘳。與之痰劑獲愈也。

玉壺丸 治風痰吐逆。頭痛目眩。胸膈煩滿。飲食不下。及咳嗽痰盛。嘔吐涎沫。

天南星生

半夏各半

天麻半兩

頭白麵三兩

右爲細末。滴水爲丸。梧子大。每服三十丸。用水一大盞。先煎令沸。下藥五七沸。候藥浮。卽熱漉出。放溫。別用生薑湯下。不計時。一方有白朮五錢。雄黃水飛三錢半。

東垣壯歲。病頭痛。每發時。兩額盡黃。眩暈。目不欲開。嬾於言語。身體沉重。兀兀欲吐。數日方過。潔古老人曰。此厥陰太陰合而爲病。名曰風痰。以局方玉壺丸加雄黃、白朮治之。

芎辛導痰湯 治痰厥頭痛。

川芎

細辛

南星

陳皮去白

茯苓各半錢

半夏二錢

枳實

甘草各一錢

右作一服。水二鍾。薑七片。煎至一鍾。食後服。此導痰湯加川芎、細辛為引。使上行也。方殊簡要。

腎虛頭痛

腎虛頭痛者。腎陰不足。虛陽無附而上攻。素問所謂頭痛顛疾。下虛上實。過在足少陰巨陽。許學士謂之腎厥頭痛是也。

玉真丸 治腎氣不足。氣逆上行。痛不可忍。謂之腎厥。其脈舉之則弦。按之則堅。

硫黃二兩

石膏服過

半夏

硝石各一兩

右為細末。研勻。生薑汁和丸。桐子大。陰乾。每服二十丸。薑湯或米飲下。更灸關元百壯。良。虛寒者。去石膏。加鍾乳粉一兩。

黑錫丹

沉香

附子

葫蘆巴

肉桂各半兩

茴香

破故紙

肉豆蔻

金鈴子

木香各一兩

黑錫

硫黃與黑錫結砂各二兩

右爲末。同研。酒煮麵糊爲丸。如梧子大。陰乾。以布袋擦令光瑩。每服四十丸。空心薑鹽湯送下。一方有陽起石半兩。巴戟一兩。

## 肝厥頭痛

肝厥頭痛者。肝火厥逆。上攻頭腦也。其痛必在顛頂。以肝之脈與督脈會於顛故也。雖太陽之脈。亦上額交顛。然太陽頭痛。必惡風寒。而厥陰頭痛。必多眩暈。或厥逆抽掣也。

龍薈丸

方見厥

加甘菊、羚羊角。

氣實便堅者用之。虛者宜生地、羚羊角、甘菊、麥冬之

類。滋之清之。使肝柔。則厥自已。

抑青丸

黃連一味。吳茱萸湯浸一宿。爲末。粥丸。

瀉青丸

當歸焙去蘆

龍膽草

川芎

梔子

川大黃煨

羌活

防風去蘆各等分

右爲末。煉蜜丸雞豆大。每服一丸。竹葉湯同沙糖溫水化下。

### 食積頭痛

食積頭痛者。食氣上攻。胃氣不清也。子和云。邪在胃而頭痛者。必下之。其證必兼痞膈噯酸。噫敗卵臭。或飽食則痛甚。其脈右手滑盛者是也。

館職張學士嗜酒散誕。忽頭痛發熱。醫作傷寒治之愈甚。孫兆脈之。右手脈甚數。左手脈和平。曰此疾非傷寒。學士好酒傷食所傷也。遂用食藥五七丸。經食久。膈漸寬。痛遂減。再進利膈藥遂獲安。

紅丸子方見飲食門

治中湯。卽理中湯。加青皮、陳皮等分。

### 血虛頭痛

血虛頭痛者。血虛脈空。自魚尾上攻頭痛者是也。產後多有此證。魚尾。眉尖後近髮際是。魚尾在眉梢後陷中。即絲竹空穴是也。

### 川芎當歸湯

川芎

當歸等分

為細末。每服二錢。水煎溫服。

一方 川芎半兩為末。每服二錢。臘茶調下。甚效。

一方 當歸一兩。酒一升。煮取六合。飲至醉效。

一方 四物湯加甘菊薄荷。

新定

生地二錢

當歸一錢

蔓荊五分

黃芩一錢酒炒

白芍一錢酒炒

炙甘草三分

甘菊七分

川芎五分

### 氣虛頭痛

氣虛頭痛者。清陽氣虛。不能上升也。其脈必弦微。其證必倦怠氣短。惡風寒。不能



食。

羅太無云。參謀柏仲實年六十餘。二月間。患頭痛不可忍。邀往視之。其人云。近在燕京。患頭昏悶微痛。醫作傷寒治之。汗出後。痛轉加。復汗解。痛益甚。遂歸。每召醫。用藥雷同。到今痛甚不得安臥。惡風寒而不喜食飲。診其脈。弦微而細。氣短而促。嬾言語。內經曰。春氣者病在頭。今年高氣弱。清氣不能上升頭面。故昏悶。此病本無表邪。因發汗數四。清陽之氣愈虧。不能上榮。亦不能外固。所以頭苦痛而惡風寒。不喜飲食。氣弱而短。宜升陽補氣。頭痛自愈。

黃耆一錢半

人參一錢

白朮

當歸

白芍錢各五

陳皮

炙草

升麻

柴胡

蔓荊各三分

川芎

細辛各三分

右咬咀。作一服。水煮。食後溫服減半。再服愈。

新定

人參

黃耆

白朮錢各一

甘草五分

當歸

陳皮各七分

升麻二分

蔓荊

細茶各八分

白芍一錢

右作一服。水煎。

### 偏頭痛

偏頭痛者。由風邪客於陽經。其經偏虛者。邪氣湊於一邊。痛連額角。次而不已。故謂之偏頭痛也。

王荊公患偏頭痛。裕陵傳禁中祕方。用生萊菔汁一蜆殼。仰臥注鼻中。左痛注右。右痛注左。或兩鼻皆注亦可。數十年患。皆一注而愈。

一婦人患偏頭痛。一邊鼻塞。不聞香臭。常流清涕。或作臭氣一陣。遍治頭痛藥皆不效。一醫教服芎犀丸。不十數服。忽然嚏。突出一鉅稠膿。其疾遂愈。

芎犀丸 此方兼祛風清熱之長。而得參膠等安定氣血。雖虛人亦可用之。安內攘外。並行不悖也。

川芎

硃

砂水飛內一兩

石膏

龍

腦各四兩

人參

茯苓

苓

炙草

細

辛各二兩

生犀角

梔

子各一兩

阿

膠妙半

麥

冬三兩

右爲細末。蜜丸彈子大。每服一丸。食後細嚼茶酒任下。

節齋云。久病頭風。略感風寒。便發寒熱。頭須重綿厚帕包裹者。此屬本熱而標寒。世人不識。悉用辛溫散之。輕時得效。誤認爲寒。殊不知其本有鬱熱。毛竅常疎。故風易入。外寒束其內熱。閉逆而爲痛。辛熱之藥。雖能開通閉逆。散其表之寒邪。然以熱濟熱。病本益深。惡寒愈盛矣。惟當瀉火涼血。而佐以辛溫散表之劑。以從法治之。則病可愈。而根可除也。

### 雷頭風

雷頭風者。頭痛而起核塊。或頭中如雷之鳴。蓋爲邪風所客。風動則有聲也。亦有因痰熱者。蓋痰生熱。熱生風也。其法輕則散之。甚則吐之下之。  
新消風散熱湯定

薄荷七分

連翹

黃芩

黑山梔

犀角

荊芥

牛蒡子錢各一

桔梗

甘草各五

右作一服。水煎。

二仙散 子和云。雷頭風。每用此藥吐之。次用神芎丸下之。一名茶調散。

瓜蒂

好茶等分

右爲末。每二錢。薑汁調空心服之。取吐。

神芎丸方見歷熱頭痛門

治痰火上升。壅於氣道。兼乎風火。頭中痛而有聲。輕如蟬鳴。重如雷響。

半夏一兩牙皂 大黃酒浸透三紙包煨再

天蟲

連翹

橘紅

桔梗

天麻各五

片芩七錢

薄荷葉三錢

香白芷

青礞石

粉草各一

右爲末。水浸蒸餅丸如綠豆大。食後臨臥。茶吞二錢。以痰利爲度。然後用清痰降火煎藥調理。

## 大頭痛

大頭痛者。頭痛而腫大如斗。乃天行疫癘病也。  
普濟消毒飲子

黃芩酒炒

川連各一錢

薄荷一錢

橘紅二錢

元參二錢

甘草生二錢

連翹一錢

鼠粘子一錢

板藍根一錢

馬勃一錢

天蟲炒七分

升麻七分

柴胡

桔梗各二錢

右共爲細末。用湯調。時時服。或拌蜜丸嚥化。或加防風、薄荷、川芎、當歸、咬咀。如麻豆大。每服五錢。水煎去渣。熱服之。食後時時服之。如大便秘。如酒煨大黃一錢。或二錢以利之。腫熱甚者。宜砭刺之。一方無薄荷。有人參三錢。  
東垣監濟源稅時。長夏多疫癘病。初覺憎寒體重。次傳頭面腫盛。目不能開。上氣喘急。咽喉不利。舌乾口燥。俗云。大頭天行。親戚不相訪問。傳染多死。張縣丞亦患此。醫以承氣湯加藍根。下之稍緩。翌日其病如故。下之又緩。莫能愈。漸至危篤。東垣診之。謂曰。夫身半以上。天之氣也。身半以下。地之氣也。此邪客於腑之間。上攻頭目而腫痛。反以承氣下之。瀉胃中之實熱。是誅伐無過也。夫安知

適其病所爲故哉。遂處方。用黃連、黃芩味苦寒。瀉心肺間熱以爲君。元參鹹微寒。甘草甘寒。瀉火補氣以爲臣。連翹、鼠粘子、薄荷辛平。板藍根味甘寒。馬勃、白殭蠶味苦平。散腫消毒。定喘以爲佐。升麻、柴胡苦平。行少陽陽明二經。使氣得升。桔梗味苦辛溫。爲舟楫。不令下行。服之良愈。乃施其方。全活甚衆。名普濟消毒飲子。

### 項背痛

本事方云。一親患項筋痛。連及背胛不可轉。服諸風藥皆不效。余嘗憶及千金有腎氣攻背。椒附丸。予強與之。兩服頓瘥。自後與人皆有驗。蓋腎氣自腰夾脊上至漕谿。然後入泥丸宮。漕谿一穴。非精於搬運者不能透。今逆行至此不得通。用椒以引歸經則安矣。

### 椒附丸

大

附一枚六錢已上者  
炮去皮臍末之

右每末二大錢。好川椒十粒。用白麵填滿。水一盞半。生薑七片。同煎至七分。去

椒入鹽。通口空心服。

同頭散 治頭項強急筋痛。或剉枕轉項不得者。烏藥順氣散。加羌活、獨活、木瓜。

烏藥

橘

紅錢各二

麻黃

川芎

白芷

桔梗

枳殼錢各一

天蟲炒

炮薑

炙草五分

加薑葱煎。

### 臂痛

臂痛有痰有虛。有氣血凝滯。各隨症治之。

指迷茯苓丸 治中脘留伏痰飲。臂痛難舉。手足不得轉移。此治痰之第一方也。

半夏二兩

茯苓一兩

枳殼去穢炒半兩

風化朴硝五錢

右爲末。薑汁麵糊丸。如梧子大。每服三十丸。薑湯下。

十味剉散 方見痺症門

治中風血虛臂痛。舉動難支。

## 眩暈

鷄峰云。夫風之病起於心氣不足。胸中畜熱而實。故有頭風面熱之所爲也。痰熱相感而動風。風心相亂則悶瞀。故謂之風眩悶瞀也。又云。頭風目眩者。由血氣虛。風邪入腦而牽引目系故也。五臟六腑之精。皆上注於目。血氣與脈并上爲目系。屬於腦。後出於項中。血脈若虛。則爲風邪所傷。入腦則轉。而目系急。故成眩也。診其脈洪大而長者。風眩也。

按。眩暈雖爲風疾。而有內外之分。鷄峰所謂痰熱相感而動風者。風自內生者也。血氣虛。風邪入腦者。風從外入者也。內風多從熱化。引之則彌盛。外風多從虛入。清之則轉加。二者不可不辨也。

素問云。頭痛顛疾。下虛上實。過在足少陰巨陽。甚則入腎。徇蒙招尤。目瞑耳聾。下實上虛。過在足少陽厥陰。甚則入肝。下虛者。腎虛也。故腎虛則頭痛。上虛者。肝虛也。故肝虛則頭暈。徇蒙者。如以物蒙其首。招搖不定。目瞑耳聾。皆暈之狀也。高鼓峰云。腎陰不足。三陽之焰。震耀於當前。中土虛衰。下逆之光。上薄於顛頂。陰



虛而眩者。目中時見火光。土虛而眩者。必兼惡心嘔吐也。

按中土虛衰。不能下蔽真陽。則上乘清道。所謂上入之光也。然亦有中虛肝氣動而暈者。如土薄則木搖也。大抵眩暈多從肝出。故有肝虛頭暈。腎虛頭痛之說。雖亦有肝病頭痛者。要未有眩暈而不兼肝者也。

聖濟總錄云。風頭旋者。以氣虛怯。所稟不充。陽氣不能上。至於腦。風邪易入。與氣相鼓。致頭旋而暈也。亦有胸膈之上。痰水結聚。復犯大寒。陰氣逆上。風痰相聚而結。上衝於頭。亦令頭旋。治當用人參丸。祛痰丸之類者也。

風虛眩暈之方

守中丸 治風虛頭眩腦轉。目系急。忽然倒仆。

人參

白朮

甘菊

枸杞子

山

藥

白茯苓

麥冬

生地黃

絞汁

右爲細末。先用生地黃汁於銀器內。入酥三兩。白蜜三兩。同煎。逐旋掠取汁上。金花令盡。得五升許。於銀器內拌炒。前七味藥。漸漸令乾。入白蜜同搗數千杵。丸如梧子大。每服五十丸。空心溫酒送下。服百日後。五臟充滿。肌膚滑澤。此藥

須擇四季旺相日。或甲子日修合。亦名五芝地仙金髓丸。

### 防風飲子

本事治風眩頭暈川芎散

山萸肉一兩

山藥

人參

甘菊花

小川芎

茯苓各半

右爲細末。每服二錢。酒調下。不拘時。日三服。

肝厥頭暈之方

### 本事鈎藤散

鈎藤

陳皮

半夏

麥冬

茯苓

茯苓

人參

甘菊

防風各半

甘草一分

石膏一兩

右爲粗末。每服四錢。水一盞半。薑七片。煎七分。去滓溫服。

下虛眩暈之方

沉香磁石丸 治上盛下虛。頭目眩暈。耳鳴耳聾。

沉香

青鹽並別研

蔓荊

甘菊各五錢

巴戟

葫蘆巴

山藥炒

川椒去目炒

磁石火煨醋淬細研水飛

陽起石火煨研

附子各一兩炮

右爲細末。用酒煮米和丸。梧子大。每服五十丸。加至七十丸。空心鹽湯下。

熱風頭眩之方

羚羊角湯 治熱毒風上衝。頭目旋暈。耳內虛鳴。

羚羊角二兩

菊花三兩

防風

葉本

元參

黃芩

杏仁去皮

石菖蒲

炙甘草各一兩

每服五錢。水煎食後溫服。一方有羌活、前胡。

耳病統論

耳者腎之竅。而膽與胃之脈所過之處也。故其病亦有數種。有氣厥而聾者。有腎虛而聾者。有風火壅閉腫痛。或鳴或聾者。有熱氣乘虛。隨脈入耳。而爲膿耳者。有

耳出津液。結核塞耳。而爲聾耳者。又有左聾右聾。左右俱聾之異。左聾者。有所忿怒過極。則動少陽膽火。故從左起。以龍薈丸主之。右聾者。多因色慾過度。致動少陰相火。故從右起。以六味地黃丸主之。左右俱聾。因醇酒厚味無節。則動陽明胃火。故從中起。以通聖散、滾痰丸主之。統三者而論之。忿怒致耳聾者。爲尤多也。

## 風聾

風聾者。經氣虛而風乘之。正氣不通。風邪內鼓。則耳中引痛。牽及頭腦。甚者聾閉不通也。

魚腦膏 治風聾日久。

生鯉魚腦二兩

當歸

細辛

附子去皮

白芷

菖蒲各三兩

共爲末。以魚腦置銀器中。入藥在內。微火煮。候香去滓。入瓷盒中候凝。取如棗核大。綿裹塞耳中。一方以竹筒盛鯉魚腦。炊飯處蒸之令烱。置耳中。一方以鯉魚膽汁滴入耳中。

久聾方

葶麻子粒二十粒去油

遠志

乳香

磁石二錢各

皂角半挺煨取肉

生地龍中者一條

全蠍二個焙

右爲細末入蠟搗圓挂入耳。

犀角飲子 治風與熱合上壅耳內痛腫聾閉。

犀角

木通

石菖蒲

甘菊花

元參

赤芍

赤小豆錢各二

甘草一錢炙

水二鍾生薑五片煎一鍾不拘時服。若風熱壅盛便悶心煩者宜防風通聖散。

亦有胃中痰火壅熱生風上攻清道因而耳鳴築築然氣閉而不通鼻塞不利。

口不知味痰多鬲熱不清脈滑數大或弦內經所謂頭痛耳鳴九竅不利腸胃

之所生也宜半夏麴橘紅甘菊茯苓甘草知母酒芩麻黃石膏桔梗桑皮之屬。

鼠粘子湯 治風熱壅盛耳內生腫如櫻桃痛極。

連翹

黃芩酒炒

牛蒡子炒

元參

桔梗

梔子炒

生甘草

龍膽草炒

板藍根

右剉水煎。食後服。隨飲酒一二盞。

### 厥聾

厥聾者。經脈氣厥而聾也。巢氏云。藏府氣逆。名之爲厥。厥氣相搏。入於耳之脈。則令聾。手少陽之脈動而氣厥者。其候耳內輝輝焮焮也。手太陽厥而耳聾者。其候聾而耳內氣滿。然厥聾之候。大都肝膽氣逆所致。其症必起於卒暴之間。蓋肝膽並善逆。而其氣多暴也。以龍薈丸瀉肝膽。降逆氣。中有辛香。并能通竅也。

### 龍薈丸

當歸焙

龍膽草酒洗

山梔炒

黃連

黃柏

黃芩各一兩

大黃

蘆薈

青黛各半兩

木香二錢

麝香五分

煉蜜丸。桐子大。薑湯下。二三十丸。

便不堅者去大黃。一方無黃連、黃柏。有

青皮、柴胡、膽星。

秘傳降氣湯。加石菖蒲。治氣壅耳聾。大有神效。方見氣門

### 腎虛耳聾

腎藏精而氣通於耳。腎虛精少。其氣不通於上。則耳聾不聰。經云。精脫者耳聾是也。其候頰顴色黑。瘦悴力疲。昏昏憤憤。因勞則甚。亦謂之勞聾。

肉蓯蓉丸

肉蓯蓉酒浸一宿切焙

附子去皮

山茱萸炒

桂心

巴戟天去心

石斛去根

乾熟地焙

澤瀉

兔絲子酒浸一宿別研

人參

白茯苓

蛇床子炒

牡丹皮

當歸酒浸

菖蒲米泔浸一宿

炙甘草

黃耆

遠志

芍藥

防風各一兩

羊腎一對去筋膜炙

蜜丸。梧子大。每服二十丸。食後溫酒下。漸加至三十丸。日三。一方有乾薑、細辛、酒糊丸亦得。

益腎散 治腎虛耳聾

磁石製

巴戟

川椒各一兩

沉香

石菖蒲

各半兩

右爲細末。每服二錢。用猪腎一具。切細。和以葱白。少許鹽并藥。溼紙十重。裹煨令香熟。空心嚼。以酒送下。一方有附子。無沉香。菖蒲。

大安腎丸 加磁石。羌活。石菖蒲。良。

憶有戈雨亭令郎。十餘歲。痘後耳漸重聽。日甚一日。幾與聾無異。業師薛一瓢診之云。此必痘涉腎經。幸而收功者。所以告乏。日甚一日。爲病圖維。於六味方中。加入鹽水炒紫衣核桃肉三兩。鹽水炒杜仲三兩。石菖蒲二兩。蜜丸開水下。服一料而愈。鶴年

膿耳聾耳

直指云。熱氣乘虛。隨脈入耳。聚熱不散。膿汁時出。謂之膿耳。治宜蔓荊子散。外用石膏。明礬。黃丹。真蚌粉。龍骨。麝香。等分爲末。綿纏竹拭耳。搽之。又耳間有津液。輕



則不能爲害。風熱搏之。津液結鞣成核塞耳。令人暴聾。謂之聾耳。治宜四物加羌活、柴、芩、連翹、元參等分。外用生豬脂、地龍、釜底墨等分細研。以葱汁和捏如棗核。薄綿裹入耳。令潤卽挑出。

蔓荊子散

蔓荊子

赤芍

生地

甘菊

桑皮

赤茯苓

升麻

麥冬

木通

前胡

炙草各一錢

水二盞。薑三片。紅棗二枚。煎一盞。食後服。

黃龍散 治膿耳。

枯白礬

龍骨研

黃丹

臘脂各一錢燒

麝香少許

右爲末。以綿杖子搨去耳中膿水。以藥摻入少許。日日用之。勿令風入。

鼻

## 鼻淵鼻塞

經曰。膽移熱於腦。則爲辛頰鼻淵。鼻淵者。濁涕下不止也。王注曰。膽液不澄。則爲濁涕。不已如水泉者。故曰鼻淵。此爲足太陽與陽明脈俱盛也。可與防風通聖散。加黃連、薄荷。夫足太陽主表之風寒。足陽明主裏之熱。云太陽陽明俱盛者。謂表邪與裏熱搏結。久之寒亦化熱。鬱伏於腦頰而不解也。

腦漏有老人腎經虛寒使然者。用八味及煖腎之劑而愈。元珠

鼻塞不聞香臭。或但遇寒月便塞。或略感風寒亦塞。不時舉發者。世俗皆以爲肺寒。而用解表辛溫通利之藥不效。殊不知此是肺經多有火邪。鬱甚則喜見熱而惡風寒。故遇寒便塞。偶感便發。治法清金降火爲主。而佐以通利之劑。若如常鼻塞不聞香臭者。只作肺熱治之。瀉火消痰。或丸藥噙化。或末藥輕調。緩服。久服無不效。若平素原無鼻塞之病。一時偶感風寒而致鼻塞聲重。或流清涕者。只作風寒治之。

防風通聖散

元珠去硝黃。其滑石、石膏減半。多加辛夷花。先用三五貼。再用此爲丸。每七十丸。早晚白湯送下。

雄黃丸 治鼻艱。

雄黃五分

枯礬一錢

瓜蒂二錢

麝香少許

右爲丸。取如豆大。搐鼻。亦治瘰肉。

蒼耳散 治鼻流濁涕不止。名曰鼻淵。

辛夷仁五錢

蒼耳子半錢

白芷一兩

薄荷一錢

右爲末。葱茶湯調下二錢。

治鼻中肉贅。臭不可近。痛不可搖者方。

以白礬末加礪砂少許。吹其上。頃之化水而消。與勝濕湯。瀉白散二貼。此厚味

擁濕熱。蒸於肺門。如雨霽之地。突生芝菌也。

鉛紅散 治肺風。鼻赤生瘡。

舶上硫黃

白礬灰各半

右爲末。入黃丹少許。染與病人面色相同。每上半錢。津液塗之。洗漱罷。及臨臥

再上。兼服升麻湯。下瀉青丸。除其本也。

舌

### 舌脹舌出

臨安民有因病傷寒。而舌出過寸。無能治者。但以筆管通粥飲入口。每日坐於門。一道人見之。咨嗟曰。吾能療此。頃刻間耳。奈藥不可得何。會中貴人罷直歸。下馬觀病者。問所須。乃梅花片腦也。笑曰。此不難。即遣僕馳取。道人屑爲末。摻舌上。隨手而縮。凡用五錢。醫說

又方 舌脹出口。以草麻子油蘸紙作燃。燒煙熏之。治腫滿如猪胞方

釜下墨末。以酢和。厚傅舌上下。脫去更傅。須臾即消。或先決去血汁。竟傅之。彌佳。千金方名百草霜散

一方

釜下墨和鹽等分醋調塗。

余小兒師魯幼時。忽患舌脹。余以煨過皂礬。取紅色者少許研末。搽舌上。少頃便瘥。

口

口瘡

口舌生瘡。其候有二。一者心胃有熱。氣衝上焦。熏發口舌。其症口臭。作渴發熱。飲冷是也。外臺含煎主之。一者胃虛食少。腎水之氣逆而承之。則為寒中。脾胃虛衰之火。被迫上炎。作為口瘡。其症飲食少思。大便不實。或手足逆冷。肚腹作痛。經曰。歲金不及。炎火乃行。復則寒雨暴至。厥陰乃格。陽反上行。民病口瘡是也。宜附子理中湯。參朮甘草補其中。乾薑附子散其寒。使土溫則火自斂也。

外臺含煎

升麻

大青

射干各三兩

苦竹葉

梔子

黃柏各一兩

蜜八合

生地汁

生元參汁各五合 乾者二兩

薔薇根白皮五兩

右以水六升。煎取二升。去滓。入生地、蜜等同煎如飴。細細含之。差止。外臺云。薔薇根、角蒿爲口瘡之神藥。

黃連膏 聖濟

黃連 三兩

猪脂 一斤

白蜜 四兩

羊髓 研二兩

右以慢火煎猪脂。取油去滓。入黃連。又煎令黑色。下羊髓令化。以綿濾去滓。入蜜更煎成膏。瓷盒盛。每含一棗大。日三五度。嚥津不妨。

附子理中湯

生薑煎

生薑汁 一盞

白蜜 三兩

同煎十沸。瓷瓶盛。時時以熱水調一匙。含嚥之。按聖濟論口瘡。有實有虛。實則清之。虛則溫之。最爲明晰。然二者之外。又有腎虛火動一症。而腎虛之候。又有二端。一者腎藏陰虛。陽無所附。而遊行於上者。宜六味之屬。壯水戀火。一者腎藏內寒。陽氣不安其宅。而飛越於上者。宜七味、八味之屬。溫藏斂陽也。雖有元藏陰火上攻口舌之說。乃用巴戟、白芷、良薑等。

味殊未妥協。惟附子蜜炙含嚥。差爲可耳。

巢簡方 治口舌生瘡。

溺桶堊七分

枯礬三分

二味研勻敷之。有涎拭去之。數次卽愈。

齒

齒痛

才齒者。骨之所終。髓之所養也。又手足陽明之支脈入於齒。故骨髓之氣不足。與夫陽明之脈虛。不能有所滋養。於是乎有牙齒之疾。其候甚多。治療之法。固不可略也。若陽明脈虛。風冷乘之而痛者。謂之風痛。蟲居齒根。侵蝕不已。傳受餘齒而痛者。謂之蟲痛。若足少陰脈虛。不能榮養於骨。因呼吸風寒。或飲漱寒水而痛者。謂之腎虛齒風痛。風痛者。齒齦多腫。或赤。得風則痛愈甚。蟲痛者。齒齦有竅。甚則搖動。宣露。虛痛者。悠悠戚戚。無甚大痛。而亦久而不已也。亦有腎虛陰火上衝作痛者。其候手足冷。腰膝軟痛。氣上衝。頭面熱色赤。頸筋粗大。舌不大赤。齦不甚腫。

七味湯加骨碎補、牛膝治之。一服如神。

去風之劑

皂莢湯

皂

莢一挺去皮子  
妙令黃色

露蜂房一枚

鹽一分

三味摩剉。分爲三貼。每貼以漿水煎。熱漱冷吐。

當歸連翹飲

當歸

川芎

連翹

生地

防風

荆芥

白芷

羌活

黃芩

黑山梔

枳殼

甘草

細辛

水煎服。

東垣蠅梢散

麻黃一錢

白芷

羌活

防風

藁本

柴胡

升麻各五分

當歸六分



蠟梢少許

生地半錢

細辛三分

草豆蔻一錢

羊脛骨灰二錢

右爲細末。先用溫水漱口。淨後搽之。其痛立止。一方有熟地、黃連、吳茱萸。

補腎去風之劑

地黃丸 治腎藏虛。食冷熱齒皆痛。

生地黃一兩

白茯苓

防風

獨活

枸杞子

山藥各半兩

六味搗羅爲末。煉蜜丸梧子大。每空心煎棗湯下十丸。至十五丸。聖濟

張文仲療齒根欲脫方

生地黃搗以綿裹貼齒根。常含之甚妙。

地骨皮湯

地骨皮

生乾地黃各一兩

細辛半兩

戎鹽一分

每用五錢。水煎三五沸。熱漱冷吐。以差爲度。

地黃湯

生地黃二兩 獨活一兩

每用五錢。以酒一盞。浸一宿。煎十餘沸。熱嗽冷吐。以差爲度。

殺蟲之劑

白礬散

治齩齒齩腫出膿汁。

白礬燒灰

熊膽各一分

蟾酥

雄黃

麝香各半

右爲散。每用半錢。傅牙根。一方有乾蝦蟆半分。

牛膝散

治風齩疼痛。解骨槽風毒痛。

牛膝一兩火燒

每以少許末。著齒間含之。

又方

郁李根一握。水一盞。煎至六分。熱含之。吐蟲長六分。黑頭。

又方

大醋一升。煮枸杞根白皮一升。取半升。含之。蟲立出。肘後

補腎之劑

地黃丸

人參

山黃各四兩

生地取汁

白蜜一升

枸杞根三兩

白茯苓二兩

酥少許

右將參、苓、杞、黃爲末。以好酒一斗煎至三升。去滓。入地黃汁、酥、蜜。同煎至可丸。即丸如小豆大。每服二十丸。溫酒送下。日三服。漸加至五服。

八味丸

安腎丸

咽喉

咽者、嚥也。喉者、候也。咽接三脘以通胃。故以之嚥物。喉通五藏以系肺。故以之候氣。氣。氣。喉。穀。咽。皎然明白。千金謂喉嚨主通利水穀之道。咽門主通藏府津液神氣。誤也。

喉以納氣。故曰喉主天氣。咽以納食。故曰咽主地氣。一陰一陽結。謂之喉痺。一陰

謂心主。一陽謂三焦。二脈並絡於喉。氣熱內結。故爲喉痺。

喉風喉痺。皆由膈間素有痰涎。或因七情不節而作。火動痰上。壅塞咽喉。所以內外腫痛。水漿不入。言語不出。可謂危且急矣。

兩寸之脈。浮洪而溢者。喉痺也。脈微而伏者死。

熱結咽喉。腫遠於外。且麻且癢。腫而大者。名纏喉風。纏喉風之症。先兩日胸膈

氣緊。出氣短促。忽然咽喉腫痛。手足厥冷。氣閉不通。頃刻不治。纏喉風多屬痰

火。其咽喉內外皆腫者是也。

喉痺之症。宜速用針法吐法以救之。若懸雍垂。則不可刺破。刺則殺人。懸雍者。生

於上腭。音聲之關也。藏府伏熱。上衝咽喉。則懸雍腫長下垂也。

乳蛾。俗名也。古方通謂之喉痺。以一邊腫者爲單蛾。兩邊腫者爲雙蛾。然雙蛾易

治。單蛾則難治。

噤痛者。咽門不能納穀與唾。而地氣閉塞也。喉痺咽痛者。咽喉俱病。天地之氣並

閉塞也。蓋病喉痺者。必兼咽痛。病咽痛者。不必兼喉痺也。

凡咽喉痺。不可純用涼藥。目前取效。上熱未除。中寒復起。毒氣乘虛入腹。胸前高

腫。上喘下泄。手足厥冷。爪甲青紫。七日後。全不食。口如魚口者死。

客熱咽痛

客熱咽痛者。凡風邪客喉間。氣鬱成熱。故爲痛也。統旨云。有初得病發熱而咽喉自痛者。此得之感冒後頓厚衣被。或用辛熱即臥。遂成上壅。或有壅熱而欲取寒涼。爲外邪所襲者。俱宜甘桔湯。甘以除熱。辛以散結也。喉痺咽痛。一鄉皆相似者。屬天行運氣之邪。勿用酸寒之藥。點之下之。鬱其邪於內。不得出也。

清咽利膈散

薄荷

防風

元參

甘

草各五

桔梗

連

翹各一

大

黃酒炒

芒

硝

牛蒡

荊

芥各七

片

苓酒炒

梔

子各五

右作一貼。水煎溫服。食後。醫鑒

甘桔湯

甘草二兩

桔梗一兩

每服五錢。水一鍾半煎服。錢氏加阿膠。海藏加牛蒡子、竹茹。太無加荊芥、生薑。

丹溪云。咽痛必用荊芥。陰虛火炎。必用元參。

必用方加荊芥、薄荷、元參、防風、黃芩各一兩。

聖濟總錄云。一切咽喉痛。紫雪爲要藥。

絳雪散。治咽喉熱痛腫塞。

寒水石半兩

礪砂

牙硝

硃砂各一錢

龍腦半錢

右爲細末。每一字。摻入口。嚥津。

千金烏扇散

生烏扇十兩

升麻三兩

羚羊角

通草

芍藥各二兩

薔薇根切一

生地切五

猪脂二斤

生艾葉六銖

右以咀綿裹苦酒一升。淹浸一宿。內猪脂中。微火煎取苦酒盡。膏不鳴爲度。去滓。薄綿裹膏。似大杏仁大。內喉中。細細吞之。

碧雪 治積熱口舌生瘡心煩喉閉。

芒硝

青黛

寒水石

石膏煨研各

朴硝

硝石

馬牙硝各等分

甘草煎湯二升。入諸藥再煎。用柳枝不住攪令溶。方入青黛和勻。傾入砂盆內。冷卽成霜。研末。每用少許。以津含化。如喉閉。以竹管吹入喉中。

牛蒡子湯

牛蒡子二錢

元參

犀角

升麻

黃芩

木通

桔梗

甘草錢各一

水煎。食後服。此辛涼解散之劑。

聖濟射干丸方

射干一兩

香豉一合

杏仁去皮

芍藥

犀角各二兩

升麻一兩

炙甘草半兩

蜜丸小彈子大。每一丸。含化嚥津。日三五服。

### 元參散

元參一兩

升麻

射干

大黃各五錢

甘草二錢五分

每服五錢。水煎時時含嚥。

### 客寒咽喉

鍼經云。寒氣客於會厭。卒然如症。此寒氣與痰涎凝結咽喉之間。宜以甘辛溫藥治之。切忌寒涼。邪鬱不解。則疾成矣。

千金母薑酒

母薑汁一升

酥

牛骨髓各一

桂心

秦椒各一

防風半兩

芎藭

獨活各一兩

右爲末。內薑汁中。煎取相淹濡。下酥髓等合調。微火三上三下煎。平旦溫清酒一升。下膏二合。卽細細吞之。日三夜一。



半夏桂甘湯 治冷症無陽咽疼喉閉。

辣桂

甘草炙

半夏製

右件等分剉。每服三錢。水一大盞。煎半盞。候冷。細細呷之。凡人伏氣之病。謂非時暴寒中人。伏於少陰之經。始先不覺。旬日乃發。先發咽痛。次必下利。古方謂之腎傷寒。宜用半夏桂甘湯。

### 咽痛失音

咽痛失音者。風熱痰涎壅閉咽門也。亦有陰虛肺損者。蓋肺象金而出聲音。金破則不鳴。金實亦不鳴。辨之之法。實者壅遏不出。虛者聲嘶破也。  
宣明訶子湯

訶子四箇半生半熟

桔梗一兩半生

甘草二寸半生

右爲細末。每服二錢。用童子小便一盞。水一盞。煎五六沸溫服。甚者不過三服。即愈。

海藏發聲散 治咽喉痛。語聲不出。

括 薑一個 白殭蠶去頭炒 甘草炙二錢  
右爲細末。每服三錢。溫酒或生薑自然汁調下。用五分。綿裹噙化。噀津亦得。日  
兩三服。寶鑑有桔梗七錢半炒爲末。每一錢入朴硝一錢匕。和勻。口含噀津。

### 咽喉妨悶

咽喉如有物妨悶者。肺胃壅滯。痰氣相搏。結於喉間。金匱所謂咽中如有炙轆。千  
金所謂咽中貼貼。狀如炙轆。吞不下。吐不出者是也。其症婦人多鬱者。恆患之。聖  
惠方云。憂愁思慮。氣逆痰給。皆生是疾也。  
醫學正論。喉乾燥痛。四物加桔梗、荊芥、黃柏、知母。煎服立已。  
咽喉乾枯。常如毛刺。吞嚥有礙者。風燥也。宜荊防敗毒散。加薄荷、黃芩。倍桔梗。入  
生薑煎服。

### 厚朴湯

厚朴薑汁炙

赤苓

紫蘇葉各一兩

半夏薑製一兩

每服三錢。入生薑三片同煎。食後溫服。

杏仁煎

杏仁去皮尖雙仁炒

桑根白皮

貝母各一兩半

酥半兩

生薑汁二合

生地汁二合半

大棗六十枚

紫苑二分

甘草炙

桔梗炒

五味子

地骨皮

赤茯苓去皮各一兩

人參三分

共十四味。研杏仁。以水五升。濾取汁。將草藥細剉。同煎至二升。以綿濾去滓。續下酥及地黃汁。慢火煎成膏。每食後含一匙。細細嚥津。按喉間痰氣。結聚成核。久而不散。則生燥澹。厚朴湯用辛味以破之也。杏仁煎假潤藥以通之也。

發聲散 治咽痛生瘡妨悶。

黃瓜蔓大者一枚

桔梗七錢

白殭蠶五錢

甘草二錢

右爲末。每取少許。乾摻。如咽腫紅紫色。加朴硝一錢。如喉中有小白頭瘡。入白礬末五分。

通噤散 治喉痛生瘡聲啞。

白礬砂二錢

孩兒茶

青黛

滑石

寒水石錢各一

蒲黃

馬牙硝

枯白礬各六分

黃連

黃柏各五分

片腦二分

右爲細末。煉化白砂糖和丸。芡實大。臥時舌壓一丸。自化入喉神效。一人但飲食。若別有一咽喉。斜過膈下。徑達左脇而作痞悶。以手按之。則漉漉有聲。以控涎丹十粒服之。少時痞處熱。作一聲轉。瀉下痰飲二升。再食正下而達胃矣。

### 喉痺諸法

喉痺者。咽喉腫塞痺痛。水漿不得入是也。由脾肺不利。蘊積熱毒。而復遇暴寒折之。熱爲寒閉。氣不得通。結於喉間。其症發熱惡寒。喘塞脹悶。不急治。殺人。針刺出血。搐鼻吐痰。皆急法也。

文潞公喉腫咽痛。喉科治之。三日愈甚。上召孫兆治之。孫曰。病得相公書判筆一管。去筆頭。露水點藥入喉便愈。孫隨便刺。相公昏仆不省人事。左右皆驚愕流汗。

孫乃笑曰。非我不能救相公。須臾嘔出膿血升餘。旬日乃平復如故。予嘗治一男子喉痺。於太谿穴刺出黑血半盞而愈。由是言之。喉痺以惡血不散故也。

凡治此疾。暴者必先發散。發散不愈。次取痰。取痰不愈。次取污血也。婁全善網目火

鬱則發之。即發散之意也。血出多則愈。有針瘡者。薑汁調熟水。時時呷之。治急

喉痛。於大指外邊指甲根齊針之。不問男左女右。只用人家常使針針之。令血出

即效。如大勢危急。兩手大指多針之。甚妙。夷堅志

挑背法。於暗室中。用紅紙條點火照背上。隱隱有紅點。用針挑破。喉痺將死者。

破盡即甦。

元公章少卿。述聞德府士人。携僕入京。其一患喉閉脹滿。氣喘塞不通。命在須臾。詢諸郡人。云惟馬行街山水李家可看治。即與之往。李駭曰。此症甚危。猶幸來此。不然死耳。乃於笥中取一紙撚。用火點着。半煙起吹滅之。令僕張口。刺於喉間。俄吐出紫血半合。即時氣寬能言。及啖粥。搽藥敷之。立愈。士人甚神其術。後還鄉里。村落一醫。偶傳得此法。云咽喉病發於六府者。如引手可探。及刺破瘀血。即已。若發於五藏。則受毒牢深。手法藥力難到。惟用紙撚為第一。然不言所以用之之意。

後有人拾得其殘者。蓋須以巴豆油塗紙。故施火即着。藉其毒氣。徑赴病處以破其毒也。牙關緊閉者。以煙熏入鼻中。即時口鼻涎流。牙關自開。醫說  
周密齊東野語云。密過南浦。有老醫授治喉痺垂死方。用真鴨嘴。膽礬為末。醋調灌之。大吐膠痰數升。即差。臨汀一老兵妻。苦此絕水粒三日矣。如法用之。即差。屢用無不效驗。神方也。濟生方用膽礬二錢半。白殭蠶炒五錢。研。每以少許吹之。吐涎。名二聖散。

孫兆治潘元從急喉痺。以藥半錢。吹入喉中。少頃吐出膿血。立愈。潘謝曰。非明公不能救。贈金百兩。願求其方。孫曰。猪牙皂。白礬。黃連等分。瓦上焙為末耳。既授方。不受所贈。

### 解毒雄黃丸

雄黃

鬱金各一

巴豆去皮油

細末。醋糊丸。菉豆大。茶清下七丸。吐出頑痰立甦。水漿不得入口者。醋磨灌喉取吐。未吐再服。丹溪云。薑汁。殭蠶末。治咽痛喉痺神效。

### 喉痺吹藥

白礬末一錢。同巴豆一粒同炒。去巴豆。取礬研細末吹之。即吐濁痰。名碧雲散。再入輕粉、麝香少許。名粉香散。吹乳蛾即開。

玉鎖匙

焰硝七錢半 硼砂二錢半 白礬一分半 龍腦一字

為末。以竹管吹半錢。入喉中神效。直指

擗鼻透關散

雄黃研 猪牙皂炙去皮 藜蘆各一分

右為末。每用一匙。分彈入兩鼻中。關透即差。

凡人患喉閉。及纏喉風。用藥開得咽喉。可通湯水。急吃薄粥半碗。或一碗。壓下餘熱。不爾即病再來。不可不知也。咽喉既可。身熱頭疼不止。此感外邪。看脈氣及大小便。有表症則發散。有裏症則微下之。皆愈。愈後虛喘。而身不熱者。必是服涼藥過多而下虛也。當服鎮重溫藥一服。如黑錫、正元之類。以粥壓之。

冰梅丸 治喉風腫痛如神。  
天南星三十個 大半夏 白礬 白鹽

防風

朴

硝各四兩

桔

梗二兩

甘

草一兩

大梅實

揀七分熟者一百個

先將硝鹽水浸一伏時。然後將各藥研碎。入水拌勻。方將梅實置於水。淹過三指為度。浸七日。取出曬乾。又入水中。浸透曬乾。俟藥水乾為度。方將梅子入磁罐封密。如霜衣白。愈佳。用時綿裹嚙口中。徐徐嚙汁下。痰出即愈。時行喉痛。宜用普濟消毒飲子。

神效散

治喉痺語聲不出。猪牙皂角和霜梅為末。嚙之。急喉痺。其聲嘶者。有如

痰在喉響。此為肺絕之候。宜用人參膏救之。用竹瀝薑汁放開。頻頻服之。如未

得參膏。獨參湯亦得。早者十全七八。次則十全四。遲則十不全一也。

爛喉痧方

筆友張瑞符傳

西牛黃五厘

冰

片三厘

真

珠三分

人指甲

五厘男病用女病用男

象牙屑

焙三分

青

黛六分

壁

錢二十個

木個焙土壁磚上者不可用

共為極細末。吹患處效。

筆友張瑞符。湖州府人也。予往來二十年矣。其為人。敦厚和平。年過五旬。並



未生育。雖置妾。亦終不得懷孕。忽一日途遇李相士。卽導喜云。爾當生子矣。李乃張之同鄉友也。張錯愕曰。我半生已來。並未生育。爾何得相戲若此。李曰。我昔年曾看爾相。許爾無子。今爾陰隲紋已滿面。豈無子之相。後果如其言。予因問張曰。爾一生如何爲善。張曰。生平並未有善。只有兩事。亦人所當爲者也。一舍弟早亡。所遺一子。我撫養長大。而舍弟所有主顧。我已相與二十年矣。舍姪旣長。我使之去。彼不願。我曰。爾在我處。我甚有益。但爾不去。終身只作店夥。我所不忍。今與爾筆同往各主顧家。相致曰。此卽我舍弟某之子也。今已長。可仍用其筆。况此子自幼在我店習業。彼之筆卽我之筆也。又此方甚效。我所不祕。餘亦並無所爲。予曰。只此可稱善矣。有姪少孤。撫之成立。并使其能繼父業。有救急之方。而公之於世。善莫大焉。予得是方。并述其始末云爾。鶴年

# 金匱翼

清 吳門 尤 怡 在涇編集

鄞縣 曹赤電炳章圈校

## 卷六

### 心痛統論

方論心痛有九種。曰飲、曰食、曰風、曰冷、曰熱、曰蟲、曰悸、曰疰、曰去來。悸者動也。心虛則動而痛也。疰者住也。惡氣所著也。去來者。作止不常。亦邪氣也。但疰爲陰。而去來爲陽耳。

心主諸陽。又心主血。是以因邪而陽氣鬱伏。過於熱者痛。陽氣不及。邪氣勝之者亦痛。血因邪泣在絡而不行者痛。血因邪勝而虛者亦痛。

五藏六府任督支脈。皆絡於心。是以各藏府經脈。挾其淫氣。自支脈上乘於心。皆能作痛。然必有各藏府病形與之相應。經云。心痛引少腹。上下無定處。洩便難者。

取足厥陰。心痛腹脹。噎然。大便不利。取足太陰。心痛短氣。不足以息。取手太陰。心痛引背。不得息。刺足少陰。不已。刺手少陽。此之謂也。

胃居中焦。稟冲和之氣。爲水穀之海。三陽之總司。凡飲食寒邪。氣血蟲邪。惡氣。亦如心痛。有不一之因也。惟肝木之相乘者尤甚。其症胃脘當心而痛。上支兩脇。膈咽不通。飲食不下。病名食痺。食痺者。食已心下痛。吐出乃已。是也。其腎水上逆者。次之。腎水上逆者。寒厥入胃也。

胃者土氣也。主乎痞。故胃病者。或滿或脹。或食不下。或嘔吐吞酸。或大便難。或瀉利。面色浮而黃者。皆是胃之本病也。其有六淫五邪。相乘於胃者。大率前所列心痛之形狀相類。但其間必與胃本病參雜而見之也。憂思忿怒之氣。素蓄於中。發則上冲旁擊。時復下注。若三焦無所阻滯。任其游行。則不能作痛。雖痛亦微。若有濕痰死血。阻滯其氣。而不得條達。兩相搏擊。則痛甚矣。

余家有治心胃痛丸方

白胡椒

枳殼

白檀香

紅花

五靈脂 去砂

廣木香

各爲末。於六月六日修合。水泛爲丸。每用七丸。噙化。少頃痛卽止。余因名之曰靈香丸。此條宜注胃脘痛中。鶴年識藥共六味。五味各一兩。五靈用五兩。予憶昔年合藥時配分兩。彷彿若此。

### 熱厥心痛

金鈴子散 保命

金鈴子

延胡索 各一兩

右爲末。每服三錢。酒調下。痛止。與枳朮丸。

左金丸

黃連 六兩 鹽炒

吳茱萸 去閉口 鹽水浸一伏一兩

右爲末。水泛爲丸。或粥糊丸。每服三十丸。開水送下。

機要云。熱厥心痛者。身熱足寒。痛甚則煩躁而吐。其脈浮大而洪。當灸太谿。崑崙。謂表裏俱瀉之。是爲熱病。汗不出。引熱下行。表汗通身而出者愈也。灸畢服金鈴子散則愈。痛止服枳朮丸。去其餘邪也。

丹溪云。心膈痛。曾服香燥熱藥。復作復結。轉深轉痼。宜山梔炒黑二兩。香附鹽

水浸炒一兩。川芎一兩。黃芩、黃連。並酒炒。木香、檳榔各二錢五分。赤麵、番降香各五錢。芒硝二錢爲末。生薑汁童子小便各半盞調二錢。痛時服。

心寒痛

大建中湯

蜀椒二合炒去汗

乾薑四兩

人參二兩

以水四升。煮取二升。去滓。內膠飴一升。微火煎取一升半。分溫再服。如一炊頃。可飲粥二升。後更服。當一日食糜粥溫覆之。

扶陽益胃湯

附子炮去皮二錢

乾薑炮半錢

草豆蔻

益智仁

官桂

白芍

甘草

人參各一錢

吳茱萸

陳皮

白朮各五錢

右剉如麻豆大。都作一服。水二盞。薑三片。棗二枚。同煎至一盞。去滓。溫服。食前。羅謙甫。治漕運使崔君長男雲卿。年二十五。體本豐肥。奉養膏粱。時時有熱證。

友人勸進寒涼藥。食寒物。至元庚辰秋發瘧。醫以砒霜等藥治之。新汲水下。禁食熱物。瘧病未除。反添吐瀉。脾胃復傷。中氣愈虛。腹痛腸鳴。時復胃脘當心而痛。不任其苦。屢醫未效。至冬不差。延至四月。勞役煩惱過度。前症大作。請余治之。診得脈弦細而微。手足稍冷。面色青黃不澤。情思不樂。惡人煩擾。飲食減少。微飽則心下痞悶。嘔吐酸水。每發作。冷汗時出。氣促不安。須人額相抵而坐。少時易之。予思內經。中氣不足。溲便爲之變。腸爲之苦鳴。下氣不足。則乃爲痿厥。心悞。又曰寒氣客於腸胃之間。則卒然而痛。得熱則已。非甘辛大熱之劑。則不能愈。遂製此方。經曰寒淫於內。治以辛熱。佐以苦溫。附子乾薑大辛熱。溫中散寒。故以爲君。草豆蔻益智仁辛苦溫。治客寒犯胃爲佐。脾不足者。以甘補之。炙甘草甘溫。白朮陳皮苦溫。補脾養氣。水挾木勢。亦來侮土。故作急痛。桂辛熱。以退寒水。芍藥味酸。以瀉木來尅土。吳茱萸苦熱。瀉厥氣上逆於胸中爲使。三服大勢去。痛減半。至秋先灸中脘三七壯。以助胃氣。次灸氣海百餘壯。生發元氣。滋榮百脈。以還少丹服之。喜飲食。添肌肉。皮膚潤澤。明年春灸三里二七壯。乃胃之合穴。亦助胃氣。引氣下行。又以芳香助脾。服育氣湯。加白檀香平治之。戒

以懲忿窒慾。慎言語。節飲食。一年而平復。

金匱治心痛徹背寒冷者方

赤石脂

乾薑

蜀椒

各四分

附子

炮二分

烏頭燒一分

右爲末。蜜丸梧子大。先食服一丸。日三。不住。稍增之。

余嘗治一香山人。心痛。問之。則服藥已一月矣。向左臥則右痛。向右臥則左痛。仰臥則痛在前。偃臥則痛在背。坐立則痛在上。無一刻少安。余曰。此中虛。與以小建中湯。重用錫糖。炙甘草。四劑而安。鶴年

### 心虛痛

良方妙香散 治心氣不足。時時疴痛。按之則止。虛煩少睡。夜多盜汗。常服補益氣血。養心止痛。

黃耆炙薑汁

山藥

茯苓去皮

茯苓去皮

遠志去心炒

人參

桔梗

甘草炙各

木香煨二錢半

辰砂三錢另研

麝香一錢另研

右爲細末。每服二錢。不拘時。按此方宜去茯苓。麝香。蓋心氣已虛。惟宜收養。有木香之通。不宜更益麝香之散。有茯苓之淡。不必加以茯苓之滲也。昔人云。按之痛止者爲虛。宜以酸收之。勿食辛散之劑。又云。病久氣虛血損。及素作勞。羸弱之人。患心痛者。皆虛痛也。有服大補之劑而愈者。不可不知。

### 氣刺心痛

氣針丸 治久積風壅。心胸築痛。兩脇心胸。有似針刺。六脈沉伏。按之手足不可近。此藥屢試神驗。常服疏滯氣。止刺痛。

木香

檳榔

青皮

陳皮

大黃各四兩

牽牛取頭半斤半生半熟

蜜丸。梧子大。每服三十丸。薑湯送下。食前量虛實加減。

新定烏附丸 治氣刺攻痛。但忍氣即發者。



天台烏藥二兩

白豆蔻五錢

沉香五錢

茯苓一兩

香附四兩

甘草一兩

右爲細末。煉蜜丸。彈子大。每服一丸。食後淡生薑湯化下。

一粒金丹 治氣痛。

鴉片二錢

阿魏一錢

木香

沉香各五

牛黃二分

右將沉香、木香、牛黃爲末。以鴉片、阿魏放碗內。滴水溶化。和蜜爲丸。菴豆大。金箔爲衣。每一粒。熱氣痛。涼水下。冷氣痛。滾水下。

神保丸 治諸氣疰痛。心腸腹脇腎氣皆治。

全蠍七個

巴豆十粒去霜

木香

胡椒各二錢半

硃砂二錢半內  
砂一半爲衣

右爲末。蒸餅和丸。麻子大。硃砂爲衣。每五七丸。薑湯溫酒任下。

血瘀心痛

拈痛丸奇效下同

五靈脂去淨砂子

蓬莪朮煨

木香

當歸各等分

蜜丸梧子大每服二十九丸食前橘皮湯送下。

手拈丸

延胡索

五靈脂

草果

沒藥各等分

右為細末。每服三錢。熱酒調下無時。

經驗失笑散

五靈脂淨好

蒲黃等分

右為末。每服二錢。用黃醋一杓熬成膏。再入水一盞煎至七分熱服。

丹溪云。死血作痛。脈必澹。作時飲湯水下。或作呃。壯人用桃仁承氣湯下之。弱人用失笑散和之。或以歸尾、川芎、牡丹皮、蘇木、紅花、延胡索、桂心、桃仁泥、赤麝、番降香之屬煎成。童便酒、韭汁大劑飲之。

### 虻咬心痛

蕪荑散 治大人小兒。虻咬心痛。經云。蟲貫心則殺人。欲驗之。大痛不可忍。或吐青黃綠水涎沫。或吐蟲出。發有休止。此是虻咬心痛也。宜速療之。

蕪荑

雷丸各半

乾漆搗碎炒令煙盡一兩

右為細末。每服三錢。溫水七分盞調和服。不拘時。甚者不過三服。小兒每服半錢。

烏梅丸 治藏寒。虻蟲動作。上入膈中。煩悶嘔吐。時作時止。得食即嘔。常自吐涎。有此症候。謂之虻厥。此藥主之。

烏梅三百個

黃柏炙

細辛去苗

肉桂

附子炮去皮

人參各六兩

乾薑炮十兩

當歸

蜀椒去目及閉口者微炒出汗各四兩

黃連十六兩

右異搗篩。合治之。以醋浸烏梅一宿。去核蒸之。五斗米下飯熟。搗成泥。和藥令相得。內臼中。加煉蜜杵二千下。丸如梧子大。每十五丸。溫米飲。食前下。

化蟲丸 治寸白蟲。

黃丹半兩

錫灰一兩

定粉二兩

右同研極細末。每服一錢。先燒猪肉五文。吃了。後以生油一口許調藥服。至晚取下。婦人有胎不可服。

### 胃脘痛

#### 痰積胃脘痛

#### 丹溪白螺殼丸

白螺殼火煨

滑石

蒼朮

山梔子

紅麴炒

香附童便浸

南星炮製各一兩

青皮

枳殼麸炒

木香

半夏

砂仁各半兩

桃仁炒去皮尖三十粒

右爲末。春加川芎。夏加黃連。

秋加吳茱萸。用生薑汁浸蒸餅爲丸。茱萸大。

每服五十丸。

#### 海蛤丸丹溪

治痰飲心痛。

海蛤燒灰研極細過數日火毒散用之

瓜蒌仁帶穰同研

右以海蛤粉入瓜薑內。乾濕得所爲丸。每服五十丸。  
加味二陳湯 治痰飲食積。胃脘作痛。或脹或痞。

陳皮

半夏

茯苓

炙草

枳實

川連

滑石

木通

山查

乾葛

此中焦溼痰蘊熱。痞滯不通。以二陳加連、枳、山查。清滌中宮。妙在乾葛升引清氣。滑石、木通蠲除濁氣。清升濁降。痛脹自除。

### 肝乘胃痛

新定吳茱萸湯 治胃脘痛不能食。食則嘔。其脈弦。

人參

吳茱萸

川連

茯苓

半夏

宣州木瓜

右作一服。水薑煎。

### 腎逆胃痛

新定桂苓湯

桂一錢

茯苓三錢

人參一錢

甘草五分

芍藥一錢

生薑五分

右作一服。水煎空心服。

按古法有生薑汁和五苓散爲丸。空心茴香湯下。蓋亦取泄水氣。益上氣之意。愚謂白朮之滯。不如人參之益胃。薑汁之辛。不如生薑之散逆。且猪澤亦過傷腎氣。不如芍藥之攝水下。行也。

腹痛

寒冷腹痛

腹痛屬寒冷者。多是口食寒物。鼻吸冷氣。脈瀋氣阻。則爲疼痛。其症四肢逆冷。唇口變青。其脈沉或緊。經云。寒氣客於脈中。則脈寒。脈寒則縮絃。縮絃則脈絀急。絀急則外引小絡。故卒然而痛。得炅則痛立止。或吐清水。所謂寒氣客於腸胃。厥逆上出。故痛而嘔也。宜溫散或溫利之。

本事溫脾湯

厚朴

乾薑

甘草

桂心

附子各二兩

大黃四錢

右咬咀各一兩。水二鍾。煎六分。頓服。治錮冷在腸胃。泄瀉腹痛。宜先取去。然後調治。不可畏虛以養病也。

溫脾丸外臺

大黃

麥芽

乾薑各三兩

厚朴炙

當歸

附子炮

甘草炙

桂心

人參

枳實炙各一兩

蜜丸如梧子大。十五丸。日三。增至二十丸。按溫脾丸。大黃多而用蜜丸少服。急法緩用也。溫脾湯大黃少而作湯服。且不用參歸。緩法急用也。總之。病非實熱。法不可下。而錮冷在藏。不下則病不去。故權宜於緩急之間如此。若其中無積滯者。則但宜緩之而已。不必下也。或挾虛者。則兼補之。

外臺附子湯

附子炮

甘草炙各二兩

宿薑一兩

倉米半升

半夏製四兩

白朮三兩

大棗二十枚

水一斗。煮三升。去滓分三服。治虛冷腹痛佳。

外臺建中湯。治氣血虛寒。不能榮養心脾。其痛連綿不已。而亦無急暴之勢。按

之則痛反緩。或按之便痛。重按却不甚痛。此正是虛症。經所謂虛者聶辟。氣不

足。按之則氣足以溫之。故快然而不痛是也。

黃耆

白芍各三兩

甘草炙

桂心各二兩

生薑六兩

半夏五兩

大棗十二枚

飴糖十兩

右以水八升。煮取三升。分三服。

治當臍痛便溺不利怯寒脈虛者方。

熟地三錢

肉桂五分

白芍五錢

桂枝五分

當歸

茯苓各一錢

水煎服。



治臍下冷撮痛陰內冷如冰延胡苦楝湯方。

熟地二錢

川楝

延胡各五

附子

肉桂各七

炙甘草一錢

右都作一服。水四盞。煎至一盞。去滓稍熱服。空心食前。

溫中湯 治戊土已衰不能運化。又加客寒聚為滿痛。散以辛熱。佐以苦甘。以淡

泄之。氣溫胃和。痛自止矣。

厚朴薑製一兩

橘皮去白一兩

乾薑七錢

甘草炙

草豆蔻

茯苓去皮

木香各半兩

右為粗末。每服五錢。水二盞。薑三片。煎一盞。去渣溫服。食前。

局方神保丸

全蠍

巴豆各十個取霜

木香

胡椒各二錢五分

右為末。入巴豆研勻。湯化蒸餅丸如麻子大。硃砂為衣。每服五七丸。此藥大能宣通藏府。治諸積氣為痛。

熱痛

熱痛者。二便閉赤。喜冷惡熱。經云。熱留於小腸。腸中痛。瘴熱焦渴則堅。乾不得出。故痛而閉不通也。宜寒宜下。勿遽補也。

肘後療卒腹痛方。

掘土作小坑。以水滿中。攪取汁飲之。差。

統旨清中湯

黃連

山

梔炒各二錢

陳皮

茯苓

各半錢

半

夏一錢炮七次薑湯

草豆蔻仁搥研

甘

草炙各七分

水二鍾。薑三片。煎八分。食前服。

### 冷熱痛

冷熱痛者。經所謂寒氣客於經脈之中。與炁氣相搏。則脈滿。滿則痛而不可按也。寒氣稽留。熱氣從上。則脈充大而血氣亂。故痛甚不可按也。治宜兼寒熱而調之。一方

草豆蔻七分

炒山梔二錢

右二味爲末。以薑汁調粥丸服之。

苦楝丸 治奔豚小腹痛。

川楝子

茴香各二兩

附子去一兩皮臍

右三味酒二升。煮盡爲度。焙乾細末之。每藥末一兩。入延胡索半兩。全蠍一十八個。炒丁香一十八粒。別爲末和勻。酒糊丸梧子大。溫酒下五十丸。空心服。

### 風痛

風痛者。邪風內淫腸胃。與正氣相搏而痛也。其症惡風。脈弦。腹中奔響急痛。仲景所謂陽脈濇。陰脈弦。法當腹中急痛。先與小建中湯。不差者。與小柴胡湯是也。

小柴胡湯

柴胡

黃芩

半夏

甘草炙

人參

乾薑

大棗

水煎服。按此方宜照仲景加減法。腹痛者。去黃芩。加芍藥。和劑抽刀散。

川白薑

五兩判入巴豆肉一錢一字同炒至豆黑去豆

良薑

五兩入斑蝥二十個同炒至蝥黑去蝥

石菖蒲

五兩半不炒

糯米

六兩一錢炒黃

右爲末。每服二錢。空心溫酒調下。

仁齋直指云。有一田夫醉飽之餘。露星取快。一枕天明。自此脾疼攻刺。百藥罔效。淹淹數載。後遇至人。授以抽刀散。數服頓愈。則知風露之根。入在脾胃。良薑、菖蒲。爲能散其邪。巴蝥借氣。爲能伐其根。觀此。可以通一舉萬矣。然而痛不復作。養脾之劑。獨不可繼。是而調理之乎。療病如濯衣。必去其垢污。而後可以加漿飾。醫者意也。請借是以爲喻。

### 食積痛

食積痛者。經所謂飲食自倍。腸胃乃傷也。其症惡心惡食。吞酸噯腐。其脈多沉實。當分三焦而治。在上吐之。在中消之。在下下之。吐之方

燒鹽半斤。溫湯五六升。和服探吐。

吳鶴臯云。凡腹痛連脇膈。手足冷。脈沉伏者。多是飲食痰飲填塞至陰抑遏。少陽上升之氣。不得敷暢。兩實相搏。令人自痛。肢冷脈伏。皆陽氣閉藏之象也。經曰。木鬱達之。故用吐法。鹹能莩堅。故用燒鹽。

消之方

取其餘類燒作末。酒服方寸匕。如所食肉卽以肉燒作末。然必得

又 治雜食瘀實不消。心腹堅痛方。

白鹽一升。以水三升煎服。吐下卽定。

下之方

川大黃

乾薑

巴

豆去皮心研壓

蜜丸如小豆大。溫水下一丸。實者加一丸。未知服三丸。腹中鳴轉下行便愈。此治寒飲食過傷。心腹卒痛。如錐刺之狀。若傷濕熱之物。不得化而悶亂便悶者。宜厚朴三物湯。或枳實導滯丸良。

厚朴三物湯

厚朴二兩炙

枳

實二枚大

大

黃四兩

水二斗。煮枳實、厚朴二味。至五升。下大黃。煮取二升。溫服一升。以利爲度。

### 死血痛

死血痛者。多從鬱怒。及飽食後急走得之。其痛必有定處。其脈必芤澹。微則和之。甚則下之。

### 桃仁承氣湯

桃仁五十粒  
去皮尖

桂枝二兩  
去皮

大黃四兩

芒硝二兩

甘草二兩

右五味。以水七升。煮取二升半。去滓。內芒硝。更上火。微沸下火。先食溫服五合。日三服。當微利。虛者加地黃蜜丸以緩除之。

### 一方

婦人油頭髮。燒如灰。細研篩過。溫酒調下二錢。元豐中丞相王郇公。小腹痛。國醫治之。百藥不止。服此卽愈。

### 腰痛

# 風虛腰痛

風虛腰痛者。腎虛而風冷乘之也。其尺脈虛浮而痛多抽掣。或拘急且痠。而上連脊背。不時速治。喜流入脚膝。爲偏枯冷痺緩弱之疾。  
獨活寄生湯寶鑑

獨活 三兩

細辛

牛膝

桑寄生

秦艽

茯苓

白芍

人參

熟地黃

防風

杜仲

川芎

當歸 各二兩

桂心

甘草

每服五錢。水煎空心服。

甘豆湯直指 治腎虛內蓄風熱。腰痛或大小便不通。

生甘草 二錢

黑大豆 二合

加生薑七片。水煎服。

治腎藏風攻。至脚膝痛。

連珠甘遂一兩

木鼈子

一個雄去殼一個雌去殼

右爲末。獺猪腰子二個破開。藥末一錢摻勻。溼紙裹數重。慢火煨熱放溫。五更初細嚼米飲下。如積多則利多。少則少也。宜軟飯將息。若患一脚。卻看左右。如左脚用左邊腰子。右用右邊者。藥末止一錢。壬子年在毘陵。有馬姓人鬻酒。久不見。因詢其親云。宿患腎藏風。今一足發腫如瓠。自腰以下。巨細通爲一律。痛不可忍。欲轉側。必兩人扶持方可動者。欲以鉸刀決之。予曰未可。予有藥。當合以贈。如上法服之。辰巳間。下膿如水晶者數升。即時痛止腫退。一月拄拐而行。予再以赤烏散。令塗貼其膝方愈。後十年過毘陵。牽其子列拜以謝云。向年脚疾。至今不復作。雖積年腎藏風。併已失去。今健步自若矣。經云。邪之所湊。其氣必虛。留而不去。其病則實。若不決而去之。而欲以補藥攻疾。非徒無效而已也。余讀本事方。有取乎此。故備錄如右。

### 溼冷腰腹痛

溼冷腰痛者。坐臥冷溼。久久得之。金匱所謂腎著是也。其症痛而冷重。遇陰或久



坐則甚。腎著湯主之。

腎著湯

生附湯

附子生一

蒼朮炒

杜仲

薑汁炒

生乾薑

白朮

茯苓

牛膝

酒浸

厚朴製

甘草炙各二兩

右剉每三錢薑四片棗二枚食前服。

牽牛丸 治冷濕流注腰疼不可屈伸。

黑牽牛

延胡索微炒

補骨脂三味另研另搗另

右煨蒜研膏丸如桐子大每服五十丸食前葱酒鹽湯任下。楊氏家藏方

子和禹功散 治水氣流注腰痛。

黑牽牛四兩

茴香炒一

右爲末薑汁調一二錢服。

溼熱腰痛

脾有濕熱。傳之於腎。得之醇酒厚味。內傷中氣。濕熱蘊積。流注腎經。令人沉重疼  
痛。遇天陰或久坐而發。其脈緩者是也。

### 東垣蒼朮湯

蒼朮五錢去濕止痛 柴胡三錢行經 防風一錢半去風勝濕 黃柏一錢半去熱止痛

水二鍾。煎至一鍾。空心食前。

### 丹溪治濕熱腰腿痛方

龜版酒炙二兩 蒼朮 黃柏酒炒 蒼耳

威靈仙酒浸一兩 側柏半兩

右爲末。酒糊爲丸。每用黑豆汁煎四物湯。加陳皮、甘草、生薑煎湯下。一方有白芍、知母。

### 腎虛腰痛

腎虛腰痛者。精氣不足。足少陰氣衰也。足少陰者。腎之經也。其脈貫脊屬腎。抵腰  
中。精氣不足。則經脈虛而痛。其症形羸氣少。行立不支。而臥息少可。無甚大痛。而

悠悠戚戚。屢發不已。經云。腰者腎之府。轉搖不能。腎將憊矣。此之謂也。丹溪云。腎虛者。其脈大。

本事麋茸丸

麋茸鹿耳亦可

兔絲子製各一兩

舶茴香五錢

右爲末。以羊腎二對。陳酒煮爛去膜。研如泥。和丸桐子大。陰乾。如羊腎少太乾。以酒糊佐之。每服三五十九。溫酒或鹽湯下。

青娥丸

破故紙炒香四兩

杜仲淨入兩

胡桃肉十兩

右爲末。酒糊丸梧子大。每三五十丸。空心溫酒送下。蜜丸亦可。百一補髓丹。有鹿茸二兩。沒藥一兩。

無比山藥丸

赤石脂煨

茯苓去皮

山茱萸去核

巴戟去心

牛膝酒浸

熟乾地黃酒浸

澤瀉各一兩

兔絲酒浸

杜仲去皮切

山藥各三兩

五味子六兩

肉苁蓉酒浸四兩

蜜丸梧子大。每服三十丸。空心溫酒。或鹽湯下。  
余治一姓顧婦女。患腎虛腰痛。用猪腰二枚。破開納鹽水炒。杜仲末縫好。煮熟去藥。任意服之而愈。

### 食積腰痛

食積腰痛者。食滯於脾而氣傳於腎也。夫腎受脾之精而藏焉者也。若食不消。則所輸於腎者。非精微之氣。爲陳腐之氣矣。而腎受之。亂氣傷精。能無痛乎。亦有醉飽入房太甚。酒食之積。乘虛流入少陰。腰痛難以俯仰者。疏瀹其源。澄清其流。此大法也。或云四物合二陳。加麥芽、神麴、杜仲、黃柏、官桂、砂仁、葛花、桔梗之類。神麴酒。

陳久神麴一塊。燒通紅。淬老酒。去神麴。通口吞青蛾丸。兩服頓愈。  
青蛾丸 見前

### 瘀血腰痛

瘀血腰痛者。閃剝及強力舉重得之。蓋腰者一身之要。屈伸俯仰無不由之。若一有損傷。則血脈凝滯。經絡壅滯。令人卒痛。不能轉側。其脈濇。日輕夜重者是也。  
茴香酒

破故紙炒香

茴香炒

辣桂等分

右爲末。每服二錢。熱酒調。食前。故紙主腰痛。主行血。仁齋

和劑復元通氣散 治閃剝腰脇痛。

舶上茴香炒

穿山甲

蛤粉炒  
各二兩

延胡索醋炒

白牽牛炒

甘草炙

陳皮

去白各  
一兩

南木香半兩

右爲末。每服一錢。熱酒調下。食前。

### 脇痛統論

經云。左右者。陰陽之道路也。又云。肝生於左。肺藏於右。所以左屬肝。肝藏血。肝、陽也。血、陰也。乃外陽而內陰也。右屬肺。肺主氣。氣、陽也。肺、陰也。乃外陰而內陽也。由陰陽五藏氣血分屬。是以左脇之痛。多因留血。右脇之痛。悉是痰積。豈可一概而

言乎。雖痰氣固亦有流注於左者。然必與血相搏而痛。不似右脇之痛。無關於血也。

### 肝鬱脇痛

肝鬱脇痛者。悲哀惱怒。鬱傷肝氣。兩脇骨疼痛。筋脈拘急。腰脚重滯者是也。枳殼煮散

枳殼四兩先煮

細辛

桔梗

防風

川芎各二兩

葛根半兩

甘草一兩

右爲粗末。每服四錢。水一盞半。薑棗同煎至七分。去滓。空心食前溫服。

悲哀煩惱。肝氣致鬱。枳殼能通三焦之氣。故以爲君。肝欲散。故細辛、川芎、桔梗之辛以散之。肝苦急。故用甘草之甘以緩之。其用防、葛者。悲則氣斂。借風藥以張之也。

戴云。脇痛身體帶微熱者。本事枳殼煮散良。若只是脇痛。別無他症。其痛在左。爲肝經受邪。宜川芎、枳殼、甘草。其痛在右。爲肝移病於肺。宜片薑黃、枳殼、桂心、甘草。

此二方出嚴氏濟生續集。

柴胡疎肝散

柴胡

陳皮

醋炒各二錢

川芎

芍藥

枳殼

香附

錢各半

炙草五分

水煎食前服。

調肝散 治鬱怒傷肝發為腰痛。

半夏

製三分

辣桂

宣木瓜

當歸

川芎

牛膝

北細辛各二分

石菖蒲

酸棗仁炒去皮

甘草炙各一分

右剉細每服三錢薑五片棗二枚煎服仁齋直指

良方香橘湯 治七情所傷中脘不快腹脇脹滿。

香附

橘紅

半夏薑製各三錢

炙草一錢

右作一服水二鍾生薑五片紅棗二枚煎至一鍾食遠服。

肝虛脇痛

肝虛者。肝陰虛也。陰虛則脈絀急。肝之脈貫膈布脇肋。陰虛血燥。則經脈失養而痛。其症脇下筋急。不得太息。目昏不明。爪枯色青。遇勞即甚。或忍飢即發者是也。滑氏補肝散

酸棗仁錢四

熟地一錢

白朮錢一

當歸

山茱萸

山藥

川芎

木瓜錢各半

獨活

五味各三分

右爲末。每服五錢。水煎服。

補肝湯  
肝體陰而用陽。此以甘酸補肝體。以辛味補肝用。加獨活者。假風藥以張其氣也。一方有人參、黃耆、牛膝、石斛、柏子仁、桃仁、無山藥、獨活、五味。

乾地黃三錢

白芍一錢

當歸

陳皮錢各一

川芎七分

甘草五分

右六味。都作一服。水煎。此亦甘酸辛。兼補體用之法。一方阿膠爲丸。梧子大。每服二錢。空心白滾湯下。



一方 雞子黃一枚。調吞。日二服。  
以上二方。皆甘酸補肝體之法。

### 腎虛胸脇痛

房勞過度。腎氣虛弱。羸怯之人。胸脇之間。多有隱隱微痛。此腎虛不能納氣。氣虛不能生血之故。氣與血。猶水也。盛則流暢。少則壅滯。故氣血不虛。則不滯。既虛則鮮有不滯者。所以作痛。宜用熟地。破故紙之類補腎。阿膠。芎歸之類和血。若作尋常脇痛治。即殆矣。戴云。曾有一人。脇痛連膈。進諸藥味。并大便導之。其痛殊甚。後用辛熱補劑。下黑錫丹方愈。此乃腎肝虛冷作痛。愈疎而愈虛耳。

### 肝火脇痛

肝火盛而脇痛者。肝氣實也。其人氣收善怒。經云。肝病者。兩脇下痛。引少腹。善怒。又云。肝氣實則怒是也。其脈當弦急數實。其口當苦酸。其痛必甚。或煩熱或渴。或二便熱澀不通。

龍薈丸方 丹溪云。治肝火脇痛要藥。

龍膽草

當歸並酒洗

梔子

黃連

黃柏

黃芩各一兩

大黃酒浸

青黛

蘆薈各五錢

木香二錢

麝香五分

蜜丸小豆大。薑湯下二三十丸。

元珠云。一人性躁。夏月受熱。忽左脇間痛。皮膚紅如碗大。發水泡瘡三五點。脈弦數。醫作肝經鬱火治之。用黃連、青皮、香附、川芎、柴胡之類。進一劑。痛益甚。且增熱。皮紅大如盤。水泡瘡又加至三十餘粒。醫以水調白礬金末敷。於前劑加青黛。龍膽進之。夜痛益甚。脇中如鉤摘之狀。次早視之。紅已及半身矣。水泡又增至百數。後詢黃古潭。乃以大瓜薈一枚。連皮搗爛。加粉草二錢。紅花五分。藥進而痛止。蓋前藥苦寒。益資其燥。瓜薈之爲物。柔而潤滑。於鬱不逆。甘緩潤下。故奏效捷也。

### 汚血脇痛

汚血脅痛者。凡跌撲損傷。汚血必歸脅下故也。其症晝輕夜重。或午後發熱。脈短

澀或搏。其人喘逆。經云。肝脈搏堅而長。色不青。當病墜若搏。因血在脅下。令人喘逆是也。

東垣復元活血湯

柴胡半兩

瓜蒌根

當歸錢各三

紅花

甘草

川山甲炮各二錢

大黃酒浸一錢半

桃仁去皮尖研如泥五十枚

右除桃仁外。剉如麻豆大。每服半兩。水盞半。酒半盞。同煎至七分。去渣。大溫服之。以利爲度。

鍼經云。有所墮墜。惡血留內。若有所大怒。氣上而不積於脅下。則傷肝。肝膽之經俱行於脅下。經屬厥陰少陽。宜以柴胡爲君。以當歸和血脈。又痛者急也。甘草緩其急。亦能生新爲臣。穿山甲、瓜蒌根、桃仁、紅花破血潤血爲之佐。大黃酒製以盪滌敗血爲之使。氣味和合。氣血有所歸。痛自定矣。

芍藥散 治婦人脇痛。

白芍藥

延胡索

肉桂各一兩

香

附二兩醋一升鹽半兩同煮

乾

右爲細末。每服二錢。不拘時。白湯下。

### 息積

內經曰。病脅下滿氣逆。二三歲不已。病名曰息積。夫消息者。陰陽之更事也。今氣聚於脇下。息而不消。積而不散。故滿逆而爲病。然氣不在胃。故不妨於食。特害於氣而已。治宜導引服藥。藥不可獨治。蓋導引能行積氣。藥力亦藉導引而行。故也。

聖濟  
同下

推氣散 治右脇痛。脹滿不食。

片薑黃

枳殼

桂

心各五錢

炙

草二錢

右爲細末。每服二錢。薑棗湯調下。食遠服。

赤茯苓湯 治息積。脇下氣逆滿悶。

赤茯苓

桂心

陳

皮炒半兩

高良薑一兩

大腹皮五錢

吳茱萸三分

甘

草一分

水煎三錢。空心溫服。日二。

白朮丸

白朮陳土炒

枳實熬炒

桂心各半

人參

陳皮去白炒

甘草蜜炙

桔梗炒各一兩

為末。蜜丸梧子大。空心酒下。三十丸日二。

胸痛附

生地黄五斤。絞取汁。微火煎三沸。投白蜜一升。再煎取三升。每服半升。日三。

四肢腫

經云。結陽者。腫四肢。河間云。四肢者。諸陽之本也。陽結故不得行於陰。陽脈不行。故留結而為腫也。

犀角湯

犀角屑

元參

連翹

柴胡各半兩

麥門冬

芒硝各一兩

升麻

木通各三錢

沉香

射干去毛

甘草炙各一分

右爲末。每服三錢。水一大盞。同煎至八分。食前去滓溫服。余曾治手十指獨腫大者。與此藥愈。有傷寒後手足腫而赤者。與此亦愈。但去柴胡。沉香。芒硝不用。加枳殼一味。蓋柴胡散氣。沉香行氣。皆所以通留結之陽。然升柴不必並行。而沉香之溫燥。不如枳殼之和利也。芒硝瀉陽明之陽。以其人便澹。故去之耳。

### 顫振

顫振。手足動搖。不能自止。廼肝之病。風之象。而脾受之也。肝應木。木主風。風爲陽。陽主動。脾應土。土主四肢。四肢受氣於脾者也。土氣不足。而木氣鼓之。故振振動搖。所謂風淫末疾者是也。

按。手足爲諸陽之本。陽氣不足。則四肢不能自主。而肝風得以侮之。肝應木。熱生風。陰血衰則熱而風生焉。故犯此症者。高年氣血兩虛之人。往往有之。治之極難奏功。

### 脚氣之源

內經曰。暑勝則地熱。風勝則地動。濕勝則地泥。寒勝則地裂。寒暑風濕之氣。雖本乎天。而皆入乎地。而人之足履之。所以往往受其毒也。始從足起。漸及小腹。甚乃上攻心胸。若不急治。遂至殺人。况五藏經絡。脾與肝腎。皆從足指上走腹中。故脚氣之候。或嘔吐惡食。或腹痛下利。或二便閉塞不通。或胸中怔忡不欲見明。或精神昏憤。錯語善忘。或頭疼壯熱。或身體冷痛。時覺轉筋。或少腹不仁。或髀腿頑痺。或百節攣急。或緩縱不隨。症狀不一。以其自脚得之。故均謂之脚氣。而又有乾濕之異。乾脚氣之狀。血脈痞澀。皮膚痛痺。脛細痠疼。食減體瘦。藏府秘滯。上衝煩悶。濕脚氣之狀。脚先腫滿。或下注生瘡。浸淫滋水。或上攻心腹。咳嗽喘急。面浮膝腫。見食嘔吐。為病不同。蓋陰陽體藏所分。其為風毒濕氣則一。要當隨其病症所在而治之。

脚氣痺攣

脚氣痺攣者。寒氣多也。寒則筋急。熱則縱。寒則脈閉。熱則流。寒搏於筋脈。則攣痺不能轉移。艱於步履。甚則不可屈伸也。

肉蓯蓉丸

蓯蓉

牛膝

天麻

黃耆

首烏

木瓜

各十兩酒五斤浸一日晒入後藥

狗脊

續斷

草薢

各三兩

共末用木瓜三枚剝空入青鹽一兩開口飯上蒸研成膏入上件和丸如乾加

酒糊丸梧子大鹽湯酒任下三十丸

石南丸 脚氣攣痺去風溼活血絡益元氣

石南

白朮

牛膝同浸上

天麻

防風

枸杞

黃耆二兩

鹿茸

桂一兩

共爲末用木瓜一枚去皮瓢蒸爛搗膏入糊丸梧子大酒下三五十丸

楊氏家藏方 治寒濕脚氣腿膝疼痛行步乏力

胡蘆巴酒浸一宿焙破故紙炒香各四兩爲末以木瓜切頂去瓢安藥在內令

滿用頂合住簽之爛蒸搗丸梧子大每服七十丸空心溫酒下



脚氣脚膝腫痛

脚膝腫痛者。風寒濕氣客於氣血。不能宣通。則壅滯爲腫。凝塞爲痛。人之氣血得溫則行。遇寒則止。故也。又邪氣初中。但在於下而未及乎上。所謂傷於濕者。下先受之也。疏導其下。固護其中。法斯善矣。

防己湯

防己

猪苓

郁李仁

檳榔

木通

枳殼

紫蘇五錢

赤茯苓

炙草一兩

薑水煎四錢。一方有白朮。

經驗加味二妙丸 治兩脚濕痺疼痛。或如火燎。從足跗熱起。漸至腰胯。或麻痺痿軟。皆是濕熱爲病。此藥主之。

蒼朮四兩米泔浸

黃柏二兩酒浸晒乾

川牛膝去蘆一兩

防己

當歸尾

川萆薢

龜版酥炙各一兩

右爲細末。酒煮麵極熟。糊丸如梧子大。每一百丸。空心薑鹽湯下。

檳榔散 治風毒脚氣腫痛。

橘葉

杉木節各一握

右用童子尿一盞。醇酒半盞。煎六分。濾清。乘熱調檳榔末二錢。仁齋

### 脚氣少腹不仁

金匱云。脚氣上入少腹不仁。腎氣丸主之。蓋濕淫之氣。自下侵上。腎虛陽弱。不能禦之。則漸入少腹。面痺著不仁矣。腎氣丸理腎之氣者也。腎氣得理。邪氣自上。而不仁者仁矣。

腎氣丸

熟地黄八兩

黃肉

山藥各四兩

茯苓

澤瀉

丹皮各三兩

附子製

肉桂各一兩

右八味末之。煉蜜爲丸。梧子大。每服三錢。空心淡鹽湯下。

三因吳萸丸 治脚氣入腹。腹中不仁。喘急欲死。

吳茱萸湯洗七次

木

瓜去瓢切片日乾等分

右爲末。酒糊丸梧子大。每服五十丸至百丸。酒飲任下。或以木瓜蒸爛。研膏爲丸尤妙。

### 脚氣上氣

脚氣上氣者。風毒濕氣循經上入於肺故也。肺主氣而司呼吸。邪氣入之。則氣道奔迫。升降不順。故令上氣喘滿。甚者不得偃臥也。

桑白皮湯

桑白皮炙二兩

陳皮一兩

葶

藶苦者妙一兩

杏仁去皮尖一兩

共爲末。水煎。薑棗湯入末三錢。再沸溫服。當利一二行。腫氣下即差。三五日服一次。一方無杏仁。

活人桑白皮散

桑白皮

郁李仁各一兩

赤苓二兩

木香

防己各一兩半

紫蘇子

木通

檳榔

青皮各七錢半

每服三錢。薑三片。水煎。

### 脚氣衝心

脚氣衝心之候。令人心胸煩悶。嘔吐氣急。甚者脈絕不出。欲死也。蓋風濕毒氣。初從足起。久而不治。則上衝心胃之分。最爲急候。下氣除濕。泄毒。不可緩也。

吳茱萸湯

吳茱萸半兩

木瓜一兩

檳榔二兩  
心者佳

水煎五錢。入竹葉一把。以快利爲度。一法。咬咀。每服八錢。水一中盞半。生薑五片。煎至一盞。去滓。溫服。無時。

蘇長史茱萸湯

吳茱萸六升

木瓜二枚

水一斗三升。煮取三升。分三服。如人行十里久。進一服。或吐或汗。或利。或大熱。悶卽差。

木香湯

青木香

生黑豆皮二兩

大黃炒

紫雪一兩

水煎五錢。入紫雪三錢。分二服。頃再服。當下燥糞。

杉木節湯

杉木節

橘葉一升

大腹連皮枚

童便三升

同煮取一升半。分二服。如一服得快利。即止。唐柳宗元患脚氣。夜半痞絕。左脇有塊如大石且死。困塞不知人。三日矣。家人皆號哭。滎陽鄭洵美傳此方服之。半日頃。氣通立愈。

犀角散 治脚氣衝心。煩喘悶亂。頭痛口乾。坐臥不得。

犀角屑

枳殼去穢炒

沉香錢七

紫蘇梗葉

檳榔

麥冬去心

赤苓去皮各

木香

防風各半

石膏研細

右咬咀。每服八錢。水一中盞半。煎至一大盞。去渣。入淡竹瀝一合。更煎一二沸。溫服不拘時。

# 脚氣腫滿漸成水狀

脚氣衝滿。漸成水狀者。邪氣上攻脾腎也。夫脾。土氣也。腎。水氣也。脚氣者。清溼之疾。其氣最易感於脾腎。同氣相求之義也。脾受邪則濕氣不行。腎受邪則水氣不化。水濕二氣。內外合邪。積而成滿。閉而成脹也。

赤苓湯

赤茯苓

防己

桑白皮

陳皮半兩

旋覆五錢

杏仁

麻黃去節

白朮

紫蘇一兩

水煮黑豆汁鍾半。煎藥五錢。薑半分。

## 脚氣差後復發

脚氣差後。邪氣未盡。正氣未復。或觸惱怒。或感風濕。則其疾復發。與前症往往相似。然與前法輒不應。要在隨時令。審氣體而治之。

四斤丸 乾濕脚氣差後常服令永不發。

牛膝

木瓜

肉蓯蓉

天麻 各一

酒五斤。浸一日。晒乾爲末。用浸酒熬膏。丸梧子大。酒下三十丸。

### 痺症統論

內經謂風寒濕三氣。雜至合爲痺。其風氣勝者爲行痺。寒氣勝者爲痛痺。濕氣勝者爲著痺。行痺者行而不定。世稱謂走注疼痛是也。痛痺者疼痛苦楚。世稱謂痛風是也。著痺者著而不移。世稱謂麻木不仁是也。夫痺者閉也。五藏六府之正氣。爲邪所閉。則痺而不仁也。

內經論痺。又有骨筋脈肌皮五痺。大率風寒溼所謂三痺之病。又以所遇之時。所客之處。而命其名。非此行痺痛痺著痺之外。又別有骨痺筋痺脈痺肌痺皮痺也。風寒濕三氣。襲人經絡。入於骨則重而不舉。入於脈則血凝不流。入於筋則屈而不伸。入於肉則不仁。入於皮則寒。久不已。則入五藏。煩滿喘嘔者肺也。上氣噎乾厥脹者心也。多飲數洩。夜臥則驚者肝也。尻以代踵。脊以代頭者腎也。四肢懈惰。

發咳嘔沫者痺也。大抵顯藏症則難治矣。

## 行痺

行痺者。風氣勝也。風之氣善行而數變。故其症上下左右。無所留止。隨其所至。血氣不通而為痺也。治雖通行血氣。宜多以治風之劑。又壽夭剛柔篇云。病在陽者名曰風。病在陰者名曰痺。陰陽俱病名曰風痺。風痺云者。以陽邪而入於陰之謂也。故雖驅散風邪。又必兼以行血之劑。又有血痺者。以血虛而風中之。亦陽邪入陰之所致也。蓋即風痺之症。而自風言之。則為風痺。就血言之。則為血痺耳。若其他風病而未入於陰者。則固不得謂之痺症矣。

四妙散 治行痺走注疼痛。

威靈仙

酒浸焙乾五錢

羯羊角灰

三錢

蒼耳子

半錢

白朮子

炒一錢

細末。每服一錢匕。薑湯下。

如意通聖散 治行痺走注疼痛。

當歸

陳皮

麻黃

炙草



川芎

御米殼

丁香等分

右用慢火同炒令黃色。每服三錢。水煎服。按麻黃之猛。而得粟殼之澀。則內行經絡。不復外發皮毛。故得治痺痛之疾。芎歸所以行血。陳皮、丁香所以行氣。氣血以行。邪氣以去。炙草則和藥緩急之用耳。慢火同炒者。欲令氣味和合。使不相驚而相就也。

丹溪治痺走注疼痛方

蒼朮

黃

柏各酒炒二錢

酒威靈仙

白芥子

羚羊角灰各一錢

生薑一片。水煎服。

摩風膏

草麻子皮一兩去研

草烏頭半兩生用

乳香另錢一

以猪脂鍊去滓成膏。入藥攪勻。以手心摩娑如火之熱。卻以藥塗摩攻注之處。大妙。

痛痺

痛痺者。寒氣偏勝。陽氣少。陰氣多也。夫宜通而塞則為痛。痺之有痛。以寒氣入經而稽遲。泣而不行也。治宜通引陽氣。溫潤經絡。血氣得溫而宣流。則無壅閉矣。河間云。痺氣身寒。如從水中出者。氣血不行。不必寒傷而作。故治痛痺者。雖宜溫散寒邪。尤要宣流壅閉也。

沒藥散 治遍身百節走注疼痛。

沒藥二兩 虎骨四兩

右為細末。每服五錢。酒下。日三服。

一粒金丹

草烏頭剉炒

五靈脂各一兩

地龍去土

木鱉子各半兩

白膠香一兩

當歸去蘆

麝香一錢

右為細末。糯米糊丸。梧子大。每服三丸。溫酒下。服藥後微汗為效。原方有細墨、乳香各半兩。沒藥一兩。八神丹有防風。無當歸、細墨、麝香、沒藥、麵糊丸。酒服十丸。云汗出則癰麻自散。

著痺

著痺者。濕氣勝也。夫濕土氣也。土性重緩。榮衛之氣與濕俱留。則著而不移。其症多汗而濡。其病多著於下。有挾寒挾熱。在氣在血之異。須審而治之。

經驗加味二妙丸。方見脚氣

治濕熱在下在血之劑。兩足溼痺疼痛。或如火燎。從足跗熱起。漸至腰膝。或麻痺痿軟。皆是濕熱為病。此藥主之。一方無草薢。有虎脰骨一兩。

又 治婦人脚疼怕冷。夜劇日輕。

生地 白芍

歸梢各五錢

黃柏炒

黃芩 白朮

蒼朮

陳皮各三錢

牛膝二錢 甘草梢一錢

右分四服。水煎帶熱服。

按、足三陰虛而濕熱襲之。多為脚痛。二朮、二黃並除濕熱。地芍、歸膝益陰。陳皮、甘草和中。陰氣益則熱易清。中氣和則濕易除。與加味二妙同一機軸。除熱蠲痛湯。溼痺氣分多者。用此分而消之。

蒼朮米泔炒

白朮

羌活

茯苓

澤瀉

陳皮錢各一

甘草五分

水煎入薑汁、竹瀝各二三匙。

大羌活湯

羌活

升麻錢各一

獨活七分

蒼朮

防風

甘草

威靈仙

茯苓

當歸

澤瀉各五分

右剉作一服。水二盞煎至一盞溫服。食前後各一服。忌酒、麵、生冷硬物。

羅謙甫云。真定張大素嗜酒。五月間病。手指節腫痛。屈伸不利。膝臄亦然。心下痞悶。身體沉重不欲食。食即欲吐。面色痿黃。精神短少。至六月間求予治之。診其脈沉而緩。緩者脾也。難經云。俞主體重節痛。俞者脾之所主。四肢者脾之所屬。蓋其人素嗜酒。加之時助濕氣大勝。流於四肢。故為腫痛。內經云。諸溼腫滿皆屬脾土。仲景云。溼流關節。肢體煩疼。此之謂也。內經云。溼淫於內。治以苦溫。以苦發之。以淡滲之。又云。風勝溼。羌活獨活苦溫。透關節而勝濕。故以為君。升麻苦平。威靈仙、蒼朮防風苦辛溫發之者也。故以為臣。血壅而不流則痛。當歸辛溫以散之。甘草

甘溫益氣。澤瀉鹹平。茯苓甘平。導濕而利小便。以淡滲之。使氣味相合。上下分散其濕也。

### 熱痺

熱痺者。閉熱於內也。內經論痺有云。其熱者陽氣多。陰氣少。病氣勝。陽遭陰。故爲痺熱。所謂陽遭陰者。府藏經絡。先有畜熱。而復遇風寒濕氣客之。熱爲寒鬱。氣不得通。久之寒亦化熱。則癰痺熾然而悶也。

升麻湯

升麻

射干

甘草

芎

藎各二兩

麥冬

萎蕤

生薑

各三兩

赤小豆

炒三兩

人參二兩

每服四錢。入生地黃汁半合。青竹葉十五片。水煎。溫服。無時。

河間升麻湯 治熱痺。肌肉熱極。體上如鼠走。唇口反縱。皮色變。

升麻三兩

茯苓

人參

防風

犀角

羚羊角

羌活各一

官桂三錢

右爲末。每服四錢。水二盞。薑二片。竹瀝半酒杯。同煎至一盞。溫服無時。  
千金犀角湯 治熱毒流入四肢。歷節腫痛。方見風症

### 腸痺

腸痺者。內經所謂數飲而出不得。中氣喘爭。時發飧泄是也。夫大腸者。傳導之府。小腸者。受盛之官。皆水穀氣味。出入之要路也。今風寒濕三氣痺之。邪氣獨留。正氣遂閉。由是水道不通。糟粕不化。則雖多飲而不得洩便。中氣喘滿。而時發飧泄也。

吳茱萸散 治腸痺。寒濕內搏。腹痛氣急。大便飧泄。

吳茱萸湯炮乾

乾薑炮

甘草炙

肉豆蔻煨各五錢

砂仁

神麴

白朮各一

厚朴薑汁炒

陳皮去白

良薑各二

右爲末。每服一錢。食前米飲下。

胞痺

胞痺者。內經云。少腹膀胱。按之內痛。若沃以湯。澀於小便。上為清涕是也。膀胱藏津液而稟氣化。邪氣痺之。水氣不行。則畜而生熱。積而成實。故按之內痛。若沃以湯而澀於小便也。足太陽之脈。其直行者從顛入絡腦。邪氣不得下通於胞者。必反而上逆於腦。腦氣下灌出於鼻竅。則為清涕也。

腎瀝湯

治胞痺。小腹急痛。小便赤澀。

麥冬

五加皮

犀角一鎊各錢

杜仲

桔梗

赤芍

木通各一錢半

桑螵蛸一個

右水盞半。入羊腎一隻。去脂膜。切細。竹瀝少許。同煎一盞。去滓。空心頓服。日再服。一方有桑皮。無螵蛸。

按。腸痺。胞痺。同為內痺。而胞痺為腎虛。熱壅膀胱。腸痺為風寒濕。著於脾胃。腎瀝湯。用清涼以化熱壅。吳茱萸散。用辛辣以開邪痺也。

腎著湯

治胞痺。小便不通。

# 臂痺

臂痺者。臂痛連及筋骨。上支肩胛。舉動難支。由血弱而風中之也。  
十味劉散

附子

黃耆

當歸

白芍各一錢

川芎

防風

白朮

茯苓

肉桂各七分

熟地酒浸二錢

右水二鍾。薑三片。棗二枚。食後臨臥服。

本事方服桑枝法

桑枝一小升。細切炒香。以水三大升。煎取二升。一日服盡無時。圖經云。桑枝平。不冷不熱。可以常服。療體中風癢。乾燥脚氣。四肢拘攣。上氣眼暈。肺氣嗽。消食利小便。久服輕身。聰明耳目。令人光澤。兼療口乾。仙經云。一切仙藥。不得桑枝煎不服。出抱朴子。政和間。予嘗病二臂痛。服諸藥不效。依此作數劑。臂痛尋愈。治風寒濕痺。四肢麻木不仁。烏頭粥法。



川烏頭生末四錢。用香熟白米作粥半碗。慢火同熬。令稀薄。不要稠。下薑汁一茶匙許。蜜三大匙。攪勻。空心噉之爲佳。如若中濕。更入薏苡米二錢。增米作一中碗服。許氏云。此粥大治手足麻木不遂。腫痛不能舉者。左氏風溼末疾。謂四肢爲末也。脾主四肢。風邪客於肝。則溼脾。脾爲肝尅。故疾在末。此以穀氣引風濕之藥。徑入脾經。故四肢得安。此湯劑極有力。予嘗以此方授人。服者良驗。

癰疽

癰皆屬肝。經云。肝主身之筋膜。故也。有熱。經云。肝氣熱。則筋膜乾。筋膜乾則筋急。而癰是也。有寒。經云。寒多則筋癰。骨痛。又云。寒則筋急是也。有濕熱。經云。溼熱不攘。大筋縵短。小筋弛長。縵短爲拘。弛長爲痿是也。有虛。經云。脈弗榮則筋急。屈伸不利。仲景云。血虛則筋急是也。

治案

楊吉老治歛丞張德操內筋癰。脚不得屈伸逾年。動則令人抱。楊吉老云。此筋病。宜服下三方。一年而愈。

治筋極養血地黃丸。春夏服之。

熟地

蔓荊各一

山萸

黑狗脊炙

地膚子

白朮

乾漆

鱗鱗炒

天雄

車前子各三

萆薢

山藥

澤瀉

牛膝

右為細末。煉蜜為丸。如梧子大。每服五十丸。溫酒下。空心。

治筋痺肢節冷痛。羚羊角湯。秋服。

羚羊角

肉桂

附子

獨活各一兩

白芍

防風

川芎各一

右為粗末。每服五錢。水一盞半。生薑同煎至八分。取清汁服。日可二三服。

治寒冷濕痺。留於筋脈。攣急不能轉側。烏頭湯方。冬服。

大烏頭

細辛

川椒

甘草

秦艽

附子

官桂

白芍各七

乾薑

茯苓

防風

當歸各一

獨

活

錢一兩三分

右爲粗末。每服三錢。水一盞半。棗一枚。同煎至八分。去滓。空心。食前服。

# 金匱翼

清 吳門 尤 怡在涇編集

鄞縣 曹赤電炳章圈校

## 卷七

### 咳嗽統論

經言五藏六府皆令人欬。蓋有自外而入者。風寒暑濕燥火是也。有自內而發者。七情飢飽勞傷是也。風寒諸氣。先自皮毛而入。皮毛者。肺之合。皮毛受邪。內從其所合則欬者。自外而入者也。七情飢飽。內有所傷。則邪上逆。肺爲氣出入之道。故五藏之邪。上觸於肺亦欬。此自內而發者也。然諸風所感。有不爲嗽者。病邪特甚。徑傷藏府。不留於皮毛。七情所傷。亦有不嗽者。病邪尙淺。止留本藏。未卽上攻。所以傷寒以嗽爲輕。而雜病以嗽爲重也。咳嗽一症。其因實多。辨症不明。妄投希效。亦安賴有醫治哉。當按昔賢所述。如咳

嗽有風寒、有火、有勞、有痰、有肺脹、風寒者、鼻塞聲重、惡風寒是也。宜發散行痰。又有咳喘聲啞、或咽痛、遇冷則發者。此謂寒包熱也。解表則熱自除。肺中有痰者、遇冷亦發。宜解表豁痰。火鬱者、咳多痰少、面赤焦煩是也。勞者、盜汗出、痰多唾紅、作寒熱是也。痰者、咳動便有痰、痰出咳止是也。肺脹者、動則喘滿、氣急聲重是也。丹溪已上數條、合而觀之、參之居養、合之氣體、雖有不中、亦不遠矣。治嗽最要、分別肺之虛實、痰之滑瀉、邪之冷熱、及他藏有無侵凌之氣。六府有無積滯之物。虛者人參、黃耆之屬補之。使氣充則藏自固。實者葶藶、杏仁之屬瀉之。使邪去則肺自寧。痰滑者南星、半夏之屬燥其濕。痰瀉者瓜蒌、杏仁之屬潤其燥。寒者乾薑、細辛溫之。熱者黃芩、梔子清之。氣侵者五味、芍藥收其氣。使不受邪也。積滯者枳實、瓜蒌逐其客。使無來犯也。

### 冷嗽

冷嗽者、身受寒氣。口飲寒漿得之。蓋肺主氣。外合皮毛。而其經內循胃口。故外內得寒。皆能傷之。經云。形寒飲冷。外內合邪。因而客之。則爲肺咳是也。其症呼吸不

利。嘔吐冷沫。胸中急痛。惡寒聲嘶。得溫則減。得寒益甚。  
仲景小青龍湯 散外寒。蠲內飲。

麻黃

芍藥

乾薑

炙甘草

細辛

桂枝各三兩

五味子

半夏各半

右八味。以水一斗。先煮麻黃減二升。去上沫。內諸藥。煮取三升。去滓。溫服一升。此散寒蠲飲之神劑。東垣云。肺寒氣逆。則宜五味子同乾薑治之。有痰者以半夏為佐。按金匱厚朴麻黃湯加厚朴石膏杏仁小麥。減桂枝芍藥。聖濟乾薑湯加紫苑杏仁。減芍藥細辛半夏。外臺羊肺湯加款冬紫苑白前食茱萸。減麻黃芍藥半夏。易簡杏仁湯加人參茯苓杏仁。去麻黃。其乾薑五味甘草則四方如一轍也。蓋本一青龍而各有裁制耳。

加減麻黃湯

麻黃去節一兩

桂枝

炙甘草各半兩

陳皮

半夏各七錢

杏仁五十箇去尖微炒另研

右細剉。每三錢紫蘇七葉。生薑四片煎服。

三拗湯

麻黃

杏仁

甘

草炙各

右㕮咀。每服三錢。生薑三片。煎服微汗愈。深師有細辛。外臺加桂枝。名小

投杯湯。和劑加蘇子、茯苓、桑皮、陳皮。名華蓋散。

聖濟飴糖煎

錫糖

乾薑炒一兩半

豉炒二兩

杏仁去皮尖

右分二劑。煎去滓。入錫糖、乾薑末服。

按咳嗽經年不愈。餘無他症。服藥無效者。得三拗湯恆愈。多用清涼。屢發屢甚。

別無熱症者。得錫糖煎遂差。不可不知也。局方於麻黃、杏仁、甘草中加阿膠、

貝母、桑葉、知母、款冬、半夏。蓋雜清潤於辛溫之內。凡陰虛邪伏者。服之最宜。名

款冬花散。

熱嗽

熱嗽有久暴之異。暴者。時熱傷肺也。肺象金而惡熱。得之則脈數、氣促、口渴、胸膈

不利。咽喉腫痛。子和云。熱乘肺者。急喘而嗽。面赤潮熱。手足寒。乳子每多有之。久者風寒不解。久而化火。肺受火邪。氣從火化。有升無降。其候咳唾痰濁。煩熱口渴。或吐膿血。甚者身熱不已。則成肺勞。  
六味竹葉石膏湯

石膏

淡竹葉

桔梗

薄荷葉

木通

甘草各一錢

水煎服。

又治熱嗽。諸藥不效者方。

人參

石膏

甘草

半夏

麥冬

知母

五味

杏仁

枇杷葉

水煎服。

按五味子治嗽。新病惟熱傷肺者宜之。若風寒所客。則斂而不去矣。久病氣耗者。非五味子不能收之。然熱痰不除。則留固彌堅矣。



紫苑丸

衍義云。一婦人患肺熱久嗽。身如炙。肌瘦將成肺勞。以枇杷葉、木通、款冬花、紫苑、杏仁、桑白皮各等分。大黃減半。各如常製治訖。同爲末。煉蜜丸如櫻桃大。食後夜臥各含化一丸。未終劑而愈。此瀉肺中積熱之劑。

人參清肺湯

和劑

治肺痿吐血年久勞嗽喘急坐臥不安。

人參

炙甘草

阿膠炒

杏

仁去皮

桑皮

知母

粟

殼去蒂蓋

烏

梅去核

地骨皮

各等分

每服三錢。水鍾半。薑一片。棗一枚。食後溫服。

按此方治勞嗽最宜。蓋以溫補虛損之陰。以酸收散亡之陽也。

元霜膏 治虛勞熱嗽咯血唾血神效。

烏梅汁

梨汁

柿霜

白沙糖

白蜜

蘿蔔汁各四兩

生薑汁一兩

赤茯苓末八兩用乳

次

款冬花

紫苑並末各二兩

右共入砂鍋內熬成膏。丸如彈子大。每一丸。臨臥含化嚥下。

### 定肺丸

款冬花

紫苑

知母

貝母

人參

炙甘草

桑白皮

馬兜鈴

御米殼

五味子

麥冬

百部

烏梅肉等分

右爲細末。煉蜜丸櫻桃大。嚥化下一丸。

直指人參紫苑散 治虛勞欬嗽。

人參

五味子

紫苑茸

陳皮

貝母

紫蘇葉

桑白皮

白茯苓

杏仁

甘草

川芎

半夏麴

阿膠

蛤粉炒  
五錢

右㕮咀。每服一兩水二鍾。薑七片。烏梅一個。煎一鍾。溫服。

### 鬱熱嗽

鬱熱者。由肺先有熱。而寒復客之。熱爲寒鬱。肺不得通。則喘咳暴作。其候惡寒。時有熱。口中乾。咽中痛。或失音不出是也。宜辛以散寒。涼以除熱。或只用辛散。使寒去。則熱自解。若遽以苦寒折之。邪氣被抑。遺禍不小。本事利膈湯

雞蘇葉

荊芥

桔梗

牛蒡子

甘草

殭蠶

元參

各一

右爲末。每服一錢。沸湯點服。日三。方古庵云。肺主皮毛。人無病之時。榮衛周流。內氣自皮膚腠理通達於外。一或風寒外束。則內氣不得外達。便從中起。所以火升痰上。故咳嗽。宜用辛溫或辛涼之劑。以發散風寒。則邪退正復而嗽止也。

### 飲氣嗽

飲氣嗽者。其症喘咳上氣。胸膈注悶。難於偃臥。許仁則云。由所飲之物。停滯在胸。水氣上衝入肺。便成咳嗽。此而不治。則爲水氣。醫餘亦云。此症宜利水道。化痰下

氣。不爾則成水。

深師白前湯

白前二兩

半夏

紫苑各三兩

大戟七合

水一斗。漬一宿。煮取三升。分作數服。

芫花散

芫花

乾薑

白蜜等分

右用前二味爲末。內蜜中攪令相和。微火煎如糜。服如棗核一枚。日三夜一。備急方。用枳殼二兩炒。水煮去滓。內白糖一斤。服如棗大。

葶藶大棗瀉肺湯

葶藶不拘多少  
炒令黃

右件細研。丸如彈子大。水三盞。棗十枚。煎一盞。去棗入藥。煎七分。食後服。孫兆治一人吐痰。頃間已升餘。欬不已。面色鬱黯。精神不快。兆告曰。肺中有痰。胸膈不利。當服仲景葶藶大棗湯。一服訖。已覺胸中快利。略無痰唾矣。外臺用葶藶杏仁各一升。大棗六十枚。合搗如膏。加蜜作丸。梧子大。桑白皮飲下六七十丸。

以大便通利爲度。本事棗膏丸。無杏仁。有陳皮、苦桔梗、棗肉丸。梧子大。每服五七丸。飲下。許叔微云。余常患停飲。久漬肺經。食已必噎。漸喘。覺肺系急。服此良驗。

蘇子降氣湯 治久年肺氣。欬嗽喘逆。上盛下虛。痰涎壅盛。胸膈噎塞。

紫蘇子炒

半夏製各二

前胡

甘草炙

厚朴炒薑汁

陳皮去白各

當歸半錢

沉香七分

水二鍾。生薑三片。煎至一鍾。不拘時服。虛冷人加桂五分。黃耆一錢。

一人痰嗽。脇下痛。以白芥子、瓜蒌、桔梗、連翹、風化硝、竹瀝、薑汁。加蜜丸。噙化。茶

清下。

按、痰飲有寒有熱。凡咳而面赤。胸腹脇常熱。惟手足乍有涼時。其脈洪者。熱痰在胸膈也。宜寒潤清膈之劑下之。面白悲噎。脇急脹痛。脈沉細弦遲者。寒痰在胸腹。宜以辛熱去之。

玉液丸 治熱痰壅盛。欬嗽煩熱。知母、杏仁、蘿蔔子、貝母各二錢。生薑一片。水煎服。

寒水石燒令赤出火毒飛過三十兩

半夏洗焙為末十兩

白礬枯十兩細研

右合研。麵糊丸。梧子大。每服三十丸。食後淡薑湯下。

治婦人形瘦。有時夜熱痰嗽。月經不調。

香附童便浸乾上 瓜 薑 中

青黛下

右為末。薑汁蜜調。噙化豆大一丸。

### 食積欬嗽

食積欬嗽者。穀肉過多。停凝不化。轉為敗濁。隨呼吸之氣而上溢入肺。肺者清虛之府。不能容物。則有欬而出之耳。王節齋云。因欬而有痰者。欬為重。主治在肺。因痰而致欬者。痰為重。主治在脾。但是食積成痰。痰氣上升。以致欬嗽。只治其痰。消其積。而欬自止。不必用肺藥以治嗽也。

瓜 薑 丸

瓜 薑 仁

半 夏

山 查

麴 等 分

右為末。以瓜薑瓢拌為丸。竹瀝薑湯送下。

元珠云。食積痰嗽。非青黛、瓜薑仁不除。其人面色青黃不常。或面上如蟹爪路。一黃一白者是也。

又方 杏仁、蘿蔔子各二兩爲末。粥丸服。

又方 治食積痰嗽發熱。二陳加瓜薑、萊菔子、山查、枳實、神麴。

### 燥欬

肺燥者。肺虛液少而燥氣乘之也。其狀欬甚而少涎沫。咽喉乾。氣哽不利。子和云。燥乘肺者。氣壅不利。百節內痛。皮膚乾燥。大便秘澀。涕唾稠粘。潔古云。欬而無痰者。宜以辛甘潤其肺也。

延年天門冬煎

生天門冬 <small>一煎</small>	生地黃汁 <small>五升</small>	橘皮	炙甘草
人參 <small>二兩</small>	白蜜 <small>五合</small>	牛酥 <small>二合</small>	白糖 <small>五兩</small>
杏仁 <small>一升</small>	貝母	紫苑	通草 <small>三兩</small>
百部	白前 <small>二兩</small>	生薑汁 <small>一合</small>	

右以水六升。煮貝母等取二升五合。去滓。入天門冬、地黃汁。煎減半。內酥、蜜、薑汁等煎。令可丸。取如雞子黃大。含嚥之。日四五次。

### 杏仁煎

杏仁一升去尖

白糖

酥

生薑汁一合

蜜五合

貝母八合別研

蘇子一升研取汁

右先搗杏仁如泥。內後六味。同煎如稠糖。取如棗大含嚥之。日三。又有一種肝燥礙肺者。其症欬而無痰。脇痛潮熱。女子則月事不來。此不當治肺。而當治肝。蓋本非肺病。肝血燥則肝氣強而觸肺藏也。滋之調之。血液通行。乾欬自愈。

### 千金豕膏丸

髮灰

杏仁熬令黃色

右二味等分。研如脂。以豬膏和酒服。如桐子大三丸。日三神良。

### 上清丸 清聲潤肺止欬嗽爽氣定神

白沙糖八兩

薄荷葉四兩

柿霜四兩

硼砂



寒水石

烏梅肉各五錢

片腦五分

石爲末。甘草水熬成膏。和丸。芡實大。每一丸嚙化。

### 虛寒嗽

虛寒嗽者。其寒不從外入。乃上中二焦。陽氣不足而寒動於中也。或初雖起於火熱。因過服寒涼消尅。以致脾土受傷而肺益失養。脈微氣少。飲食不入者。急宜溫養脾肺爲主也。

加味理中湯

人參

白朮

乾薑

甘草炙

橘紅

茯苓

半夏

細辛

五味等分

右咬咀。每服三錢。薑棗煎。食前服。戴元禮云。飲水一二口而暫止者。熱嗽也。呷熱湯而得停者。寒嗽也。治熱嗽以小柴胡加五味。冷嗽以理中湯加五味。皆以試之驗。直指方理中圓加阿膠五味。

濟生紫苑湯 治肺虛寒嗽。喘急無熱症者。

紫苑茸洗

乾薑炮

黃耆

人參

五味子

鍾乳石

杏仁數炒去皮尖

甘草炙各五錢

右咬咀。每服四錢。水一盞。薑五片。棗一枚。煎服。

### 腎欬

腎虛氣逆者。腎之脈從腎上貫肝膈入肺中。循喉嚨。腎中陰火上炎。入肺則欬。腎中陰水。隨經入肺亦欬。內經云。欬嗽煩冤者。是腎氣之逆也。又少陰所謂欬嘔上氣喘者。陰氣在下。陽氣在上。諸陽氣浮。無所依從。故欬嘔上氣喘也。水則濟生。腎氣補而逐之。火則六味。都氣之屬。引而下之。又有一種少陰腎症。水飲與裏寒。合而作嗽。腹痛下利者。宜真武湯加減治之。

### 真武湯

白茯苓

白朮

白芍各一兩

熟附子半兩

右剉散。每二錢半。加生薑、細辛、五味子各半錢。薑三片。食前煎服。

### 欬嗽失音

欬而失音。有新久虛實之異。新者多實。痰火閉鬱。所謂金實不鳴也。久者多虛。肺損氣脫。所謂金破亦不鳴也。實者。逐邪蠲飲易治。虛者。補肺養氣難治。亦有肺已虛損。而風寒未盡。或痰火閉塞者。則攻補俱礙。其治尤難也。  
訶子飲 治久嗽語聲不出。

訶子肉

杏

仁各一錢炒

通

草半錢

分二服。每服水二鍾。薑三片。煎一鍾。食遠溫服。

一方 訶子四箇。有桔梗一兩半。甘草二寸。

杏仁煎 治嗽失音不出。

杏 仁三兩

生薑汁

蜜各一

木

通

桑白皮

貝

母各一分

紫苑

五

味各一

水三升。煎半升。去滓。入杏仁蜜薑汁。再熬成稀膏。食後臥。嚙化一匙。  
又方 皂角一握。去皮弦子。蘿蔔三箇。切片。水一碗。煎至半碗。服之。不過三服。能

使語出聲。

治盛寒失音不語。咽喉癢痛。

桂心

杏仁

各一兩

爲末。密丸櫻桃大。綿裹嚥津。

戴云。有嗽而咽痛失音。多進冷劑而聲愈不出者。宜生薑汁調消風散。少少進之。或只一味薑汁亦得。又云。聲啞者。寒包其熱也。宜細辛半夏生薑之屬。辛以散之。若痰熱壅於肺者。金空則鳴。必清肺中邪滯。用清咽寧肺湯主之。

清咽寧肺湯

桔梗二錢

炒山梔

黃芩

桑皮

甘草

前胡

知母

貝母

水二鍾。煎八分。食後服。

和劑款冬花散。治肺已虛而風寒未盡。喘滿煩悶。痰涎壅盛。鼻塞流涕。咽喉不利。

杏仁

阿膠炒

麻

黃芩去根

半

夏薑洗製

款冬花

桑葉

知母

貝母各一

右改咀。每服二錢。水一鍾。薑三片。水煎食前溫服。

準繩用炙甘草與半夏加

一倍。

### 喘統論

三因方云。喘病肺實者。肺必脹。上氣咽中逆。如欲嘔狀。自汗。肺虛者。必咽乾無液。少氣不足以息也。王宇泰云。喘而無汗。煩躁脈浮大者。汗之。喘而有汗。腹滿脈沉實者。下之。又云。喘而自汗。腹滿便悶。氣口脈大於人迎。下之無疑。外此則不宜輕下也。

欬嗽氣急。喉聲如鼾者。爲虛。喉中如水雞聲者。爲實。戴復庵云。有痰喘。有氣喘。有胃虛喘。有火炎上喘。痰喘者。凡喘便有痰聲。氣喘者。呼吸急促而無痰聲。胃氣虛喘者。擡肩擷肚。喘而不休。火炎上喘者。乍進乍退。得食則減。食已復甚。大概胃中有實火。膈上有稠痰。得食入咽。墜下痰涎。其喘即止。稍久食已入胃。反助其火。痰再升上。喘反大作。俗不知此。作胃虛治。以燥熱之藥者。以火濟火也。

# 痰實肺閉

肺虛如器而不容物。痰熱實之。則氣不得宣。呼吸壅滯。喘急妨悶。胸膈痞痛。徹背者。宜濟生瓜蒌實丸。此與水氣相似。但水即飲也。飲體稀而痰質稠。飲多寒而痰多熱耳。

## 濟生瓜蒌實丸

瓜蒌實研

枳實去瓤炒

桔梗

半夏等分

右爲末。薑汁打糊爲丸。如梧子大。每服五七十丸。食後淡薑湯下。

## 元戎葶藶大棗湯

葶藶二兩炒紫  
色杵成丸

以水三升。大棗二十枚。同煮取二升。去滓。內麻黃、五味子各半兩。取清。令二日服。一劑盡。差。外臺方。葶藶、杏仁二味。杵末。棗肉丸。此又加麻黃五味。其用彌廣矣。

## 水氣乘肺

喘因水氣乘肺者。經所謂不得臥。臥則喘者。是水氣之客也。古法心下有水氣上  
乘於肺。喘而不得臥者。以直指神秘湯主之。若腎中水邪干肺者。則以濟生腎氣  
丸主之。  
神秘湯

人參

陳皮

桔梗

紫蘇

半夏

桑皮

檳榔各一錢

炙甘草五分

五味子粒十五

右用水薑煎。食遠溫服。

### 寒邪入肺

喘因寒邪入肺者。經曰邪在肺。則病皮膚痛。寒熱。上氣。喘欬動肩背。因背受寒邪。  
伏於肺中。關竅不通。呼吸不利。右寸沉而緊。亦有六部俱伏者。宜發散。則身熱退  
而喘定。小青龍三拗湯之屬。若內兼火熱。外顯煩躁者。宜散而兼清。麻杏甘石之  
屬。

小青龍湯

麻黃

桂枝

芍藥

細辛

甘草各三錢

乾薑三錢

半夏

五味子各半升

右以水一斗。先煮麻黃去上沫。內諸藥。煮取三升。強人服一升。羸者減之。  
三拗湯方見救門

令火爍金

喘因夏月火爍肺金者。上焦熱甚。煩渴多汗。肺主氣而屬金。金畏火逼。氣不得降而反上行。從化於火也。  
人參白虎湯

人參

石膏

知母

甘草

粳米

腎虛氣逆



喘因腎虛。氣吸不下者。或因氣自小腹下起而上逆者。但經微勞。或飢時即發。宜以六味補陰之屬。壯水配火。若足冷面熱者。須以八味安腎之屬。導火歸元。

安腎丸

肉桂去粗皮 川烏頭炮去皮臍 桃仁熬炒 白蒺藜刺炒去

巴戟去心 山藥 茯苓 肉蓯蓉酒浸

石斛去根 草薢 白朮 破故紙各四十

右為末。煉蜜為丸。梧子大。每服三十丸。鹽湯送下。空心食前。

小安腎丸 治腎虛冷僊。陰火上升。喘嗽。齒痛腰痛。

香附子 川烏頭 川楝子以上各一斤用鹽四兩

茴香十二兩 熟地黄八兩 川椒去目及閉口者

右六味。為細末。酒糊丸。桐子大。每服二十丸。至三十丸。空心臨臥。鹽湯、溫酒任

下。

齁喘

胸喘者。積痰在肺。遇冷即發。喘鳴迫塞。但坐不得臥。外寒與內飲相搏。宜小青龍湯主之。若肺有積熱。熱為寒束者。宜越婢湯主之。

小青龍湯

前方見

越婢加半夏湯

麻黃六兩

石膏半斤

生薑三兩

甘草一兩

半夏半斤

大棗十五枚

右六味。以水六升。先煮麻黃去上沫。內諸藥。煮取三升。分溫三服。

定喘湯

白果

二十一枚。去殼。切碎。炒黃色。

麻黃

半夏

杏仁

蘇子

桑皮

款冬花各一錢

黃芩錢半

甘草一錢

水三鍾。煎二鍾。分二服。徐徐服。無時。一方無黃芩。

按仲景云。欬而上氣。此為肺脹。其人喘。目如脫狀。越婢加半夏湯治之。又肺脹。欬而上氣。煩躁而喘。脈浮者。心下有水。小青龍加石膏湯主之。丹溪云。肺脹而

欬者。用訶子、青黛、杏仁。佐以海石、香附、瓜蒌、半夏、蜜丸。噉化。仲景之治。乃傷寒法也。邪從皮毛入肺。則肺脹。故治以散邪之劑。丹溪之治。乃陰虛火動迫肺。及濁痰瘀血凝結於內。故治以收斂消痰之劑。然亦有引動腎間虛氣。喘不得臥。足冷如冰者。非濟生腎氣不效。丹溪治胸喘之症。未發以扶正氣為主。入味、腎氣、溫腎行水之謂也。已發用攻邪氣為主。越婢、青龍。泄肺蠲飲之謂也。

定喘丸 治虛人痰多欬嗽。胸滿氣逆。行坐無時。連年不已。

人參二錢

南星

半夏

夏鎔二錢  
苦葶藶五錢

右爲末。生薑自然汁糊丸。黍粒大。每三五十丸。生薑湯下。亦可漸加。

### 血積肝傷

喘因血積傷肝者。經曰肝脈搏堅而長。色不青。當病墜若搏。因血在脇下。令人喘逆是也。

### 嘔吐統論

仁齋直指云。嘔吐出於胃氣之不和。人所共知也。然有胃寒。有胃熱。有痰水。有宿食。有膿血。有氣攻。又有所謂風邪干胃。凡是數者。可不究其所自來哉。寒而嘔吐。則喜熱惡寒。四肢淒清。法當以剛壯溫之。熱而嘔吐。則喜冷惡熱。煩躁中乾。法當以清涼解之。痰水症者。吐沫怔忡。先渴後嘔。與之消痰逐水輩。宿食症者。胸腹脹滿。醋悶吞酸。與之消食去積輩。腥氣燥氣熏炙惡心。此膿血之聚。經所謂嘔家有癰膿不須治。膿盡自愈是也。七情內鬱。關格不平。此氣攻之症。經所謂諸鬱干胃。則嘔吐是也。若夫風邪入胃。人多不審。率用參朮助之。攔住寒邪。於此尤關利害。其或惡聞食臭。湯水不下。粥藥不納。此則翻胃之垂絕者也。辨之不早。其何以爲對治乎。雖然。足陽明之經。胃之絡脈也。陽明之氣下行則順。今逆而上行。謹不可泄固也。然嘔吐者。每每大便秘結。上下壅遏。氣不流行。蓋思所以區畫而利導之。他如汗後水藥不入口者。遂嘔而脈弱。小便復利。身微熱而手足厥者。虛寒之極也。識者憂焉。

潔古論吐以氣積寒。分屬上中下三焦。大旨元從啓元子食不得入。是有火。食入反出。是無火來。至中焦吐。則獨以積字該之。未中焦氣交之分。主運行上下。和調

陰陽其病有虛有實。有寒有熱。其治亦不拘一法。豈區區毒藥去積。檳榔、木香和氣。所能盡其事哉。東垣論吐。以嘔吐噦。分屬太陽陽明少陽。以其經氣血多少而為聲物有無之別。未見著實。

剛壯之劑

吳茱萸湯 治冷涎嘔吐。

吳茱萸三佛湯炮洗生

薑各半

人參三分

大棗五箇

右剉。每服四錢。水盞半。食前服。

本事附子散 治反胃嘔吐。

附子一枚極大者。坐於磚上。四面著火。漸漸逼熱。淬入生薑自然汁中。再用火逼再淬。約盡薑汁半盃。焙乾末之。每服二錢。水一盞。粟米少許。同煎七分。不過三服。

清涼之劑

本事竹茹湯 治胃熱嘔吐。

乾葛三兩

甘草三錢

半

夏水一兩薑汁半盞漿

右爲粗末。每服五錢。水二盞。薑三片。棗一枚。竹茹一錢。同煮至一盞。去滓溫服。許叔微云。胃熱者。手足心熱。政和中一宗人病傷寒。得汗身涼。數日忽嘔吐。藥與食俱不下。醫者皆進丁香、藿香、滑石等藥。下咽卽吐。予曰。此正汗後餘熱留胃脘。孫兆竹茹湯正相當耳。急治藥與之。卽時愈。

龐老杷杷葉散

杷杷葉刷淨毛

人參各一錢

茯苓半兩

茅根二兩

半夏一錢

右細剉。每服四錢。水一盞半。生薑七片。漫火煎至七分。去滓入檳榔末半錢。和勻服之。此方宜入行氣薑下

新定清中止嘔方

半夏一錢

茯苓二錢

陳皮一錢

竹茹一錢

乾葛五分

生薑五分

蘆根五錢

杷杷葉三片

麥冬一錢

白風米百粒

消痰逐水之劑

大半夏湯 治痰症嘔吐。

半夏製二升 人參三兩切

右每四錢薑七片。蜜少許。熟煎服。

小半夏茯苓湯 金匱云。嘔家用半夏。以去其水。水去嘔止。

半夏一升 生薑半斤 茯苓三兩

右三味。以水七升。煮取一升半。分溫再服。

局方二陳湯 治痰飲嘔惡。頭眩心悸。

陳皮半 夏製各三錢 茯苓二錢 炙甘草一錢

水二鍾。薑三片。食遠服。

東垣云。辛藥生薑之類。治嘔吐。但治上焦氣壅表實之病。若胃虛穀氣不行。胸中痞塞而嘔吐者。惟宜益胃。推揚穀氣而已。故服小半夏湯不愈者。服大半夏湯立愈。此仲景心法也。

本事神朮散 治嘔吐清水。亦治嘔酸。方見痰飲門

經云。太陰之復。嘔而密默。唾吐清液。治以苦熱。是嘔水屬濕也。或一味蒼朮製炒

爲丸服之。

丹溪云。或問吞酸。素問明以爲熱。東垣又以爲寒。何也。曰。吐酸與吞酸不同。吐酸是吐出酸水如醋。平時津液隨上升之氣鬱而成積。成積既久。濕中生熱。故從水化。遂作酸味。非熱而何。其有鬱積之久。不能自涌而出。伏於肺胃之間。咯不得上。嚥不得下。肌表得風寒。則內熱愈鬱。而酸味刺心。肌表溫煖。腠理開發。或得香熱湯丸。津液得行。亦可暫解。非寒而何。素問言熱者。言其本也。東垣言寒者。言其末也。但東垣不言外得風寒。而作收氣立說。欲瀉肺金之實。又謂寒藥不可治酸。而用安胃湯加二陳湯。俱犯丁香。且無治熱濕積鬱之法。爲未合經意。予嘗論治吞酸。用黃連、茱萸各製炒。隨時令送爲佐使。蒼朮、茯苓爲輔。湯浸蒸餅爲小丸吞之。仍教以糲食蔬果自養。則病自愈。

消食去積之劑

治中湯

治食症嘔吐。

人參

白朮

乾薑炮

甘草炙

青皮

橘皮等分



右剉。每服三錢。棗一枚煎服。積聚大便多者。加大黃二錢子許。二陳湯加縮砂丁香亦治宿食嘔吐。

潔古紫沉丸 治中焦吐食由食積與寒氣相格故吐而疼。

砂仁 半夏麴錢各三 烏梅去核 丁香

檳榔錢各二 沉香 杏仁 白朮

木香錢各一 陳皮五錢 白豆蔻 巴霜錢各五

右除巴霜另炒外。爲細末。和勻。醋糊爲丸。如黍米大。每服五十丸。食後薑湯下。愈則止。

溫中法麴丸 治食已心下痛。陰陰然不可忍。吐出乃已。病名食脾。

法麴炒 麥芽炒 白茯苓 陳皮去白

厚朴 枳實錢各一 人參 附子製

炮薑 炙草 桔梗錢各五 吳茱萸三錢炮

右爲細末。煉蜜丸。梧子大。每服七八十丸。食前熱水送下。一方有當歸細辛。

行氣之劑

加減七氣丸 治氣鬱嘔吐。

半夏製二兩半

人參

辣桂

厚朴製各一兩

茯苓一兩

甘草炙半兩

右剉散。每三錢半。薑七片。棗一枚。煎服。加木香亦得。

去風和胃之劑

霍香正氣散 治風邪入胃嘔吐。

半夏麴

川厚朴製各三兩

藿香葉

橘紅各一兩

甘草炙七錢

右剉散。每三錢。薑三片。棗一枚。食前煎服。

清胃丸 治嘔吐。脈弦頭痛。

柴胡一兩

黃芩七錢

甘草炙

人參錢各五

半夏三錢

青黛二錢

右細末。每薑汁浸。蒸餅丸。桐子大。每五十丸。薑湯下。

理中安虵之劑

安虵丸

人參

白朮

乾薑

甘草

川椒

烏梅

導利之劑

金匱大黃甘草湯 治食已即吐。

大黃四兩

甘草一兩

水三升。煮取一升。分溫再服。

此上病療下之法。夫陽明之氣順而下行者也。若下焦不通。其氣必反而上行。是以食已即吐。用大黃以通大便。則氣復順而下行矣。所謂濁氣自歸濁道也。

東垣通幽湯

治幽門不通。上衝吸門。嘔吐噎塞。氣不得上下。治在幽門。

熟地

生地各二錢

紅花五分

桃仁泥七粒

當歸

甘草

升麻各五

大黃一錢

右咬咀。都作一服。水二大盞。煎至一盞。去滓熱服。

準繩云。陰虛邪氣逆上。窒塞嘔噦。不足之病。此地道不通也。當用生地黃、當歸、桃

仁、紅花之類。和血涼血潤血。兼用甘草以補其氣。微加大黃、芒硝以通其閉。大便利邪氣去。則氣逆嘔吐自愈矣。

### 益胃之劑

廣濟豆蔻子湯 治翻胃嘔吐。不下食。腹中氣逆。

人參一兩

白豆蔻七粒

甘草兩炒一

生

薑五兩

水四升。煮取一升五合。去滓分溫三服。相去如人行五六里。

丁香煮散

丁香

石蓮肉四枚

北棗七枚

生

薑七片

黃秫米半合

右以水一碗半。煮稀粥去藥。取粥食之。

### 欬嗽嘔吐痰血飲食

欬而嘔吐。痰食俱出者。傷於胃氣。昔人所謂肺病連胃是也。嘔血帶痰而出者。傷於肺之絡。金匱所謂熱傷血脈是也。吐食者。二陳湯加減治之。吐血者。補肺湯主

之。

加減二陳湯

半夏一錢

杏仁五分錢

茯苓五分錢

炙甘草五分

橘紅一錢

竹茹八分

生薑一片

粳米一百粒

右藥用清水煎服。加枇杷葉、蘆根佳。

補肺阿膠湯

阿膠五分錢

兜鈴五分

炙甘草五分

牛蒡一錢

杏仁七粒

糯米一百粒

都作一服。甚者加生地黃、藕汁。

### 泄瀉諸症統論

戴復庵云。瀉水腹不痛者。濕也。飲食入胃。輒瀉之。完穀不化者。氣虛也。腹痛瀉水。腸鳴。痛一陣瀉一陣者。火也。或瀉或不瀉。或多或少者。痰也。腹痛甚而瀉。瀉後痛減者。積也。陰泄者。水穀不化而完出。濕兼風也。瘧泄者。漸下污積粘垢。濕兼熱。

也。驚泄者。所下澄徹清冷。小便清白。濕兼寒也。濡泄者。體重軟弱。泄下多水。濕自甚也。滑泄者。久下不能禁固。濕勝氣脫也。故曰濕多成五泄。

### 濕瀉

濕瀉一名濡泄。其脈濡細。其症泄水。虛滑腸鳴。身重腹不痛。由脾胃有濕。則水穀不化。清濁不分。久雨潮溢。或運氣濕土司令之時。多有此疾。內經所謂濕勝則濡泄。左傳所謂雨淫服疾者是也。又水寒之氣入客腸間。亦令人濡瀉。經云太陽之勝。寒客下焦。傳為濡泄是也。本事芎藭丸。治風濕滑泄。

芎藭

神麴

白朮

附子炮各

右為細末。麵糊丸。如梧子大。每服三五十丸。米飲送下。

許叔微云。左氏述楚子圍蕭。蕭將潰。無社告叔展曰。有麥麵乎。有山鞠藭乎。意欲令逃水中以避。是知芎藭能除濕。予常加朮。附以製方。治脾濕而瀉者。萬無不中。此藥亦治飧泄。

劉草窗瀉濕湯

生白朮三錢

白芍二錢

陳皮炒一錢

防風一錢

升麻五分

右剉作一貼。水煎服。此用風藥以舉其氣。抑勝其濕也。河間云。有腸胃燥鬱。水液不能宣行於外。反以停濕而泄。或燥濕往來。而時結時泄者。此又濕瀉之變。余見有老人久泄。飲牛乳而泄反止者。此類是耳。

胃苓湯 治脾濕太過。泄瀉不止。

平胃散

五苓散各等分

右剉水煎服。平胃散治酒泄不已。飲後尤甚。加丁香、縮砂、麥芽、神麴各五錢為末。米飲調二錢。立愈。

升陽除濕湯

方見  
飧泄

東垣云。予病脾胃久衰。視聽半失。氣短精神不足。此由陽氣衰弱。不得舒伸。伏匿於陰中耳。癸卯歲六七月間。淫雨陰寒。踰月不止。時人多病泄利。一日予體重肢節疼痛。大便泄下。而小便閉塞。治法諸泄利。小便不利。先分利之。又云。治濕不利

小便。非其治也。噫。聖人之法。布在方策。其不盡者。可以意求耳。今客邪寒濕之淫。從外而入裏。若用淡滲之劑以除之。是降之又降。復益其陰。而重竭其陽。則陽愈削。而精神愈短矣。故必用升陽風藥。羌活。獨活。柴胡。升麻。各一錢。防風。根半錢。炙甘草半錢。同咬咀。水二鍾。煎至一盞。去滓。稍熱服。六法云。濕寒之勝。助風以平之。又曰。下者舉之。得陽氣升騰而去矣。又云。客者除之。是因曲而爲之直也。醫不達升降浮沉之理。而一概施治。其愈者幸也。

寒瀉一名  
鷺瀉

鷺瀉者。水糞并趨大腸也。夫脾主爲胃行其津液者也。脾氣衰弱。不能分布。則津液糟粕并趨一竅而下。金匱所謂脾氣衰則鷺瀉也。又寒氣在下。亦如令人水糞雜下。而色多青黑。所謂大腸有寒則鷺瀉也。羅謙甫云。鷺瀉者。大便如冰。其中有少結糞是也。補本丸

蒼朮

川椒去目炒  
各一兩



末之。醋和丸如桐子大。每服五十丸。食前溫水下。一法惡痢久不效者彌佳。小兒丸如米大。

桂枝湯 治太陽經傷動。傳太陰下利爲驚漉。大腸不能禁固。卒然而下。中有硬物欲起而又下。欲了而又不。小便多清。此寒也。宜溫之。春夏桂枝湯。秋冬白朮散。

川桂枝

白芍藥

白朮各半

炙甘草二錢

每服半兩水一盞煎七分去滓溫服。

白朮散

白朮

白芍藥各三錢

乾薑炮半兩

炙甘草二錢

右爲細末。如前服之。甚則除去乾薑。加附子三錢。謂辛能發散也。

附子溫中湯 治寒瀉腹痛。或水穀不化。

附子炮

乾薑炮各一錢

人參

白朮

白茯苓

白芍

炙甘草各一錢

厚朴

豆蔻

陳皮

右作一貼。水煎空心服。

### 熱瀉

熱瀉者。夏月熱氣乍乘太陰。與濕相合。一時傾瀉如水之注。亦名暴泄。內經所謂暴注下迫。皆屬於熱是也。其症腹痛自汗。煩渴面垢。脈洪數或虛。肛門熱痛。糞出如湯。或兼嘔吐。心腹絞痛者。即霍亂之候也。

香薰飲

香 茹去土一斤

白扁豆微炒半斤

厚 朴半斤去皮炙熟

右咬咀。每服三錢。水一盞。煎七分。沉冷不拘時服。一方加黃連四兩。薑汁炒

令黃。

六和湯

香 茹二錢

砂 仁

半 夏

杏 仁

人 參

甘 草炙各五分

赤 苓

藿 香

白扁豆薑汁略炒

厚 朴

木 瓜各一錢

水二鍾。薑五片。紅棗一枚。煎一鍾。不拘時服。

久泄

久泄不止。百藥不效。或暫止而復來。此必有陳積在腸胃之間。積一日不去。則瀉一日不愈。必先逐去陳積而復補之。庶幾獲益。如果係藏虛滑泄。審無腹痛。脈微虛不沉滯者。可以溫澀之藥固之。本事溫脾湯。治痼冷在腸胃間。連年腹痛泄瀉。休作無時。服諸熱藥不效。宜先取去。然後調治易瘥。不可畏虛以養病也。

厚朴

乾薑

甘草

桂心

附子生各二兩

大黃生四錢碎切湯一盞浸半日。去渣煎湯時和渣下。

右細剉。水二升半。煎八合。後下大黃汁。再煎六合。去滓澄去脚。分三服。自夜至曉。令盡不受。食前更以乾薑丸佐之。

乾薑丸

乾薑

巴豆

去心炒黃

人參

大黃

兩各一

右除巴豆。餘爲末同研。煉蜜丸如梧子大。服前湯時。用湯下一丸。  
震靈丹一名紫金丹。治一切沉寒痼冷。久瀉久痢。臍腹冷痛。嘔吐不食。及婦人血氣

虛損。崩漏帶下。

禹餘糧火煨醋淬不計遍數。手撚得碎爲度。

紫石英

赤石脂

丁頭代赭石如禹餘糧製法。各四錢。

已上四味。並作大塊。入甘鍋內。鹽泥固濟。候乾。用炭十斤煨通紅。火盡爲度。入地埋。出火毒二宿。

滴乳香另研

五靈脂去沙

沒

藥去沙石

硃

砂水飛

右八味。並爲細末。以糯米粉煮糊爲丸。如芡實大。晒乾出光。每一丸空心溫酒。或冷水下。忌猪羊血。恐減藥力。婦人醋湯下。

乳豆丸。治滑泄不止。諸藥無效。

肉豆蔻生爲末

右用通明乳香。以酒浸過。研成膏。丸如桐子大。每五十丸。空心米飲送下。

和劑桃花丸。寒瀉腹中痛。服諸熱藥以溫中。並不見效。登園不送。穢物隨出。此

屬下焦。宜桃花丸以溫澀之。

赤石脂

乾薑炮等分

右爲末。麵糊丸如梧子大。每服三十丸。空心食前米飲下。日三。

河間訶子散 治泄久。腹痛漸已。瀉下漸少。宜此藥止之。

訶子生一兩半熟半

黃連三錢

木香半兩

甘草二錢

右爲細末。每服二錢。以白朮芍藥湯調下。如止之未已。宜因其歸而送之。於訶

子散內加厚朴一兩。竭其邪氣也。接收澀之劑。固腸丸。訶子散。皆治熱滑。扶脾

丸。桃花丸。皆治寒滑。蓋滑泄雖同。而有陰陽之分也。似泄下

加味平胃散 治食積瀉。噫氣作酸。泄而腹痛甚。瀉後痛減。臭如抱壤雞子。得效

云。傷食積而瀉者。糞白可驗。且腹必耕痛。方泄是也。

蒼朮

厚朴

陳皮

甘草

縮砂

草果

山查子

麥芽

水煎服。有停飲食。數日乃瀉。後屢作屢止。飲食稍多即發。名曰瀼瀼。宜枳朮

藥丸。

治飲酒過多。遂成酒泄。骨立不能食。但飲一二杯即發。經年不愈方。

蒼朮

厚朴

陳皮

甘草

丁香

縮砂

乾葛

麥芽

神麴

右爲末。空心米飲調下二錢。

治傷酒晨起必瀉方

人參

白朮

乾薑

炙甘草

茯苓

乾葛

陳皮

川黃連

酒浸炒

右剉。薑水煎服。

## 腎泄

腎泄者。五更溏瀉也。腎雖水藏。而中有元陽。爲脾土之母。又腎者主蟄。封藏之本。而開竅於二陰。腎陽既虛。既不能溫養於脾。又不能禁固於下。故遇子後陽生之時。其氣不振。陰寒反勝。則腹鳴奔響作脹。瀉去一二行乃安。積月不愈。或至累年。

此病藏於腎。宜治下。而不宜治中者也。

五味子散

五味子二兩

吳茱萸半兩細粒  
綠色者

右二味同炒香熟為度。細末每二錢陳米飲下。許氏云。頃年有一親識。每五更初欲曉時。必溏泄一次。如是數月。有人云。此名腎泄。感陰氣而然。得此頓愈。

四神丸

肉豆蔻

五味子各二兩

補骨脂四兩

吳茱萸一兩  
浸炒

右為末。生薑八兩。紅棗一百枚。煮熟。取棗肉和丸。如梧子大。每服五七十丸。空心或食前白湯下一云。夜食前更進一服。蓋煖藥雖平旦服之。至夜力已盡。無以敵一夜陰氣之故也。澹寮無五味。吳萸有茴香一兩。木香半兩。一方去五味。吳萸入神麴麥芽。按五更溏泄。不獨腎虛一端。酒積、寒積、食積皆作此病。概與溫腎非其治矣。食積、酒積。治法詳久泄。吞紅丸子。或單服麴藥枳朮丸。寒積者。積寒在脾腎。宜魏氏椒朴丸。

椒朴丸

益智仁去殼炒

川椒炒出汗

川厚朴薑製

陳皮

白乾薑

茴香等分

右用青鹽等分。於銀石器內。以水浸乾藥。慢火煮乾。焙乾為末。酒糊丸如梧子大。每服三十丸。加至四十丸。空心鹽湯溫酒任下。傷酒者。濕熱在脾。宜理中湯。加乾葛、黃連。或葛花解醒湯。吞酒煮黃連丸。飲食過多。脾胃之氣不能運化。其人必噯氣如敗卵。宜治中湯。加砂仁半錢。吞紅丸子。或單服麴蘖枳朮丸。

飧泄

飧泄。完穀不化也。脾胃氣衰。不能熟腐水穀。而食物完出。經所謂脾病者。虛則腹滿腸鳴。飧泄食不化是也。又清氣在下。則生飧泄者。謂陽氣虛則下陷也。又風氣入脾。亦令飧泄。夫風者木氣也。而行於土中。風性善行。傳化疾速。則熟腐不及。經所謂久風入中。為腸風飧泄者是也。又脾所生病。為胸滿嘔逆。飧泄者。亦木氣制



土之所致也。又虛邪舍於腸胃。多寒則腸鳴飧泄。食不化者。土性喜溫而惡寒。多寒則變化無權也。故飧泄之病。約有三端。一曰虛。二曰風。三曰冷。而皆以虛為本也。亦曰虛泄。

胃風湯 治風冷虛氣。入客腸胃。水穀不化。泄瀉注下。腹脇虛滿。腸鳴疝痛。

人參

茯苓

川芎

官桂

當歸

白芍

白朮

各等分

每服二錢。水一大盞。粟米百餘粒。同煎七分。去渣。稍熱空心服。若虛勞嗽。加五味子。若有痰。加半夏。若發熱。加柴胡。若有汗。加牡蠣。若虛寒。加附子。若寒甚。加乾薑。皆依本方等分。

防風芍藥湯 治飧泄脈弦。身熱腹痛而渴。

防風

芍藥

各二錢

黃芩

一錢

蒼朮

三錢

水煎服。此治風入脾之法也。

鞠藭丸

方見

吳茱萸散

方見

升陽除濕湯 治胃氣不升。清氣在下。飧泄不已。

蒼朮半錢

柴胡

升麻

羌活

防風

澤瀉

猪苓

神麴各七

麥芽

陳皮各五

甘草三分

水二盞。煎一盞。去滓。空心服。如胃寒腸鳴。加益智仁。半夏各五分。薑棗同煎。

靈樞云。頭有疾。取之足。謂陽病在陰也。足有疾。取之上。謂陰病在陽也。中有疾。

傍取之。中者脾胃也。傍者少陽甲膽也。脾胃有疾。取之足。少陽甲膽也。甲風木

也。東方春也。胃中真氣者。穀氣也。飲食不化。穀氣下流者。濕勝故也。故曰濕多

成五泄。宜助甲膽風以克之。又是升陽助清氣上行之法也。大抵此症。本胃弱

不能克化。奪食少食。欲使胃氣不困也。若藥劑大。則胃不勝藥。泄亦不止。當漸

漸與之。不可多服餌也。

經云。飧泄取三陰。三陰者。太陰也。宜補中益氣湯。去當歸。加白芍。東垣云。清氣在

下者。乃人之脾胃氣衰。不能升發陽氣。故用升麻。柴胡。助甘辛之味。以引元氣之

升。不令下陷為飧泄也。

加味四君子湯 治氣虛泄瀉。

四君子加肉豆蔻煨、訶子炮各一錢。薑棗煎。一方加縮砂、藿香、炮薑各五分。山藥、蓮子、陳皮各一錢。烏梅一箇。名參苓蓮朮散。

### 諸痢治法統論

痢疾古名滯下。亦名腸癖。以其滯澀腸藏。下多不快。而癖癖有聲也。或赤或白。或赤白相雜。或下腸垢而無糟粕。或糟粕相雜。雖有痛不痛之異。然皆裏急後重。逼迫惱人。

痢疾古有赤熱白冷。及五色分屬五臟之辨。然藏府寒熱。當以脈症互參。雖有前說。存之而已。若執此認病。泥矣。

準繩謂後重因邪壓大腸墜下者。當用大黃、檳榔輩。如謙甫水煮木香膏、東垣白朮安胃散等方。瀉其所壓之邪。則後重自除。若邪已瀉。其重仍在者。知大腸虛滑。不能自收而重。當用御米殼等澀劑。固其滑。收其氣。用亦愈也。議論自正。但水煮木香、白朮安胃二方。皆以御米殼爲君。且有烏梅、五味、白芍、訶子。並無檳榔、大黃。

而云然者。豈未之察耶。

又謂大腸爲邪墜下之重。其重至圍後不減。大腸虛滑不收之重。其重至圍後隨減。愚謂邪墜之重。圍後當減。虛滑之重。圍後不減。茲反言之。亦有誤耶。

又謂休息痢。多因兜住積滯。以至時作時止。宜四君子。吞駐車丸。再投去積。却用兜劑。按四君。駐車。都非去積之劑。然議論自正。

敗毒散。發散風溫。益元散。解利熱邪。故俱治發熱下利。

治痢大法。後重者宜下。腹痛者宜和。身重者除濕。脈弦者去風。膿血稠粘。以重藥竭之。身冷自汗。以毒藥溫之。風邪內縮者。汗之則愈。驚澹爲利者。溫之而已。又曰。在表者發之。在裏者下之。在上者湧之。在下者竭之。身表熱者內疎之。小便澹者分利之。盛者和之。去者送之。過者止之。

又曰。食寒冷者。宜溫熱以消導之。傷濕熱者。宜苦寒以內疎之。風邪內陷者。升舉之。濕氣內盛者。分利之。裏急者下之。後重者調之。腹痛者和之。洞泄腸鳴無力。不及拈衣。脈細微而弱者。溫之收之。膿血稠粘。數至圍而不能便。脈洪大而有力者。下之寒之。

分治痢症諸方

寒下之劑

潔古大黃湯

大黃針一兩

好酒二大盞。浸半日許。煎至一盞半。去滓分二服。頓服之。痢止勿服。如未止再服。取利爲度。後服芍藥湯和之。痢止再服白朮黃芩湯。盡徹其毒也。審係寒積留滯。則宜溫下之法治之。

韓悉大黃湯

川黃連吳茱萸炒一兩

廣木香一兩

大黃酒浸炒二兩

右爲末水丸。量人虛實加減丸數。蓋暑毒與食物相搏。結在下脘。則升降出入不得循其正。糟粕欲行不得行。而火復迫之。則將藏府脂膏逼迫而下。故取大黃驅熱毒。下糟粕清腸臟也。如膿血相雜。而脈浮大者。慎勿以大黃下之。下之必死。謂氣竭也。而陽無所收。

不收則死。

和利之劑

芍藥湯原古行血調氣。經曰。洩而便膿血。知氣行而血止也。行血則便膿自愈。調氣則後重自除。

芍藥一兩

當歸

黃連

黃芩各半

大黃三錢

桂枝二錢

甘草炒

檳榔各二錢

木香一錢

右九味。㕮咀。每服五錢。水二盞。煎至一盞。去滓溫服。一方無桂。甘。有枳殼。名導滯湯。

先醒齋滯下丸

川連薑汁炒

滑石研末

白芍煨炒

甘草炙三

檳榔四兩

枳殼五兩

木香二兩

右爲末。荷葉湯稍加薑汁和丸。如菉豆大。每服四錢。凡燥煩渴惡心者。勿用木香。元氣虛弱者。勿用檳榔、枳殼。裏急色赤者。加

當歸。惟惡心嘔吐不思食勿用。白多加吳茱萸湯泡七次七分。扁豆炒二錢。陳皮一錢。赤多加烏梅肉一錢。山查肉二錢。紅麴一錢。腹痛加白芍三錢。甘草三錢。口渴及發熱調滑石末。小便赤少或不利亦加之。惡心欲吐。即噤口痢多加人參、石蓮肉、綠色升麻醋炒。久利不止加肉豆蔻一錢。蓮肉去心炒黃三錢。扁豆、茯苓各二錢。人參三錢。劉河間曰。夫治諸痢者。莫若以辛苦寒藥治之。或微加辛熱佐之。蓋辛熱能發散邪氣。開通鬱結。苦能燥濕。寒能除熱。使氣宣平而已。其濕熱鬱抑。欲利不利。宜以韓悉加大黃利之。

當歸導氣湯東垣

當歸	芍藥	生	甘草
	各一錢	地二錢	半一錢
檳榔	木香	青皮	槐花
	各二錢		各七分

澤瀉五分

右爲末。用水煎。食前溫服。如小便利。去澤瀉。惡心。去槐花加薑汁炒黃連。燥渴減木香一半。

丹溪青六丸 治血痢。及產後腹痛自利。能補脾補血。去三焦濕熱。

六一散三兩

紅麴炒半兩

酒糊丸。

按和者。和養其腸胃。利者。通利其積滯。凡正不足而邪有餘者。宜倣此法治之。

疎解之劑

活人敗毒散 治下利發熱脈浮者。

人參

川芎

羌活

獨活

前胡

茯苓

枳殼

桔梗

炙草

柴胡

陳倉米

右咬咀。每服五錢。水一盞半。生薑三片。煎至七分。去滓服。無時。一名倉廩湯。

藿香正氣散

香薰飲

下利雖曰有積有熱。如用藥不效。即是腸胃有風邪。熱者赤者。與敗毒散。冷者白者。不換金正氣散。治痢之法。大要以散風邪。行滯氣。開胃脘為先。不可遽用



粟殼、龍骨、牡蠣輩。以閉澀腸胃。邪氣得補而愈甚。不為纏擾撮痛。則為裏急後重。所以日夕淹延而未已也。肉瘧詞子白朮輩悉其補住寒邪亦不可遽投

溫通之劑

葛氏療利色白食不消者。為寒下方

豉綿裏一斤

薤白一把

水三升。煮取二升。及熱頓服之。此不從暑毒而發者。或過啖生冷。或坐臥高堂大廈。寒氣所乘。脾亦不運。故隨感而為痢。以葛氏豉薤湯治之。如逾二三日。寒化為熱。其病形與暑毒同也。

黑丸子

烏梅肉

杏

仁去皮尖另巴

霜去油

百草霜六錢

右為細末。和勻稀糊為丸。如黍米大。每服十五丸。加至二十丸。白湯送下。一方有半夏、縮砂各十四粒。

感應丸

溫補之劑

理中湯

人參

白朮

炮薑

炙草

水煎服。如利不止。宜加豆蔻、木香。

有熱加黃連。

真人養臟湯

人參

白朮

白芍

木

香

甘草

肉桂

肉豆蔻

麵裹煨

御米殼蜜炙

訶子肉二錢

右咬咀。每服四錢。水一盞半。煎至八分。去滓。食前溫服。忌生冷、魚腥、酒、麵、油膩之物。如滑泄夜起。久不差者。可加附子四片。此溫補兼收之劑。臟虛滑脫者宜之。若有熱者不可用也。宜冷瀉之劑。

冷瀉之劑

外臺方治傷寒八九日。至十餘日。大煩渴作熱。三焦有瘡。慄下利。或張口吐舌。目爛口瘡。不識人。用此除熱毒。止痢。

龍骨半斤。水一斗。煮四升。沉之井底。冷服五合。漸漸進之。

肘後方。治熱病下利欲死者。

龍骨半斤。研水一斗。煮取五升。候極冷。稍飲。得汗即愈。效。

又治久利休息不止者。

龍骨四兩。打碎。水五升。煮取二升半。分五服。冷飲。仍以米飲和丸。每服十丸。按三方。並用龍骨水煎。冷服。蓋以冷除熱。而以澀固脫爾。

和養之劑

駐車丸

治一切下痢。無問冷熱。

阿膠

十五兩。搗碎。蛤粉炒。成珠。醋四升。熬成。

當歸十五

川黃連三十兩。去鬚。

炮乾薑十兩

右爲末。同阿膠膏杵成丸。梧子大。每服三十丸。食前米飲下。日三。凡蘊熱血痢。裏急而痛甚。雖已疎通蕩滌。然其痛不減者。非熱亦非積也。營血虧少。陽剛勝陰。故爾。用藥當以血藥爲佐。營血一調。其痛立止矣。

# 金匱翼

清 吳門 尤 怡在涇編集

鄞縣 曹赤電炳章圈校

## 卷八

### 夢遺精滑

夢遺精滑。雖皆屬火。而有心腎之異。動於心者。神搖於上。則精遺於下也。不必治腎。但清其心。而夢自已。蓋精之藏貯。雖在腎。而精之主宰。則在心。是以少年伶俐之人。多有此病。而田野愚魯之人。無患此者。總由心之動靜而已。動於腎者。壯年氣盛。久節淫慾。經絡壅熱。精不能固。經所謂陽強不能密。陰氣乃絕是也。而此病復有二。有出於木者。有出於水者。以二藏皆有相火故也。宜分別治之。又有脾胃濕熱下流。腎經精氣不清。而遺者。得之醇酒厚味過多也。直指所謂心腎之外。又有脾精不禁。小便漏濁。手足乏力。腰背酸疼。當用蒼朮等劑。以斂脾精。斂脾謂何。

精生於穀也。

清心之劑

安神丸

生地

硃砂水飛

當歸錢各一

甘草五分

黃連五分錢

湯浸。蒸餅為丸。如黍米大。每服十五丸。或二十丸。津咽。或用溫水送下。  
導赤散。婁全善云。一壯年。夢遺白濁。與澀精藥益甚。改用導赤散。大劑服之。遺濁皆止。

生地

木通

甘草等分

竹葉二十

水煎服。一方加人參、麥門冬。

茯神湯 治思想太過。夢泄夜臥心悸。

茯神

錢五分 木一

遠志

石菖蒲

茯

苓

錢各一

棗仁

炒一分 錢一

人參

當歸錢各一

甘

草

四分

黃連

生地各八分

水二鍾。蓮子七枚。搥碎。煎八分。食前服。

蓮子六一湯 治心熱夢遺赤濁。

石蓮肉連心用六兩 甘草炙一兩

右爲末。每服二錢。食後燈心一小撮。煎湯調下。

王荊公妙香散 安神閉精安心氣。

人參 益智仁

龍骨五色者各一兩

白茯苓

茯神去木 遠志去心各半兩

硃砂研

甘草炙各一錢半

右爲細末。每服二錢。空心溫酒調服。

真珠丸

真珠六兩以牡蠣六兩用水同煎一日去牡蠣以真珠爲末

右於乳鉢內研三五日後。寬著水飛過。候乾。用蒸餅和丸。如梧子大。每服二十丸。食前溫酒送下。

珍珠粉丸

黃柏新瓦上炒赤 真蛤粉各一斤

真珠三兩

右爲末。滴水丸。梧子大。每服一百丸。空心溫酒送下。  
法曰。陽盛乘陰。故精泄。黃柏降火清心。蛤粉鹹而補腎陰。易老方無真珠一味。

正傳

定志珍珠丸 治心虛夢泄。

蛤粉

黃柏

人參

白茯苓各三

遠志

石菖蒲

青黛各二

樗根白皮一兩

右爲末。麵糊丸。梧子大。青黛爲衣。空心薑鹽湯下五十丸。正傳

本事清心丸 治年壯氣盛。久節淫慾。經絡壅熱。夢漏。心忪恍惚。

好黃柏皮一兩爲細末。用生腦子一錢。同研煉蜜丸。如梧子大。每服十丸。至十

五丸。濃煎麥冬湯下。

大智禪師云。夢遺不可全作虛冷。亦有經絡熱而得之者是也。常治一人。至夜

脊心熱。夢遺用珍珠丸。猪苓丸。遺止。後服紫雪。脊熱始除。或清心丸亦佳。本事

清燥濕熱之劑

神芎丸

大黃

黃芩各二兩

黑丑頭末

滑石各四兩

黃連

川芎

薄荷葉各半兩

滴水丸桐子大。每服五十丸。食後溫水下。局方無黃連婁全善云。一中年夢遺與澀

藥勿效。改與神芎丸下之。後與猪苓丸遂愈。

猪苓丸 治年壯氣盛。溼熱鬱滯夢遺

半夏一兩。破如豆粒。用猪苓二兩為末。先將一半炒半夏色黃。勿令焦。出火毒。

取半夏為末。糊丸梧子大。候乾。用前猪苓末一半。又同炒微裂。入瓷餅內養之。

空心溫酒。或鹽湯下。三四十丸。常又服於未申間。以溫酒下。此方以行為止。治

濕熱鬱滯。小水頻數。夢遺精滑。良。蓋半夏有利性。而猪苓導水。即腎氣閉。導氣

使通之意。

一男子夢遺。醫與澀藥。反甚。先服神芎丸。大下之。却服此猪苓丸。愈。可見夢遺

屬鬱滯者多矣。

經驗猪肚丸 治夢遺泄精。進飲食。健肢體。此藥神應。

白朮五兩

苦參三兩

牡蠣左顧者煨研四兩



右爲末。用雄猪肚一具洗淨。以瓷罐煮極爛。木石搗如泥和藥。再加胆汁搗半日。丸如小豆大。每服四五十九。日進三服。米飲送下。久服自覺身肥。而夢遺永止。

和劑威喜丸

白茯苓

去皮四兩切塊同猪苓二錢半於磁器內煮二十餘沸曬乾不用猪苓

黃蠟四兩

右以茯苓爲末。溶黃蠟搜和爲丸。如彈子大。每空心細嚼。滿口生津。徐徐嚥服。以小便清和爲度效。忌米醋及怒氣動性。

三仙丸

益智仁

二兩用鹽二兩炒去鹽

烏梅半兩

山藥爲末

右用山藥末。煮糊爲丸。梧子大。每服五十丸。用硃砂爲衣。空心臨臥以鹽湯下。

蒼朮丸

茅山蒼朮

去粗皮一斤米泔浸一日夜焙乾

舶上茴香三兩

川烏炮去

破故紙

各二兩炒

川棟子

蒸取肉焙乾三兩

白茯苓二兩

龍骨

別研二兩

右末。酒糊丸。梧子大。硃砂爲衣。每服五十丸。空心縮砂仁湯下。粳米飲亦可。

此直指所謂脾精不禁。當用蒼朮輩以斂脾精是也。若有熱者。宜鳳髓丹

秘固精氣之劑

葛元真人百補交精丸

熟地黄

酒浸一宿切焙乾四兩

五味子六兩

山藥

牛膝

酒浸一宿切焙乾

肉苁蓉

酒炒一宿切碎焙乾各二兩

杜仲

去粗皮慢火炒斷絲三兩

澤瀉

山茱萸

茯苓

遠志

巴戟肉

柏子仁

微炒另研

赤石脂

各一兩

右爲細末。煉蜜丸如梧子大。每服二十丸。空心酒送下。

一方有石膏一兩。

固真散

白龍骨一兩

韭子一合

右爲末。每服二錢匕。空心用酒調服。此二藥。大能澀精固真氣。煖下元。

一方

有白茯苓、兔絲子、醋和丸。桐子大。每服五十丸。溫酒鹽湯下。名玉露丸。

一方

加天雄、鹿茸、牡蠣。酒糊丸。梧子大。每服五十丸。酒下。日再。名內固丸。

玉鎖丹 治玉門不閉。遺精日久。如水之漏。不能關束者。

文蛤八兩

白茯苓二兩

白龍骨一兩

右爲細末。米糊丸。梧子大。每服七十丸。空心。淡鹽湯下。臨睡更進一服。極效。加蓮鬚或肉二兩。芡實二兩。兔絲子四兩。牡蠣一兩。山藥丸糊尤妙。

### 赤白濁

有濕熱下流而致者。病從脾而及腎也。丹溪曰。大率多是濕痰流注。治宜燥濕降火。珍珠粉丸主之。

真珠粉丸

黃柏炒

蛤粉炒各一斤

珍珠三兩

右爲末。水糊丸。如梧子大。每服一百丸。空心溫酒下。黃柏苦而降火。蛤粉、珍珠鹹而補腎也。

又方。加樗白皮、青黛、乾薑、炒滑石等分。神麴糊丸。盧氏曰。病因濕熱的矣。然亦不可專用寒涼藥。故用炒柏之類。又以乾薑之溫而佐之也。又方。海蛤、黃柏各三兩。樗根白皮、青黛各二兩。人參、白茯苓各三兩。遠志、石菖蒲各二兩。麵糊

丸。梧子大。每服五十丸。空心薑鹽湯下。名定志珍珠丸。又方加知母炒、牡蠣煨粉、山藥炒等分爲末。糊丸。梧子大。每服八十丸。鹽湯下。  
革薺分清飲

益智仁

川草薺

石菖蒲

烏藥等分

右㕮咀。每服四錢。水一盞。入鹽一捻。煎七分。食前溫服。一方加茯苓、甘草。

治腎虛白濁方聖濟總錄

肉蓯蓉

鹿茸

山藥

白茯苓等分

右爲末。米丸。梧子大。每服三十丸。棗湯下。

小兔絲子丸

石蓮肉二兩

白茯苓一兩

兔絲子

酒浸研五兩

懷山藥

二兩內以麴錢五分作糊

右爲細末。用山藥末糊丸。梧子大。每服五十丸。溫酒或鹽湯下。空心服。一方有五味子。名元兔丹。一方無山藥。名茯苓丸。

## 便閔統論

潔古云。藏府之祕。不可一概論治。有虛祕。有實祕。有風祕。有冷祕。有氣祕。有熱祕。有老人津液乾燥。婦人分產亡血。及發汗利小便。病後血氣未復。皆能作閼。不可一例用硝黃利藥。巴豆。牽牛。尤在所禁。按仲景云。脈浮而數。能食不大便者。此爲實。名曰陽結。期十七日當劇。脈沉而遲。不能食。身體重。大便反鞭。名曰陰結。期十四日當劇。東垣云。陽結者散之。陰結者熱之。前所云實閉。熱閉。卽陽結。所云冷閉。虛閉。卽陰結也。

### 虛閼

虛閼有二。一以陰虛。一以陽虛也。凡下焦陽虛。則陽氣不行。陽氣不行。則不能傳送。而陰凝於下。下焦陰虛。則精血枯燥。精血枯燥。則津液不到。而腸藏乾槁。治陽虛者。但益其火。則陰凝自化。治陰虛者。但壯其水。則涇渭自通。

### 菴蓉潤腸丸

肉菴蓉酒浸焙

沉香另研

爲末。用麻子仁汁打糊爲丸。梧子大。每服七十丸。空心服。

益血潤腸丸

熟地六兩

杏仁炒去尖

麻仁各三兩已上

枳殼

橘紅各二兩

阿膠炒肉蓯蓉各半

蘇子

荊芥各一兩

當歸三兩

末之。以前三味膏同杵千餘下。加煉蜜為丸。如梧子大。每服五六十丸。空心白湯下。

五仁丸

柏子仁半兩

松子仁

桃仁

杏仁各一兩

郁李仁一錢

陳皮四兩另

右將五仁另研如膏。入陳皮末研勻。煉蜜丸。梧子大。每服五十丸。空心米飲下。

黃耆湯 治老人虛悶

綿黃耆

陳皮去白各半兩

右為末。每服三錢。用大麻仁一合研爛。以水投取漿水一盞。濾去滓。於銀石器內煎。後有乳起。即入白蜜一大匙。再煎令沸。調藥末。空心食前服。閉甚者不過

兩服愈。

### 實閼

實閼者。胃實而閼。東垣所謂胃氣實者閼物。胃氣虛者閉氣是也。其人能食。小便赤。其脈沉實。

麻仁丸

厚朴薑製

枳實熬炒

芍藥各八兩

大黃蒸焙一斤

麻仁別研五兩

杏仁去皮尖炒五兩半

右爲末。煉蜜和丸。梧子大。每服二十丸。臨臥溫水下。大便通利則止。

木香逐氣丸

檳榔雞心者

青皮去白

陳皮去白各兩

南木香二錢

川巴豆肉漸入錢半研如泥

右件並末。生薑自然汁調神麴末爲糊。丸麻子大。每服十丸。薑湯下。如氣攻腹痛。枳殼、木瓜煎湯下。

按、實、閼有寒有熱。熱實者。宜寒下。寒實者。宜溫下。麻仁丸、厚朴三物湯。治實而熱者。逐氣丸、溫脾湯。治實而寒者也。

### 風閼

風閼者。風勝則乾也。由風搏肺藏。傳於大腸。津液燥澀。傳化則難。或其人素有風病者。亦多有閼。或腸胃積熱。久而風從內生。亦能成閼也。

皂角丸 治大腸有風。大便閼結。

皂角子炙去

枳殼去瓢熬炒各等分

右爲末。煉蜜丸。梧子大。每服七十丸。空心米飲下。或加麻仁、杏仁、防風、陳皮亦得。

### 東垣潤腸丸

當歸梢

羌活

大黃煨各半兩

麻仁

桃仁去皮尖各一兩

蜜丸。桐子大。每服三五十丸。白湯下。



冷閼

冷閼者。寒冷之氣橫於腸胃。凝陰固結。陽氣不行。津液不通。其人腸內氣攻。喜熱惡冷。其脈遲澀者是也。

半硫丸

半

夏湯洗七次焙乾爲細末

硫

黃明淨好者研令極細用柳木搥子殺過

右以生薑自然汁同熬。入乾蒸餅末。攪和勻。入臼內杵數百下。丸如梧子大。每服十五丸至二十丸。無灰溫酒或生薑湯任下。婦人醋湯下。俱空心服。準繩云。熱藥多秘。惟硫黃煖而能通。冷藥多泄。惟黃連肥腸而止泄。

熱閼

熱閼者。熱搏津液。腸胃燥結。傷寒熱邪傳裏。及腸胃素有積熱者。多有此疾。其症面赤身熱。腹中脹悶。時欲作冷。或口舌生瘡。大黃飲子。治身熱煩躁。大便不通。

大黃	煨二錢	紙裹	杏仁	炒去尖	枳殼	麸炒	梔子仁
生地黄	各一錢	半	人參		黃芩	各七	川升麻
甘草	炙五分						一錢

右作一服。水二鍾。薑五片。豆豉二十一粒。烏梅一枚。煎至一鍾。不拘時服。

### 氣悶

氣悶者。氣內滯而物不行也。其脈沈。其人多噫。心腹痞悶。脇肋脹。此不可用藥通之。雖或暫通。而其悶益甚矣。或迫之使通。因而下血者。惟當順氣。氣順則便自通矣。

蘇子降氣湯。加枳殼。杏仁煎。此藥流行肺氣。

蘇感丸。即蘇合四分。感應六分。研和別丸。大凡腹痛而嘔。欲利其大便。諸藥皆令人吐。惟感蘇丸。用薑汁泡湯下。最妙。

六磨湯。治氣滯腹急。大便秘澀。

沉香

木香

檳榔

烏藥

枳殼

大黃各等分

右六味。熱湯磨服。

### 閉癰遺溺

太無論小便不利三端。一者大便瀉而小便澀。爲津液偏滲。治宜分利而已。二者熱搏下焦。濕熱不行。必通泄則愈。三者脾胃氣澀。不能通調水道。下輸膀胱。可順氣令施化而出。然津液偏滲。有脾肺之分。濕熱不行。亦有腎與膀胱之別。更當參合脈症而分辨之。東垣以小便不通。皆邪熱爲病。分在氣在血而治之。如渴而不利者。熱在上焦。氣分爲肺熱。不能生水。是絕小便之源也。宜澹味滲泄之藥。以清肺泄火。滋水之化源。如不渴者。熱在下焦。血分爲陰受熱邪。閉塞其流。宜氣味俱陰之藥。以除其熱。泄其閉塞也。此以上下二焦分氣血言。然在下焦。亦有氣壅血汚之分。即在上焦。亦有氣虛氣窒之異。不可不察也。

元珠論遺溺閉癰。惟肝與督脈三焦膀胱主之。經云。肝足厥陰之脈。環陰器。所生病。遺溺閉癰。督脈者。女子入繫廷孔。其孔溺孔之端也。其男子循莖下至纂。與女

子等。其生病癰痔遺溺。三焦者。足太陽少陰之所將。太陽之別也。上踝五寸。別出貫踰腸。出於委陽。並太陽之正。入絡膀胱。約下焦。實則閉癰。虛則遺溺。然刺灸之法。但自取厥陰督脈三焦俞穴。而不及膀胱者。以膀胱但藏溺耳。其出溺。皆從三焦及肝督脈也。按經云。腎開竅於二陰。又云。腎合膀胱。余常見老醫以白通六味。腎氣等藥。辨陰陽虛實而治之。其效捷於桴鼓。而此論獨不在腎。故當總統諸家而參考之。則無遺義矣。

丹溪云。小便不通有正治。有隔二隔三之治。如不因他故。但膀胱有熱者。則宜黃柏。知母之屬瀉膀胱。此正治也。如因肺燥不能生水者。則宜車前。茯苓之屬清肺氣。此隔二之治也。如因脾濕不運。而精不升。以致肺不能生水者。則當蒼朮。白朮之屬。燥脾利濕。此隔三之治也。但所謂清肺之法。自宜外臺百合飲子之類。清潤兼行。庶幾得理。若車前。茯苓。滲利之品。以求其水。益資其燥矣。

丹溪又謂。不論氣虛血虛。實熱痰閉。皆宜吐之。以提其氣。氣升則水自降。譬如滴水之器。必使上竅通而後下竅之水出焉。夫病在下。取之上。內經之旨也。天地之氣不升則不降。吐亦法之巧耳。然必痰實氣閉者。乃可用之。未可以之概治氣虛。

血虛等症也。

元珠閉癰遺溺不禁之辨。謂閉者小便不出塞而不通也。癰者罷弱而氣不充。淋瀝瀝點滴而出。或澀而疼。一日數十次。俗名淋病者是也。閉則是急病。癰則是緩病。遺溺睡夢中溺出。醒而方知是也。不禁者。日夜無遍數。頻頻而溺也。

### 小便不通

有下焦蓄熱者。內經所謂膀胱不利爲癰也。巢氏云。膀胱與腎爲表裏。而俱主水。熱氣太盛。故令結澀。小便不通。腹脹氣急。甚者水氣上逆。令心腹痛嘔。乃至於死。其脈緊而滑直者是也。

廣濟方

冬葵子

滑石

茯苓

通

草

各三

茅根四兩

芒

硝二兩湯

水煮分溫三服。相去如人行六七里。若不得溺。急悶欲絕者。以鹽二升。大鍋中熬。以布綿裹臍下按之。小便當漸通也。曾試有驗。

聖濟總錄方

獨顆大蒜一枚。梔子仁三七枚。鹽花少許。三味搗爛攤紙上。貼臍良久即通。未通塗陰囊上立通。

掩臍法

連根葱勿洗。帶土生薑一塊。淡豆豉二十一粒。鹽二匙。同研爛。捍餅烘熱掩臍中。以帛紮定。良久氣透自通。不然再換一劑。

有肺熱不降者。東垣曰。小便閉而不渴者。熱在下焦血分。真水不足。膀胱乾涸。乃無陰則陽無以化。法宜苦寒之屬。以補腎與膀胱。使陰氣行而陽自化。則小便自通。其渴者。熱在上焦氣分。肺中伏火。不能生水。膀胱絕其化源。宜氣味俱薄淡滲之藥。以瀉肺火清肺金而滋水之化源。

百合飲子

外臺

桑白皮

六分

通草

百

合各入

白茅根

一分

水四升。煮取二升。去滓溫服。

有下焦陽虛不化者。夫腎開竅於二陰。腎中陽虛。則二陰之竅閉。閉則大小便俱

不得出。如重陰沍寒。地道閉塞。惟與白通湯多加蔥白。陽氣一至。二便立通矣。  
白通湯

蔥 白四莖 乾薑一兩 附子一枚

右三味。以水三升。煮取一升。去滓。分溫再服。加人尿五合尤佳。傷寒并用猪膽者。所以從上焦格拒之陰。此病獨加人尿者。所以通陰中閉塞之陽也。有下焦陰虛而陽不化者。其狀脚膝軟弱無力。陰汗陰痿。足熱不能履地。不渴而小便閉。是不可以淡滲之劑利之。利之則陰愈竭。而水益不行矣。宜苦寒之屬。以補腎與膀胱。所云使陰氣行而陽自化也。

滋腎丸

黃柏酒洗焙 知母酒洗焙 肉桂一錢

右爲細末。熟水丸。芡實大。每服百丸。加至二百丸。百沸湯空心下。內經曰。熱者寒之。又云。腎苦燥。急食辛以潤之。以黃柏之苦寒。瀉熱補水潤燥。故以爲君。以知母苦寒瀉腎火。故以爲佐。肉桂辛熱。寒因熱用也。丹溪云。諸淋皆屬於熱。余每用滋腎丸。每百丸。可用四物湯加甘草梢、杜牛膝。

木通、桃仁、滑石、木香煎湯。空心吞服。兼灸三陰交。如鼓應桴。累試累驗。有轉胞不得小便者。由胞爲熱所迫。或強忍小便。俱令水氣迫於胞。屈辟不得充張。外水應入不得入。內水應出不得出。小腹急痛。不得小便。不治害人。亦有虛人。下焦氣冷不治。胞系了戾者。宜分而治之。

滑石散

寒水石二兩

葵子一合

滑石一兩

亂髮灰

車前子

木通各一兩

右剉散。水一斗。煮取五升。時時服。一劑卽利。

八味丸。治腎虛小便不通。或過服涼藥而閉澀愈甚者。及虛人下元冷。胞轉不得小便。膨急切痛。經四五日困篤欲死者。每服五十丸。溫鹽湯下。

小便閉尿滿方

小青菜子炒枳殼。不拘分兩。煎湯熏洗卽通。

## 小便不禁



有命門陽衰。不能約束水液者。經所謂水泉不止。膀胱不藏。乃失守之死候也。急宜溫固腎氣。多有生者。

濟生兔絲子丸

兔絲子製二兩

肉苁蓉酒浸二兩

牡蠣煅

桑螵蛸酒炙五錢

五味子

鹿茸酒炙各二兩

雞胫脰炙乾五錢

附子炮二兩

右爲末。酒糊丸。桐子大。每服七十丸。空心鹽湯溫酒任下。

有脾肺氣虛。不能約束水道而病。爲不禁者。金匱所謂上虛不能制下者也。宜補中益氣之屬爲主。而以固瀦之劑佐之。張景岳曰。小便不禁。古方多用固瀦。此亦治標之意。而非塞源之道也。蓋水雖主於腎。而腎上連肺。若肺氣無權。則腎水終不能攝。故治水者。必先治氣。治腎者。必先治肺。不然徒障狂瀾。無益也。又古方書論小便不禁。有屬熱屬虛之辨。不知不禁之謂。乃以小水太利爲言。皆屬虛寒。何有熱症。若因熱而小便頻數。則淋瀝點滴。不能禁止。而又出之不快。或多痛澀。非遺失不禁之謂矣。倘以虛寒誤認爲熱。而妄投瀉火之劑。豈不殆哉。巢氏云。人睡中尿出者。是其素稟陰氣偏盛。陽氣偏虛。膀胱與腎氣俱冷。不能制

於水。而夜臥陽氣衰伏。不能制於陰。陰氣獨盛。則小便多。或不禁而遺尿也。  
治之方

雄雞肝

桂心

二味等分。搗爲丸。服如小豆大一枚。日三服。

交腸

交腸者。大小便易位而出。由冷熱不調。陰陽不順。而氣亂於下也。婦人多有此症。  
加減四物湯

四物五錢

益元散二錢

水酒各一盞。煎至八分。去滓。空心溫服。

按此症。前人有以五苓散爲治者。此又一法也。一法以舊烏紗帽燒灰服者。

諸淋

諸淋者。由腎虛而膀胱熱也。腎氣通於陰。陰津液下流之道也。膀胱與腎爲表裏。

為津液之府。腎虛則小便數。膀胱熱則水下澀。數而且澀。則淋瀝不宣。故謂之淋。其狀小便數。起少出。少腹弦急。痛引於臍。有石淋、勞淋、血淋、氣淋、膏淋之異。透格散

消石一兩

不夾泥土雪白者。生研為末。每服二錢。

勞淋、勞倦虛損。小便不出。小腹急痛。葵子米煎湯下。通後便須服補虛丸散。

血淋、小便不出。時下血。疼痛滿急。熱淋、小便熱赤色。臍下急痛。並用冷水調

下。氣淋、小腹滿急。尿後常有餘瀝。木通煎湯下。石淋、莖內痛。尿不能出。引

小腹。膨脹急痛。尿下沙石。令人悶絕。將藥末先入銚內。隔紙炒至焦為度。再研。

用溫水調下。並空心調藥。使消如水。乃服之。沈存中靈苑方

淋症所感不一。或因房勞。或因忿怒。或因醇酒厚味。房勞者。陰虛火動也。忿怒者。氣動生火也。醇酒厚味者。釀成濕熱也。積熱既久。熱結下焦。所以淋瀝作痛。初則熱淋、血淋。久則煎熬水液。稠濁如膏。如沙。如石也。夫散熱利小便。只能治熱淋、血淋而已。其膏石沙淋。必須開鬱行氣。破血滋陰方可也。古方用鬱金、琥珀開鬱也。

青皮、木香行氣也。蒲黃、牛膝破血也。黃柏、生地黃滋陰也。東垣治小腹痛。用青皮、黃柏。夫青皮疎肝。黃柏滋腎。蓋小腹乃肝腎部位也。

### 沙石淋

沙石淋者。膀胱結熱。水液燥聚。有如沙石。隨溺而出。其大者留礙水道。痛引小腹。令人悶絕也。

人參散方

人參

通草

青鹽研

海金沙別研各一分

莎草根炒去毛

右爲散。合研勻。每服二錢。空心米飲下。

### 海金沙散

海金沙

滑石

石膏

木通

井泉石碎

甘草炙

右六味。等分爲散。煎燈心湯調下二錢。不拘時。

鱉甲散

鱉甲燒存性。搗羅爲散。每服三錢。空心溫酒調下。

茅根湯

茅根細切一斤

葛花爲末一兩

露蜂房爲末二兩

右分三服。每服以水三盞。煎溫服。

三因石燕丸 治石淋因憂鬱氣注下焦。結所食鹹氣而成。令人小便鬱痛不可忍。出沙石而後小便通。

石燕火燒通赤水中淬三

石韋去毛

瞿麥穗

滑石各一兩

右爲細末。麵糊丸梧子大。每服十丸。食前用瞿麥燈心煎湯送下。日二三服。外臺療石淋丸

石首魚頭枚十四

當歸等分

二味杵散。以水二升。煮一升。頓服立愈。或單服石首魚亦佳。

白茅湯 治婦人產後諸淋。無論膏石冷熱皆治之。

白茅根	五錢	瞿麥	白茯苓	各二錢半	滑石	七分
人參	各一錢二分半	蒲黃	桃膠	葵子	各七分	
甘草	五分	紫貝	煨二個	石首魚頭	中骨煨四個	

右剉分二貼。入薑三片。燈心二十莖。空心水煎服。

### 勞淋

勞淋者。勞傷腎氣。內生虛熱。熱傳膀胱。氣不施化。以致小便淋瀝作痛。此症勞倦即發。故謂之勞淋。其候小腹痛引莖中者是也。

兔絲子丸 治腎勞虛損。洩便不利。淋瀝不已。

兔絲子	別酒浸	人參	黃耆	芍藥
滑石	各一兩	木通	車前	各一兩
冬葵子	炒一合		黃芩	三分

右為末。蜜丸梧子大。每服二十丸。食前溫酒或鹽湯下。日二。

白芍藥丸 治勞淋小腹痛。小便不利。

白芍藥

熟地黄

當歸

鹿茸各一兩

右細末蜜丸。梧桐子大。每服三十丸。阿膠湯下。

### 血淋

血淋者。熱在下焦。令人淋悶不通。熱盛則搏於血脈。血得熱而流溢。入於胞中。與溲便俱下。故爲血淋也。

白茅根湯

白茅根

芍藥

木通

車前子各三兩

滑石碎

黃芩各一兩半

亂髮燒灰半兩

冬葵子微炒半兩

右八味。搗篩。每服三錢。水煎溫服。日三。

雞蘇飲

雞蘇葉

竹葉各二兩

滑石

木通各五兩

小薊根一兩

生地黄六兩

每服五錢。水煎溫服。不拘時。以利爲度。

四汁飲

葡萄汁

生藕汁

生地汁

蜜五合

右俱取自然汁。與蜜和勻。每服七分一盞。銀石器內慢火煎沸。溫服不拘時。

瞿麥湯 治血淋尿血。

爛滑石

赤芍

瞿麥穗

車前子生

赤茯苓

石韋去毛

桑白皮炒

阿膠炒

黃芩

生地黃洗焙

甘草炒

白茅根等分

右爲細末。每服二錢。人髮灰一錢。沸湯調下。

琥珀散

琥珀爲細末。每服二錢。燈心一握。腦荷少許。煎湯調下。

茅根飲子

張放 治胞絡中虛熱。小便赤淋。此心氣虛而熱氣乘之也。

茅根一升

茯苓三兩

人參

乾地黃二兩

右四味。以水五升。煮取一升五合。分溫五六服。一日服盡驗。

又方 陶氏



苧根十枚。水五升。煮取二升。一服。血止神驗。

本事火府丹 治心經蘊熱。小便赤少。五淋塞痛。

生乾地黄二兩 黃芩一兩 木通三兩

右爲末。煉蜜丸。桐子大。每五十丸。燈心湯下。

新定

生地三錢 麥冬二錢 茅根五錢 竹葉三錢

滑石二錢 葵子一錢 川木通一錢 黃芩一錢

右作一服。水煎服。虛人用緩。加甘草五分。實人用急。加川芒硝一錢。

牛膝膏 治死血作淋。

牛膝酒四兩去蘆桃仁炒去皮 歸尾酒浸各 生地

赤芍各一兩 川芎五錢

右剉片。用甜水十鍾。炭火慢慢煎至二鍾。入麝香少許。分作四次。空心服。

氣淋

淋者。氣閉不能化水。病從肺而及於膀胱也。其候小腹滿。尿澀。常有餘瀝。許仁則云。氣淋者。氣壅小便不通。遂成氣淋。此病自須依前療水氣法。然亦有氣熱不能化水者。當以清肺金為主也。

### 瞿麥湯

瞿麥

桑白皮

甘草炙各兩

木通

赤茯苓

陳皮去白各一兩

滑石碎半兩

冬葵子炒一合

右共八味。搗篩。每服三錢。入葱白二寸。同煎溫服。

桑白皮湯 治氣淋結澀。澀便不利。

桑白皮一兩

茅根半兩

木通

乾百合各二兩

右搗篩。每服三錢。水煎溫服。無時。

### 石韋散

石韋去毛

赤芍各半兩

白茅根

木通

瞿麥

川芒硝

葵子各一兩

木香一兩

滑石二兩

右咬咀。每服四錢。水一盞。煎至六分。去滓。食前溫服。

沉香散 治氣淋多因五內鬱結。氣不宣行。陰滯於陽。而致壅閉。小便脹滿。便溺不通。

沉香

石韋去毛

滑石

王不留行

當歸各半兩

葵子

白芍各半兩

橘皮

甘草各半兩

右為散。每服二錢。煎大麥湯下。

### 膏淋

膏淋者。小便肥濁。色若脂膏。故名膏淋。亦曰肉淋。

磁石丸

磁石火煨醋淬三七次肉蓯蓉酒浸切焙

澤瀉

滑石各一兩

右為末。蜜丸梧子大。每服三十丸。溫酒下。不拘時。如臍下妨悶。加沉香一錢。以行滯氣。

秋石丸 此直指方也。治濁氣干清。精散而成膏淋。黃白赤黯。有如肥膏蜜油之狀。

白茯苓一兩

桑螵蛸蜜炙

鹿角膠搗碎

秋石各半

右末。研糕糊丸。梧子大。每服五十丸。人參煎湯下。

三因鹿角霜丸

鹿角霜

白茯苓

秋石各等分

右爲細末。糊丸。梧子大。每服五十丸。米飲下。

### 疝症統論

昔人論疝。有專主厥陰經者。有專主任脈者。有兼言五藏者。主厥陰者。謂肝之脈。環陰器。抵少腹。是厥陰之分。乃受疝之處也。主任脈者。謂內經任脈爲病。男子內結七疝。故任之脈。爲疝之源也。兼五藏者。謂內經心脈搏急爲心疝。肺脈沉搏爲肺疝。又太陰脈滑爲脾風疝。太陽脈滑爲腎風疝。少陽脈滑爲肝風疝之類是也。以愚觀之。則疝病未有不本於肝者。蓋任爲陰脈之海。其脈同足厥陰。並行腹裏。

而五藏之疝。其脈曰搏急。曰滑。夫搏急是肝脈。滑則爲病風。氣通於肝。故任脈諸藏。雖皆有疝。莫不連合肝經。所謂有形如瓜。有聲如蛙。或上於腹。或下於囊者。方可謂之疝病。其不與肝相干者。則不得謂之疝矣。至論疝病之因。有主寒者。有主濕熱者。有火從寒化者。要之。疝病不離寒濕熱三者之邪。寒則急。熱則縱。濕則腫。而尤必以寒氣爲之主。其有熱者。寒邪鬱熱於內。非熱能病疝。亦非熱能變寒也。故曰。熱爲寒鬱則可。熱從寒化則不可。又疝者痛也。不特睪丸腫痛爲疝。卽腹中攻擊作痛。控引上下者。亦得名疝。所以昔賢有腹中之疝。與睪丸之疝之說。戴人且謂婦人亦有疝。凡血涸不月。少腹有塊等症。皆是要不離乎肝經爲病。蓋肝者藏血主筋。而其氣暴。且善攻衝也。

諸疝名狀。巢氏戴人言之最詳。巢氏辨列七疝。曰厥。曰癰。曰寒。曰氣。曰盤。曰肘。曰狼。其厥熱心痛。吐食不下者。名曰厥疝。腹中氣乍滿。心下盡痛。氣積如臂者。曰癰疝。寒飲食卽脇下腹中盡痛。曰寒疝。腹中乍滿乍減而痛。曰氣疝。腹中痛在臍旁。曰盤疝。腹中臍下有積聚。曰肘疝。小腹與陰相引而痛。大便難。曰狼疝。此皆痛在心腹之疝也。戴人亦分七疝。曰寒。曰水。曰筋。曰血。曰氣。曰狐。曰癰。寒疝其狀囊氣

冷。結硬如石。陰莖不舉。連控舉丸而痛。得之坐臥濕地及磚石。或冬月涉水。或風冷處使內過勞。宜以溫劑下之。久而無子。水疝。其狀腎囊腫痛。陰汗時出。或囊腫狀如水晶。或囊癢搔出黃水。或小腹按之作水聲。得之飲水。或醉酒使內過勞。汗出而遇風寒。溼之氣聚於囊中。故水多令人爲卒疝。宜以逐水之劑下之。筋疝。其狀陰莖腫痛。或潰或膿。或裏急筋縮。或莖中痛。痛極則癢。或挺縱不收。或白物如精。隨洩而下。得之房室勞傷。及邪術所使。宜以降心火之藥下之。血疝。其狀如黃瓜。在小腹兩旁。橫骨兩端約中。俗云便癰。得之春夏重感大燠。勞於使內。氣血流溢。滲入脬囊。留而不去。結成癰腫。膿少血多。宜以和血之劑下之。氣疝。其狀上連腎區。下及陰囊。或因號哭忿怒。則鬱久而脹。號哭怒罷。則氣散者是也。宜以散氣之劑下之。狐疝。其狀如瓦。臥則入小腹。行立則出腹入囊中。狐晝出穴而溺。夜入穴而不溺。此疝出入上下往來。正與狐相類。亦與氣疝大同小異也。宜以逐氣流經之藥下之。癰疝。其狀陰囊腫縫。如升如斗。不癢不痛。得之地氣卑溼所生。故江淮之間。湫澹之處。多感此疾。宜以去溼之藥下之。此皆痛在舉丸之疝也。

### 溫劑

溫法有二。外入之寒。溫必兼散。內生之寒。溫必以補。子和論疝。多從勞內得之。然並不立補法。愚謂寒從外入者。其病多實。寒從內生者。其病多虛。設不能辨而概與散法。難免虛虛之咎矣。余采當歸、黃肉等方。以補子和之未備。且遵仲景之舊法也。

和劑葫蘆巴丸 治疝氣偏墜。痛不可忍。甚則嘔吐悶亂。

葫蘆巴斤炒一

川棟子斤去核炒一

川烏炮去

巴戟去心炒

茴香鹽水炒

吳茱萸洗雨

右爲末。酒糊丸。如梧子大。每服十五丸。至二十丸。空心溫酒下。食前。一方有

黑牽牛。

烏頭桂枝湯仲景

治寒疝腹中痛逆冷。手足不仁。

烏頭

右一味。以蜜二斤。煎減半。去滓。以桂枝湯五合解之。得一升。初服二合。不知。卽服三合。又不知。復加至五合。其知者如醉狀。得吐者爲中病。桂枝湯和榮衛散寒邪。止痛。烏頭直入厥陰。逐寒氣。用蜜煎者。緩其毒也。一方只用烏頭水。

煮去滓。內蜜煎。令水氣盡服之。名爲頭煎。

### 當歸生薑羊肉湯

當歸三兩

生薑五兩

羊肉一斤

水八升。煮取三升。溫服七合。日三服。若寒多者加生薑十片。痛多而嘔者。加陳皮二兩。白朮一兩。

金匱治寒疝腹中痛。及脇痛裏急者。當歸生薑羊肉湯主之。

衍義云。服之無不應驗。有一婦人產當寒月。寒氣入產門。臍以下脹滿。手不欲犯。此寒疝也。師將與抵當湯。謂有瘀血。非其治也。與仲景羊肉湯。二服而愈。海藏附子建中湯

桂

白芍

甘草

飴糖

附子製

白蜜

生薑

此溫養營血之劑。亦有虛在氣分者。丹溪云。疝有挾虛而發者。其脈不甚沉緊。而豁大無力者是也。然其痛亦輕。唯覺重墜牽引耳。當以參朮爲君。疏導藥佐之。如桃仁、川棟、茺蔚、木香、橘核之類是也。



逐水之劑

醉後飲水過多。脾氣不化。則流入下焦。或房勞汗出入水。腎氣不治。則滲入脬囊。此水疝之源也。子和以導水。禹功治蔡參軍疝痛。瀉水三十餘行。腫痛立消。蓋必決去其水。而疝乃愈。若雜進薑附。水溼爲燥熱所壅。則三焦閉塞。水道不行。而腫痛益甚矣。

禹功散

黑丑頭末四兩

茴香兩炒一

右爲末。以生薑自然汁調一二錢。臨臥服。

宣胞丸 治外腎腫痛。

黑牽牛半生半熟取頭末一兩

川木通兩炒一

青木香七枚同用鹽熬

右爲細末。酒糊爲丸如梧子大。每服三十丸。溫酒下。

除溼之劑

水濕同氣也。然水汪洋而濕淹濡。故水可逐。而濕宜滲。水成形而濕化氣。故水無陽而溼有熱。子和水疝。癰疝所由分也。學者辨諸。

元戎加味五苓散

朮

茯苓

猪苓

澤瀉

肉桂

川楝子

右爲末。

降心火之劑

治疝降心火之說。子和語焉而未詳。戴氏有心火下降。則腎水不患不溫之語。然與子和之治不同。子和所謂降心者。治在筋疝。莖腫痛。潰膿血。戴氏所謂降心者。治在木腎。頑痺結硬如石。大抵子和主清降。使心火下泄。如加味通心散之類。戴氏主鹹降。使心火下濟。如海藻潰堅丸之類。然而治法懸殊矣。

加味通心散

治膀胱實熱。小腸氣痛。

瞿麥穗

木通去皮

梔子仁

黃芩

連翹

甘草

枳殼去瓢

川楝等分核各

右剉散。每服五錢。水一盞半。燈心二十莖。車前草五莖。同煎空心溫服。

海藻潰堅丸

治木腎如斗。結硬如石。

海藻

昆布

川棟實

吳茱萸一湯炮各

木香

青皮

小茴香

荔枝核炒

延胡索炒

肉桂

桂各五錢

海帶

橘核炒

桃

仁各一兩

木通七錢

酒糊丸梧子大每服六十丸溫酒鹽湯任下。

和血之劑

子和所謂血疝。即今人所謂囊癰也。辜丸腫痛。潰出膿血。以病在血分。故名血疝。

血行則疝亦愈。故當和血。

桃仁當歸湯 治疝因瘀血作痛。

桃

仁去皮二錢

當歸梢酒洗

延胡索各一錢半

川芎

生地黃

赤芍藥

吳茱萸

青皮醋炒各一錢

牡丹皮八分

水二鍾。薑三片。煎八分。食前服。

散氣之劑

氣聚則塞。氣散則通。是痛之休作。由氣之聚散也。故曰治疝必先治氣。  
青木香丸

黑牽牛取二十兩炒香

補骨脂妙

萆澄茄各四兩

木香二兩

檳榔

用酸粟米飯裏溼紙包火煨令紙焦去飯四兩

右爲細末。清水滴爲丸。如菉豆大。每服三十丸。熟水下。

寒熱兼行之劑

疝氣有寒束於外。鬱熱在內。攻刺急痛者。法必寒熱兼行。如倉卒散之類。丹溪云。用之無有不效。蓋川烏頭治外束之寒。山梔仁治內鬱之熱也。  
倉卒散

山梔仁四十個

附子炮一枚

右剉散。每服二錢。水一盞。酒半盞。煎七分。入鹽一捻。溫服即愈。

丹溪方

山梔仁

川烏

吳茱萸

橘核

桃仁各等分

右研。水煎服。

逐氣流經之劑

許學士云。疝病多因虛而得之。不可以虛而驟補。邪之所湊。其氣必虛。留而不去。其病則實。故必滌去所畜之邪。然後補之。是以治疝諸藥。多借巴豆氣者。蓋爲此也。

天台烏藥散東垣下同

天台烏藥

木香

茴香炒

青皮去白

良薑炒各五分

檳榔剉二枚

川楝十個

巴豆十四枚

右八味。先以巴豆打碎。同楝實用麩炒候黑色。去巴豆。麩俱不用。外爲細末。每服一錢。溫酒調下。

川楝子散

川楝子剉碎用巴豆十四粒打破一處炒黃色去巴豆

木香

茴香鹽一匙炒黃去鹽各一兩

右爲細末。每服二鍾。空心食前。溫酒調下。

診候生死要法

五藏者。中之守也。中藏盛滿。氣勝傷恐者。聲如從室中言。是中氣之濕也。言而微。終日乃復言者。此奪氣也。衣被不歛。言語善惡。不避親疎者。此神明之亂也。倉廩不藏。是門戶不要也。水泉不止者。是膀胱不藏也。得守者生。失守者死。五藏者。身之強也。頭者精明之府。頭傾視深。精神將奪矣。背者胸中之府。背曲肩隨。府將壞矣。腰者腎之府。轉搖不能。腎將憊矣。膝者筋之府。屈伸不能。行則僂附。筋將憊矣。骨者髓之府。不能久立。行則振掉。骨將憊矣。得強則生。失強則死。微論要精人一呼脈四動以上曰死。脈絕不至曰死。乍疎乍數曰死。人無胃氣曰逆。逆者死。脈從陰陽病易已。脈逆陰陽病難已。脈得四時之順曰病無他。脈反四時及不間藏曰難已。春夏而脈瘦。秋冬而脈浮大。命曰逆四時也。風熱而脈靜。泄而脫血。脈實病在中。脈虛病在外。脈濇堅者皆難治。命曰反四時也。水穀爲本。故人絕水穀則死。脈無胃氣亦死。所謂無胃氣者。但得真藏脈。不得胃氣也。平心脈來累累如連珠。如循環玦。曰心平。夏以胃氣爲本。病心脈來喘喘連屬。其中微曲。曰心病。死心脈來前曲後居。如操帶鉤。曰心死。平肺脈來厭厭聶聶。如落榆莢。曰肺平。秋以胃氣爲本。病肺脈來不上不下。如循雞羽。曰肺病。死肺

脈來如物之浮。如風吹毛。曰肺死。平肝脈來。更弱招招。如揭長竿末梢。曰肝平。春以胃氣爲本。病肝脈來。盈實而滑。如循長竿。曰肝病。死肝脈來。急益勁。如新張弓弦。曰肝死。平脾脈來。和柔相離。如雞踐地。曰脾平。長夏以胃氣爲本。病脾脈來。實而盈數。如雞舉足。曰脾病。死脾脈來。銳堅如烏之喙。如烏之距。如屋之漏。如水之流。曰脾死。平腎脈來。喘喘累累如鈞。按之而堅。曰腎平。冬以胃氣爲本。病腎脈來。如引葛。按之益堅。曰腎病。死腎脈來。發如奪索。辟辟如彈石。曰腎死。平人氣象論形氣相得。謂之可治。色澤以浮。謂之易已。脈從四時。謂之可治。脈弱以滑。是有胃氣。命曰易治。取之以時。形氣相失。謂之難治。色夭不澤。謂之難已。脈實以堅。謂之益甚。脈逆四時。爲不可治。所謂逆四時者。春得肺脈。夏得腎脈。秋得心脈。冬得脾脈。其至皆懸絕沉澹者。名曰逆四時。五實死。五虛死。脈盛皮熱。腹脹前後不通。悶瞀。此謂五實。脈細皮寒。氣少。泄利前後。飲食不入。此謂五虛。漿粥入胃。泄注止。則虛者活。身汗得後利。則實者活。玉機真藏論形盛脈細。少氣不足以息者危。形瘦脈大。胸中多氣者死。形氣相得者生。參伍不調者病。三部九候。皆相失者死。上下左右之脈。相應如參。春者病甚。上下左右相

失。不可數者死。中部之候雖獨調。與衆相失者死。中部之候相減者死。目內陷者死。脫肉身不去者死。真藏脈見者死。九候之脈皆沉細懸絕者爲陰。主冬。故以夜半死。盛躁喘數者爲陽。主夏。故以日中死。寒熱病者以平旦死。熱中及熱病者以日中死。病風者以日夕死。病水者以夜半死。其脈乍疎乍數。乍遲乍疾者。日乘四季死。形肉已脫。九候雖調猶死。七症雖見。九候皆從者不死。脈不往來者死。皮膚著者死。瞳子高者。太陽不足。戴眼者。太陽已絕。此決死生之要也。三部九候論乳子而病熱。脈懸小者。手足溫則生。寒則死。乳子中風熱喘鳴肩息者。脈實大也。緩則生。急則死。腸澼便血。身熱則死。寒則生。腸澼下白沫。脈沉則生。浮則死。腸澼下膿血。脈懸絕則死。滑大則生。腸澼之屬。身不熱。脈不懸絕者。滑大者曰生。懸澼者曰死。癰疾脈搏大滑久自己。脈小堅急死不治。癰疾之脈。虛則可治。實則死。通評虛實論消瘰虛實。脈懸小堅。病久不可治。脈實大。病久可治。實論陽從左。陰從右。老從上。少從下。是以春夏歸陽爲生。歸秋冬爲死。反之則歸秋冬爲生。一上一下。寒厥到膝。少者秋冬死。老者秋冬生。形弱氣虛死。形氣有餘。脈氣不足死。脈氣有餘。形氣不足生。方藏



得守者生。失守者死。得神者昌。失神者亡。論本病

平人而氣勝形者壽。病而形肉脫。氣勝形者死。形勝氣者危。壽夭剛柔篇

熱病七八日。脈微小。病者洩血。口中乾。一日半死。脈代者一日死。熱病已得汗

出而脈尚躁喘。且復熱喘甚者死。熱病七八日。脈不躁。躁不數散。後三日中有

汗。三日不汗。四日死。熱病不知所痛。耳聾不能自收。口乾陽熱甚。陰頗有寒者。

熱在髓。死不可治。熱病已得汗。而脈尚躁盛。此陰脈之極也。死。其得汗而脈靜

者生。熱病脈盛躁而不得汗者。此陽脈之極也。死。脈盛躁得汗靜者生。熱病不

可刺者有九。一曰汗不出。大顙發赤藏者死。二曰泄而腹滿盛者死。三曰目不明。

熱不已者死。四曰老人嬰兒熱而腹滿者死。五曰汗不出。嘔下血者死。六曰舌本

爛。熱不止者死。七曰咳而衄。汗不出。出不至足者死。八曰髓熱者死。九曰熱而瘡

者死。腰折瘰癧。齒噤齬也。凡此九者。不可刺也。熱病篇

熱病脈靜。汗出已。脈盛躁。是一逆也。病泄脈洪大。是二逆也。著痺不移。腠肉破。身

熱脈偏絕。是三逆也。淫而奪形。身熱色夭然白。及後下血衄。血衄篤重。是四逆也。

寒熱奪形。脈堅搏。是謂五逆也。

脈一呼再至曰平。三至曰離經。四至曰奪精。五至曰死。六至曰命絕。此至之脈也。一呼一至曰離經。再呼一至曰奪精。三呼一至曰死。四呼一至曰絕命。此損之脈也。損之爲病。一損損於皮毛。皮聚而毛落。二損損於血脈。血脈虛少。不能榮於五藏六府。三損損於肌肉。肌肉消瘦。飲食不能爲肌膚。四損損於筋。筋緩不能自收。持五損損於骨。骨痿不能起於床。反此者至脈之病也。從上下者。骨痿不能起於床者死。從下上者。皮聚而毛落者死。按脈來一呼再至。一吸再至。不大不小曰平。一呼三至。一吸三至。爲適得病。前大後小。卽頭痛目眩。前小後大。卽胸滿短氣。一呼四至。一吸四至。病欲甚。脈洪大者。苦煩滿。沉細者。腹中痛。滑者傷熱。濇者中霧露。一呼五至。一吸五至。其人當困。沉細夜加。浮大晝加。不大不小。雖困可治。其有大小者難治。一呼六至。一吸六至。爲死脈也。沉細夜死。浮大晝死。一呼一至。一吸一至。名曰損人。雖能行。猶當著床。所以然者。血氣皆不足故也。再呼一至。再吸一至。名曰無魂。無魂者當死也。人雖能行。名曰行尸。上部有脈。下部無脈。其人當吐。不吐者死。上部無脈。下部有脈。雖困無能爲害。所以然者。人之有尺。譬如樹之有根。枝葉雖枯槁。根本將自生。有根本。人有元氣。故知不死。

扁鵲云。筋絕不治。九日死。手足爪甲青黑。呼罵口不息也。